

انفراد

(رواية)



أحمد حسني

المحتويات

3	اهداء.....
4	المقدمة.....
5	مدخل حكاية سخيفة.....
10	إمام في القاهرة.....
15	العزيزة أوجانيك.....
23	الفرسان الثلاثة.....
29	عفريت العلبة.....
38	مسابقة TDF.....
46	بروميثيوس المصري.....
53	سمارت سوليوشنز.....
61	فوت بكره يا سيد.....
70	انا الوزير يا ناظر.....
78	الإرهاب والكباب.....
83	متظلم بباب سيادتكم.....
90	مشروع بقرار جمهوري.....
95	الأوسكارجي.....
99	الوسادة الخالية.....
103	عريس يا أماي.....
109	الكبير أوى.....
Error! Bookmark not defined.	تأشيرة وسفر.....
122	السجن للجدعان.....
129	خاتمة سعيدة.....

اهداء

الى كل انسان فكر واجتهد وتعب وحاول..
 الى كل انسان صخر الشقي جرح صوابعه..
 الى كل انسان صبر لحد ما زهق منه الصبر..
 الى أوائل الكليات والشباب المتفوق الطموح..
 وقبل كل دول..
 الى روح أبويا رحمة الله عليه.

المقدمة

من المفترض انى احببك فى الرواية او اشعل فضولك فى كام سطر علشان تتحمس وتقرأ الرواية لحد الآخر..
 من المفترض انى اختصر الحدوثة دى كلها فى كلمتين كبار مجلصين.. اضحك بيهم على عقلك او اقنعك بالعافية انى كاتب عميق ولما وجهة نظر ورسالة وهدف ومحتوى ومضمون وكلام من ده كله.
 من المفترض انى امهدلك واديلك صورة وردية عن اللى هتقراه فى الرواية دى..
 مش كلهم بيعملوا كده؟

لا يا معلم..

خد عندك..

أول الكلام.. الرواية دى بالعامية المصرية.. الأخوة أنصار الفصحى.. استعدوا علشان تفرتكونى نقد وشتيمه.
 الرواية دى كئيبة جدا.. مقبضة لأبعد حد.. من النوع اللى غصب عنك هيسيل دموعك بعد ما يفجر غضبك.. رغم محاولاتي العديدة التخفيف من الواقع المأساوي المظلم بشده فى الرواية.. الا انها خرجت غصب عنى حقيقة تماما.. سوداوية تماما..
 مثيرة للغیظ تماما.

زى أحداثها الحقيقة بالظبط.

دى رواية قائمه على احداث حقيقية كلها حصلت.. ويمكن كمان حصلت بشكل أكثر سودا من اللى هتقراه فى الرواية..
 الرواية دى مش جديده اطلاقا.. هتلاقى زيتها فى اسرتك.. جيرانك.. محيط معارفك..
 هتلاقى زى واحد صاحبك.. أو زى حد من زميلك فى الكلية.. مش بعيد أكون انا نفسى زميلك فى الكلية.. مش بعيد تكون عرفتني فيوم بالصدفة لو انت من جيل الثمانينات عشاق ومريدي معرض الكتاب.
 باختصار.. دى رحلتي للتنازل عن هوية أبني..

برغبتي الكاملة وارادتي الحرة.. قررت ان أبني مش هيورث منى جنسيتي.

ليه؟

الأجابة موجوده من الصفحة الجايه والى اخر الرواية.

أحمد حسنى

مدخل حكاية سخيقة

التاسعة من صباح يوم 16 فبراير 2015م.

مستشفى اورورا للأسرة.. ميلواكي (ويسكونسن).. الولايات المتحدة الأمريكية.

قاعد مسهم ومتنح.. نظرة الى اللانهاية والخواء وانا بجواب على أسئلة موظفة المستشفى المختصة بتوثيق المواليد.. 8 ورقات لازم أملاهم كلهم.. فيهم نص ورقه يخصني والباقي كله للأم والطفل.. بينما في سماعات المستشفى الداخلية في اغنيه شغاله لها موسيقي طفوليه محببه مرحبة بطفل معين.. حابه كده زي يارب ياربنا تكبر وتبقى أدنا.. على باب الأوضة كم مهول من البالونات والورد.. شنطة كبيره هديه من المستشفى مليانه بامبرز وحاجات خاصه بالأطفال حديثي الولادة.. انا كأب مش مطلوب مني اي شيء في الليلة دي كلها.. في الدول الى زي دي.. بعد حدوث الحمل يبقي انتهي دورك للأبد يا ديان على رأي السادات.. اللهم الا دورك الطبيعي في الانفاق على الأسرة ولو حبيت تبقي بنى ادم محترم وتربي ابنك بدل ما ترميه هو وأمه في الشارع وتعيش حر زي ما الشيطان بيهمس في ودني دلوقتي كده.. الدولة موفره كل شيء للأم والطفل.. يعني عندك مساحة هائلة من الحرية إنك تستندل وتهرب بدون قلق.. كده كده مش هيتلطموا من بعدك.. أساسا لو حسبتها حسب ماديته بحتة.. هتلاق ان الأفضل ليهم إنك تختفي من حياتهم تماما لو قررت تبقي مجرد ماكينة "ATM" تصرف وبس.. شوف ازاي يا جدع.. بأمر القانون.. صاحبة العيال لا تضار ابدا في دوله ضعيفة الارتباط بأى ديانة معروفه.. وبالقانون ام العيال تتسحل وتتبهذل وتشوف كل أنواع الذل الممكن والغير ممكن وتعرف الجوع والحرمان وكل أنواع سخافات الدنيا علشان تربي عيالها في دولة مصدعانا كل يوم بالدين وتفايسير نصوصه المختلفة على هوى كل واحد طامع في شيء ما.

سبحان الله.. في دوله زي دي اتفق الجماعة بتوع الوطن والجماعة بتوع الدين عندهم على تقطيع بعض في ملعب السياسة النجس.. بس المواطن يفضل بكرامته بعيد والدولة تحميه وترعاه وتدعمه وتحرسه.. المستشفى وموظفينا فرحانين ويحتفلوا بميلاد مواطن أمريكي جديد.. نسخه من الي عندنا في مصر بالظبط سامحني يارب.

على السرير في غرفة الولادة الفخمة راقده الست الي أصبح اسمها الرسمي بعد اليوم ده "ام حمزة".. أفضل نساء العالم في نظري.. الست الي اكيد عملت مصيبة كبيرة في طفولتها كانت عقوبتها انها اتجوزت.. اعتقد ان أمها دعت عليها فيوم وقالتلها "روحي إلهي ربنا يوقعك في شر أعمالك".. واياه هيكون شر اعمالها اكثر من انها ترتبط بواحد زي حالاتي سواح ورحالة في البلاد.. درويش بالكذب والقراءة في أغلب الأوقات.. عاشق للتاريخ.. رافض الواقع وفاقد للتركيز في الدنيا.. شديد الهشاشة والحساسية من داخله حتى ان كلمة اهانه واحده ممكن تقلب يومه كله رأسا على عقب.

رغم شحوب البشرة المصاحب في العادة لأي ست قامت بالسلامة من ولادة استغرقت 14 ساعة الا انها كانت في عيني وقتها أجمل من مارلين مونرو.. الشحوب والهزال الي هي فيه ده تمن أجمل شيء حصلنا في حياتنا.. أبني حبيبي الي بسجله في اللحظة دي في سجل مواليد الدنيا.. ارتجف أيها الكوكب البائس واستعد.. أسوأ أطفال العالم من 37 سنة قرر يرازي الكوكب بطفل من صلبه في الغالب هيكون أسوأ منه هو كمان.

على يمين أم حمزة كم مرعب من الفراخ المشوية والمحشية والسلوقة والمقلية.. عمال ايديا وحياء عيني.. حسب كلام الأقدمين لازم الواد ينزل من هنا ونحط مكانه فرخه من هنا.. انا بس حبيت اجود شويه.. بدل ما نحط فرخه مكان الواد.. قررت اننا نحط مزرعة فراخ.. خلى الولية تتغذى وتتقوت.. دي نفساء برضه.

متمسك جدا بثقافتي الشرق أوسطية.. كنت فاكور موضوع الولادة ده زي ما بيطلع في الأفلام كده.. واحده ست عماله تصرخ وتقول هموت يا ماما هموت يا ماما.. يا أم السعد يا أم السعد يا أم السعد.. يا اختي.. راجل قلقان وبيدخن بره الأوضة وحواليه عيال عماله تقول يا لطيف يا لطيف.. بينما في ست أرشانة ماسكه حلة ميه سخنه لحد يومنا هذا عجز الأطباء انهم يفسروا سبب وجودها لحظة الميلاد.. ناس كتير بتروح وتيجي بدون اي داعي.. وفجأة ينطلق صوت طفل بيعيط.. حصلت المعجزة الإلهية ودبت الروح في حنة لحمه حمراء لم تكن منذ أشهر قليلة.. وبعدين

ناس عماله تهني وتبارك وتشرب مغات بينما في ناس تانيه بتفكر في الوضع الجديد..

يتربى في عزك..

ربنا يخلي..

ياللا بقي علشان تأذن في ودانه..

ياللا علشان "تعمده" مسلم زي ابوه..

ياللا علشان يبدأ معه رحلة الحياة الى هيكبر بعدها ويقولك لبست ثوب العيش لم استشر.. والله يسامحك يابا على جريمة أنجابي وكل أفورة المراهقين دى.

كل ده ولا حصل.. المستشفى وفرت كل شيء وفيها كل شيء وعملت كل شيء.. لقيت نفسي يوم الولادة مش لاقى حاجه اعملها غير إني لعب المزرعة السعيدة على الفيس بوك.. كنت سعيد سعادة غير طبيعية.. أخيرا سامع في بيتي عياط عيل صغير.. أخيرا مصطلحات بامبرز وتاتينا ويبرونه وبوتي هيتددوا في بيتي.. أخيرا هبقي زي كل الإباء شايل الهم وليل ونهار بفكر ازاى آمن مستقبل العيال.. أخيرا هقرف الناس في الطيارة وأي مواصلات بعياط الواد.. أخيرا هلاقي حد أقوله بشده وعنف مصطنع:

"يا ولد.. لما بابا لما يقول كلمه يبقي لازم تتسمع"

واروح جاى هابده برجل الكرسي على دماغه علشان يتربى.

انا فعلا شلت الهم من دلوقتي.. عاوز اسم قوي للواد.. رغم انه نازل عامل زي أبو قردان.. ابيض وغتت وشبه امه.. الا إني مؤمن بأن لكل من اسمه نصيب.. مش حابب اسمي الواد اسم نواعم.. نفترض ان الواد طلع فتوه ومجدع فيوم من الأيام.. هيوافه ازاى المجتمع وهو اسمه وائل مثلاً.. لو كان الواد اللي بيضريني في المدرسة وياخد سندوتشات اسم هيثم وللا لؤي.. هل كان بقي بلطجي؟؟ ده انا كنت دفنته بالحياة باسمه ده.. بقي ابني انا بعد العمر واللف ده كله.. يبقي اسمه تيم وللا تامر!! دي تبقي هزلت.. ده كده ممكن يكبر ويفضل يقول انا اسمي مش تامر يا بشر.. هذا جناه على دادى.. وانا جنيت على No Body.

قبل الموقف ده ب 15 سنه حلمت ان ابويا بيقولي هات حمزة وتعالى معايا.. 3 أيام ورا بعض الحلم ده يتكرر بحذافيره بشكل مزعج.. حسيت انها رسالة.. خصوصا إني من دراويش سيرة سيد الشهداء وصائد الأسود وعم الرسول عليه الصلاة والسلام واخوه في الرضاعة وأهم وزير من وزرائه.. سيدنا حمزة بن عبد المطلب.

اذن هو حمزة.. اسم من أسماء الأسود.. اسم ذو تاريخ وله هيبة وسمعه حسنه.. اسم فيه قوه وشدة وحزم.. ربنا يلحقه بسيد الشهداء في الجنة ان شاء الله.

قلت الاسم للموظفة المسئولة عن تسجيل المواليد في المستشفى.. الاسم كان صعب عليها.. شوية تقولي هامزا.. وشوية تقولي هيمزا.. ولما غلبت حاولت تقوله خامزا.. وانا وراها ومصمم أخليها تنطق ال "ح" زينا لحد ما قدرت تنطقه بعد معجزه.

- هتسمي الطفل كده.. حامزا؟؟
- ايوه يا غسل.. حمزة.. حمزة أحمد حسني.. زينة أطفالك يا بلد وسيد شبابك بعد 20 سنه بأمر الله.
- الاسم في الأوراق هيبقي إبراهيم حمزة أحمد.. اوك؟
- ماشي
- من حقا تختار اسم كمان "Secondary Name".. تحب يكون ايه؟؟
- جوزيف
- اذن هيبقي الاسم الثاني كده.. إبراهيم جوزيف أحمد.. اوك؟
- اوك يا فندم

- ايه!!!! ابراهيم جوزيف!!! انت اتجننت يا راجل؟؟

نظرة لوم وعتاب وبداية خناقه من ام حمزة.. الاسم الثاني ده يهودي خالص.. مقدرتش تقتنع ان جوزيف هو النطق الاجنبي لاسم يوسف.. الولد اسمه الاصلي حمزة وانا زودت اسم كمان هو يوسف.. اسم الدلع عند الامريكان هيبقي جوزيف او جو.. الاسم عندنا حمزة وعندهم جوزيف الى احنا بنقوله يوسف.. هما بينطقوا اسم الجد الأول.. وكده كده ابراهيم عندهم هي ابراهيم عندنا.. اذن الولد ممكن يكبر ويعيش هناك باسم ابراهيم جوزيف.. اسم غير ملفت ابدا لأصله العربي.. كام سنه وانا هموت ومحدش هيفتكرني.. هو هيبقي معاه باسبور أمريكي.. مواطن زيه زيههم.. محدش هيضطهده علشان عرقه اودينه زي حالاتي.. محدش هيفتكر ولا هيعرف انه عربي فيرسمه راكب الجمل ولا بس عقال وجلابيه.. محدش هيعصلج معاه في اي تأشير.. محدش هيلوم دينه مع اي تفجير هيحصل.. كل الناس هتبصله بنظرة حسد تحمل معني "ايوا يا عم" بايضا لك في القفص.. بكره يبقي عنده حظ ومستقبل أفضل مني.. شقي 7 سنين في بلاد الجاز ومعاهم قرض بمبلغ وهمي رميته كله في المشوار ده.. امي افتكرتني عبيط لما قررت اجيب لأبني باسبور أجني.. سخرت مني لأنني رميت شقايا على الأرض علشان الباسبور الأمريكي بدل ما ادخل جمعيه مع طنط نوسه وللا طنط افتخار ب 500 جنيه في الشهر يأمنوا مستقبل الواد.. مسكينه.. مواليد جيل عبد الناصر اغلبهم كده.. رضعوا الدونية مع البان امهاتهم.. اتربوا على الخوف والرعب والتواضع.. فكرة الدولة المهلهلة وان فاتك الميري متغلغلة تماما في وجدانهم.. لسه عايشين في فيلم ارفع رأسك يا أخي والقومية العربية وهنحارب ووقعنا 9 مليون طياره لليهود.. الدونية سممت ابدانهم في كل شيء فأصبح اقصى طموح لحد فيهم هو شقه بحري 3 اوض او جمعيه منحسش بيها نجوز بيها البنات.. كذبوا على نفسهم علشان يجلعوا الدونية والزبالة الى هما عايشين فيها ويحسوا ان عيشة البهائم دى فضل ونعمه واحنا أحسن من غيرنا.. حرفوا آيات القرآن وبهدلوا تفسير الأحاديث النبوية الشريفة علشان يقنعوا نفسهم ان الدنيا سجن المؤمن وجنة الكافر.. ده على أساس ان سيدنا المبشر بالجنة الملياردير عبد الرحمن بن عوف وسيدنا الخليفة الخلق الملياردير المبشر بالجنة برضه عثمان بن عفان كانوا ملحدين مثلا فبقت الدنيا سجن ليهم.

اي كلام في اى زفت.

ده كان تخطيبي.. قررت غير نادم إني أدي ابني فرصه ثانية لحياه أفضل.. قررت إني احميه من كل شر تعرضتله بسبب جنسيتي العربية ذات التاريخ المرعب من القرف والخيانة والفشل.. قررت احميه من تاريخ سيء احملة على اكتافي بدون ادني ذنب مني.. قررت ان حمزة مش هيبقي حمزة الا في مصر.. قررت إني اهدي اكر ناس بكرههم اكر حاجه بحبها.. مكره لا بطل.. مش بحب أمريكا ولا الامريكان.. مقتنع تماما انهم سبب كلا بلاوينا.. ومع ذلك بديهم ابني الوحيد هديه.. ابني.. أمل في الحياة.. مش هيطلع أبدا زي.. مش هيشوف الى انا شفته.. ممكن جدا يطلع مش بيعرف يتكلم عربي ولا يعرف حاجه عن تاريخه ولا يعرف عن جنسية ابوه الا ان عنده باسبور اخضر ملوش عازه مرعي في الدرج.. ممكن يكبر يغني "يومئذ سيكون شعارنا بالله نثق" بدل ما يغني كلمات الشيخ يونس القاضي "بلادي بلادي لك حبي وفؤادي".. ممكن يكبر يقولي جدي الأكبر جورج واشنطن عمل وسوي وارسى دعائم الحرية في أرض الاحلام.. بدل ما يقولي ان جدي رمسيس الثاني بني مملكة مصرية لا تقهر.

مش مهم..

المهم انه ميشوفش الي انا شفته وخلاص.

ام حمزة متعرفش كل الى جوايا ده.. هي شايفه من جوزها وشه الوطني.. شايفه واحد كل ما تيجي سيرة مصر يتقلب ويبقي سومه الحساس.. شايفه درويش ليل ونهار بيتغني بمصر وعظمتها وذكرياته فيها.. في يوم ما سخرت من موقف عمله الرئيس الراحل أنور السادات.. هي فلسطينية وطبيعي جدا ان الجماعة دول مش بيحبوا السادات.. ولكن نظره شديده اوي مني علمتها إني مش مستعد ابدا اقبل ولا ربح كلمه على شخص اظنه من رموز الوطن حتى لو اختلف معاه البعض.. مصر في نظري شيء.. والفتن اللي فيها وغباوة أهلها شيء تاني.. ووساخة الحكام شيء ثالث.. مفيش اي تعارض بين إني عاشق للبلد دي وبين إني شايف بنظره محايدة مستقبلها الأسود.. مفيش اي تعارض ان قلبي مفطور عليها وبين إني عاوز لأبني مستقبل أفضل.. مفيش اي مانع إني "أتمنى" انه فعلا تحيا مصر وبين ان لساني مش قادر يقولها لان معطيات الواقع تقول ان مصر مش ممكن هتحيا ابدا بالمنظر المقرف ده.

- انت سميت الواد جوزيف.. انت اتجننت يا راجل؟
- ايوه.. اسمه هيبقي أجني.. خليه يعيش وينسي أصله الواطي
- أصله الواطي!! انت اللي بتقول كده!!
- ايوه.. انا اللي بقول كده.. ما هو حضرتك اللي معرفش يقول عدس..
- عدس يا سيدي مقلتش حاجه.. مالك يا أحمد في ايه؟ انا حاسه ان زي ما يكون في حاجه انت مخبىها ومش عاوز تتكلم.. بقالك كام يوم زي ما يكون في حمل على قلبك او حاجه بتهرب منها.. زى ما تكون مخبى عنى مصيبه.. في ايه يا أحمد؟
- يبدو إني لسه زي مانا.. وشي ببيان عليه كل حاجه.. 37 سنه في الدنيا مقدرتش اتعلم فيهم ازاي أكون خبيث.
- وده أجمل ما فيك.. بس مش مسامحاك إنك مخبي عليا حاجه.. طالما الراجل مخبى على مراته.. بيقى في واحده تانية اكيد.. حسبي الله فيك يا شيخ.. ليه تعمل فيا كده.. انا قصرت في ايه بس.. قولي الحقيقة ومتكذبش عليا.. هي البت المسلوقة الى قالتلك هاي في دانكن دونتس دى.. صح؟؟ انا كنت حاسه انها مش مطبوعة بنت المفكوكه دى.. قولي.. صارحني.. خنتني كام مره.. عرفت كام ست غيرى.. الواد حمزة ده.. مين امه؟؟
- بس يا عسل.. مش فايق للهازار.. الموضوع فعلا كبير.
- موضوع ايه يا راجل.. خير يارب.
- انتي فاكركه إني عملت كده مع حمزة علشان بكره مصر؟ فاكراي حاقد وناقم عليها؟ ابدا والله.. متخلطيش بين غضبي من الوضع القذر اللي أصبحنا فيه حاليا وبيني محبتي للبلد نفسها.. مصر تعبتني اوي يا ميساء.. مصر تعبتني وشيلتني همها من بدري.. شلت همها من أيام ما كنت طالب في الكلية.. وشايل همها وانا الشيب بيشق طريقه في راسي.. كنت عيل عبيط في الكلية معرفش حاجه لما أترميت في دنيا السياسة زي البهيم وسط ذئاب كلهم ضحكوا عليا.. اشتغلت بقلب جامد اوي واخلاص عالي جدا وانا فاكركه إني بخدم البلد.. نزلت الانتخابات وهتفت.. كنت بدى للناس فلوس تمن أصواتهم الى راحت لمرشحين الحزب بتاعنا وانا شايف كل الأطراف بتعمل كده.. كنت فاهم ان ده عادي وصح طالما كل الأطراف بتعمل كده.. انا بعمل كده وبقول للناس هظبطكوا.. والتانيين بيعملوا كده ويقولوا للناس بارك الله فيك.. حضرت بنفسي اتفاقات أصحاب الدقون مع أصحاب الكئوس.. قالولى ان السياسة هي فن الممكن ولي تغلب به العب به.. كلهم بيلعبوا لعبه كبيره اسمها السياسة وانا والي زي كنا حمير في الأول.. ولما الثورة قامت بقينا حطب للنار في الاخر.
- وبعدين؟
- خلصت الكلية وطلقت السياسة بالثلاثة بعد ما تأكدت ان كل انسان اشتغل في المجال ده في مصر -بدون اي استثناء- يبقى ابن حرام مصفى لا يعرف رب ولا دين ولا بلد.. كلها سبوبة كبيره اوي كل واحد بيسمىها باسم يوصله للناس بسرعه.. في الي مسمىها وطنيه وفي الي مسمىها ديمقراطية.. في الي مسمىها انتاج وعمل واقتصاد وفي الي مسمىها شهادة لله ورسوله.. كلهم ولاد كلب حلال فيهم الحرق بالنار.. كلهم مش بيفكروا في شاب عنده 21 سنه عنده طن أحلام وطموحات وأفكار ذهبية.. كلهم شاغلين نفسهم بس بكام صوت أقدر المهم من على القهاوي في حدائق القبة اكثر من كام فرصة عمل او كام وظيفة أقدر اوفرها لو افكاري نزلت لأرض الواقع.. كلهم شاغلين نفسهم بإني اد ايه شاطر في اقناع الناس ان الصوت يبقى ب 30 جنيه بدل 50.. محدش ابدا سألني عن فكرة مشروع تكنولوجيا عبقري يجيب ملايين ويوفر ملايين وينط بالبلد خطوه لقدام في اقل من 5 سنين.. محدش اهتم بالامتياز اللي اتخرجت بيه من الكلية.. اهتموا بطريقي السينمائية في الكلام وقدرتي على حشو الخطب بألفاظ كبيره واقتباسات من كلمات الكتاب والادباء الكبار.. محدش فكر إني ممكن أكون مشروع مهندس ورجل اعمال شاطر عنده أفكار ذهب.. انما كلهم ركزوا إني كنت في اتحاد الطلبة.. ايواااا.. يبقى الواد ده من بتوع الهيصة والزيطه ويقدر يلم عدد كبير.

عدد كبير..

عدد كبير..

كل همهم كان العدد الكبير.. اشحن من الخرفان على اد ما تقدر.. تنول الرضا وتكسب من وراهم ملايين.. غير كده.. انت كلب ولا تسوي.

- ايه ده!! هو الموضوع جد وللا ايه.. مالك يا احمد.. انا بضحك معاك يا راجل.
- مانا دلوقتي بضحك.. بس ضحك كالبكاء زي ما قال المتنبي.. بضحك على وطن متمسك بقوه بمنهجية الضياع..
- بضحك على وطن بيفرم ويطحن كل انسان حابب يكون حاجه كويسة لنفسه ولغيره.. بضحك على متخلفين لسه بيشتما بعض علشان مختلفين.. بضحك على موظفين الحكومة وهما بيصارعوا بعض علشان يعينوا ولادهم مكانهم علشان يستنوا ملاليم المرتب التعبان اخر كل شهر.. بضحك على الزحمة المربعة في الشوارع اللي مليانه زباله في العقول اكتر من زباله البيوت.. بضحك وهفضل اضحك لحد ما اموت..
- طيب ما تضحكني معاك.. اشيل معاك يا أخي بدل ما يجراك حاجه.
- تحبي تسمعي قصه لطيفه؟ قصة امام الشاب القروي الساذج الي وقع مع شفاعات الأرملة اللعوب؟؟ تحبي تسمعي قصة وطن مصر إصرار غريب على الانحدار والانهيال؟؟
- لومش هضايقلك يعني.. انا اول مره اشوفك كده.. انت اشعلت فضولي تماما.
- طيب.. طالما اشعلت فضولك.. يبقي بلاش نحكي..
- تصدق إنك رخم!!
- لا خالص.. مش معني ان ماما وبابا واخواتي واصحابي وانتي وزمايل الشغل وزمايل الكلية بيقولوا إني رخم.. إني ابقي رخم فعلا.. دي اراء.. اراء..... زى ما قال الأستاذ رمضان مبروك أبو العلمين حمودة كده.
- طيب.. قول بقي يا عم.
- حاضر.. هقول.
- كلى اذان صاغيه بعد ما معدتي اتملت فراخ بالفعل..
- هقول.. بس افتكري.. انتي اللى طلبتي تسمعي.
- قول باض بدل ما اقولك كلمه عيب.

وبدأت احكى.

إمام في القاهرة

على أنغام وأوأة حمزة في أيامه الأولى.. بدأت احكي لمراي القصة اللي اثار فصولها بقوه.. قصة اغتيال أحلام انسان.. زيه زي كل ست.. متوقعه ان في عنصر- حريمي في الموضوع.. قصة حب.. خيانة.. خازوق.. طلاق.. اي حازه لها علاقة بتاء التأنيث.. اي قصه من النوع ده تأكد تماما ان مراتك هتسمعك وهتركز جدا في كل حرف.. ولو طالت كمان هتخليك تعيد الكلام في مناطق معينه.. غير كده انسي.. لو حكيتها عن اختراع انت عملته بيعمل من الفسيخ شريات.. هتبتسم في وشك بغباء وتقولك ما شاء الله.. أقوم انا بقي اعمل الرز لاحسن اللحمة استوت.

ازاي أقدر اشد انتباهها لحكايتي اللي هي أساسا قائمة على فكره تكنولوجياه 90% من العاملين في المجال بتاعنا مش فاهمينها وقتنا هذا؟؟

معذرة..

فكرة تكنولوجياه اه..

هو انا مقلتش اني مهندس كمبيوتر؟؟

آسف.. اندمجت شويه في الكلام ونسيت أقول انا مين.. هي مش معلومات كتير ولا أنا اعتبر من الناس المهمة الى حكايتهم ممكن تملي صفحات.. انا مجرد انسان من الطبقة الوسطى او الأقل من الوسطى.. ابويا كان موظف حكومة.. تعليمي حكومي مجاني.. لا أملك من مقومات الحياة في سنة 2000 الا بكالوريوس علوم الحاسب الآلي بتقدير عام امتياز مع مرتبة الشرف بالإضافة الى طن من الطموحات والأحلام.. رصيدي في البنك وقتها يقترب من الصفر بقليل من الأسفل.. لو طنشت شوية ديون عبيطة كده.. يبقى انا زى الفل.

اذن.. نستعين بالله ونبدأ الحكاية.

- طبعا تعرفني إني اتخرجت من حاسبات ونظم معلومات بتقدير تراكمي كان امتياز مع مرتبة الشرف.. شهادة الكورسات اللي درستها في الكلية كانت كلها امتيازات الا شويه.. نادرا ما كان عندي ماده جبت فيها جيد جدا.. اللهم الا ماده واحده بس جبت فيها مقبول.. علم النفس قبحه الله.. لا عمري حبيته ولا حبيت المدرسين بتوعه.. انا لو كنت ادبي في الثانوي مكنتش خلصت علام لحد دلوقتي.. مشروع التخرج كان تقديري فيه امتياز برضه.. مشروعنا كان حازه كده تحفه بالاشتراك مع الشباب بتوع اتصالات وميكانيكا.. عملنا حازه وقتها تعتبر اختراع كنا فاكرين اننا ممكن نقلب مصر كلها.. طبيعي جدا لما تكوني مشتركه في تصميم روبوت إنك تحسي بالفخر.. انا كتبت سوفت وير يقدر يحرك ذراع آلية تعمل وظيفة معينه.. حازه بدائية شويه اه.. انما مع الوقت ومع الماجستير اكيد ممكن اعمل روبوت كامل.. حازه كده زى أفلام الخيال العلمي.

- ذراع يعنى ايه.. قصدك الأطراف التعويضية يعنى.

- لا.. ذراع آلي.. تخيلي مثلا مصنع البان.. وظيفة عمال السير.. وظيفة بسيطة جدا بتتكرر زى ما هي ومش محتاجة أي فن.. مطلوب منك تشيلي علب الزبادي المليانة من على سير الماكينة وترصيها في الكراتين.. وكل 20 علبه تقفلي الكرتونة بتاعتهم علشان الكرتونة تروح المرحلة الى بعد كده.. عملنا ذراع الى يقدر يعمل الوظيفة دى لمدة 24 ساعة في اليوم بنسبة خطأ 0%.. من غير ما يشتك ولا يكل ولا يمل ولا يقولك ساعة غداء ولا هدخل سيجاره ولا هصلي التراويج مع الظهر.. ذراع آلي لا يجيله برد ولا كحه ياخذ بسببهم أسبوع اجازه.. ذراع آلي مش بيضيع الوقت في التظبط مع البت اللي بتقفل الكراتين ولا اى اونطا من دى.. ذراع آلي يعمل وظيفة واحده بنفس الكفاءة لعدد غير محدود من الساعات.

- يا حلاوة.. عملتوا س 18 بتاع نبيل فاروق يعنى!!! ده على كده بقي ممكن تعملي خدامه اليكتروني على ذوقك كده تساعدني في شغل البيت.. بدل ما اجيب خدامه اصحى في نص الليل الاقيها بتقولك يا محاميحو.
- بغض النظر عن السخرية في كلامك.. هو ده كان حلمنا بالظبط.. طالما قدرنا نتحكم في الماكينات.. يبقى ممكن بشوية ذكاء اصطناعي نعمل ماكينات تتعلم من اخطائها.. الفكرة لسه بدري عليها اه.. انما كنا ممكن نشتغل في تطبيقاتها البسيطة.. ومع الوقت ممكن تبقي فتح فعلا في عالم التكنولوجيا.. الحلم الأكبر.. استبدال العمالة اليدوية بعمالة أخرى آليه أرخص وأكفاً
- وبعدين.
- ولا حاجه.. المشروع اتناقش.. خدنا الامتياز المتين.. اتألشت من التعيين في الكلية.. واترمتيت في سوق العمل.
- اه.. كتير بيحصل معاهم كده عادي جدا.. دى قصه مكرره ومملة جدا.. لو ابوك مش دكتور في الكلية.. يبقى بلح.. ابن الضابط ضابط وابن الدكتور دكتور واولاد الفقراء للبطالة والتصدير والموت في مراكز الهجرة غير الشرعية.
- علشان كده مدققتش أوى ولا سمعت نصيحة حد أنى اشتكى واعمل مشاكل.. طول عمري قافل وداني تماما.. ربنا خلقتني كده.. شخص رافض تماما لأي نصيحة من اى حد.. مش غرور اد ما هو فقدان ثقة في الناس.
- ليه كده.. ده الدين النصيحة.. رحم الله رجلا أهدي الى عيوي.
- الدين النصيحة اه.. بس السؤال هنا.. مين ينصح مين.. الى افهمه ان المؤهل للنصيحة ينصح ويتبعه الراغب في النصيحة بلا أي فرض ولا سخافة من الناصح.. كمثال.. الرسول عليه الصلاة والسلام ينصحنا واحنا نمشي.. وراه.. كده يبقى الأمر منطقي.. شخص محل ثقة ادبه ورباه خالق الكون وعلمه كل شيء بالطريقة الصح فأصبح معلم بضم الميم.. هو ده الى نسمع كلامه ونصايحه.. مش كل من هب ودب يلبس قميص النصيحة وكسبون الوعظ وفانلة الارشاد ويديها نصائح علشان تديله طراوة.. مينفعش يوم الاقي راقصه بتنصح وبتدى للناس عظات من تاريخ كفاحها ومعاناتها في علب الليل والكباريات وأقول أهو.. الدين النصيحة.. مينفعش لصوص عالم البيزنس يملوا الفضائيات بقصص كفاحهم الوهمية تحت بند النصيحة واقل واحد فيهم سارق من البلد اد كده.. مينفعش اجيب واحد مطلقه وأقول انها تعمل كورسات ودورات للتنمية الزوجية والعلاقات الاسرية.. مينفعش اجيب الأفرع يسرح لبنت السلطان.. بصي- حواليكى هتلاقى مسخره تحت بند النصائح ده.. مطبلاية الصحافة بقوا بينصحوا.. واحد يقولي خد بالك.. كله الا.. هسيبيىء.. الصلاة.. وريحة الكحول فايحة من بقه.. واهو الدين النصيحة برضه.. العملية بقت بزرमित وأصبح فعل النصح يغتصب باسم الباطل في ارض خربه يقال لها مصر.. وتبصى- في الآخر تلاقى حال البلد مائل متنيل في كل المجالات.. الله.. لما البلد فيها كل الكمية ده من الناصحين.. امال اتوكسنا كده ليه!!!
- يا حفيظ.. انت كابتني يا راجل.. حرام عليك ده انا لسه والده ونفساء.. الموضوع مش بالسود ده.. قوم اعمل فرخه احطها مكان العيل الى نزل والى انت حطيت مكانه البؤس ده كله.
- يا وليه هما كام فرخه هيسدوا مكان العيل.. ده انتى لو والده ديزانور حتى مش هيبقي كل ده.
- خليك انت كده مضطهدنى.. مكانوش ست فرخات عمي.. بكره أقوم على حيلي واديلك تمنهم على الكوتشي.
- بقالي كتير مستني الكوتشي ده.. لا شفت ابيض ولا اسود.
- ضيع بقي في الوقت لحد ما الواد يصحى.. فكك من الهري ده وكمل حكي.

- من المنطق الى حكيتهولك ده كنت ولا أزال رافض النصيحة.. او بمعنى اخر رافض عرض النصيحة.. الى يسألني بقوله دى خبرتي انا وانت صاحب القرار.. مش واثق في شخص الناصح ولا اهليته للنصيحة مع التعميم.. مش واثق في حد في المجتمع ده كله.. حاولي تقنعيني ان مجتمع بينحدر من سيء الى أسوأ من أيام الملكية لحد النهارده ممكن حد فيه ينصح الثاني.. حاولي تقنعيني ان بلد مفياهش غير مسلمين ومسيحيين بس.. الاتنين مش قادرين يعيشوا مع بعض والاتنين مش آمنين على نفسهم وكل يوم انفجار شكل في مسجد او كنيسة وقاعدن يتغنوا بالأمن والأمان ويوزعوا نصايح على الناس يقولوا فيها قال الله وقال يسوع آجي انا في الاخر آخذ منهم نصيحة.. حاولي تقنعيني اني آخذ نصيحة من مواطن عايش في بلد فيها واحد معاه معهد سنتين بعد الدبلوم وبقي مكانه اهم من حملة الدكتوراه من كليات القمة لا لشيء الا انه لبس ميري وبقي امين شرطه اسم الله.. حاولي تقنعيني ان الشيخ الى كان موافق على ان عسكري امي لا يقرأ ولا يكتب يروح يجيب دكتوراة في الجامعة من قفاها علشان يرميها في بيت راجل هي مش طايقاه ولا طايقه عشرته ويبقي هو هو نفس الشيخ الى وافق على قانون الخلع باعتبار انه من الدين لما حرم الرجل الكبير قالت انه من الدين.. حاولي تقنعيني اني آخذ نصيحة بعد كده من الشيخ ده وأمسك لساني عن اني اشتهمه بأمة على اعتبار انه من مشايخ السلطان.. اعتقد ان أمثال هؤلاء الناس لو قالوا اشهد ان لا إله الا الله.. هيبقوا كذابين برضه.

- يا ستار.. ايه السواد ده يا اخي.. مش للدرجة دى.. انت ليه مش شايف الا النماذج دى.. ما الدنيا فيها وفيها.

- لا صدقيني.. للدرجة دى واكثر.. دنيا مصر—ميتقالش عليها فيها وفيها.. هي فيها بس.. فيها كل وحش وسيء وقذر وملعون وكذاب ونجس ومنافق وهمجي وبلطجي وخائن وغدار وقاسي ووحش.. فيها كل فساد ورشوة ومحسوبة وظلم ووساطة وقهر وذلل للفقير الغلبان او للأهبل صاحب الطموح.. فيها أحمد زويل ومجدي يعقوب ومصطفى السيد الى نجحوا بره ارضها القذرة.. وفيها صافيناز وفيفي عبده ولوسي الى عملوا ملايين من عرق العافية في ارضها القذرة برضه.. بعض الناس لما أكلهم يقولولي متعممش علشان التعميم غلط.. الناس دى افلست ومعندهاش منطق تتكلم بيه ولا عندها اى حجة للدفاع.. اى كلام وخلاص المهم منسيش الورقة فاضية.. التعميم هنا جايوز ويلزم لأن حال البلد كلها خائب ومتنيل بنيلة.. لما أقول ان الداخلية وزاره وسخه.. يبقى لازم الكلام يتاخذ على محمل الجد ومحدث يقول انت بتعمم ليه ياعم.. اه فيها ناس كويسة مقلناش حاجه.. ولكن غالبيتها العظمى القذرة هي الى ظلمت القلة المحترمة وأدت انطباع عن المجمل انه زفت.. اه في لواء اسمه البطران الله يرحمه مات شجاع شهيد وهو بيأدى واجبه.. بس في قصاده 90 لواء مش عايز يموت ولا يتوب من اكل الحرام.. اه في امين شرطه اعرفه شخصياً واعرف انه مثقف ومحترم وبتاع ربنا وغلبان خالص.. بس في قصاده 9 مليون حاتم.. اذن في الحالة دى وجب على القلة المحترمة المتأدية من المجموع القذر انهم ينقلبوا على الغالبية القذرة وياخدوا صف الى بيشتهم فيهم كلهم.. هو في الواقع مش بيشتهم هما بشكل شخصي.. هو بيشتهم الفساد والقهر والذل.. بيشتهم الفاسدين في صورة النسر- وشعار الشرطة والشعب في خدمة القانون.. لازم نتعامل معاها من المنطلق ده علشان نظهرها.. كده كده النظيف والمحترم مش هيتأثر بأى شيء لان صفحته نظيفة.. واللى يمشى.. على وزاره زى الداخلية يمشى على باقي مؤسسات الدولة المتهالكة المنهارة.. ده كان بس مجرد مثال لا أكثر.

- منطق برضه.. بس أخاف إنك تكون بتظلم ناس ملهاش ذنب.

- السيئه تعم والحسنة تخص.. لما اتعرض لموقف كويس من موظف حكومة.. هقول ان الأستاذ فلان كويس.. بينما لو موظف تاني في نفس الوزارة قرفني.. هقول الله ينعل أبو ميتين ام الحكومة كلها.. الكويس فيهم والوحش.. لان السمّة الغالبة عليهم هو السوء.. والا كانت الأحوال عموماً أصبحت أفضل.

- مميمم.. أقنعتني

- ماهو لازم تقنعني والا هتجوز عليكي واحدة تقنعني باللي بقوله.. هكذا عشت حياتي.. مستغنى عن كل شيء وكل حد.. مش عاوز من الناس الا انها تسيبني في حالي.. يا نحل لا تقرصني ولا عاوز منك غسل.. متوقع تماما مع أصحابي الى شبهي في عالم منعزل رافض للواقع بقرفه ووساخته.. نزلت السوق وبدأت اصارع مع نفسي.. وحيد تماما.. قررت اني اشق الطريق في قلب الصخر منفردا.. بخلاف توفيق الله عزوجل ورحلة ابويا في الانفاق عليا لحد

التخرج.. محدش له عندي اى فضل في اى شيء.. تعبت واتبهملت بشده.. وقعدت مستريح البال قرير العين في انتظار جزاء ربنا العادل الى جه الحمد لله أفضل مما كنت أتوقع.

- طبعاً.. اديك اتجوزت جواز عنب اهو.. احمد ربنا بقي.

- يظهر ان سمعي بقي ثقيل.. مش سامع بتقولي ايه.. الحمد لله بتاعتي كانت عبارته عن شغل بزيادة.. شكر ربنا كان باستغلال الفرص لأبعد حد.. توفيق من ربنا إني الاقي شغل بسرعة.. توفيق من ربنا اني حبيت شغلي.. توفيق من ربنا انه حفظني من المخدرات والهطل ده كله.. ربنا رزقني بالأرض وأسقط عليا المطر وانا مفرطتش في ولا نقطة ميه.. خرجت من الأرض محاصيل كتير اوى لحد ما بانث عليا نعم ربنا.. هو ده شكر ربنا الى اعرفه وافهمه.. كنت مركز اوي في الدراسة وما بعدها.. كنت مقسم يومي تقسيم عادل وقاسي جدا.. 14 ساعة شغل.. 4 ساعات نوم و6 ساعات لنفسى.. ما بين قراءه واكل والقهوة مع أصحابي.. كنت عاصي اوي على البنات.. مكنوش في تفكيرى خالص.. اهم حاجتين بيضيعوا وقت الشباب ومستقبلهم في الفترة دي انا كنت بعيد عنهم تماما.. المخدرات والستات.. عمرهم ما اجتمعوا معايا في مكان ابداء.. كان طبيعى إني الاقي وقت كبير جدا لمستقبلي.. كنت عامل زي شكري سرحان كده في شباب امرأة.

- هههههه... امام الى ضحكت عليه شفاعات؟

- بالضبط.. بس انا مسبتش فرصه لأي شفاعات تقرب منى.. أفكر ان واحده زميله طلبت مني كشكول محاضراتي في الكلية في سنه أولي.. معرفتش انام يومها.. ثاني يوم رحى الكلية وانا حاطط على شعري جيل لأول مره في حياتي.. فاتح زراير القميص ولا بس سلسله فضه.. كده انا بقيت عيل بقي من العيال الحلوة بتوع تجارة عين شمس الي بعدي عليهم الصبح في طريقي من حدائق القبة للكلية الاقيهم قاعدين بيظفروا مع بنات واعدي عليهم المغرب وانا راجع من الكلية للحدائق تاني الاقيهم قاعدين بيتغدوا مع بنات تانيه.. وانا عمال اقر عليهم واشوف البنات معانا في الكلية واستعيد بالله من الخبث والخبائث.

- حرام عليك يا اخي.. متقولش عليهم كده.

- هما فعلا كانوا صعبانين عليا جدا.. الواحده فيهم لو لقت وقت تلف الطرحة بس يبيخ خبر وبركه الله يكون في عونهم.. المهم ان البت اللي خدت مني الكشكول مرجعتوش ثاني بنت الوارمة.. وانا عشت بعدها شهر كامل بسمع هاني شاكر واغنيه رخمه اوي كان عاملها وقتها اسمها غلطه ندمان عليها.. بيني وبين نفسي.. بقيت أقول ازاى تخون تضحيتي الكبيرة علشانها.. ازاى تاخذ كشكولي ومرتجعوش ثاني.. مش كده وبس.. لا دي كمان الاقيها قاعده في الكافيتريا مع عيل من بتوع البكالوريوس من جيراننا في كلية الهندسة بيشرحلها لغة برمجة كانت معقدانا كلنا امسها "C++" .. بقيت أقول بيني وبين نفسي.. هي الستات كده.. بتاعة مصلحتها.. باعتي علشان اول واحد جاهز وفاهم "C++" صحيح يا ولاد.. اتنين ملهمش امان.. الفرامل والنسوان وال "C++" .. ودي كانت اقصى.. مغامراتي مع الستات.. بعدها قررت اني ابعد عن الصنف الخائن ده وأركز في مستقبلي.. واحده باعتي النهارده بعد قصة حب عنيفة عمرها يوم واحد علشان "C++" يبيخ مش بعيد واحد تانيه تكسر قلبي ومشاعري علشان "Oracle" مثلا.

- هههههه.. انت طول عمرك سينمائي كده؟

- وهوده اللي جابني الأرض على فكرة.. انا كنت بشتغل وبقبض مرتب من أيام ما كنت في الكلية.. مجالنا كان مطلوب اوي.. المستقبل كان يبدو انه بتاعنا.. وخصوصاً لما الدكتور احمد نظيف مسك الوزارة.. احنا - بتوع نظم المعلومات - شقنا أيام عنب مش هتكرر ثاني في تاريخ مصر الا لو انا مسكت الوزارة بقي.. هههههه.

- ادها وادود يا أبو حميد.. ساعتها بقي تجيبلي اي فون 6 وانت مرتاح.

- ماشي.. وأحطلك عليه رنات بولي فونيك كمان.. رأفت الهجان وبلادي بلادي.. ياللا.. هيصي

- طيب.. ايه اللي حصل بعد كده؟؟
- انتقلت من شركه لشركه.. كنت مركز اوي في التكنولوجيا والشغل.. بجري وراء كل جديد.. كنت مقتنع ان الملايين سهله اوي لوجبت فكره جديده وطبقتها في السوق.. الناس اللي فتحت شركات انترنت في البدايه خالص في مصر.. عملت ذهب في اقل من سنة.. العقل مع شويه علم.. سهل اوي يخلوني مليونير.
- جميل.. وبعدين؟
- اشتغلت في بدايه حياتي في شركة حلواني اخوان.. كانوا بيصرفوا كويس على التكنولوجيا.. معاهم فلوس بقي.. اتعلمت فيها كتير جدا لحد ما مديري - الراجل المحترم اوي - توفي الله يرحمه ووظفوا مكانه شخص اقل في رتبته البيولوجية من الحمير.. كان الصدام متوقع جدا.. استقلت بهدوء ودورت على شغل ثاني..
- فين؟
- اشتغلت مع شركة معروفه عاملها دكتور غريب الأطوار متخصص في الزراعة الحيويه والطاقة والاي كلام ده كله.. شركة مشهوره للأعشاب.. أدركت وقتها اللحظه الفارقه بصوت محمد صلاح أبو إسماعيل.
- ايه ده!! الشركة إياها بتاعة الأورجانيك؟؟
- ايون.. هي دي.. الدكتور صاحبها رجل مثير دوما للجدل.. قعدت عنده في الشركة 6 شهور بالظبط شفت فيهم كم مهول من الدروس والعبر.. شفت حاجات مكنتش أتصور وجودها الا في الخيال.. لو قعدت احكي عن الشركة دي سنين.. مش هخلص.
- هما بيقولوا حواليه كلام كتير فعلا.. الله اعلم بقي ان كان صح وللا غلط.
- بعضه صح وبعضه غلط.. هي كانت مدرسه كبيره اوى اثرت فيا بشده.. رغم الفترة القصيرة فيها.. الا انها تقريبا اهم فترات حياتي بدون اى مبالغة.
- حصل ايه بقي
- حصل وطحينه... ههههههه.
- الشه كمان زى دى واعتبر اني خلعت منك بلا عوده.. انا دلوقتى حاضنه والشقة من حق الزوجه.. آنى ام الواد أطلقى البخور يا خاله نظيما!!!.
- اوعى الأفلام.. قبل ما أحكيك عن شركة الزراعة الحيويه الأورجانيك واللى عرفته واتعلمته هناك.. هقوم اصلى العشاء وأرجعلك.. خلى ربنا يكرمنا بالصلاة علشان خاطر الواد.
- ماشي.. تقبل الله يا مولانا.
- منا ومنكم ان شاء الله.
- بس وانت جاى أبقي هات اى حاجه أعرض فيها كده.. سندوتش وللا حاجه.. متنساش اني نفساء.
- ها!!!!!!ارسوح!!!

العزيزة أوجانيك

اشرقت شمس صباح جديد على اراضي الولايات المتحدة الأمريكية.. صباح آخر كتبلي فيه رب السماوات الحياة.. صباح فتحت عيني فيه وانا بكلم أبني الرضيع أبو يومين عمر في الكوكب اللطيف ده.. بدون وعي لقيتني بقوله صباح شريف على عيونك يا حمزة.. صباح أجمل من الجمال الجميل عليك يا أبني.. اسمحلي اضايق عيونك الحلوة بشعاع الضوء.. ماهو مفيش شمس بتطلع في البلد دي في الشتاء.. سامحني اني جيبتك تتولد في درجة حرارة 22 تحت الصفر.. أملى ان شمسك انت والى زيك تطلع فيوم وتنور كل الدنيا.. على رأى الأسد موفاسا قبل ما يموت.. هيجي يوم يا "حمزة" شمسي.. فيه راح تغيب وشمسك انت تطلع تنور دولة الملك الجديد.. ده أملى فيك يا أبني وده حلمي ليك ولكل اللي في سنك.. وعد مني وعهد عليا إني مش هعز عنك حاجة ابداء.. هعلمك كل اللي اعرفه وأكون حريص أنك تعرف أكثر.. هجيبلك انضف شيء من كل شيء.. هجيبلك الدنيا كلها تحت رجلك لو كان في مقدرتي.. ولو مكانش في مقدرتي.. برضه هجيبها لك تحت رجلك.. لو حكمت الظروف أبقي خد من جسمي الأساسيات علشان تبقي كماليات في حياتك.. ولا هيغفر معايا.. عاوزك بس تكون حاجه افخر اني جبتها للدنيا.. عاوزك تكون راجل وسند حقيقي لامك واهلك واخواتك ان ربنا اذن واركتبت الجنون الى اسمه الانجاب ده تاني.. اوعي تفتكر اني مستغنى عنك او مش عاوز منك حاجة.. ابداء يا أبني.. انا أملى كله فيك وعاوز منك حاجات كتير اوى.. عاوزك ترعاني في ايامي الأخيرة.. متخافش مش هكون تقيل عليك ومش هضايقك.. راعيني يا أبني وهتكسب من ورايا رضا ربك.. عاوزك تفهم وتعرف ان انت أجمل حاجه حصلت في حياتنا انا وأمك.. عاوزك تفهم ان انت هديه من ربنا للكوكب ده.. اتصرف بما يليق بكونك الهدية.. معلش يا موزه انا عارف ان الساعة 06:00 الصبح دلوقتي.. بس بقولك اهو ومن أولها كده.. لازم تتعود على الصحيان بدري والنشاط.. مع بابا مفيش دلح.. هيبقي في شدة وقسوة.. بس كلهم لمصلحتك.. بكره تكبر وتعرف ان فعلا كل ده لمصلحتك.. بكره تكبر وتقول الله يرحمك يا ابويا.. كان عندك حق.. زى ما أنا بقول عن جدك دلوقتي.

ايه ده...!!!

انا بقيت بتكلم زى بابا الله يرحمه..

معقول كده!!

قالولى زمان أنك مش هتعرف قيمة الابن الا لما تخلف.. معقول كان عندهم حق للدرجة دي؟؟

الله يرحمك يا بابا.. يا ريتك كنت عايش علشان تسمعني وانا بعترف انه كان عنك حق.. انت وكل الآباء.

اه والله..

عندكوا ألف حق.

- جرى ايه يا راجل.. انت بتكلم نفسك؟

- ايوه.. انا بقالي 12 ساعة اب.. الأبوة دي طلعت حاجه مش سهله خالص.

حرما المصون عايشه في الدور تماما.. بتصحى من النوم الظهر وعايظه الفطار في السرير.. انا مليش خلق على دلح النسوان ده.. ايه يعني خلفت بقالها كام ساعة.. مش فاهم انا ايه المحن ده.. الحرمة من دول زمان كانت بتخلف في الغيط وترجع تحضر-الغداء لجوزها والعيال.. الله يرحمك يا ستي.. خلفت من هنا وقامت بعدها عملت صينية بطاطس لجدي من هنا.. حريم الأيام دي بتدلح على الآخر.

- مش انت يا راجل الى كنت بتقولي أيام الخطوبة هدلعك واجيبلك الفطار لحد عندك في السرير؟
- هو انا قلت ايه وللا ايه في فترة الزفت دى!! انتى بتقولي كلام يصعب انى اصدق.. ده انا حتى لو عبيط وبرياله.. مكنتش هقول كل ده.
- اه يا أخويا.. قلت وقلت وقلت.. وانا زى الهابله صدقت.
- طيب لعلمك بقي.. فترة الخطوبة العريس بيشرب فيها هوب هوب علشان ينسى.. هو داخل على ايه.. ميصحش اى ست عاقلة تصدق اى راجل في فترة الخطوبة خالص.. وخليني أقولك حاجه كمان.. عمرك شفتي صياد بياكل السمكة بعد ما اصطادها فعلا؟؟
- لا..
- هو ده الموقف دلوقتي بالظبط.. الراجل في الخطوبة زى الصياد والبنت هي السمكة.. والخطوبة هي الشبكة.. الخطوبة طعم تلعوه من سكات ومتصدعوناش بعد كده بعايزه ورد يا ابراهيم وشغل الدباديب والكلام الفارغ ده.. الرومانسية فضيلة الأشرار.. كل عظماء التاريخ مكانوش رومانسيين ما عدا سيدنا النبي.. بعد الجواز الأمور بتختلف.. كيلو كباب وكفته يخلينا نبات في سعادة أحسن من 5 قصائد محن من بتوع نزار وأيام الخطوبة.. حلة محشى تضميني بيها رضا جوزك ورضا ربك بعد كده.. المكرونة بالبشاميل فيها رسائل رومانسية يفهمها اى راجل في الدنيا.. فكرى صح بقي.. كوني له رؤى يكن لك نور الشريف كما ورد في موسوعة العار للعلامة محمود أبو زيد.
- اشكو اليك يا رب.. ماشى.. قولي بقي حصل ايه في شركة الأورجانيك مع الدكتور غريب الأطوار وانت بتحضر لنا الفطار وبتجيبهولنا السرير.. وابقى اتوصي شويه في الفول وأفرط ايدك في الطعمية.. انا نفساء خد بالك ومحتاجه غذاء.. متنساش كمان كام نوع جنبه كده وخيار وخس و5 ارغفة.. انا هفتانه.
- 5 ارغفة...!!! يا قوة الله.. حاسبي يا وليه لتاكل الواد بالغلط.. هههههه.. بعد الفطار نركب تاني مركب الحكايات.. لعلمك انا سعيد جدا انى بسترجع ذكريات فتره في أولها كانت محببه الى نفسي.. جدا.. فتره كنت سعيد فيها الى ابعد حدود السعادة.. فتره بدأت بحلم وانتهت بالسجن.
- السجن!!! انت بتتكلم جد؟
- اصبرى هتعرفى كل حاجه في وقتها.
- اصبر ايه.. هي دى حاجه فيها صبر.. انت اتسجنت بجد؟
- اووالل.. لورحتي تسألني عنى في حدائق القبة هتلاق اسم الشهرة.. المعلم حسنى الزفر.. فتوة روكسي والعزبة وأرض الجولف تماً.
- هزر هزر.. يا حبسجي يالى عندك ماضي.
- حاسبي على نفسك بقي.
- احاسب ليه.. مش معايا فكه.. الشه اهى في منتها القذارة.. متركزش فيها وكمل الحكاية.
- ماشى.. في شركة الأورجانيك اتعرفت على انصف ناس عرفتها في حياتي.. وكذلك اتعرفت على اوسخ بشر.. خلقها ربنا بعد الى بالى بالك بتوع الاتاوات الميري.. شفت ناس بتقرأ القرآن بطريقة الانجيل.. وشفت ناس بتدي محاضرات في الدين وبعدها ب 5 دقائق تسب نفس الدين الي كانت بتحاضر فيه.. الشركة دى كانت كل حاجه والعكس.. كان

فيها مسرح كبير وفرقة تمثيل ومخرج محترف.. اشتركت معاهم طبعاً.. حلمي القديم بالسينما طلع مماتش رغم دراسة الهندسة والشغلانة الصعبة.. الشركة كان فيها حركه ثقافيه جامده اوي.. 10% من المرتب كانوا محجوزين للتقييم بناء على مشاركة الفرد في النشاط الثقافي.. الدكتور كان مهتم بكل حاجه في الحياة الا الشغل.. كل أسبوع في ندوه وشخصيه عامه من الادباء والمفكرين يجيبهم الشركة عندنا.. عن طريق المخرج بتاع مسرح الشركة.. لقيت مدخل إني اعمل اختبار في فرقة محمد صبحي المسرحية.. كانت مدرسه حياتيه كبيره اوي وشغل مقرف اوي.

- طيب.. ايه علاقة الشركة بالموضوع؟ انا بدأت اتوه يا احمد.
- الصبر.. الصبر مفتاح الفرج.
- يا صبر صبصب.. صابرين يا سيدي.. صابرين بتاعة أم كلثوم.
- أوووف.. ايه ده!!
- سامحني مقدرتش امسك نفسي.. متركزش معايا وكمل.
- ماشي.. في الشركة دى اتعرفت على ابطال الحكاية.. الحقيقة ان الشركة زي ما كان فيها عيوب كان فيها مميزات.. اهم ميزه فيها ان مصدر دخلها الاساسي هو تبرعات من منظمات خيريه في أوروبا.. عاملين نصباية كده اسمها المنتجات الحيويه او الحياة بدون كيماويات في 40 فدان موجودين في بلبيس.. اكل أورجانيك.. لبس أورجانيك.. موبيليات أورجانيك.. وهكذا.. الجماعة في أوروبا مهووسين بالكلام ده مؤخرًا.. فكانوا بيساعدوا ويشجعوا اي منظمه او شركة شغاله في الأفكار دي وما شابهها.. محاربة التلوث.. منتجات طبيعية.. كده يعني.
- |||||..... صحیح.. دول عندهم مزرعة كبيره اوى في بلبيس.
- هي دى.. مزرعة الشركة الناس بتشبهها بمعتقل أوشفيتز النازي.. بس الى يقول كده يبقى ولا يعرف اى حاجه عن اى حاجه.. الناس الى عايشه في المزرعة دى مبسوطين على الاخر والا كانوا سابوها ومشياوا.. الحياة هناك فعلاً جميله اوى.. الدكتور كان يبدو من الخارج كده كديكتاتور رهيب مرعب.. لكن الناس كانت بتحبه رغم انحراف بعض أفكاره.. الراجل ده مجنون بالحضارة المصرية القديمة.. الأسماء كلها عنده مصري قديم.. شركاته اسامياها كده.. اسم الشركة الأم نفسه كان يعنى الشمس المشرقة بالهيوغليفيه.. مؤخرًا فتح جامعه سماها هليوبوليس.. كله مصري قديم.
- انا سمعت فعلاً اشاعات كتير عن الشركة دى.
- كل الى سمعته ده ولا ييجي ربع الموجود والاحداث الى جوا.. على سبيل المثال هو عامل لنفسه قبر جوا المزرعة.. القبر على شكل صليب راسه متجهة ناحية القبلة.. ومكتوب على القبر من بره.. يارب لقد بذرت البذرة واطلب منك ان ترعى النبتة فأنت الذي يرعانا فلا يعوزنا شيء.
- متهيألى دى ايه في الانجيل..
- بعضها مش كلها.. الايه بتقول الرب يرعاني فلا يعوزني شيء.. دى ايه مشهوره اوى في المزمور ال 23 في سفر المزامير.
- وهو ماله ومال الكلام ده.. هو مش مسلم؟
- اه مسلم.. بس مسلم من نوع غريب.. يستشهد مثلاً بآيات من القرآن ويكتب تحتها 1:15.. زى ما بيكتبوا في اقتباسات الانجيل كده.. بيصلى ومحافظ على الصوت بتاعتنا.. بيصوم رمضان والصيام الكبير.. عمل عمره وحج

بيت ربنا وبيتناول وبيعترف زى المسيحيين.. عنده في بيته لوحات آيات قران ولوحات العذراء والمسيح والملاك مايكل كفنون بشكل عام.. تحسي.. انه نقى من كل ديانة كل الحاجات الى جت على مزاجه وعمل لنفسه ميكس كده غريب.. كان يكلمنا على سماحة الأسلام وتضحية المسيح وسمو البوذية وتواضع الكونفوشية وحروب الشنتو ومش عارف ايه كده من الهند.. حاجات غريبه كده.

- الله أكبر.. ده راجل عالي اوى..

- عالي اوى.. فوق ما تتخيلي.. انتى عارفه ان الموظفين هناك كل يوم الصبح قبل الشغل.. من الساعة 9 الى 09:05 بيقفوا في دايره كبيره اوى.. ماسكين ايد بعض.. رجاله وستات.. كرمز الى تكامل الشركة.. انا ماسك ايد الى على شمالي والى على يميني ماسك ايدى.. زى ما باخد من الشركة زى ما بديها.. حظي بقي ان كان على شمالي بنت خطيبها واقف في وشنا في الدائرة.. وانا لازم امسك ايديها قصاص خطيبها.. خطيبها كان معاه حزام اسود 3 دان في الكاراتيه وغبي وعصبي جدا.. كل يوم الصبح كانت الدائرة دى مأساة بالنسبالي بسبب البنت دى.. كنت بديها كم الجاكت علشان تمسكه وأهرب من التار ولا العار ده.. والدكتور يسأل كام سؤال غريب كده.. النهارده يوم ايه بالتقويم المصري القديم.. ايه الكوكب واللون والمعدن المناسب للشغل النهارده.. وبعدين نقول كلنا شعار الشركة في نفس واحد.. حاجه كده زى نشيد الصباح كده.. تقدرى تسميه قسم الشركة الخاص..

التعجب في الجمال

والمحافظة على الحق

واحترام النبل

وتقرير الخير

يقود الإنسان في حياته الى أهداف

ويجعل في إرادته.. طيبة القلب

وفي إحساسه.. حب الناس

وفي تفكيره.. نور الحق

ويعلمه الثقة في مشيئة الله

في أنحاء الكون وفي أعماق النفس

وخدى بالك.. لما تيجي كلمة طيبة القلب او حب الخير او نور الحق.. نروح كلنا رافعين أيدينا لفوق.

- نعم يا أخويا.. طابور الصباح ده وللا ايه.

- بالظبط هو كده.. طابور الصباح.. الشعار ده انا فكرته في الأول ماسوني وللا حاجات من دى.. خصوصاً انه كان بيقله بقلب جامد وهو باصص للشمس ويباخذ نفس عميق اوى.. حسيت ساعات ان الراجل ده بيعمل للناس حاجه كده زى غسيل الدماغ خصوصاً ان الترويض من الدائرة بيبقي عليه خصم يومين كاملين من المرتب.

- وبعد الدائرة؟

- كل واحد بقي يروح على مكتبه يشوف شغله.

- [illegible]

وكامبرا.. محمد صبحي نفسه قالي خس وتعالى.. للأسف حجمك هيحبسك في أدوار معينه ومش هيبقي عندك حرية الحركة ولا اختيار الأدوار.

- يعني كنت هتبقى حسنى أباطة... ههههههه

- مش عارف.. انا كان نفسي أكون مخرج مش ممثل.. بس فشلت وطلعت مهندس.. ههههههه

- وايه تاني عن الشركة دى وصاحبها.. دى طلعت حدودته كبيره اوى.

- حدوتة أكبر مما تتخيلي.. تبرعات أوروبا معناها كام مليون دولار كل سنه.. يعني على التبرعات بس الشركة تقدر تعيش وتصرف أرباح كمان للموظفين.. البيع في السوق المصري مكانش فداغهم.. كانوا مركزين على شوية منتجات هابله كده رغم ان الشركة عندها منتجات حلوه فعلا تكتسح بيها السوق لو عندها مدير تسويق شاطر.. انما زي ما قلتلك.. الشغل نفسه مكانش في دماغهم.. يعني مثلاً وقت التقفيل السنوي كنتي تلاقيهم عاملين ندوه وجايين دكتور زغلول النجار او دكتور عبد الصبور شاهين مثلاً.. يولع التقفيل والشغل.. المهم الندوة.. الموظف المثالي هو اللي يقرأ كتاب ويلخصه للناس في اجتماعات يوم الثلاثاء.. الدكتور كان بيحب اوي ان حد يعمل ندوه في الشركة لمناقشة فيلم او كتاب او رواية.. مشفتش في حياتي حد مغرم بالقراءة زي الراحل ده.. ساعات كنت بطلب منه ندوه اضافيه لكتاب معين قرأته.. فكان يقعد الناس بالعافية علشان تحضر الندوة بعد مواعيد الشغل.. والناس طبعا اتخنقت مني جامد بسبب الكلام ده.

- راجل مثقف يعني.. بس ديكتاتور

- اوي اوي اوي.. النقاش معاه ممتع فعلا رغم أفكاره المنحرفة نوعاً ما..

- تلاقيك كنت هايس معاه.

- فوق ما تتخيلي.. بعد اقل من شهرين في الشركة كنت عنده فرخه بكشك.. كان بيعتلي اروح عنده المكتب مش علشان الشغل اطلاقاً.. علشان يتناقش معاه في تاريخ أوروبا الصليبية مثلاً او مصر- في العصور الوسطي أو الفكر الشيوعي والأخطاء في تطبيقه في الاتحاد السوفيتي.. كان بيكلفني بقراءة 3 كتب في الأسبوع.. من شدة سعادته بيا.. نزلي علاوة في المرتب 50% بعد تاني مرتب قبضته.. دي كانت معجزه فعلاً لأن الشركة دي معروف انها مش بتزود حد.. في ناس بقالها أكثر من 10 سنين بنفس المرتب.. خلاني مسئول عن مكتبة الشركة كلها – وما أعظمها من مكتبة- سابلي ميزانية مفتوحة اشترى كل الكتب اللي تعجبني.. أصدر قرار اني مسئول النشاط الثقافي في الشركة.. وانا ما صدقت.. كنت بعمل مسابقة ثقافية مرعبه كل أسبوع وهو بيمول ويدفع ثمن الجوائز القيمة أوى.. كان سعيد وفرحان بيا جداً.. لدرجة انه مره قالي عاوز أعمل مسابقة على مستوى شركات القاهرة وتكون الجائزة الأولى عربيته.. انا هتفق مع محمد فريد خميس بتاع النساجون الشرقيون ورائد هاشم بتاع موكيت ماك وأحمد عز بتاع حديد عز وانت نظم الموضوع.. عملنا حاجات ثقافية جميلة جداً في 5 شهور بس.. بنفس شفت موظف حسابات غلبان جداً بيشتغل في موكيت ماك وهو بيستلم عربيته هيو نداي كجائزة أولى.. وعلى المستوي الإنساني لم يكن هذا الرجل أقل نشاطاً.. يكفيه مثلاً مشروع أطفال الكاموميل.

- أطفال مين يا حاج؟

- الكاموميل.. الكاموميل يا عسل.. الى هي البابونج.. دى زهره يعرفها الأفاعي.. الصيادلة يعني.. الدكتور قرر انه هياوى 40 طفل مشرد في مزرعته في بلبس.. الصبح يتعلموا في مدرسة الشركة الابتدائية.. ودي مدرسه خاضعه لإشراف للوزارة زى اى مدرسه خاصه.. والعصر- يجمعوا أزهار الكاموميل من الغيط -ومن هنا جه اسمهم- وبليل يشاركوا في النشاط الثقافي. مشروع خيرى جداً كان بياخد عليه دعم 300 ألف دولار سنوياً من منظمة مش عارف ايه كده في المانيا.. العيال تتعلم ويحميها من الشارع.. مصنع الدواء والأعشاب ياخذ محصول الكاموميل كمادة خام.. هو ياخذ دعم للمشروع من أوروبا.. وثواب من عند ربنا.

- والفلوس كان بيحطها في جيبه بقي وللا ايه.
- اطلاقا.. الراجل ده اخر حاجه كان بي فكر فيها هي الفلوس.. كان بيصرفهم كلهم وزيادة على الأطفال نفسهم.. أقامه شبه 5 نجوم.. تعليم وتربيته واكل وعلاج.. اعتقد ان اول دفعه منهم كبرت واتخرجت من الكليات فعلا واشتغلوا في شركته دلوقتى.. إذا كان كافل اليتيم مع الرسول في الجنة.. ما بالك بكافل 40 يتيم سنويا من سنة 2005 لحد النهارده؟
- سبحان الله.. يعنى الراجل مظلوم اهو..
- مظلوم ومش مظلوم.. ده موضوع تانى بقي..
- طب انت كان دورك ايه مع أطفال البنفسج دول
- يا وليه بقولك الكاموميل.. تفتكري مين هيبقي مسئول عن النشاط الثقافي الترفيهي للأطفال دى؟
- اكيد انت طبعا.. ما هو شافك مجنون كتب..
- بالظبط كده.. الراجل كتر خيريه عملي مرتب تانى في مقابل الاشراف على الأطفال دول ثقافيا.. تقدرى تقولى مثلا ان دخلي في حلواني اخوان كان x لما رحلت الشركة دى بقي 4.5 x. فلوس كثير فعلا.
- طيب.. الحياة فل اهو.. امال ايه بقي الى حصل.. بغض النظر عن أفكاره الي انت بتقول انها منحرفه نوعا ما.
- فكره كان أن العقل اهم من الشغل.. القراءة اهم من اكل العيش.. الراجل ده أثر فيا جدا واحترمته جدا.. لكن ابنه كان حدوده تانيه لوحده.. غير أبوه خالص.. كان مهندس ماسك منصب مهم تبع الحزب الوطني.. كان الصديق الصدوق لرشيد محمد رشيد وشلتته.. كلنا كنا متوقعين ان رشيد هixelف نظيف في الوزارة وساعتها هيبقي صاحبنا ده هو وزير الصناعة.. كانت اشاعات قوية جدا ولها ما يعضدها.. خصوصا ان زيارات رشيد تعددت للشركة عندنا وبدأ صاحبنا يطلع في التلفزيون ويتلمع.
- وبعدين؟؟
- ده كده باختصار جو الشركة الي كنت بشتغل فيها وقت الاحداث الساخنة ما بدأت.
- ايون.. خش بقي على السخن على ما أقوم اعملنا كوبايتين شاي علشان الكلام شكله هيجلو.
- لا خليكي انتى مرتاحة.. انا هعمل الشاي
- البوتاجاز اختراع ملهم.. مجرد ما تقف قصاده تلاقى نفسك صامت وسارح في ملكوت الله.. حلقات الدخان تتصاعد من مناخيري مشكله خيالات سرياليه سريعا ما تتبخر بفعل هواء الشباك البارد جدا.. درجة الحرارة 22 تحت الصفر.. مفيش مجنون في أمريكا كلها يقدر يفتح الشباك في الجو ده الا انا.. ذكريات شركة الأورجانيك وايامها هاجت عليا.. حزين ومش حزين.. فراقى للشركة كان نقطة انطلاق في حياتي.. ولكنه أثر عليا في نواحي تانيه.. ليس في الأمكان أحسن مما كان طبعا والحمد لله على كل شيء.
- شاي في نص الليل في عرف المرأة المصرية لا يصح الا انه يكون مع سندوتشات او كحك او اي شيء نعضعض فيه.. الرجل في عرف الزوجة المصرية الأصلية هو كائن لازم يفضل بقه يلعب طول ما هو قاعد في البيت والا هيبص بره.. نفيسه مرات حنفي في المتزوجون فكره لا ولن تموت ابدا.. تتساوى في الحكاية دى الأميه ودكتوراة الجامعة.. يفضلوا يعلفوا فينا من

منطلق ان الطريق الي قلب الرجل معدته.. ولما المعدة تتكور والكرش يعلن عن نفسه بقوه وتحدي.. يبدأوا يعايرونا ويقولوا
الراجل المصري أبو كرش.

تباً للنساء ذوات المهارة العالية في الطبخ.. هن السبب في زيادة الاوزان.. وسحقا للنساء معدومات المهارة في الطبخ لأنهم
اجبرونا على الاكل او العط بره.. مظلوم يا عزيزي الرجل.. يا تتخن يا تبقي فلا تي.

مع رشفات الشاي السخن أبو نعناع أمريكي (معرفش الفرق بينه وبين النعناع المصري الحقيقة).. بدأت أكمل الحدوتة..
حدوتة الخروج.

الفرسان الثلاثة

- [illegible]

* * *

- الشندوتش عالي اوى يابو حمزة.. انت راجل فنان.. من هنا ورايح انت الى هتطبخ حيث ان نفسك في الاكل حلو كده.
- اه.. اطبخ وماله.. ماهو الزمن ماشى بالولامؤاخذه بتاعته.. اتلمى يا وليه بدل ما اخطف منك الواد.

- اتلميت.. ها.. ايه بقي الى حصل بعد كده في العزيزة شركة الأورجانيك.
- اممم.. حكيتلك انا عن ماجد وأشرف ومحمود؟
- أشرف ده تقريبا الى كان بيكتبلك الاقتباسات الرومانسية الاسلامية الى انت ضحكت بيها على عقلي في الخطوبة.. صح؟؟
- اه هو... ههههههه.
- عليكم من الله انت وهو ما تستحقون.. وانا الى كنت فاكراك رومانسي ولا سوما الحساس.. مين التانيين دول بقي؟
- ماجد كان مديرنا كلنا في ال "IT" شخص مثير للانتباه جدا.. مسيحي متدين جدا جدا.. سلفي ان جازت الكلمة.. كلامه كله اقتباسات من الانجيل.. شماس وبيخدم في الكنيسة.. محترم وهادئ الطباع وفحاله تماما.. ميعرفش اى حاجه عن اى حاجه في ال "IT" خالص.. اموت واعرف الراجل ده مسك المنصب ده ازاى.. عنده كم مهول ومرعب من العلاقات.. حد ممكن يقولك ماهو المسيحيين مجتمع مغلق على بعضه في مصر.. وبيضطبطوا بعض وكده.. أرد اقولك طب ازاى وصل لشركة الأورجانيك الى أغلبها مسلمين؟ وللعلم.. دى كانت اقل شغلانة مسكها.. بعد كده سافر قطر ومسك مدير ال "IT" في مجموعة شركات ممكن ابيع الكام فدان الى حيلتنا علشان أتصور جمبها من بره.
- يااه.. للدرجة دى!!
- واكثر.. ماجد كان رهيب.. عنكبوت.. في كل مكان له معارف.. فوجئت ان حماه ممثل من ممثلين الدرجة الثانية الى بيطلعوا في مسلسل طويل عريض يقولو 3 جمل وشكرا.. كان طلع في الجزء الأول من مسلسل رأفت الهجان.. واحد كده مش هتلقني تشوفيه لو عينك رمشت.
- طيب وتعامله معاكوا كان ازاى؟
- للأمانة.. هو كان محترم.. أطلق لنا الحبل على الغارب طالما عارفين احنا بنعمل ايه.. عمره ما اتدخل في اى شيء في الشغل.. في الأساس انا واتنين كمان الى كنا ممشيين الشغل كل.. ماجد كان متفرغ لشغل الاونطا بتاعه هو والدكتور صاحب الشركة.. كل شهر كده يعمل اجتماع يقول فيه كلمتين قصاد الكبار ياكل بيهم الجو ويجيلنا بيهم اى عزومه او مكافأة.. كنا مبسوطين من مبدأ انه فحاله واحنا فحالنا طالما سايبنا نشتغل ومش بيغتن علينا.. واقع الامر ان الشغل كان اخر اهتماماته هو كمان.. يظهر دى كانت السمّة العامة لمديرين الشركة دى.. او يبدو ان ده شرط أساسي للترقية.. الاونطا والاجتماعات والحركات دى تبقي اول الاهتمامات.. الشغل مفيش منه قلق ولا خوف.. الى مخلصش النهارده.. عادى.. يخلص بكره.. وان مخلصش بكره.. خلاص.. يبقي ربنا عاوز كده.. متعكرش دمك.. ماجد كان يقولي كده وانا اتنطط.. يا عالم.. عاوز اشتغل.. مش معقول كده.. جتني هترنخ من الركنة.
- انت غريب يا اخي.. ما تربط الحمار مطرح ما يعوز صاحبه.
- طب ولو صاحبه حمار وعاوزني اربطه في عربيه نازله في التربة؟
- انت مالك بقي.
- مالي وحالي في الحمار والعربية.. انا كمان مستنفع بيها.. في العمل الجماعي مفيش الى انتي بتقوليه ده.. لما تقوم حريقه في شقة جارى مينفعش أقول والله انا في بيتي وقافل عليا باي ومليش دعوه بحد.. هتحرق معاه ان عاجلا او آجلا لو عملت عبيط.. لما أكون راكب عربيه بيجو والسواق ماشى مسطول.. لازم اهبطه على قفاه علشان يفوق..

لأنه بسهولة هيلبسنا كلنا في سكايا ماشية بتدلج.. على السكة وقاطرة المقطورة "اقتباس من الأديب التونسي- الغمراوي"

- افحمتني تاني.. خدلك حنة خيار مكافأة.
- هاتي.
- طيب كنت بتتخانق معاه مثلاً؟
- اطلاقا.. ماجد كان متعاون جدا وداعم جدا لكل حاجه بنعملها انا وتوأم التنين.. أشرف ومحمود.
- ايوه.. قولي بقي.. مين دول.
- اشرف كان في نفس سنى بالظبط.. اتولدنا في نفس اليوم.. شخص فوق مستوى الاحترام بكتير.. مهذب ومؤدب وراقي جدا.. متدين لأبعد حد بدون تطرف.. اشرف هو الصورة الجميلة اوى للشباب المسلم.. بكالوريوس علوم بتفوق.. خالص الماجستير في 18 شهر.. حب واتجوز بدون انحراف.. بيضحك وبيألش بدون سفاله.. بيغضب ويثور بدون خطأ ولا الفاظ قذره.. بيشتغل بدون ضغط وبيتفسح وعائش حياته بدون بهرجه.. بيعمل للأخرة بدون تطرف ولا خوف ولا رعب.. عائش الحياة بدون تفريط.. الوسط من كل شيء في كل شيء.. راضي تماما بحاله ودائما مبتسم.. ممكن تقعد معاه 3 سنين ولا تزهي.. لطيف المعشر وحلو الحديث جدا.. لا يعيبه الا ان ضحكته عالية وشعبية جدا.. تحسى.. ان على الشريف بيضحك ضحكات الكفار دى.. ما عدا ذلك.. كان شخص فعلا جدير بكل احترام.
- هو لسه في ناس كده؟
- اه طبعا.. الدنيا مليانه نماذج حلوه.. لو كان في أيامنا دى ناس ينفع يتقال عليهم من صحابة الرسول.. يبقى اشرف منهم.. ولو كان اتولد أيام الإسلام الأولى اكيد كان هيبقى من الصحابة المقربين كمان.. في حياتي كلها مشفتش حد فاهم الأديان عموما.. والإسلام خصوصا زى اشرف.. الراجل ده خساره فعلا انه ميكونش داعيه.. لما بسمعه بيتكلم وبعدين اتفرج بالصدفة على مشايخ الفضائيات.. بقتنع تماما ان الجماعة دول بيكرهوا الإسلام لا محاله.. هو ده المسلم الصحيح.. مسلم متعلم متنور فلح ونجح في كل حاجه عملها.. مفيش حاجه حط فيها ايده الا ونجحت.. حتى اللعب والهلس.. كان دايم يغلبني في البلاي ستيشن.. اشرف كان المثل الحى لشخص يتقال عليه امه داعياله.. مش امه بس.. دى نسوان عيلتهم كلهم دعوله.. حتى حماته كمان – ويا للعجب – حماته كانت بتحبه جدا وتدعيله ليل ونهار.. تخيلي ان دى اول مره – قبل حماتي العزيزة- اشوف حما.. تغلط بنتها قصاد جوزها؟؟
- سبحان الله.. اكيد كان بيعاملها كويس ومش بيضحك عليها بالكوميكس الرومانسية الإسلامية زى ما كنت بتعمل معايا كده يا ضلالي.
- هههههه.. انا كنت أقوله يا اشرف مثلاً انا عاوز حته كده حلوه تزغلل عينين البت.. بس حاجه يكون فيها قال الله وقال الرسول والحاجات الجامدة دى.. حكمه رومانسية كده مع صوره معبره واحاديث ومواقف وبتاع.. هو كان يغطس ويجيبلى موقف مستخبي من السيرة وانا اقله حلاوتك يا مولانا.. يا بتاع الدين.. يا متعمم.. و اخذ الكلام زى ماهو واحطهولك على صفحتك وأنا لا قريرته ولا فاهم ايه الموضوع.. أساسا كان في ساعات انتى بتسألبنى عن حاجات انا حطيتها من مواقف زى دى.. وانا ولا فاكر عنها اى حاجه واضطر انى اقلبها معاكي خناقه علشان كلمتيني وقت الشغل مثلاً.. اهو اى كلام رومانسي.. عبيط مع اى صورة اتنين عواجز ماسكين ايد بعض وللا شاب ملتحي بيسقي مراته ميه بأيده على أساس ان البلد مفياش كوبايات يعنى.. الحاجات الهابله الى بتعجب البنات دى.. الظريف انه كان دايماً يترأ معايا على بتوع السياسة ويقول يا حسنى متدخلش الدين في الجواز.. زى دعاوى فصل الدين عن السياسة كده.. انا وهو كنا مختلفين سياسيا اه.. انا مؤمن تماما بفصل الدين عن السياسة وهو مؤمن تماما ان الدين داخل في كل شيء بس من غير دروشة.. مش اى حد يتكلم كلمتين بالنحوي مع كام ايه يبقي محل

ثقه.. الحمد لله لحد اللحظة دى انا وهو أصحاب جدا.. اختلاف الرأي لا يفسد ابدًا للود قضيه.. في الآخر اتفقنا انا وهو على رفض الانقلاب.. وكنا متفقين على سطحية الاخوان.. كمان كنا متفقين ان الكل لازم يحترم رأى الصندوق.

- وهو فين دلوقتى؟

- بيحضر للدكتوراه علشان يروح إنجلترا.. المنطقة بتاعتنا دى مش على مقاسه.

- ما شاء الله.. طيب والثاني؟

- محمود.. ده بقي الى حكاية وحدوته مصرية بجد.. حنة عيل شربات.. كان ساكن جمبى في حدائق القبة.. شاب من الشباب الى اتربت في منطقته شعبيه محترمه ونظيفة.. عيل جدع كده وحرك ويعرف الكفت.. خريطة حيه لمصر.. واماكنها وشوارعها وحواريها.. بيحب البلد دى اكتر من امه.. زوج واب مثالي تماما.. ميعرفش من الدنيا كلها الا مراته وأولاده وامه.. اتربي يتيم من صغره لحد ما عوده بقي انشف من الزلط.. حياته كلها محروقه في خدمة بيته.. ماكينة شغل لا تهدأ ولا تكل ولا تمل.. كنا بنترياً عليه في الشركة ونقول انه عامل زى الفار الأزرق الى كان مع توم وجيري.. مجرد ما رجله تلمس الأرض يطلع يجرى علطول وكأن فيها زمبلك.. اهو محمود كان كده.. مجرد ما يدخل الشركة.. يفضل مكفى على المكتب ببشتغل لحد بليل.. لا عمره اشتكى ولا اتخانق مع حد.. لا عمره طلب زياده في المرتب ولا حد اشتكى منه.. سمعته نظيفة جدا وشخص فعلا يتصاحب.. كان ثوري بطريقه مرعبه.. اعتقد ان شعار يسقط الرئيس القادم ده طلع من عنده.. رافض لأى شيء وكل شيء جاى من الحكومة.. فاقد الثقة تماما في البلد وادارتها.. بيكره الداخلية بطريقه مرعبه.. اى انسان في نظره محترم لحد ما يبقي رئيس شركه او وزير او حاجه كده.. وطبعا شخصيه زى كده دبستنا في مشاكل بالهبل.

- ازاي؟

- مره كنا راكبين عربيتي ومروحين.. وقفنا لجنه عاديه على الطريق علشان يشوفوا الرخص.. الضابط كان الى حد ما محترم لكن الأمناء كانوا سخفاء كالعادة.. واحد منهم زود مع محمود في الكلام.. محمود اتعصب عليه وقاله جرى ايه يا عم.. هو كلها بقت اوتوبيسات العين السخنة وللا ايه.. بس.. وعينك ما تشوف الا النور..

- انا مش فاهمه.. ايه اوتوبيسات العين السخنة دى؟

- دى حادثه مشهوره اوى حصلت لشباب اسمه أمجد كان طالب في هندسة الجامعة الامريكية.. كان راكب في اوتوبيس راجع من العين السخنة للقاهرة.. شكله ابن ناس وفرفور شويه.. بيدو انه طنش الضابط واللجنة وقعد يشتغل على اللاب توب مع نفسه في الأوتوبيس مع صاحبتة.. يظهر ان شكله معجبش الضابط الى كان في لجنة المرور على الطريق.. او ان الضابط حب يعمل نمرة قصاص المزه الى مع أمجد.. ويبدو كمان ان الواد رد على الضابط رد مش تمام.. الضابط ساب الأوتوبيس كله ومسك في الواد ده.. واصر ان امين شرطه معاه يقوم مع الواد بدور فافاراج في فيلم الكرنك.. والواد قعد يصرخ ويستسمح الضابط.. والضابط مصمم.. في الآخر خالص الضابط اجره ييوس الأرض بين رجله.. والواد فعلا عمل كده.. وفعلا عتقوه من حادثة الاغتصاب دى.. بس الموضوع اتعرف وانتشر.. طبعا الوقت ده كانت الاحداث دى عماله تتسرب من الداخلية نفسها.. حادث سيد بلال السلفي بتاع اسكندرية.. عماد الكبير سواق الميكروباص بتاع امبابه وفيدوهات تانيه كتير تثبت عنف وغباء وقسوة أفراد الشرطة في التعامل مع الناس.. كل ده كان تمهيد للحادث الكبير في يناير 2011.. المسرحية الى مات فيها انصف ناس جابتهم مصر.. وطلع منها كسبان اوسخ ناس جابتهم مصر.. واتحبس فيها اهل ناس جابتهم مصر.. واتفق على قتلها واغتصابها احقر من ولدت النساء في مصر.

- اه والله.. ربنا مطلع ومنتقم.. المهم.. حصلكوا ايه في اللجنة دى؟

- الأمناء طبعا هاجوا علينا.. كان بينا وبين الحبس تكة صغيره اوى.. لولا ان الضابط الى في اللجنة كان معرفة واحد صديق.. فالحمد لله ربنا نجانا.. من ساعتها واتفقنا ان محمود ميتكلمش ابدًا في السياسة قصاص حد.

- اه يا عم.. ده ممكن يوديکوا فداھيه..
- كانت صحبه جميله اوى.. احنا التلاته قربنا من بعض جدا في سيکم.. اشرف كان على خلاف مع الدكتور صاحب الشركة علشان آراؤه.. ساعات كان يقولي انه انكر معلوما من الدين بالضرورة.. انا عن نفسي- محضرتش حاجه زى كده.. لكن اللى اعرفه ان اشرف مش بيکذب ابدا.. بينما محمود كان شايف ان الدكتور ده راجل فاضى ولازم يتجوز علشان يهدى ويعقل من كم الأفكار اللى فداهاغه دى.. بينما احنا التلاته متفقين ان ماجد مديرنا رجل زى الفل طالما هو بعيد عن اى شغل.. ومتفقين اننا هنعمل حاجه مع بعض.. ومتفقين كمان ان الشركة دى محطة مؤقته في حياتنا مش هنقف عندها كتير.. ومتفقين انهم لازم يجوزوني بأسرع طريقه علشان انهل من نهر العسل اللى هما بيطفحوا منه على رأى محمود ليل ونهار.. ده كان تعبير محمود وهو بيضحك.. كان دايمًا يقولي يا أبني الجواز ده نص الدين وبيطلع النص التاني.. فکده كده انت هتعيش بنص دين.. بکره مراتك تأکلك من ايديها وهي بتقولك اطفح يا حبيبي.. بميتين ام الهنا والشفاف على ديك ام قلبك.
- ليه يا عم.. هو متجوز مرتضى منصور!!
- ابدأ.. مراته كانت فحالها تماما وغلبانة.. بس هو كده.. الجواز نفسه وحش.. انما الستات دول اجمل حاجه في الدنيا.
- ماشى.. هعديها.. وبعدين.
- المهم بقي.. انا وأشرف ومحمود دماغنا اتفقت في حاجات كتير اوى.. وعلى رأى حسن الهلالي في فيلم امير الانتقام.. بارک الله في الصداقة القائمة على العمل اكثر من العمل القائم على الصداقة.. احنا الثلاثة كان عندنا نفس الاهتمامات التكنولوجية مع اختلاف تخصصاتنا.. احنا الثلاثة عندنا قدره على الشغل بدون توقف.. احنا الثلاثة عندنا نفس الرغبة في تحقيق اى شيء مهم في الحياة.. ولكن مش عارفين نعمل ايه بالظبط.
- المهم ان عندکوا الرغبة والقدرة والدافع.. الباقي بقي توفيق من ربنا.
- الله ينور عليكى.. صح تماما.. والنبي تستاهلي نص فرخة مکافأة
- هات.. انا حتى بقالي ساعه مکلتش.. انا نفساء متنساش.. وبعدين؟
- فضلنا نتخبط في کام فکره كده.. مره تصنیع خشب من قش الرز.. مره استضافة برامج الشركات الكبيرة على الانترنت.. مره برنامج نقاط بيع.. مره إعادة تدوير الزباله.. وهكذا.. لحد ما ربنا سبحانه وتعالى قرر انه يدينا جزء التعب ويبعثنا اول لمبة خضراء في الطريق.
- كانت ايه؟
- ال "RFID"
- مين؟
- هقولك متستعجلش.. كنا سافرنا احنا الثلاثة دى مع بعض علشان نحضر- معرض جيتكس بتاع نظم المعلومات سنة 2005. في المعرض قابلنا شركات كتير اوى وجمعنا معلومات بالهبل عن التكنولوجيات الجديدة.. لحد ما فيوم حضرنا سيمينار مع شركة هندية.. ووقعنا على الزغلول الكبير.. الفكرة اللى مفروض انها تأکنا ذهب ونعمل منها ملايين.. سمعنا الكلام من هنا.. وعنينا نورت وبرقت من هنا.. سبحانک يارب.. في نفس اللحظة بالظبط انا ومحمود قلنا هي دى.. بصينا لأشرف لقيناه بالفعل بيکتب شوية ملاحظات عن الفكرة وعن الشركة الهندي.. حسينا انها

اشاره من ربنا.. مخدناش وقت كبير اطلاقا.. بليل كنا على الكورنيش في دبي.. بناكل دره مسلوقة ونشرب شاي كرك ونخطط هنعمل ايه.

- كنتوا سمعتوا عنها قبل كده؟
- لا.. دى كانت اول مره نسمع الكلمة دى.. بس بنظرة متخصصين.. فهمنا انها حاجه كويسة.
- طيب انت عارف ان ثقافتى المانية ومش بفهم الإنجليزي.. يطلع ايه بقي ال RFID"ده؟
- ال RFID ده حاجه تحفه.. سحر.. تقدرى تقولى انه كان هيبقى بوابتنا الى عالم الملايين.
- تقصد ايه يا حضرة الزميل.. وضح أبن أفصح.
- ماشى.. هو عبارة عن.. وللا اقولك.. بعدين بقي.. انا قايم احضر الغداء.. عاوزه حاجه معينه؟
- أه عاوزه.
- عاوزه ايه؟
- عاوزه اطلق.. حمايتى مغلطتش ابدأ لما قالت ان انت رخم.
- طيب خلاص خلاص.. متزعليش.. هكمل
- الله عليك يا حبيب والديك.. حمايتى دى عمرها ما قالت كلمه صح فحقك ابدأ.. قول بقي.. ايه هو ال RFID ده؟
- ده يا ستي تكنولوجيا..
- وبعدين؟
- نكمل بعد ما أحضر الغداء بقي.
- امنت بالله العظيم.. انت غالبا هتموت محروق.

- ال "RFID" هو اختصار لجملة "Radio Frequency Identification" او التعرف على ماهية الأشياء عن طريق موجات الراديو.. بصورة ابسط هي تكنولوجيا لنقل البيانات -أيا كان نوعها- عن طريق موجات الراديو.. لا شبكات

كمبيوتر بأسلاك او شبكات من غير أسلاك ولا "UHF" او "VHF" من بتوع التلفزيون.. هننقل بيانات في الهواء العادي الى حوالينا ده.. زينا زى اى طريقة اتصال في الدنيا.. الفرق بس ان الناقل هنا او الأوتوبيس اللي بتركبه البيانات علشان تنتقل من مكان لآخر هو موجات الراديو العادية خالص.

- لا وضح شوية الله يكرمك.. انا كنت أدبي
- طيب ماشي.. تخيلي ان في قصادنا كيان معين.. اى شيء.. علبة دواء.. بقره.. انسان.. كمبيوتر.. اى حاجة.. الكيان او الحاجة او المنتج ده له بيانات.. قد تكون بيانات طبية او تاريخ الصيانة.. قد تكون بيانات التصنيع أو الصلاحية.. قد تكون بيانات الوزن والحجم وطرق التخزين.. اى شيء متعلق بالمنتج ده.. اى نوع من أنواع البيانات.. واضح لحد كده؟
- اه.. طبيعى جدا.. كل شيء في الدنيا له بيانات.
- رائع.. البيانات دى محتاجين ننقلها من مكان الى اخر.. محتاجين نقرا بيانات الحاجة دى علشان نتعرف عليها.. نتعرف عليها وقت البيع.. نتعرف عليها وقت الذبح.. نتعرف عليها وقت تحديد او اتخاذ اى قرار يتعلق بالحاجة دى.. لما تقولي مثلا انا عاوزه اشترى التلفزيون ده.. ده اسمه قرار.. القرار ده اخدته بناء على بيانات بتقول ان التلفزيون ده إمكانياته كذا وكذا.. اذن انتى تعرفي على بيانات التلفزيون ده.. بياناته انتقلت من ورقه مكتوبه جمبه الى مخك.. لما حضرتك تعرفي على التلفزيون.. خدتي قرار بشأنه.. الا وهو الشراء.. صح كده؟
- تمام.. زى ما أكون في الصيدلية مثلا واقرا بيانات علب الأدوية او مستحضرات التجميل.
- تمام جدا.. اهو ده بالضبط اللي بحكي فيه.. بس بدل ما قراءة البيانات تبقي بلدى بالشكل ده.. تبقي آلية.. بدل ما عينك هي اللي هتقرأ بيانات المنتج.. هيبقي عندي جهاز أكبر يقرأ بيانات مليون منتج في نفس اللحظة.. فاهمه؟
- مش متأكدة انى استوعبت.. يبدو ان الامر مش بالسهولة دى.
- هو فعلا كده.. مش بالسهولة دى اطلاقا.. لكن لو عرفتي تطبيقات ال "RFID" وبتستخدم في ايه.. يمكن الأمور توضح قصادك شويه.
- طيب ما تقول.
- الفكرة كلها عبارة عن قراءة بيانات مختزنة على شريحة مغناطيسيه بنسُميها "TAG" الشريحة دى أقدر اكتب عليها واقرا منها باستخدام قارئ في حجم الموبيل كده.. عملية القراءة والكتابة دى تتم عن طريق موجات الراديو العادية.
- زى الباركود يعنى؟
- الله ينور.. كده قربنا أوى وبدأني تفهميني.. نركز بقي شويه علشان الموضوع يوضح.. هو فعلا يشبه الباركود.. لكن الفرق ان الباركود شايل بيانات قليلة اوى وكمان لازم توجهي قارئ البيانات عليه مباشرة من قريب اوى علشان يتقري.. بمعنى اخر لو انتى في مخزن موجود فيه 10 الاف علبة عليها باركود.. فانتى محتاج تعملي سكان بقارئ الباركود ده 10 الاف مره.. مره على كل علبة.. صح؟
- مظبوط.. زى ما بنكون في السوبر ماركت وجايبين 5 علب عصير مثلا.. البائع بيعملهم سكان 5 مرات علشان سعرهم يبان على الشاشة وينزل في الفاتورة.
- صح أوي.. كمان رقم الباركود يخص النوع مش الوحدة نفسها.. يعنى الباركود لما يتقري.. يقولك ان دى علبة عصير مانجو 250 ملي.. لو عندك في المحل 1000 علبة عصير من دى هيبقي الباركود بتاعهم واحد.. صح؟

- اه طبعا.
- يعني لو حبيت اعرف رصيد المخزن بتاعى باستخدام الباركود.. ينفع؟؟
- لا بقي.. ينفع ازاي.. هتلاقى المخزن كله في رقم واحد بس لان كل نوع معين له باركود واحد بغض النظر عن العدد.
- الله عليكم.. 100% صح.. مع ال "RFID" بقي الامر مختلف شويه.. البيانات المخزنة في التاج بتاعه تخص الوحدة نفسها مش النوع.. يعنى هيبقي عندك 1000 تاج ل 1000 علبة عصير.. كل علبة منهم كأنها منتج لوحده تماما.. تخيل مثلا ان في بيان معين مميز لكل علبة من ال 1000 علبة دول.. باستخدام ال "RFID" بقي نقدر نحدد علبة معينة بعينها.. كمان مش محتاجين نقرب من العلبة وقت القراءة ولا حاجه.. انتى ممكن تقفى بره المخزن خالص وتدوسي على زر القراءة في الجهاز الى في ايدك.. الجهاز ده بيعت موجات راديو تنشط شريحة البيانات الموجودة على كل علبة من ال 10 الاف علبة الموجودين في المخزن.. تقوم كل شريحة منهم تبعت بياناتها تلقائيا للمصدر الى جاي منه موجات الراديو دى.. الكلام ده كله في ملي ثانيه.. يعنى نقدر نعمل جرد مثلا لمخزن في حجم وزارة الخارجية.. في اقل من دقيقة.
- يا سلام.. معقوله!!
- واكثر كمان.. انا لسه مقلتش اى حاجه.
- طب قول قول.. البتاع ده شكله مهم فعلا.
- لو اتكلمنا مثلا عن مجال المخازن ومراقبتها ومتابعة الأصول.. كل علبة بضاعة عندي هنعط عليها التاج ده.. وهي بتتقفل في الإنتاج هلزق عليها التاج.. زى ما بعمل في الباركود بالظبط.. وتدخل المخزن.. وانا قاعد في مكتبي ابص بصفه على الشاشة اعرف المخزن فيه ادايه.. لو قررت ابعت شحنة مثلا الى مكان تانى.. على باب المصنع هيبقي موجود جهاز تانى قارئ للتاج ده.. اول ما العربية تعدى منه وهي في طريقها للخروج.. هيقرأ الموجود فيها آليا.. ويبعت اس ام اس على موبايل المراقب.. الرسالة دى فيها عدد العلب الى خرجت من المصنع.. يعنى تأمين ضد أي سرقة.. اى علبة في المخزن او في العرض مثلا محطوبة مش في مكانها.. هتنور احمر.. علشان لو حد عقله وزه وحب يسرق باى طريقه من الطرق الخبيثة.. حتى لو شال التاج من على العلبة تماما.. برضه هيبان انها مش منوره خالص وبالتالي اعرف انها مختلفة عن الباقي.
- يا حلاوة.. ده كده مفيش اى احتمال للسرقة خالص.
- اطلاقا.. تخيلي بقي عربية البضاعة وهي مثلا خارجة من فرع العاشر من رمضان من المصنع.. بعنت رسالة علطول مجرد ما عدت من البوابة.. كل ده اوتوماتيك من غير ما حد يحس.. ولما وصلت مخازن العميل في بنها.. بعنت رسالة تانيه.. المسافة المفروض ساعتين.. يبغي لما الرسالة الثانية تيجى بعد 4 ساعات.. يبغي السواق كان بيعمل ايه؟
- يا بيلعب يا عمل حادثه.. يعنى صاحب البضاعة قاعد مأنتخ وعارف حاجته فين بالظبط.
- صح كده... بدأتي تفهمي اهو..
- طيب قول كده.. التاج ده ممكن يشيل بيانات كتير صح؟؟ انت قلت ان الباركود محدود.. مش بيشيل غير رقم أو رمز.. بينما دى مفتوحة.. يعنى ممكن أسجل عليها بيانات بدون حد أقصى.. صح؟
- مفيش حاجه اسمها بدون حد اقصى.. التاج مساحته تتراوح بين 256 بايت و256 ميغا بايت.. وعلى فكره.. بالنسبة للبيانات النصية.. ده رقم فوق العملاق.

- فعلا.. باى باى مصالح وسبوبات.
- ايه تانى..
- خدي تانى عندك.. اى شركة او مصنع له منتجات قابله للتداول والبيع.. ال "RFID" هيقيضيله تماما على السرقات او البضاعة الى بتبوظ علشان صلاحيتها قربت.. التليفزيونات مثلا بيبيقي لها شرائح مخصوصه.. الشريحة بتقدر تعرف التليفزيون ده اشتغل كام ساعة النهارده وجاب أنهى قناة وكل قناة اشتغلت ادايه.. وكلها بيانات في الاخر.. البيانات دى تهمل اوى بتوع التسويق.
- طب البيانات دى مفيدة في ايه؟
- البيانات دى لما تترتب وتتستف وتعرض بطريقه معينه بيبيقي اسمها معلومات.. المعلومات دى بتتباع لشركات التسويق والدعاية بمبالغ خرافية.. مش تسمعي مثلا حد يقولك ان البرنامج بتاعى حقق نسبة مشاهدته عالية.. او تلاقي ان الإعلانات في رمضان وقت الفطار بتبقي أسعارها مرعبه؟
- اه.. قصدك يعنى ان شركة التليفزيونات تلم البيانات دى من الأجهزة الى هي باعتها وتستفها وتبيعتها خالصه مخلصه لشركات التسويق.. الى هي بالتالي تقدر تحدد شرائح أسعار معينه للإعلانات بناء على بيانات حقيقيه اهي عن نسبة مشاهدة كل قناة؟
- الله ينور يا عسل.. صح.. الحريم لما بتفهم.. بتلعلع.
- وطبعا ده مكسب زيادة لمصنع التليفزيونات غير أرباح البيع.. لأنه هيزود سعر التليفزيون.
- وكمان كل فتره يقدر يلم بيانات تانيه عن التليفزيون بتاعه وتاريخ صيانتة وتصنيعه وإمكانياته.. انا كمنتج للتليفزيون ده أقدر احدد مثلا أنهى أماكن في مصر— بيكون فيها بيع نوع معين من التليفزيونات عالي او قليل.. وبالتالي أقدر استفيد من المعلومة دى عن طريق تحديد منتجات معينه لمناطق معينه.. بالتالي اخاطب الشريحة الصح في الوقت الصح في المكان الصح.. كل ده في الاخر نترجمه الى جملة واحد.. أرباح زيادة عن طريق مبيعات زيادة او تقليل التكلفة
- ااااا.. صح
- طيب.. خدي كمان بقي.. في اليابان العربية الشقيقة.. بحلول عام 2020 هيعملوا ايه في الهويات الشخصية والكلام ده؟
- ايه؟
- هيعملوا عليها ملوخية.. هيجيبوا شريحة في حجم حبة الرز البسمتي.. هيسجلوا عليها كل البيانات الممكنة للمواطن.. وتتحقن تحت الجلد.. ويبقي كده بيس.. يتحرك في اى مكان صحراء ان كان او بستان من غير اى ورق من اى نوع.. لو مجرم مثلا.. كده كده الشريحة بتاعته هيحصلها تحديث من الشرطة من غير ما هو يحس.. هيسخبي فين بقي المسكين؟ اى تعامل حكومي من اى نوع محدش هيقوله هات شهادة من اثنين موظفين إنك لسه حي واختمها من الاستاد ياماموتو عبد الدايم وبعدين روح اشترى بجنيه وربع دمغه من عند مدام اكيهيتا الهيروشيما فراج.. هو بس يروح المصلحة.. وبياناته كلها موجودة تحت جلده.. يعني لا تزوير ولا وقت ضائع في مجمع التحرير بتاع طوكيو.
- يا سلام.. زى الفيلم بتاع توم كروز.. لما كان مسئول عن عيال كده بتتنبأ بالمستقبل باين.

- اه بالظبط.. الفيلم كان اسمه "Minority Report".. هي فكره مشابهه.. شركات عملاقه زى ايكيا واي بي ام واوراكل وكارفور وهوم ديبو وسنتر بوينت.. كلها شغاله بالكلام ده دلوقتي.. اى شركة شغاله في مجال بيع وتخزين او تجارة التجزئة او ما شابه.. هتلاقى عندها الكلام ده.. فاكركه مترو الانفاق في نيويورك اول ما وصلنا.. لما قلتلك الكارت ده شغال بال "RFID".. وانتى قلتيلي اه.. سبحان الله وانتى مش فاهمه حاجه.
- اه.. الى هو مجرد ما انت قربت منه الباب راح فاتح علطول.
- ايوه.. لما قلتلك شفتي يا وليه.. حتى الامريكان يعرفوا أبو حمزة المصري.. اهو كان شغال بكده.. طيب فاكركه كارت الاوتيل.. الى كنا بس نقربه من الباب يروح الباب فاتح علطول؟
- اه.. اهو ده تلاقيه برضه "RFID" مش كده؟
- بالظبط.. ده غير مجالات تانيه بالهبل.
- طيب.. السؤال المهم بقي.. الكلام ده بكام؟
- اه.. جينا للكلام المهم.. الشريحة اللي بتشيل البيانات سعرها حسب حجمها ومدى ارسالها.. في شرائح تشيل 5 ميجا وتتقري من مسافة أقصاها 10 متر.. وفي شرائح تشيل 10 ميجا وتتقري من 150 كيلومتر بيستخدموها في المرور بدل الرادار لانها أكفأ.. الأسعار تتراوح ما بين 0.1 سنت أمريكي للشريحة.. الى 1500 دولار للشريحة.. طبعا كل مجال وله المناسب بتاعه.
- قولي مثلا.. حاجه زى بتاعة التليفزيون دى.. بكام؟
- يعنى.. نقول في المتوسط مثلا.. 3 دولار.
- يا دين النبي.. 3 دولار في القطعة صاحب المصنع هيزودهم على سعر التليفزيون يعنى تقريبا 15 جنيه.. الى هو أساسا انت ممكن تدى اكر منكم بقشيش للواد الرخم الى بيصمم يركبك التاكسي بعد ما تشتري.. ايه يعني 3 دولار زيادة في تمن التليفزيون هيدخلوا لصاحب المصنع اد كده.. أساسا هو كمان ممكن جدا ميزودش السعر ولا حاجه.. وكده كده سعر الشرائح هيبقي متغطي من المكسب الى جاى من سكه تانيه.
- بالظبط كده.. سعرها ولا حاجه.. في ناس كمان مزودتش اى أسعار واكتفت بالأرباح المهولة الى جت من ورا الكلام ده.. ماهو خدي بالك.. لما اوfer وقت.. معناها انا كسبت فلوس.. لما اوfer خامات.. معناها انا كسبت فلوس.. اى تقليل للتكلفة يبقي مكسب مادي علطول.
- اه طبعا.
- قيسي— على كده بقي.. كل مجال ندور فيه.. نلاقى ان ال "RFID" عامل فيه شغل عالي اوى.. في أوروبا واستراليا خلاص.. استخدامه بقي رسمي.. شركات التجزئة الكبيرة بقت بترفض ان مخازنها تستقبل اى بضاعة مفيش عليها التاج بتاع ال "RFID".. التكنولوجيا دى بدأت تغزو السوق بقوه والجيل الثالث نزل السوق كمان.. كان واضح اوى ان قصاها بالكتير اوى 5 سنين وتبقي هي الطريقة الرسمية للتعامل في العالم ونسمع سلام بودعك للباركود والى بيستخدم الباركود.. ده حتى السعودية الأيام دى مطبقاه في المرور على لوح نمر العربيات وبيفكروا يطبقوه في الحج.. حضاظه بلاستيك كده تتلبس في الايد علشان نتعرف على هويات وبيانات الملايين دى كلها.. انتى عارفه ان الحج بقي بتصريح.. الى مش معاه تصريح حج هتبقى ايده منوره احمر او مش منورة خالص.. وبالتالي يمنعوه من دخول مكة.. يعنى هيقدرنا أخيرا يسيطروا على الملايين دى كلها من اجل خدمات أفضل.. ده ان فلهوا يعنى.
- طيب.. عندي سؤال وياريت متريأش عليا

- قولي.
- لما بنروح سنتر بوينت مثلا.. في شرائح بلاستيك كده بتبقى في الهدوم.. بيشيلوها لما بندفع الحساب.. لو قربت من الباب من غير ما تشيلها.. جرس الإنذار بيضرب.. البتاعة دى تقربلكوا؟
- طبعا.. دى صوره من صور ال "RFID" وتطبيقاته الغير منتهيه.. هتلاقى على الباب حاجه زى لوح بلاستيك واقف كده.. ده القارئ.. مجرد ما تقري منه.. الشريحة ذات المدى القصير جدا تتنشط علطول وتبعث اى بيانات.. المفروض ان مكانها مش هنا.. معنى كده انها بتحاول تخرج من المحل بصورة مش قانونيه.. تبقي سرقه علطول وهوب.. الانذار يضر.
- ياااااااااااا.. تخيل انت محل زى زارا وللا كارفور عندهم اد ايه من الشرائح دى.. ده انت ممكن تكسب بالهبل من الشرائح بس.
- اهو ده اخر حاجه فكرنا نطلع منها مكسب.. الهاردوير.. القارئ والشرائح سعرها هيبقي معروف.. مفيهاش مكسب كثير.. بينما السوفت وير الى هيبقي معاها بقي.. هو ده الى كان فيه الكلام واللعب كله.. ده الى فيه الابداع البشرى.. التكنولوجيا اهى.. انت بقي هتستخدمها ازاي؟؟ هو ده السؤال.. دايمًا سعر السوفت وير اعلى بكتير اوى من الهاردوير.. سألتبني انتى من يومين على السيرفر الى كنت شغال عليه في الشركة من يومين وضرب.. اهو ده مثلا تمناه 90 ألف دولار.. السوفت وير الى عليه بقي.. ب 380 ألف دولار.
- ليه الفرق المرعب ده؟؟؟
- هو دايمًا كده.. سوفت وير يعنى أفكار.. يعنى ابداع.. يعنى إمكانيات لا محدودة انا بزودها للماكينة دى.
- طيب سؤال تانى.. الموجات دى مش مضره طبيا؟ تعمل مثلا سرطان وللا يكون فيها اشعاع او كده.
- كده انتى فهمتي الفكرة بس مش فاهمه فكرة النقل.
- الحقيقة اه.
- طيب.. بصي يا غسل.. عمرك سمعتى عن حد جاله تسمم من إذاعة الشرق الأوسط وللا تلبك البرنامج العام او مثلا حد جاله مغص لأنه سمع إذاعة القرآن الكريم طول اليوم؟؟
- اه.. الكفار بيستمعوا القرآن ويجيلهم صرع.
- الكلام ده في فيلم الأنس والجن بس.. ماهو القرآن شغال حوالينا اهو هنا في كل مكان.. ولا حد انصرع ولا حد خد باله أساسا.
- ههههههه.. انا بهزر طبعا.
- ماشي.. موجات الراديو هي الوسط الى بتتحرك فيه البيانات بتاعتنا رايحه جايه.. نفترض ان البيانات دى بتركب مركبه فضائية في حجم علبة الكبريت مثلا.. العلبة دى حماية للبيانات علشان متختلطتش مع اى بيانات تانيه.. كل علب الكبريت دى بتطير في الهواء محمولة على كفوف الراحة من موجات الراديو.. موجات الراديو هي الى لها القدرة على التحرك والتنقل في الهواء العادي.. قوم بقي وهي ماشيه تاخذ علب البيانات في سكتها.. الموجه الواحد ممكن تبقي شايه بيانات من نجوم اف ام + بيانات "RFID" + إشارات اللاسلكي بتاع أمناء الشرطة وطائر في الهواء بأمان على رأى محمد رشدي لما قال طائر يا هواء طائر على الميناء

- الهواء اللي طايير رايح يخبر اهلهم ده.. شابل كمان بيانات "RFID"؟

- اه طبعاً.. الهواء ده هيفتن على رشا الى راحت تقابل هيثم من ورا ابوها.. وفي نفس الوقت هيعمل مصلحه لناس بتشتغل وتكسب.

- طيب والتجسس والمخابرات بقي وكده.. من نمر الى اسد.. من نمر الى اسد.. البضاعة في بطن الزير.. ده برضه ماشي في نفس الهواء اللي رايح يفتن على العيال؟؟

- اه ولا.. اتصالات المخبرات والاجهزة الامنية بتبقي على موجات تانيه خالص متأمنه كويس وصعب اختراقها.. في نفس الهواء اه.. لكن مقفولة.. وبعدين زمن التجسس بموجات الراديو وكتاب الشفرة والحبر السري ده اخر واحد عمله كان مسيلمة الكذاب وهو بيتجسس على جيش اسامه بن زيد.

- امال انتوفی ال "RFID" شغالین علی ایہ؟؟

- على الموجه المتوسطه العادية.. بصي كده على اى راديو.. هتلاقى جمب مؤشر المحطات فى حروف

AM / FM / SW / MW

دى عباره عن اطوال الموجات اللى بتنقل البيانات.. اذاعاتنا مثلا كلها شغال على الموجه المتوسطة.. في بعض الإذاعات عندها تكنولوجيا بـث مختلفة بتشغل على موجات الـ "FM". في اذاعات تانيه شغاله على الموجه القصيرة.. الـ "SW" وهكذا.. الخلاصة.. هـى امانه تماما طبيا.

- طيب سؤال أسرع من السرعة السريعة.. مكانش في اسم أحسن من كده شويه؟؟ حاسه ان افراد ده اسم تعبان اوى.

- ههههههه.. المشروع كله كان قايم على فكرة التحكم في المخزون باستخدام موجات الراديو.. بالإنجليزي هتبقى كده..

Inventory Control Using Radio Waves

جربي معايا كده.. اهم كلمتين في الجملة دي هما "INVENTORY" و"RADIO".. تعالى نلعب معاهم شويه.. ناخذ حته من هنا وحته من هنا.."INV RADIO".. لا مش لطيف.. طيب نجرب تاني.. InvRad. نصها مخازن ونصها راديو.. بالعربي البسيط تتقري انفراد.. على أساس اننا أول ناس "انفردنا" بالتكنولوجيا دي في مصر.. من هنا جه الاسم.. انفراد.. واللوجو كان هديه من مصمم الجرافيك بتاع شركة الأورجانيك الله يمسيه بالخير.. جورج ميشيل.. او الشيخ جورج زى ما كنا مسميينه.. أصله كان شبه صفوت حجازي بتاع الاخوان اوى... هههههههه ابابا!!!!!!

- طیب.. اتفقتوا علی ایه بقی؟ هتعملوا ایه بالبتاع ده؟

- اتفقنا علی کل خیر.. ویا ربنا ما اتفقنا.

- ليه.. ايه الى حصل.. ومن فضلك متقولش حصل وطحينه علشان متقولنيش.

- اللى حصل ان حضرتك ان بسبب الموضوع ده انا أترميت في الحبس.

- أنت كررت الكلمة دي كتير ومقلتش اى تفاصيل.. انت بتتكلم جد فعلا؟

- اه والله.. وهو الحاجات دی فیها هزار؟

- طيب قول.. ايه بقي.

- ماشي.. هحكليك الرحلة.

رحلة الفشل.

معلومات اكثر عن ال RFID

[/http://www.tragging.com/ar/about-rfid-2](http://www.tragging.com/ar/about-rfid-2)

[...%_https://ar.wikipedia.org/.../%D8%AA%D8%AD%D8%AF%D9%8A%D8%AF](https://ar.wikipedia.org/.../%D8%AA%D8%AD%D8%AF%D9%8A%D8%AF...%_)

ماهو "RFID" – فيديو 2:00 دقيقة

<https://www.youtube.com/watch?v=Xe7UaH20n7A>

كيف يعمل "RFID" – فيديو 2:30 دقيقة

<https://www.youtube.com/watch?v=yNPDgudPmXE>

احنا اتفقنا على كتمان الموضوع تماما.. على الأقل لحد ما نعرف هنعمل ايه وخطواتنا هتبقى ازاي.. مصر- مفهياش اسهل من السرقة.. الواحد يبقي شقيان في فكرة سنين وهوب ييجي واحد تاني على الجاهز ينسبها لنفسه بمنتهى السهولة.. اخلاقيات المصريين اجبرتنا على كتمان الموضوع تماما.. وبالفعل.. اشتغلنا على الكلام ده 3 شهور كامله في السر- تماما.. انا رحلت الهند وأشرف سافر الصين ومحمود راح ايرلندا.. جمعنا بيانات عن كل حاجة تخص الموضوع ده.. مش كده وبس.. لا.. حضرنا كورسات عن الموضوع.. دفعنا فيها فلوس كتير لأنها كانت غالية اوى.. طبيعي جدا.. مجال لسه محدث يعرفه فطبيعي يكون العلم فيه تمنه غالى.. اشرف اشترلنا عينات للتجربة من الصين.. ومحمود جاب حالات كامله لشركات مطبقة الكلام ده "Case Study" نتعلم منها ونستفيد من تجربتهم.. وانا رجعت من الهند باتفاق مع 3 شركات مستعدين يدونا التوكيل بتاعهم في مصر.. وما ادراني ماهو التوكيل.. توكيل يعنى دعم مادي وعلمي ومبيعات ومشاريع جوا وبره مصر.. يعنى هنشتغل باسمهم وهنبقي جزء منهم في مقابل نسبة من الارباح.. ال 3 سفريات كلفونا 25 الف دولار.. لكن الفايده من وراهم كانت رهيبه.. الاتفاقات ووضوح الرؤية.. ده طبعا غير كم مهول من الكتب والسيديهات.. بقيت أقول لل "RFID" في اى مكان خد بالك...

سيديها تاتك معايا زى الخلق مرتضى كده.. ملينا 6 شنت سفر كبيره أوراق وكتب ومراجع عن الموضوع ده.. تحولت شقتي في حدائق القبه الى أول مخزن ومعمل للـ "RFID" في مصر.. استغرقنا في المشروع ده تماما بكل جوارحنا حتى اننا بقينا نروح الشركة نجتمع كلنا في مكتب اشرف ونقفله علينا من جوا علشان مفيش كلمه تنتشر- كده وللا كده والمستور ينكشف والكلاب مفيش اكر منهم.. وبعد الشغل نجتمع عندي في البيت لحد الساعة 3 و4 الفجر.. اى اكل يصلب طولنا وخلص.. طبعاً مرات محمود شكت انه متجوز عليها وكلمت مرات اشرف.. الاتنين اتفقوا ان الرجلين من ساعة ما عرفوا الجدة الفاسق العزبنجى الى هو أنا وهما حالهم في النازل.. فجأة بقيت انا راسبوتين الواجب التخلص منه.

- معاهم حق ولازم يشكوا طبعاً.. عملوا ايه بقي بعد الشك ده؟
- وقفولي تحت البيت وقعدوا يقولوا الغازية لازم تنزل.
- ههههههه.. بجد والله.. عملوا ايه؟؟
- في يوم كبسوا علينا هما الاتنين في شقتي في الحدائق.. مرات محمود اقتحمت علينا البيت وهي عماله تصرخ.. هي فين.. هي فين.. فين الى انت بتخوني معاها يا فلاني يا ابو عين زائغة.. وكمان معاك صحابك.. ايه عاملينها حفله.. بقي دي اخره العشره يا محمود وانا شغاله خدامه ليك انت وعياللك.. وقعدت تلف في البيت زى المجنونة تفتح في الدولار وتدور تحت السرير.. أساساً الشقة مكانش فيها غير سرير واحد ودولاب واحد وترابيزة صغيره واحده.. الدولار مليون كتب والسرير عليه كل ما تتخيلي من مقومات الحياة.. براد شاي وبقايا اكل.. شرابات وهدوم مش نظيفة.. كتب وورق وكله كله.
- يا لهوى.. معقول؟
- فضحتني وسط الجيران الله يسامحها.. وفي الاخر طبعاً ملقتش حاجه غير الشغل.. فقعدت تعيط في الصالة.
- ومرات اشرف؟
- دى الى كانت كوهين.. فضلت ساكنه خالص تشتري ومتبيعش.. واضح ان اشرف كانت ايده عليه في البيت بينما محمود كان حنين ورومانسي.
- ههههههه.. يا لهوى على ده موقف.
- موقف طين.. المهم بقي انهم لما اقتحموا علينا البيت.. كنا بنصلي العشاء.. انا دايماً كنت بسبب باب البيت موارد علشان لو حد من صحابي جه وانا مش موجود او جه وانا نايم.. يقوم يدخل من غير دوشه.. محدش كان يعرف كده الا أصحابي بس.. شقتي كانت ملتقى لكل الشباب والله الحمد في غير اى خطأ.. اخرنا كانت بولة الاستيميشن او الطاولة والدومينو.. هي اقتحمت البيت لقتنا بنصلي ورا اشرف.. ورغم كده.. برضه دخلت تدور زى المجنونة في كل حته.
- الغيرة يا أبني.. الغيرة دى شيء مرعب.. محدش هيفهم المرأة الا المرأة.
- مرأة ايه.. الله ينعل أبو المرأة ان كانت بالهبل والتفاهة والسطحية دى.. هي ممكن تشك اه.. انما دخلت لقتنا بنصلي وكلمت بحث.. فكرها يعني اننا جايين مزز وسايينهم جوا علشان نخطف العشاء وبعد كده هندخل نلعب معاهم بنك الحظ؟ والنبي ده كلام.. نسوان خلل صحيح.
- ههههههه.. تصدق عندك حق.

- وبعدين المفروض ان كل واحد عارفه جوزها وحدود اخلاقياته.. كل واحد تغير اه.. انما تشك في جوزها بعد 8 سنين جواز و3 عيال.. تبقي وليه مجنونه طبعا.
- احمد.
- نعم.
- اوعى تكون لما كنت بتتأخر في الشغل بتبقي سهران مع المز.
- طبعا امال ايه.. ده انا بقعد في الشركة سته على يميني وستة على شمالي ولا أبو لهب المفترى عليه.
- طيب بالله عليك متبقاش تنسى تصلى العشاء.. متخليش المصيبة مصيبتين.. مزز واهمال في الصلاة.
- لا ازاي.. ده احنا بنصلي مع بعض كلنا.. اسره واحد كده مع بعضينا على رأى خالد الصاوي.
- ههههههه.. وبعدين طيب.. حصل ايه؟
- مفيش.. واضح ان المسكين محمود كان متعود على الجنان الحريمي ده.. الحريم مشيوا طبعا واحنا كملنا شغل.
- لا لا ميصحش.. على الأقل كانوا روحوهم البيت.. خصوصا انك بتقول الوقت كان متأخر..
- ما هي مرات اشرف كان معاها عربييه ومحمود كان ساكن بعدى بشارعين.. كمان احنا كنا مستغرقين بطريقه لا تتخيلوها.. يعنى انا مثلا كنت اولع سيجاره وانا بشتغل.. اخذ منها نفس وبعدين اولع واحد تانيه في نفس الوقت والاولانية لسه والعه.. ويا ما السجاير وقعت على هدومي وعلى الأرض وكانت هتعمل كوارث.. استغرق وتركيز تاتاتاتاتاتاتاتام.
- طب والشركة والشغل.. عملتوا فيهم ايه؟
- الشركة كانت اخر حاجه تهتم بيها هي الشغل.. محدش سأل علينا خالص ولا احنا سألنا على حد.. المهم بنحضر.. الدائرة والاجتماعات.. وشكرا على كده.
- اكيد طبعا طلع عليكو سمعه ان انتو بترتبوا لمصيبه مثلا وللا حاجه زى دى.
- الحقيقة اه.. بس لولا وجودي معاهم كانوا بلغوا عنهم فعلا.. اشرف كان مشهور عنه انه اخوان وهو مش كده.. انما هو التوجس الطبيعي من اى حد متدين في بلد تكره الدين بشده.. محمود معروف انه ثوري وبتاع قلق.. الاتنين مع بعض معناها ان في حاجه بتترتب ضد النظام.. لكن وجودي فركش الفكرة دى تماما.. على اعتبار انه كان معروف انى حزب وطني.. محدش ممكن يفكر ان حد من الحزب الوطني يكون بيدبر حاجه لقلب نظام الحكم مثلا بالاشتراك مع اخواني ويساري.
- يا بتاع الفلول انت.. يا مترشح.
- وقتها مكانش في الكلام ده.. اتخنها تخين في مصر.. كان يعرف حسن البنا بالعافية.. خدى بالك ان الكلام ده كان سنة 2006.. وقتها كان إبراهيم عيسى مناضل ومصطفى بكرى صحفي ثوري معارض وخيرت الشاطر كان مجهول تماما.. في الوقت ده مرشد الاخوان كان بيقول على مبارك اب حنون نتمنى كلنا نقعد معاه.. دكتور محمد الجوادي مثلا عمل كتاب اسمه النخبة المصرية الحاكمة اتنشر.. تبع مكتبة مدبولي.. كان ناقص يقول فيه على مبارك صلى الله عليه وسلم.. محدش كان عارف اى شيء عن اى شيء وكلنا فرحانين بكأس أمم افريقيا والمنتخب.

امممم.. ماشي.. فكنا من شغل السياسة ده.. خرينا في ال "RFID".

على رأيك.. احنا بقي فضلنا نستف ونرتب الأوراق.. نقرأ ونجمع معلومات.. شغلنا الأجهزة اللي اشتريناها من بره في مشاريع صغيرة اوى كتجربة مش اكرت.. بقينا محترفين في الاجهزة وإصلاحها وتركيبها وبرمجتها.. مش كده وبس.. عملنا تعديل صغير كده على قارئ منهم.. فكينا الجهاز نفسه وبدلنا لوحة المفاتيح.. حطينا بدل الاصلية اللي بتكتب إنجليزي واحدة ثانية تكتب وتقرأ إنجليزي وعربي.. وصلنا الى درجه عالية اوى من احتراف الموضوع ده وبقينا جاهزين نقدمه للسوق.. استقر فكرنا ان الفكرة دى هتظهر اوى وتلعلع وتبان فعاليتها وأهميتها في المنتجات الصغيرة والمتوسطة الحجم في تجارة التجزئة.. لاب توب.. تليفزيون.. مصانع الاكل والأدوية وما شابه.. قدرنا نحصر.. في مصر.. بس 6800 شركة ومصنع نقدر نقدملهم فكرتنا... بحسبه بسيطة كده.. لو قلنا ان مثلا 50% منهم هيسمعونا.. 40% هيطلبوا عرض أسعار.. 20% هيفاصلوا ويقرفونا وفي الآخر 3% هيشترخوا.. يعنى ممكن يبقى عندنا 200 عميل تقريبا.. ال 200 عميل دول لو الفكرة نجحت بسهولة جدا هيقوا 500.. والبلية تلعب بقى.

طیب هتکسبوا من العمیل الواحد ادایه؟

في الأول قلنا كرقم تقريبي كده.. حوالى 50 الف جنيه ممكن يكون صافي أرباح المشروع الواحد.

ممممم.. يعنى 10 مليون جنيه.. يا ولاد الايه يا لعبه.. متقولش ان الفكرة اتسرفت.

4

مالك يا راجل.

[illegible]

اللّٰه.. احمد.. انت اتجننت.

معلش... ههههههه اصلى مش قا.. ههههههه... كل ما افكر ال ههههههه.

طب اشرب ميه كده وصلى على النبي.

- هههههههه كح كح كح.. هههههههه كح كح... اااااااااااااااااااا... خير يارب اللهم اجعله خير.. اللهم صل عليك يا نبي.

اهدی یا عم.. اهدی.. مالک بقی.. بتضحک علی ایہ.

بضحك لما قلتلك ممكن نكسب متوسط 50 الف جنيهه في المشروع وانتى شغلتى ماكينة القر على 10 مليون جنيهه وكده.

امال اہ؟

هديك مثال بسيط اوى.. في عميل قدمنا له شغلنا.. كانت شركة جابكو بتاعة البترول.. كان عندهم مشروع حوالين مواسير الزيت في البحر الأحمر.. الجزء بتاع ال "IT" بس في المشروع ده كانت ميزانيته 25 مليون جنيه.. منهم 7 مليون جنيه كامله لمشروع بيانات مواسير الزيت.. ده كمرحلة أولى بس.

نعم!!

- اه والله.. ميزانية المشروع 7 مليون جنيه.. في العادة أرباح شركات نظم المعلومات بتكون من 30 الى 36% يعني ال 7 مليون دول لنا فيهم ما يقرب من 2.5 مليون جنيه مصري.. ده اول مرحله من مشروع واحد.. المشروع كان 4 مراحل على فكره.
- يعني 10 مليون برضه.. مغلطتش اهو.
- 10 مليون ده تقديرى انتى.. بعدين ده عميل واحد.. مش ال 200 عميل.
- يعنى ايه تقديرى انا.. مش انت اللى بتقول اهو؟
- يعنى حضرتك في حاجه في الشغل بتاعنا دايم اسمها "up-sales".. احط رجلى عند العميل.. بعد كده بنلاقي فرص بالهبل بتتفتح عنده.. يعنى لما اروح ابيعله مشروع ب 7 مليون جنيه هفضل شغال فيه سنه.. معناها انى ممكن اطلع شغل تانى من عنده ب كمان 7 مليون على الأقل وانا ورزقي.. يعنى بعد 3 او 4 سنين من الشغل مع العميل ده أكون عملت من وراه 20 او 30 مليون وانا في الأساس مقدمله اول مشروع ب 7 مليون.. تمام كده زى ما تجيبى نقاش يدهنلك حيطه فيعجبك شغله وتقرري تدهني البيت كله والسقف بالمره واختك تشوفه فتقرر تتعامل معاه وهكذا.. الشغل بييجب شغل خصوصاً لو السمعة حلوه والتقفيل نظيف.
- ممممم.. ده كده اول عميل بس.
- اى نعم.. وكمان الجزء بتاع ال "RFID" عندهم مكانش أساسى.. ده كان حاجه كده فرعيه في المشروع الكبير.. لسه لما أحكيلك على مقابلتنا مع صاحب شركة تليفزيونات كبيرة.. ممكن يغمى عليكى.. ده غير ان في عامل مهم أوى سقط من الكلام عن المشروع ده دلوقتى.
- ايه هو؟
- بابا
- ايه ده.. هو عمى اشتغل معاكوا في الليلة دى؟
- بابا مش بس اشتغل.. ده أنا اكتشفت ابويا وانا سنى 27 سنه.. اكتشفت انى كنت عايش مع كنز على بابا طول عمرى وانا زى الحمار ولا واخد بالي.
- حصل ايه؟؟
- خليها لوقتها.. المهم.. جهزنا نفسنا تماما وعرضنا الامر كله على ماجد مديرنا.
- ماجد!! مش معقول.. انت مش قلت كنتوا دافنين على الخبر؟
- اه.. بس صرحنا في الوقت المناسب.. ماجد كان هو انسب واحد يساعدنا في المرحلة دى.. في سنة 2004 إدارة ال "IT" في الشركة كسبت المركز الأول في مسابقه تبع وزارة الاتصالات اسمها "TDF".. دى كانت مسابقه لشباب الخريجين والشركات الصغيرة العاملة في مجال تكنولوجيا المعلومات.. حاجه كده تشجيع من الدولة ودعم للمواهب الشابة.. الجائزة الأولى كانت مليون جنيه.. بس محدش بياخدهم كاش.. الكسبان بياخدهم في صورة خدمات تأسيس شركه جديده.. شركه مدفوعة الايجار والمرتببات في القرية الذكية.. اشتراك انترنت مدفوع لمدة سنه.. وهكذا.. بمعنى آخر.. الدولة عن طريق وزارة الاتصالات كانت بتحاول تساعد شباب الخريجين انهم يعملوا شركات يشتغلوا فيها بالفكره بتاعتهم.. بدل ما يدوهم فلوس في أيديهم يتجوزوا بيها على نسوانهم او يشرحبوا بيها سجاثر.

- معقول.. الكلام ده في مصر؟
- اه وربنا.. في مصر.. بس التاتش المصري طبعا خرب كل حاجة.. فهمتي بقي لما قلتلك ان احمد نظيف كان نعمه لينا بينما النظام كله كان نعمه على البلد كنت اقصد ايه؟ احمد نظيف كان مهندس شاطر وعبقري.. لكنه كان سياسي فاسد.. او للأنصاف نقدر نقول انه كان سياسي مصري طبيعي.. البلد دى فعلا بتدفع كتير اوى لأهلها.. ومع ذلك تستاهل السب واللعن.. بنصرف كتير ولكن في غير محله.. ميزانيتنا كبيره تكفى وتفيض كمان.. بس القائمين على صرف الفلوس ما بين ولاد كلب حراميه او جهله ميعرفوش حاجه.. نبني مساكن للفقراء.. بس نبنيها عشوائية وغلط ونوزعها بالواسطة.. نعالج على نفقة الدولة.. بس نعالج الغير محتاج والضباط والفنانين.. عندنا قوانين وقواعد وكل حاجه.. بس التطبيق غلط.. تحسى ان في حد بيتعمد يتف على التورتاية دايمًا بعد ما تخلص.
- ليه بقي؟
- هتعرفي كل حاجه في وقتها.. المهم خليني اكملك بس علشان تسلسل الاحداث.
- كمل يا بتاع التكنولوجيا.. يا متصطب.
- ماجد كان عنده خبره في المسابقة دى.. هو كان احسن واحد يظبطلنا ملف تمام نكسب بيه.. مليون جنيه كانوا كافيين جدا علشان نأسس الشركة.. ونفتح السوق.. كمان ماجد غنى جدا وشبعان والشغل كله مش في دماغه.. يعنى ماجد ممكن يسبب فرصة شغل يكسب من وراها مليون جنيه ويروح يحضر موعظة من البابا شنودة مثلاً.. كان رجل ديني تماما.. بقول آخر مش هينط في الحلل معانا.
- منطق برضه.
- المهم.. ماجد عزمنا على رحله لدير الانبا بولا الى في طريق السويس.. قال تعالوا قضوا معايا يوم هناك.. تغسلوا ارواحكو من الخطايا وتكلم براحتنا هناك.. الجو هناك ممتاز جدا.. وافقنا من غير اى مشكله.. جو الأديرة هایل جدا وممتاز للتركيز.. لا يعيبه الا ان هناك مفيش تدخين.. مش مهم.. المهم اننا نظبط الليلة كلها علشان نقدم في المسابقة ونبقى بعيد عن عيون النسوان المجانين اياها.. وكده كده لو دخنت هناك محدش هيلومنى.. مسلم بقي ومعرفش الجو ده.. ولو حد قالنا كلمه كده وللا كده.. هتبقى فتنه طائفية.. ههههههه.
- ورحتوا الدير؟
- اه.. كنا مستعدين للذهاب الى الكنيسة ذاته زى ما قال السادات الله يرحمه.. احنا كان ممكن نروح جهنم نفسها علشان المشروع ده.. كمان مكانش عندنا اى تخوف.. انا اعرف ان الأديرة بتستقبل زوار عادى.. كان عندنا دير الملاك في حدائق القبه.. ياما رحته مع شلة الكلية عادى جدا.
- ومخفتوش؟
- نخاف من ايه؟
- مسلمين ورايحين الدير.. هيكونوا رايحين يعملوا ايه يعني.. كمان بيقولوا يا أبني الأديرة فيها اسلحه؟
- هما مين اللى بيقولوا؟
- انا معرفش.. انا اسمع بس.

- اه.. فيها طبعاً اسلحه امال ايه.. ده حتى واحنا في الدير عدى قصادنا البابا كيرلس السابع.. ده اللى يبقى اخو فرناندو الثاني الى طرد المسلمين من اسبانيا.. كان راكب الدبابة بتاعته وعامل فيها روش ومشغل اغنية اديك في الجركن تركن في الكاسيت بتاع الدبابة وسلم علينا من طرف مناخيره كده وقال فل عليكم يا مسلمين.. العذراء تحميكم.. فانا طبعاً مباحبش حد يتنطط عليا.. رحت مسلم عليه من بعيد برضه وقتله وعليكم يا خواجه.. اتفضل معانا كبده وسجق.. قالي لا انا صايم.

- بجد يا اخى.. بطل ترياه بقي.

- ماهو الكلام ده ميتردش عليه الا بالترياه.. اى انسان راح اى دير في الدنيا مش هيملك الا انه يضحك من الكلام ده.. يضحك من تسطيح الاشاعات ويضحك من جهل الى يصدق.. يضحك من شعب الجهل تغلغل فيه حتى النخاع وعمي قلبه لدرجة انه يصدق ويردد كلام.. مجرد كلام.. كلام اهل مفيش عليها ولا ربع قرينه حتى اللهم الا كلام محامي وسياسي كبير المفروض يكون اعقل من الهبل ده.. المحامي لهدف ما طلب انهم يفتحوا الأديرة للتفتيش ولما رفضوا قال بالاس.. اهو ده دليل اهو.

- طيب هما مفتحوش الأديرة ليه لو كان مفيهاش حاجة؟

- والنبي!! بالله العظيم انا لو مكانهم وحد قال كده على مسجد لهطلع على الملاء أقول اه.. المساجد فيها اسلحه يا ولاد ال "تبيييبيبييت" واللى هيقرب منها هفرتك لحمه.. بالذمة بقي ده كلام.. بيوت للعبادة يتقال عليها كده.. وبديل ما نلوم الى بيتكم بدون دليل.. نقوم نلوم الضحية الى رفض ان حريته تنتهك بالطريقة القذرة دى.. بقي انا أقول لابو العروسة انا عاوز اكشف على بنتك وأشوفها نظيفة وللا مستعمله.. ولو رفض.. أقوله يبقى انت عاوز تلبسني في الحيط!! وفي الآخر مستغربين ان حد في البلد دى طلع يقول على البنت الى اتعرت من الكلاب ايه الى وداها هناك؟؟ يا عزيزتي الفاضلة.. كلنا صاحب قرون بشكل او بآخر.. كلنا محجوب عبد الدائم وان انكرنا الفعل.

- عندك حق فعلاً.. انا عمري ما فكرت في الموضوع كده.. لا حول ولا قوة الا بالله.. والله يا اخى جاجه تحزن.. وبعدين طيب حصل ايه؟

- بس يا ستي.. رحنا الدير.. قضينا هناك اليوم كله.. ماجد فوجئ بكم المعلومات الى عندنا.. حطلنا الأساسيات ورسملنا الخطوط العريضة العامة للملف.. وبدأنا احنا الثلاثة نستف البيانات والمعلومات ونكمل.. لحد ما عملنا ملف كامل 280 صفحه ندخل بيهم التاريخ.. الملف كان قوى جدا.. رسومات بيانیه.. دراسات جدوى كامله ساعدنا فيها محاسب تكاليف محترف.. سكرين شوتس من السوفت وير الى عملناه للأجهزة دى.. كمان كان في جزء لتوصيف الشركة الى عاوزين نعملها وعدد موظفيها وتوصيف الوظائف ومتوسط المرتبات.. الملف ده مش ناقصه الا واحد معاه فلوس ويبقي شركه بعد 3 فيمتو ثانية بالظبط.

- طيب.. لحد كده الأمور فل اهو.. قدمتموا في المسابقة؟

- اه.

- وبعدين؟

- بس.

- بس ايه؟

- قدمنا.

- ايوه.. بعد ما قدمتموا حصل ايه؟

- بس.
- اتبسلك ما دقتة يا بعيد.. ما تقول يا راجل حصل ايه.
- حصل وطحينه.. هههههه.
- تانى.. تصدق انا غلطانة.. انا هتصل ب 911 علشان ييجوا يقبضوا عليك لأنك مش بتحترم شعوري وأناى ام الواد اطلقى البخور يا خاله ناظيما.
- ماشى.. خليههم يقبضوا عليا ويفوتك الى حصل.
- ماهو انت مش عاوز تقول اهو
- أقول ايه؟
- تقول الى حصل.
- اقولك بس توعديني من غير مقاطعه؟
- اه.. اوعدك.
- حصل وطحيننا... هههههه
- طلقنا!!!!!!!!!!!!!!!!!!!!!!!!!!!!!! اى.

بروميثيوس المصري

ام حمزة على نار.. الموضوع فعلا بدأ يتشعب ويسخن.. كنت بحكي الموضوع بحراره وقوه.. مع كل لحظة كنت بسترجع الذكريات كلها وبسخن وبتفاعل مع المواقف.. مره أقوم أقف.. ومره اتمشي.. في الأوضة.. دراغي بيتحرك غصب عني ونبرة صوتي تعلي أو توطي من غير ما أحس.. مشكلة كبيرة إنك تكون سينمائي.. شكلك بيبقي كوميدي جدا وانت بتحكي عن اى شيء.. بالنسبالها الموضوع حكاية لطيفه مسليه.. بالنسبالي شعور عامل زى شعور المغتصبه وقت مواجهتها بمرتكبي الحادث في النيابة علشان تتعرف عليهم وطالبين منها انها تكون هادئة ومتمالكه أعصابها.. تكرار الحكاية مؤلم جدا لصاحب الموضوع بينما في نظر الاخرين ما هو الا حدوته..

مجرد حدوته..

- ما تقول يا أبني حصل ايه؟
- زى ما بقولك كده والله.. ستفنا الملف القوى جدا.. قدمنا في المسابقة.. ورحنا لصاحب شركة الأورجانيك علشان يدعمننا بأى كلب يعرفه من كلاب الحزب الوطني.. الرجل اتبسط مننا اوى وشرينا كاموميل في مكتبه لما قلنا يا بس.. خد الملف بنفسه وقدمه في المسابقة بأسمنا.
- ها وبعدين؟
- وبس
- يا دى النيلة
- اه والله.. بس.. الكلمة العبقريه التي تلي في أهميتها كلمة "بتاع" في العامية المصرية.. بس هي اللاشيء.. بس هي الإحباط.. بس هي الرفض الغير مبرر.. بس يعنى امشي.. بس يعنى اطلع بره.. بس يعنى مشفش وشك هنا تانى.. بس يعنى مكسبناش.. ولا حتى دخلنا في التصفيات الاولانية.. أتقدم للمسابقة 35 ملف.. المفروض انهم بياخدوا اول 10 للمرحلة الثانية.. الملف بتاعنا حتى معداش من اول تصفيه.. مش قادر اقولك حالنا يومها عامل ازاى.. بس فاكرا الحوار كويس جدا.. مكناش مصدقين ان الفكرة بتاعتنا طلعت اقل من 34 فكره تانيه.. بقينا نضرب كف على كف.. معقول في شباب الخريجين في مصر.. في 34 فكره أحسن مننا؟ طيب لو الكلام ده حقيقي.. امال حال البلد خاب ليه.. اكيد في حاجه غلط.
- طبعا.. انا بسمع منك اهو بقالي كام ساعة.. وحاسة ان الفكرة دى فعلا ممكن تعمل انقلاب.. في حاجه غلط فعلا.
- صح.. في حاجه غلط.. المفروض اننا شباب متفوق.. متخرجين بتقديرات عالية وشغالين في فكره لسه أساسا مجتش البلد.. معنى اننا نترفض بالشكل ده حاجة من ثلاثة.. يا اما الناس مفهمتش الفكرة.. يا اما فعلا فكرتنا هي اقل فكره في ال 35.. يا اما في ريعه مش كويسة في الموضوع.
- استر يارب.. عملتوا آيه طيب؟
- محمود كان متوقع.. الجدع ده مليون كم مهول من الإحباط والطاقة السلبية.. اليتيم المبكر وبهدلة امه علشان تعلمه هو واخواته بالإضافة الى 3 سنين اتحرقوا من عمرة في الجيش واضح انه اتذل فيهم جامد اوى.. كل ده عمل منه انسان فاقد أي أمل او ثقة في البلد دى.
- طيب وأشرف؟

- أشرف وصل لمرحلة من الايمان خلته زى ماجد كده.. مش فارق معاه اى حاجه طالما قادر يصلى وطالما عنده ما يكفيه سؤال الناس.. استقبل الموضوع عادى.. بسمل وحوقل وقال معلش.. خيرها في غيرها ان شاء الله.. ربنا اكيد شايلنا حاجه أفضل.. الحمد لله اتعلمنا حاجات مهمه وقضينا وقت ممتاز في غير معصية.
- طيب وانت؟
- انا بقيت عامل زى اللى بيذاكر طول السنة وفي الآخر سقط.. جالي نفس إحساس بتخوني بتخوني يا عمو حسام.. الدنيا اسودت في وشى تماما.. 3 أيام قاعد في البيت لا بكلم حد ولا بروح الشغل.. كان هاین عليا اشرب سم.. خصوصاً بعد ما اخدت فكره عن المشاريع او الأفكار اللى اتقبلت في المسابقة.
- قولي.. أتحفي.
- خدي عندك.. فكره منهم مثلاً كانت حاجه اسمها "Mobile Game Engine" سيرفر العاب للموبايلات.. حاجه كده زى نظام المزرعة السعيدة والحاجات الهابله دى.. تلعبها على موبايلك وتشترى منها مستويات أعلى واسلحه وكلام من ده.
- العاب!! لا إله الا الله.. وايه كمان؟
- فكره تانيه كانت عباره عن مستشارك الطبي الإلكتروني.. رقم تتصلى عليه ياخذ منك الاعراض ويحولك تلقائياً على رقم تاني تحجز منه عند الدكتور المختص.. وطبعاً بتعيد نفس الكلام من الأول لما يرد عليكى تمرجى المستشفى.
- نعم!!
- والله زى ما بقولك كده.. فكره تالته كانت دائرة معارف للأطفال على الموبايلات.. وفكرة رابعة اسمها "هناكل ايه النهارده" وفكره خامسة اسمها "ديلفرى تحت امرك"
- !!!!
- بقيت ماشي أكلم نفسي— زى المجانين.. هي خلاص مصر— بقت جنه لدرجة اننا بنفكر نعمل سيرفرات العاب للموبايلات.. مصر خلاص اشتغلت وخلصت شغل.. ودلوقتي عندها وقت علشان تلعب.
- بس انا اسمع يا احمد ان الحاجات دى أرباحها عالية اوى.. مثلاً ارقام 0900 والهبل ده.. هي أفكار عبيطة اه.. انما بتجيب فلوس بالهبل.
- بتكسب اه.. انما اقتصاديا هي مجرد هبل بلا طائل.. على فكره.. الشركة اللى كانت مسئوله عن الأرقام دى تبقي واحده من شركات اوراسكوم.. اعرف طقم ال "IT" بتاعها.. يعنى بكلمك من واقع معرفه وخبره بيهم وبشغلهم.. دى مشاريع استهلاكيه تضر.. الاقتصاد ومتفيدوش.. لا بتوفر وقت ولا بنبيع منها حاجه بره البلد فتدخل عمله صعبه.. لا هي بتزود الناتج القومي للبلد ولا فيها حسن استغلال موارد.. هي عباره عن استنزاف لفلوس الاغلبية من المهايل المقتنعين ان مكالمه تليفون هتعمل المليون علشان تصب في جيوب اقلية.. يعنى مزيد من سوء توزيع الثروات.. اى حد فاهم اقتصاد ولو بنسبه بسيطة المفروض يحارب الهفأ ده.
- حقك الصراحة.. دى حاجه تفقع.
- بس للأمانة كان في فكرتين كويسين.. واحده قائمه على فكرة ال "WIMAX" دى اللى هي شبكات الكمبيوتر في المساحات الكبيرة.. اختصاراً.. ازاي نقدم خدمة الانترنت في الصحراء مثلاً او على المراكب السياحية او في الحفارات

في البحر عن طريق المايكروويف "الموجات القصيرة جدا" مش الثاني بتاع المطبخ.. الكلام ده كان قبل ال "4G" خدي بالك.. والفكرة الثانية كانت مراقبة حركة السيارات عن طريق ال "Online GPS" والفكرتين سقطوا في التصفيات والحمد لله.. يعني مكناش لوحدا في دائرة الفشل والإحباط.

- طيب عندك فكره ايه المشروع اللي كسب؟
- متابعتش بقي.. الاحداث وما بعدها أخذت عقلي تماما.. كمان مليون جنيهه ايه اللي هبصلهم.. ده انا في ايدي كنز.
- هو لسه في احداث تاني!! مش خلاص كده.. سقطتوا في التصفيات وشكرا على كده.
- سقطنا في التصفيات اه.. خدنا الم على مؤخرة الاعناق اه.. صرفنا اللي حيلتنا اه.. انما شكرا على كده دى.. لا.
- امال؟
- بعد 3 أيام انعزال قررت اني مش هستسلم.. اتكلمت مع أشرف ومحمود علشان نشتغل في اتجاه تاني.. نعيد الكره من اول وجديد بعد دراسة معطيات الموقف الجديد كله.. اكيد غلطنا في حاجه.. نصلح ونجرب تاني.. ولو فشلنا نجرب تالت ورابع وخامس.. لحد ما الظروف تعرف اننا رخماء اوى ومش هنتراجع.. فالفشل ينهار قصادنا وننجح.
- جميل.. روح قتاليه ممتازة
- للأسف بعد اول قفا.. نزلت الأقلام على قفايا ترن ولا كان الدنيا مخبر ابن جزمه في قسم الخليفة.
- اهو كده.. هو ده جوزي اللي انا اعرفه.. انت مفيش حاجه بتحصل معاك طبيعية ابدأ؟
- والله يا بنتي انا طبيعي بس البلد دى هي اللي مش طبيعية.. انا مجرد انسان رافض انه يتنازل عن أحلامه.. شاب مكملش 30 سنه وغير قابل للكسر.. علمونا كده في الجيش.. هما يعني بعد ما يعلمونا الروح القتالية دى.. يقوموا يترياوا علينا لو الواحد صمم على هدف نبيل يحققه في الدنيا!!
- انت قفشت ليه يا عم.. انا بهزر معاك.
- مش كل حاجه يصح فيها الهزار.. انا بحكيك خلاصة تجربتي ورحلتي في الدنيا.. هو ده ميراثي الحقيقي.. المواقف دى هي مدرسة الحياة بتاعتي.. هي دى المرمطة اللي بيقولوا عليها.. ان كنت قدرت تعامل مع الدنيا وسط كل المصايب دى بعد وفاة ابويا.. يبقى السبب والفضل للأحداث دى.. انا عشت عمري كله رافض اني أكون خروف يسمع ويردد.. كنت أكره جدا كلمة بيقولوا دى.. اكتشفت كل حاجه بنفسي وعرفت كل شيء بعد ما جربته.. كسبت كتير وصرفت اكتر.. فشلت كتير ونجحت اكتر.. عمري ما عملت حساب لعمري.. عايش بقلب ابن عشرين.. هفضل عايش وأجرب وأحاول ولازم هنجح.. مسيري يوم من الأيام هدفن كل الفشل ده وهفضل عايش.. مش هموت الا لما ربنا يقرر اني اموت.. وربنا لحد دلوقتي مقررش.. عشمي فيه اني قبل ما اموت أكون راضي عن مشواري.. أكون حققت حاجه.. أكون عملت فرق.. محدش هيقدر يكسرنى ابدأ ولو اتجمعت عليا شياطين الدنيا كلها.. هدفنهم كلهم وبرضه هفضل عايش.
- انا اسفه يا احمد والله مش قصدى السخرية.. انا بس لقيتك قافش فحبيت افك الجو.. شيء يدعو للفخر طبعا اني متجوزه راجل صلب كده.. معرفش تقييمك لنفسك ايه دلوقتي.. هل انت راضي فعلا؟
- انا قلتلك اني مش هتكسر حتى لو اتجمعت عليا شياطين الأرض.. صح؟
- اه.

- انا اتكسرت.
- يووه.. انت لحقت يا راجل.. ازاي طيب؟؟
- اتكسرت لأني قابلت عينات فعلا أسوأ من شياطين الأرض.. قابلت ناس ابليس نفسه يستحي من الحديث عن نفسه قصادهم.. الأيام عرفتني على نوعيات من البشر- خسارة فيهم اى عقوبة في الدنيا ولا يليق بهم في الآخرة الا مكانة اميه بن خلف على الأقل.. وان كانوا في نظري اشد قسوة وقذارة من اميه وأبو جهل أنفسهم.
- اشعلت فضولي حتى كادت السنة اللهب تبلغ عنان السماء.. قول ابوس ايدك.
- ماشى.. بعد ما اتألشنا من المسابقة.. طبعا كان لازم تفكير بطريقه تانيه.. اجيب منين تمويل علشان المشروع ده؟
- عمى الله يرحمه موقفه كان ايه؟
- بابا له دور كبير اوى.. بس مش دلوقتي ومش فلوس.. فلوس بابا كانت في نظري حرام ليا.. مقربتش منها خالص.. واهو على يدك.. ميراثي كله منه مصرفتش منه مليم لحد النهارده.. حاسس انه حرام اصرف شقاه.. من سنة ثالثة كليه وانا مخدتش من بابا مليم.. هو كان فرحان وانا كمان.. فرحان ان ابنه بدأ يعتمد على نفسه.. وأنا فرحان انى بكسب فلوس ومش ملزم أقول لحد صرفتها في ايه.. النهارده انا أقدر أقول انا قررت.. طالما املك اطعام نفسي.
- بس طبيعي جدا اى اب يبقي فرحان وهو بيساعد ابنه
- هو يفرح اه.. انا لا.. هو كمان هيفرح أكثر لما أقف لوحدي وأقوله شكرا.. دعواتك هي ما اريد مش محفظتك
- انت براوي كده ليه يا أبني.. هو حد يتكسف من ابوه؟
- اه... انا
- لله في خلقه شئون.. معنى كده إنك مش هتساعد حمزة؟
- لما اموت ان شاء الله فلوسي كلها تحت امره بحكم الشرع والقانون.. طول مانا عايش ملوش اى علاقة بيها.
- خلاص.. انا هبقي أدكن من وراك واديله.. أبني لازم يتنغخ.
- وتفسدي الواد؟؟ كويس إنك قلتي.. وديني لأحرمك من المصروف انتى وهو.. سعيد صالح ستايل.. ههههههه.
- يا حفيظ.. انت ما صدقت.. بهزر يا راجل بهزر.. قولي بقي عملت ايه بعد ما اتألشتوا من المسابقة؟
- بدأت المصايب ترف.. محمود والدته توفت بعد الموضوع ده بشهر.. المسكين دخل في حالة اكتئاب مخرجش منها لفترة طويلة أوى.
- لا إله الا الله.. ربنا يرحمها.
- الصدمة كانت شديده عليه لانها مكانتش مريضه.. كانت طبيعية جدا وصغيره كمان.. طلعت تعمل عمره رجعت في صندوق.. سبحان الله.. وما تدري نفس بأى أرض تموت.
- الله على حسن الخاتمة.. ونعم بالله.. طيب وأشرف؟

- أشرف مراته حملت.. الولية حسست بالخطر لما لقت جوزها عنده وقت يعمل مشاريع ومغامرات.. فقررت انه مش كفايه انها أرسلت من بطنها الى زوجها اثنين للسيطرة عليه وتقليب فلوسه.. فقررت انها تعزز موقفها في البيت بثالث.. والثالثة ثابتته يا أبو العيال.. تسقط النسوان الكهينة.. ابويا كان عنده حق لما قالي ان اى تفكير في الستات في الوقت ده معناها ضربه قاضيه لمستقبلي كله.. الستات يملكون سلاح دمار شامل سقطت قصادة أعنى الحصون التاريخية.. سلاح اسمه الرحم.. اعوذ بالله من ده سلاح.. عارفه انتى هولاءكو بتاع التتار؟ اهو الراجل ده فضل راجل مجدع وبتاع حروب وفتوة العالم بحق.. لحد ما مراته قررت انها تهد حيله بالعيال لما حسست ان عينه زاغت على الجواري العرب.. وعنهما.. فضلت تخلف وتدبسه في أقساط مدارس لحد ما اترقع علقه موت في عين جالوت.
- طيب ماهو خير يا أخي برضه.. العيال رزق.
- والنبي ايه!!! الى حصل بقي ان الاثنين اتلهوا تماما في حياتهم الاجتماعية تماما وفضلت أنا لوحدي في حومة الوغى.. الفكرة كلها معايا بكل تفاصيلها.. مش عاوز اكرر المأساة والغلطة الى عملتها لما كبرت دماغي عن فكرة موقع اطلب دوت كوم.. مش كل مره بقي هتضيع منى فرص كده.
- معلىش يعنى اسمحلي.. انت دخلك من الشركة حسب كلامك كان ممتاز.. انت كنت عاوز توصل لايه؟
- كنت عاوز أوصل لأي نجاح في اى مجال.. ابويا اتربي في بيت عامل دخان وبقي نائب وزير.. انا اتربيت في بيت نائب وزير.. المفروض ابقي ايه؟
- اممم.. فهمت
- المهم.. استأذنت أشرف ومحمود انى هسعى في الفكرة تانى وادور على ممول.. الناس الصريحة كانوا أنظف من النظافة.. اتنازلولى عن اى حق ليهم في الفكرة دى.. طبعا قتلهم ان الموضوع بتاعهم في اى وقت.. منين ما يحبوا يشتركوا معايا تانى.. من غير استئذان.. علطول مرحبا بيهم.. تقريبا انفصلنا في الشغل لكن الصداقة فضلت طبعا لحد النهارده.. بقينا نتقابل كل ما تسمح ظروفهم.. عمري ما اتاخرت عليهم ابداء.. هما الاثنين سابوا الشركة مع بعض وسافروا قطر.. انا سافرت بعدهم للسعودية.. اول حاجه عملتها لما رحلت السعودية هي انى زرتهم في قطر.. كانت زيارة جميله جدا الحقيقة.
- فيك الخير يابو حميد.. الفترة بقي من بعد ما هما سافروا.. حسب كلامك الكلام ده كان نص 2005 تقريبا.. وانت سافرت السعودية 2008.. ايه الى حصل بقي؟
- اه.. سنتين ونص من الصراخ.. سنتين ونص بحارب طواحين الهواء.. سنتين ونص بفحت في الصخر علشان أقوم المشروع على رجله.. سنتين ونص كانوا الاجمل في حياتي على الاطلاق رغم انى كنت عامل فيهم زى بروميثيوس.. بروميثيوس حسب الأسطورة اليونانية هو الى سرق سر النار من جبل اولمب واهداه للبشر.. فزيوس قرر عقابه بتعليقه بين جبلين وسلط عليه الرخ ياكل كبده كل يوم.. كل يوم معاناة من نفس النوع.. كل يوم نفس الزهق والملل.. انا كنت بروميثيوس الى لطش عقله الرغبة في النجاح.. او تقدرى تقولي حسنيوس.. زيوس الحكومي علقني بين جبل الروتين وجبل الواسطة وحطني فوق خازوق قلة الحيلة.. كل يوم ييجى سيد أفندي حباره الرخ ياكل كبدي.. كبدي كان فلوسي وشقي عمري.. فلوس المرتب والوظيفة الى كنت بشتغل 30 يوم زى الحمار علشان اجمعهم.. بقيت اشتغل واقبض اخر الشهر علشان اوزع مرتبي رشاي على الموظفين اياهم.. في مقابل انى بس اعرف اخبار.. اى اخبار.. عن الملف بتاعى.
- يعنى ايه.. مش فاهمه الحته دى.
- خليها لوقتتها.. هتعرفى كل حاجه فوقتها..
- طيب.. ليه بتقول انهم كانوا أجمل سنتين في عمرك؟

- شوفي يا ستي.. طبعاً صاحب شركة الأورجانيك بعد الفشل في المسابقة باعنا بيعة التنين الأحمر الناري.. مقدملناش اى مساعده تذكر من اى نوع.. عرفت بعد كده من جوا الحزب ان المسابقة دى مترتبة وكل سنه في حد بياخذها بالدور كده.. يعنى لا تفوق ولا تميز ولا ابداع ولا يحزنون.. المهم ان الميزانية كلها تنصرف.. فساد ووساخة بس من نوع تانى.. نوع قانونى تماماً.. طبعاً بيصرف على الكلام ده كام رجل اعمال من الشلة الجديد بتاعة جمال مبارك طلّعوا كده في المقدر جديد بلا اى تاريخ.. وجه الحياة اتغير تماماً بظهور الفرقة دى.. كانوا بيتلمعوا ويظهروا مع جمال في كل مكان.. دول الى سموهم الحرس الجديد.. الوقت ده بدأ نجم كمال الشاذلي يأفل تماماً لصالح الفتى الذهبي الجديد.. احمد عز.

- اه.. الشلة إياها دى..

- بقيت أقول سبحانه يا خالق الكون.. بلد اوسخ من الوساخة الوسخة.. كده كده بنصرف.. كده كده بنرمى الفلوس في الأرض.. طيب ما نصرف في المكان الصح.. هو يعنى لو عملنا حاجه صح على بعضها من الأول للآخر.. هيقولوا علينا اتهبلناها.. هنقف قصاص ربنا شالين ذنب اننا انجزنا شيء كامل على بعضه.. حكمتك يارب.. زى ما تكون اختصيت المسئولين في مصر— بالغباء والجهل بتوع الكوكب كله علشان يوزعوهم على الناس.. طمعوا فيهم لوحدهم.

- طيب خلاص.. بلاها المسابقة.. انت راجل صنايعي ومعاك سر المهنة.. ملعون ابوهم وابدأ مع نفسك.

- بالضبط كده.. مركزتش كتير في موضوع المسابقة ده.. مليون جنية ايه الى هبصلهم وانا أساساً معايا الفكرة الى تدخل 10 مليون.. خسرتنا وفهمت الفولة... خلاص.. يولعوا بجاز.. هبدأ مع نفسي.

- وعملت ايه؟

- لجأت لبابا.. عرضت عليه الموقف كله بكل تفاصيله.. قتلته ان الموضوع ده محتاج شعر ابيض.. محتاج خبرتك معايا.. الموضوع كبير ومش هقدر عليه لوحدي.

- وكان رده ايه؟

- بابا عمره ما ردي خائب ابداء.. كان الله يرحمه اجدع انسان قابلته في حياتي كلها.. الفترة دى كان هو طلع معاش بس فضل على قوة الوزارة كعضو مجلس اداره في الشركة القابضة لكهرباء مصر.. الوزير مقدرش يتقبل فكرة خروج زميل دراسته على المعاش بعد الرحلة دى كلها.. فقرر انه لازم يكون موجود في الوزارة غصب عنه.. بابا الله يرحمه كان واحد من 12 واحداً الى اسسوا شبكة كهرباء مصر.. كلها في الستينات.. من اول السد العالي لحد محطة كهرباء شبرا الخيمة مروا بمحطات توليد الكهرباء في الصعيد وكمان له أيادي بيضاء في موضوع الطاقة الجديدة والمتجددة وكهربة الريف... يعنى محدش يعرف دواخل الشبكة وتفاصيلها وإمكانياتها زيه.. بابا درس الموضوع كويس اوى وعمل حركه جنونية تقول ان الشباب فعلاً هو شباب القلب والعقل.

- عمل ايه؟

- استقال من الوزارة تماماً.. رفض كل عروض الشغل الى جتله بحجة الظروف الصحية.. لقيته بيكلمني في يوم وبيقولى انا فضيتلك يابو حميد.. تعالى بقي نخطط ونشوف هنعمل ايه.

- يااه.. للدرجة دى كان مقتنع بالموضوع؟

- انا نفسي.. اتفاجئت باللي هو عمله.. اتارى كل الى عرفته وشفته وجمعتة عن المشروع ده وتطبيقاته مطلعش ربع الأفكار الى انفجرت في دماغ بابا بمجرد ما فهم الليلة.. لما لقاني متح ضحك وقالي يا ض انا كنت مهندس والنسوان بتجري ورايا وانت لسه بتعملها على نفسك.

- هههههه... نفس الى انت بتقوله للشباب الصغير دلوقتى.
- اه.. الزمن دوار..
- وبعدين؟
- انا عيل صغير ممكن ينضحك عليه او يتهدد.. بابا لا.. راجل كبير وله اسمه وسمعه.. كمان عنده معارف ثقيله تسنده لو لازم الامر.. في الفترة دى انا أدركت ان شركة الأورجانيك مضيعه للوقت.. خصوصا بعد ما ماجد كمان استقال وراح اشتغل في اوراسكوم.. بقيت اروح الشركة مفيش حاجه اعملها.. نفسي.. قفلت حتى من الدكتور صاحبها واجتماعاته ودائرته الصباحية وكتبه وثقافته.. بقيت مبحضرش الاجتماعات ولا الدائرة علنا كده.. لحد ما يوم الدكتور ادانى ملاحظه ان دقنى طويله.. قطعت كلامه بقله ذوق وبورقه مكتوب عليها استقالتى.. سبت الشركة ومشيت.. فعليا انا كنت محطم نفسيا ومش طايق اى حد يدوس عليا لأي سبب.
- مكانش عندك شغل تانى؟
- لا
- ولا اى عرض من اى مكان؟
- لا
- ولا في اى خطه بديله؟
- لا
- يبقى المشروع كان مبشر بالخير.
- برضه لا
- يعنى قعدت في البيت؟
- ايون
- حد يعمل كده يبنى!!!
- اه.. انا... قرني من الوقت الى ضاع في الشركة دى وقرني من ابن صاحبها الأونطجي بتاع الحزب الوطني ومعيته معانا.. تركيزي التام في المشروع خلوني مترددتش.. سلام يا أورجانيك.. انا ماشي.
- يا لك من مجنون.
- بعد الموقف ده بأسبوعين ماجد عرف بالصدفة انى استقلت.. كلمني علشان اروح معاه اوراسكوم... العرض كان مغرى جدا.. مقدرتش ارفض الحقيقة خصوصا انى كنت محتاج فلوس علشان اعرف أعيش واصرف على المشروع ومحتاج اسافر علشان اشوف الدنيا بره فيها ايه بخصوص ال "RFID".. ومفيش أكثر من السفر في اوراسكوم.
- وقبلت الوظيفة؟
- اه.. وبدأت أحلي سنين عمري في أجمل شركات مصر كلها.. العزيزة اوراسكوم

قلنا اني بدأت أجمل سنين عمرى في العزيزة اوراسكوم.. عمرك سمعت عن شركة.. يتظاهر موظفيها في صالح صاحبها ضد الحكومة؟

إذا كانت اجابتك لأ.. يبقى يسعدني أقولك ان اوراسكوم كانت كده.. ويسعدني اقولك ان الناس عملت كده من نفسها تماما بدون اى وعد ولا تحريض من ملاك المؤسسة.. انا كنت موظف هناك ودايما بقول كده.. لو كنت هناك وقت أحداث يناير الساخنة.. كنت عملت زيهم بالظبط.

في حدود ما شفت واتعاملت معاهم.. مشفتش منهم الاكل خير واحترام.. اول مره أحس اني بنى آدم في مصر—كان في اوراسكوم.. مش هنسى.. ابدا لما فتحنا شغل في العراق وكنت من الفريق الى مفروض يسافر.. الشركة عملت بوليصة تأمين على الحياة قيمتها مليون دولار عن كل واحد فينا.. وحصل بالفعل قبل كده ان واحد من زميلنا اتخطف هناك والشركة دفعت عنه الفدية بدون أي التزام عليه.. حتى اني كنت بهزر مع مديري واقوله احنا ممكن نروح نتفق مع العصابات دى علشان يخطفوني شويه كده.. الشركة تدفع لهم نص مليون دولار.. انا أخذ ربع مليون والارهابيين ياخدوا ربع مليون ونطلع كلنا كسبانين وزى الفل.

محدث بيصدقني لما بقول ان في شركة بتعمل كده مع موظفيها خصوصا ان كانت إدارة وملكية الشركة مسيحية والموظفين اغلبهم مسلمين.. دائما وابدا تطل الطائفية المتعفنة بقذارتها في كل تفاصيل المجتمع المصري.. لكن بنظرة حيادية هلاق ان الناس معذوره.. هات واحد ربيه في مجتمع مغلق يفضل يكرر ويردد في ودانه كلمات عقيمه عن كراهية الآخر وضلاله وكفره والنار الى مستنبيهم في الآخرة.. أفضل ردد في كلام انت مش فاهمه ومتعرفش معناه ايه عن الى هيجصل يوم القيامة مع الناس ومين داخل الجنة ومين داخل النار على أساس ان انت موكل من الخالق عزوجل إنك تحكم على البشر—او على أساس ان معاك مفاتيح الرحمة او العذاب.. أفضل قوله كده لمدة 30 سنه مثلا وقضى.. طفولتك وشبابك وانت بتقول الكلام ده.. بعدين اقولك ان شركة زى اوراسكوم مثلا كان عندها جمعية خيرية بتصرف منها على الأطفال الايتام "بدون تمييز طائفي" أو أقولك مثلا اننا في حدائق القبة كنا كل رمضان لازم لينا عزومة فطار جبارة عند صديقنا ريمون وأمه العصبية جدا.. او ان أبو شكري أقدم بقالين منطقتنا كان بيمنع تماما عن الأكل والشرب طول نهار رمضان كمشاركه وجدانيه معنا في الأيام المباركة.. أو اقولك اننا كنا بنحتفل مع جيرانا في الحدائق بالغطاس او حد السعف.. وشوف بعد كده هتقول ايه..

طبعا مش هتصدقني.. عارف ليه؟

لأن الكراهية اترعت زرع جواك بدون ما تحس.. النظام ووجهات النظر الأحادية مسخت فيك الكائن المعتدل الباحث عن المعرفة الحقيقية وحولتك الى مجرد متلقى.. وبعد سنين طويلة من اعتيادك على ريحة المجاري.. أصبحت بتقرف من ريحة البارفان.

- مش كده يا ست الستات؟
- كلامك منطقي.. كنت حكيثلي انت عن اوراسكوم وقتلتي انها كانت السبب في معظم سفرياتك.. بس مكنتش اعرف ان الفترة دى كان فيها المشروع ده.. انت كنت بتجيب وقته منين؟
- الحقيقة ان الفترة دى كانت محتاجة سياسة واداره للموضوع اكثر منها شغل في.. فنيا انا كنت جاهز فعلا.. مش كده وبس.. انا كل مره كنت بسافر سفريه من بتوع الشغل.. كنت بتابع اخبار ال "RFID" وتطبيقاته بره مصر.. واي تكنولوجيا جديده فيه.. كنت واثق تماما اني هقدر اشغله في مصر.. ده غير ان وقتي كان كله للشغل.. بصحي الساعة 5 الفجر وبنام الساعة 1 ليل.. لا ليا في الشرب ولا في الحرير.. معنديش حاجة في حياتي الا الشغل والكتب.

- للدرجة دى!!

- اه.. وأكثر مما تتخيلي.. المجهود الى بذلته بالإضافة الى مستوى معرفتي بالتكنولوجيا وإمكانياتها كانوا بيحسوا الناس اني مغرور.. والحقيقة مش كده.. انا بس انسان ملك ناصية علم ما في مجال معين وأصبح على دراية كاملة بكل تفاصيله.. علشان كده مكنتش بضيع وقت مع الناس ولا الأفكار دى.. ركزت مع ابويا علطول.. بدأت اسمع كلامه ونصائحه لأول مره من 27 سنه.

- عملتوا ايه بقي؟

- لما الأرقام كبرت منى اوى.. بقيت عامل زى احمد راتب كده في جزيرة الشيطان.. الأستاذ بيبرس.. بقيت ليل ونهار عمال اصرخ.. يا جاه النبي.. ايه كل الاصفار دى.. لقيت نفسي.. مش عارف اسيطر على الدنيا لوحدي.. فقررت اني أسلم بابا كل حاجه إداريا وانا ابقى المنفذ وبس.. هو بيْفهم في الحاجات دى أحسن منى بمراحل وبقاله اكتر من 20 سنه مدير لمشاريع عملاقه.. انا لسه ابن امبارح.. بالإضافة الى ان خبرتي الإدارية بالمقارنة بالفنيات... لا تذكر..

- صحيح.. مش كل الناس اتولدت مديرين..

- بالظبط كده.. بابا كانت فكرته اننا لازم يكون لنا كيان قانوني علشان نقدر نتواصل مع الشركات الكبيرة.. مش هنقدر نشغل الا لو في حد يحمينا.. في الأول قعد يحسبلى حسبه كده وبعدها كان خايف جدا عليا وعلى مستقبلي.. مش هقدر أنسي ابدأ كلامه أيامها.

.....

- احمد.. الموضوع كبير ومحتاج جديه.. لو بدأت شغل في مشروع بالحجم ده مش هينفع تيجي وسط الطريق تقول مش لالع.. ممكن تتحبس.. وساعتها هتضر نفسك وتضرنا كلنا معاك.

- متقلقش يا بابا.. الشغل شغل.

- كمان في نقطه مهمه اوى..

- خير يارب

- الارقام الى انت حاططها دى مش مظلوبة.. الأسعار دى كفته خالص.. الدنيا متمشيش كده ابدأ.

- طيب اقترح عليا.. دبرني يا مولاي.

- مفيش حد بيحصد قبل ما يزرع.. اى رقم تفرضه دلوقتي هيبقي غلط.. نبدأ الدنيا من الأول ونشوف.

- ايوه يعنى.. هنعمل ايه؟

- هنعمل شركه.

.....

- وعملتوا شركه؟

- شركة الحلول الذكية "Smart Solutions" لصاحبها المهندس حسنى حامد وولده احمد.

- يا حلاوة.. يعنى انت كنت صاحب شركه.

- اى نعم.. بابا كان رئيس مجلس الإدارة وانا المدير التنفيذي.. مجرد مسميات على ورق في الهيكل التنظيمي للشركة.. اضطرينا نعمل كده علشان السجل التجاري والفيلم الساقط ده.. مش هحكيلك طبعا على المزار الطافح الى قاسيته علشان نعمل الشركة دى.. كل موظف حكومي في مصر.. اخد منى فلوس علشان ورق الشركة يمشى.. كل واحد قالي صباح الخير لطش منى حاجه في المقابل.. كل كائن بيتنفس على هذا الجزء من كوكب الأرض راضيته بحاجه علشان ورقي يخلص.. 6 شهور كامله بلف زى الثور في الساقية لحد ما الحمد لله الشركة ظهرت للنور.. راضيت الى مراته عيانه واللى ابنه بيسقط واللى بنته بتتجوز.. راضيت الى عاوز يعالج امه واللى عاوز يجوز اخته واللى عاوز يطلق مراته.. راضيت الى عاوز يدفع نفقة او يجدد مدفن ابوه.. دفعت فلوس من تحت الترايزة لكل موظف قابلي ولو حتى صدفه.. ولو حتى مقابلنيش.. برضه دفعته.. يوم زيارتي للمصالح الحكومية كان بيبقى يوم عيد عليهم.. العبيط اهو.. العبيط اهو.. مجرد دخلتي مكاتبهم معناها فطار فخيم ورشة هدايا في السريع لحد ما يشوفوا الدور على مين فيهم المره دى علشان ياخذ الكوستليتة من الضحية الى هو انا.. انا كنت فاكرا ان الفساد المصري موجود في اهل السياسة وبس.. لكن طلعت عبيط.. النيل نفسه فاسد.. كل كائن عايش على الأرض دى ومعه رقم قومي يبقى فاسد.. كلمة مصر.. في الزمخشري تعنى خراب الذمة.. الدين معداش على البلد دى خالص.. او يمكن عدى وشاف الحال من بره بره.. راح جاى تافف وطلع يجرى.. اعتقد ان انبياء الله لو صحوا دلوقتى تانى وشافوا اهل مصر.. هيتبرأوا تماما من اعتناق الناس دى لدياناتهم.. لا الرسول هيكون مبسوط ولا المسيح.. سيدنا يوسف ممكن يضحك ساخرا ويقول يا أهبل.. دول حبسوني وأنا برئ علشان حرمة رغم انهم شافوا قميصي.. متفرتك من ورا.. فكرك هيسمعوك انت.. سيدنا موسى ممكن يقولي إذا كنت انا الى صحي كنت حلوه ومساعداني خرجت منها خايف وبجري وانا متربى في قصر.. الحاكم وكلمتي مسموعة.. قوم انت يالى جاى من ورا الجاموسة ومفيكش ألم تفتكر إنك ممكن تعمل فيها حاجه.. اكتشفت انى علشان اعمل شركه اكل منها عيش.. لازم اتذل واتهان واتمرط وادفع دم قلبي لناس ولاد كلب بلطجية قاعدين على مكاتب مفيش وراهم اى شيء غير انهم يسرقوا فلوس الناس ويشتكوا بعد كده ان الفلوس مش كفايه.. اكتشفت انى علشان اشتغل بالحلال في البلد دى.. لازم اعمل كل حاجه حرام.. المهم انى أقول بسم الله في الأول.

- ماهو ده سلو الناس كلها يا احمد.. زيك زى الباقي.

- ماهو ده الى ودانا في ستين داهيه.. زيك زى الناس.. طب الناس وسخه.. هل ده مبرر انى ابقي وسخ؟

- ماهو كده ورقك مش هيمشي..

- صحيح.. مش هيمشي.. ده باعتبار ان بالرشوة والوساخة البلد ماشية.. شوفي يا عسل.. هعلمك درس اتعلمته بالعافية من الدنيا.. مقص الفساد له طرفين.. الحمار بيتركب علشان عمره ما رفس الى بيركبه.. فرعون بقي فرعون لان قومه كمان قوم تبع هفأ ظالمين.. الظلم يتحمل نصف جزاؤه المظلوم.. قبول الناس بالوضع الزفت ده لن يعفيهم من لوم الأجيال الى بعد كده ليهم.

- بس انت نفسك قبلت اهو..

- لأنني حمار.. والله حمار معرفش حاجه.. وهما ولاد الكلب كانوا محترفين.. عملوا عليا حفلات.. كانوا بيلموا بعض ويعرفوني على بعض على أساس يعنى ان كل واحد من دول له دور في انجاز المهمة العظيمة الى هي تخليص ورق الشركة.. وطبعا كل واحد عاوز يلطش منى اى حاجه.. لحد ما وصلت انهم جابولى واحد شغال في الأرشيف علشان ينوبه من حب الرشوة جانب.. بقيت اضرب كف على كف.. حسيت انى ذبيحة ومعمول عليها حفله.. عمري ما هنسى.. اشكالهم ابداء ولا عمري هبطل دعاء عليهم ابداء.. والله كنت كل جمعه اقعد بعد الصلاة ادعى لحد ما صوتي يتهدج وابقى على وشك الدموع.. دعيت عليهم بالفقر والمرض والجوع والنهم.. دعيت دعوة مظلوم مقهور غلبان قليل الحيلة.. ربنا المنتقم بقي.

- أهذا بس وصلي على النبي.. هما بيختبروا صبرك علشان تعرف ان الموضوع غالى.. مش لما حد بيروح يخطب واحده.. أهلها بيعذبوه علشان يعرف ان بنتهم غالية ويحافظ عليها.

- اه.. اهو انا بقي شفت الكلام ده عملي بس مش في الجواز.. في الشغل.
- وبعدين طيب حصل ايه؟؟
- بدأ بابا يبدع..
- ازاي؟
- بابا انعزل في مكتبه أسبوعين كاملين.. امي كانت بتقولي انه كان بيشتغل ولا كأنه عيل صغير.. يصحى الفجر يتحبس في المكتب ميخرجش منه الا نص الليل.. تليفونات طول النهار.. زيارات ومقابلات.. كل كام يوم تلاقيه لابس البدلة السوداء التي تجعله رجلا مهما.. البدلة دي كان دايمًا بيلبسها لما يروح يقابل الوزير او يكون عندهم حاجه في مجلس الشعب.. بتحكيلى ماما انه نسي- تماما انه مريض كبد "فيرس C" في مرحله متأخرة ورجع تانى عيل صغير.. لو شفتي وشه في الفترة دي استحاله ابدأ تديله 50 سنه.. كان بيسافر ويروح وييجى.. من اسكندرية لبنها لشرم الشيخ لأسوان.. يفضل الراجل شغال طول اليوم زى النحلة.. ويرجع اخر اليوم يترعى على السرير يأن من الإرهاق والألم.. لما كانت ماما تقوله بالراحة يا حسنى مش كده.. صحتك.. انت مش حمل الكلام ده.. كان يقولها احمد محتاجنا دلوقتي اكر من اى وقت فات.. أبني كبر وبقي راجل.. أبني بينجح ويبشق طريقه في الحياة.. انا ربيت وتربيتي فلحت.. لو صحتي هي تمن نجاح أبني.. يبقى هنا مفيش اختيار.. كانت دموعه تنزل وهو بيقولها فاكهه احمد الى كنتي بتحطيه على القصرية وتحطي القصرية فوق الكرسي وتحطي الكرسي فوق الترابيزة علشان تضمني انه ميتحركش؟ فاكهه اول مره جاله امساك وعملنا له حقنه شرجيه وراح عاملها على صينية البطاطس؟ فاكهه لما قفشتى عنده صورة البت ام شعر اكرت وهو في تانيه أعدادى وقالك انا بحبها يا ماما وقلتلى الواد بيخيب؟ احمد دلوقتي مبقاش الواد احمد.. احمد بقي راجل ملو هدموه.. شقاننا مراحش على الأرض ولله الف حمد وشكر.. انا هموت واسيب ورايا ولد فخور انه تربيتي وصنع ايديا.. كل كلمه كان لازم يقول قبلها أبني.. لدرجة ان ماما نفسها مبقتش مصدقه انه بيحبني كل هذا الكم من المحبة.. انا نفسى- مكنتش متخيل ان بابا.. ظابط الجيش السابق.. متحجر الوجه جامد المشاعر.. عنده كل هذا الكم من المشاعر ليا.. الله يرحمه يارب.
- في ميزان حسناته ان شاء الله
- آمين.. المهم يا ستي جتلي سفره لجمهورية التشيك.. أسبوعين اوام اوام رجعت منهم لقيت بابا محضرلى مقابله مع صاحب شركة تليفزيونات عملاقة.. بابا طبعًا يعرفه من أيام ما كان في الوزارة عن طريق صديق مشترك.. كلهم ناس محترمه وسمعتهم كويسة وبتوع شغل فعلا.. راجل وقته بفلوس.. طالما وافق على المقابلة.. يبقى بابا قدر يعمل حاجه بس كالعادة مش بيصرح بأى شيء الا لو اصبح حقيقه واقعه او تاريخ.
- ممممم
- رحت المقابلة انا وبابا.. قعدنا مع صاحب المصنع شخصياً.. المفروض ان المقابلة كان مدتها 45 دقيقه.. الى حصل اننا قعدنا معاه 6 ساعات كامله.. الراجل يومها الغي كل مواعيده.. وبعت جاب مديره المالي ورئيس حسابات التكاليف ومدير المخازن ومدير المشتريات ومدير ال "IT".. الموضوع مش بس عجب.. الراجل اتجنن من الفكرة.. وطلعت من دماغه 500 فكره تانيه في الاجتماع ده.. بابا كان موقفه غريب جدا اليوم ده.. متكلمش اطلاقا طول ال 6 ساعات.. اللهم الا كلمه ورد غطاءها.. بقي يزقني زق انى ارد على الناس واشرح الفكرة وادخل معاهم في جدل وحوارات كتير.. عكيت كتير وهو مكانش بيعلق خالص.. كنا متفقين ان الفلوس والمواعيد من اختصاصه.. الشغل الفني وتفصيله معايا.. انا ملتزمتش بأى شيء من ده.. اتكلمت معاهم في كل شيء.. وبابا ساكت تماما.. اتفقنا مبدأيا على خطوط المشروع العريضة.. الميزانية المقترحة كانت 2.5 مليون جنيه هاخداهم على 8 دفعات.. أول دفعه تستحق مع توقيع العقد.. انا جالي ما يشبه الهبل المغولي يومها.. المفروض ان توقيع العقود كان بعدها ب 10 أيام.. المفروض ان بعد 10 أيام هيبقي معايا ربع مليون جنيه في وقت الالف جنيه فيه كانت مبلغ جبار.. 8 دفعات على سنتين.. يعنى كل 3 شهور 250 الف جنيه.. متخيله انى اعمل شركه في السن ده يبقي دخلها من اول مشروع 80

الف جنيه شهريا؟ متخيله ان شركه مفيهاش غير اتنين موظفين منهم واحد مش عاوز اى فلوس هيدخلها في الشهر
80 الف جنيه؟

- ما شاء الله..
- الأجهزة كلها كانت بما يوازي مليون.. يعنى صافي مكسبنا كان هيبقي مليون ونص جنيه من 24 شهر شغل.. ده طبعا غير ما يستجد
- ممتاز طبعا.. يا ريتنى كنت اتجوزتك في الفترة دي..
- الفترة دي كانت امي هتتجن واتجوز.. بابا كان بيقولي خدها على اد عقلها واوعى تتجوز دلوقتي.. الجواز دلوقتي معناها طعنه قاتله للمشروع ومستقبلك كله.
- وانت ما صدقت طبعا
- طبعا.. جواز ايه وزفت ايه.. مين كان فيه دماغ للسئات وقتها.. الوقت ده انا كنت مسحول تماما.. ما بين شغل اوراسكوم المرهق وسفرياتها الغير منتهيه وبين المشروع اللى بحضرله علشان اعدى بيه.. فكرك بقي وقتها كان ممكن الاق وقت لواحد تستهلك من وقتي ساعه كل يوم علشان تقرر هناك ايه النهارده؟
- وبعدين؟
- بابا أعاد صياغة المشروع كله.. جابلي محاسب تكاليف ابن لزيينا عقر.. سافرت تبع شغلي تاني على رومانيا.. 10 أيام ورجعت لقيت الميزانية متشقلبه تماما.. بدل ما المشروع كان ب 2.5 مليون.. بقوا 5.5 مليون في نفس الفترة.. بس الموضوع كان وسع اوى.. شغل زياده بس.. بقيت مش مصدق.. 5.5 مليون.. طب ازاى؟
- صحيح ازاى.. والناس وافقت على كده؟؟
- أساسا الناس هي اللى كانت بتقترح على بابا توسيع المشروع..
- بجد؟
- اه والله.. علشان ابسطلك الموقف.. كأنى كنت بقول للناس انا هشتغل ساعتين في اليوم بس ب 10 جنيه.. بابا قال لا.. احنا ممكن نشتغل في اليوم 20 ساعه.. ونجيب كمان 5 افراد يشتغلوا 20 ساعه.. فبدل ما هتأخدوا شغل ساعتين.. هتأخدوا شغل 100 ساعه.. فالناس لقت انها ممكن تعمل حاجات كتير اوى.. فعرضت انها تشتري زياده.. وهكذا.
- اممم.. سبحان الله يا اخي.. شوف فرق الخبرة.
- امال ايه يا بنتي.. هاتى شباب صغير يشتغل بجد بأشراف أصحاب الخبرة.. واتفرجى على النتيجة.
- وبعدين؟
- الحلم قرب اوى من الواقع.. رحنا فعلا في اليوم المحدد علشان نمضى العقود.. المفروض حسب العقد الجديد اني هصرف 10% من قيمة العقد الجديد بمجرد التوقيع.. يعنى انا هروح عندهم الساعة 11 الصبح.. وارجع الساعة 1 الظهر ومعايا 550 الف جنيه.. يوم تاريخي في حياتي.
- ورحت؟

- اه
- وأخذت الفلوس؟
- أه
- بجد!!
- وهو ده في هزار.. رحنا الشركة مضينا العقود وخذت شيك مقبول الدفع بمبلغ 550 الف جنيهه بالتمام والكمال.
- انت بتتكلم جد وللا بتهزر؟
- ابقى اسألني ماما.. روحنا يومها البيت انا وبابا في حالة سكر بين بفعل التوقيع... انا جبت سيجار وطلعت على سطوح بيتنا ادخن سيجار الانتصار زي الأفلام الأمريكي كده.. انا كده خلاص.. حياتي خلصت.. حققت النجاح فعلا.. سنتين بالضبط وهبقي من أصحاب الملايين.. الامر واقع اهو.. الأجهزة موجوده والعقد مضمينه فعلا.. المعلومات في دماغي والفلوس في البنك.. وكمان قدمت المشيئة علشان مبقاش زي حجا لما راح يشتري الحمار.. فاضل ايه بقي؟؟
- مفاضلش غير انك تتجوز وتسلم..
- يا دى ام الزفت.. أيوه طبعا كنت هتجوز.. ده انا كنت هتجوز بنت حسنى مبارك نفسه لو كان عنده بنات.. عيل عنده 28 سنه هيبقي مليونير من شغله ومجهوده هو.. لا ورث ولا وقع على كنز.. لا انا من سلالة اعظمهم باشا ولا عندي ابعديه.. اتخن واحد من صحابي في الوقت ده كان بيفكر ليل ونهار في قسط العربية الداىو بينما انا كنت هشتري التوكيل نفسه..
- يرزق من يشاء بغير حساب.
- ايوه فعلا.. يرزق من يشاء.. انا بقي كنت من ضمن المجموعة اللى خرجت بره المشيئة.. المنحوس منحوس ولو علقوا على بيته فانوس.
- يا ساتر يارب.. حصل ايه...
- عارفه فيلم النوم في العسل.. لما عادل امام سأل العروسة في الأول.. حصل ايه وقعدت تقوله تعيط وتقوله محصلش.. محصلش..
- الله يكسفك يا شيخ.
- اهو احنا كده بالضبط... محصلش.. محصلش.. أهىي أهىي أهىي.
- تفاصيل بقي.. ها.. تفاصيل.
- مضينا العقد وأخذنا الشيك وبعدين طلعلنا على البنك علشان نصرفه.. وفعلا صرفته وحولت الفلوس على حسابي.. سحبت بس كام الف ادلع بيهم امي واخواتي اليوم ده.. في الطريق وانا راجع من البنك عدت انا وأبويا على معرض عربيات بي ام دبليو في القاهرة.. رحت اشوف اتخنها عربيه عنده واشترىها كاش.. بقيت قاعد قصاص مدير الفرع وانا بقوله احياة ابوك يا مدير آني سمعت ان في عربية اسمها سكستين فالف.. آني عاوز عربيه سفنتين فالف.. اتفقت على بي ام دبليو الفئه الخامسة من اللى فيها تكييف واستين وزراير بالهبل وبنشوفها في التلفزيون بس.. بدأت افكر فعلا في حياتي كمليونير محتمل.. شقة العبور مش تنفع خلاص.. انا لازم اسكن في فيلا في الرحاب او الشيخ زايد

- مهما كنتي متوقعه.. لازم المصريين يفاجئوكى بسلوك وتصرفات غير متوقعه ابداء.. الابداع في الفساد المصري موجود من قبل ما ربنا يخلق الكوكب ده كله.

- يا ساتر يارب.
- امال انتى فاكهه ايه.. بلد تسبح في مستنقع الجهل والتخلف والفقر.. فكرك ده هيكون من ايه؟ افتكرى دايما.. وما ربك بظلام للعبيد.
- ونعم بالله.. حصلك ايه طيب مع بتوع التخليص؟
- اصلى الظهر وارجع اكلّمك.
- استغفر الله العظيم.

فوت بكره يا سيد

- انت يا عم يالى بتصلى التراويح.. جرى ايه يسطى.. هو مش الظهر كان 4 ركعات؟؟
- أه.. انا خلصت اهو خلاص.
- انت بتصلى ايه كل ده يا عم.. انت جاي تتوب دلوقتى.. انجز ياللا.. قولي حصل ايه وانت بتجيب البضاعة من بره.
- اه يا ميبسيس اه.. لفيت السبع بحور على رأى ألف ليلة وليلة.
- ليه بقي؟
- حضرتك علشان تشتري بضاعة من بره.. لازم تعملي حاجه اسمها اعتماد مستندي في البنك.. زى حساب كده بس باسم الشركة الى بره.. الشركة الى انتى هتشتري منها.
- يعنى ايه اعتماد مستندي ده.. مش فاهمه؟
- دلوقتى انتى معاكي فلوس.. الشركة الى بره معاها بضاعة.. هتتعاملوا ازاي؟؟
- بسيطة.. سلم واستلم.. يديني بضاعتي.. اديله فلوسه.. والتخزين شغلة الدفاس.
- طب افرضى ادالك البضاعة وقلتيه شكرا.. انت ملكش فلوس عندي بصوت الواد سيد الشغال.. او خد منك الفلوس وادالك بضاعة اى كلام او مخالفة للمطلوب او اى قلق من اى نوع.. ساعتها انتوا الاتنين تعملوا ايه؟
- ما بلاها شغل يا عم ان كنا هنخون بعض من أولها.
- الدنيا مش بتمشي.. كده.. البنك هنا بيتدخل كضامن للبضاعة والفلوس في نفس الوقت.. انتى تروحي بنك محترم.. تحطي فيه قيمة البضاعة كلها في حاجه اسمها اعتماد مستندي.. وتاخدي من البنك ورقة اسمها خطاب ضمان " Letter of Guarantee " اخوانا المحاسبين بيسموه "LG".. الورقة دى هي الدليل إنك دفعتي مقدما فلوس البضاعة الى طرف محايد وهو البنك.
- وبعدين؟
- تبعتي الخطاب ده للشركة الى بره.. وهي تراسل البنك علشان تتأكد ان الفلوس موجودة.. البنك طبعا مش هيصرفلهم الفلوس الا بعد خطاب منك إنك استلمتي بضاعتك.. يبقى الشركة بره مطمئنه ان فلوسها في امان.. عند البنك.. وانتي ضامنه ان الفلوس مش هتتصرف الا لو استلمتي البضاعة الى على كيفك.. والبنك ياخذ عموله من ده وعموله من ده.. والكل يطلع كسبان ومرضى.
- اه.. كآنا بنعلق الرهان مع البنك يعنى كطرف محايد.
- بالضبط كده..
- طابايب.. حاجة متزعش حد.. وبعدين؟
- رحت بقي افتح اعتماد مستندي بقيمة البضاعة كلها.. والبنك المفروض هيبعت للشركة هناك يقولهم انه حاجز فلوسهم بأمان.. انتو بس ابعثوا الصنف كله والمعلم احمد الزفر هيستلمه هنا.. بعدين احنا نسلمكوا الفلوس الساعة 6 عند الكيلو 45 في الطريق الصحراوي.. وكلمة السر.. عنب عنب.

- يا دى عنب عنب الى انت معلق عليها دى..
- ماهو لو تعرفي قصتها مكنتيش استغربتي.. الشفرة عنب عنب هي أحسن حاجة توصف الوضع ده.. عنب عنب كانت الشفرة بتاعة جيشنا في 67.. شفرة الفشل والخيبة والهزيمة بعيد عنك.. عنب عنب هي شعار مصر.. من أيام الخديو تيفا الرهيب لحد الجنرال عمرو اديب.
- ماشى.. حصل ايه بقي؟
- علشان اشترى حاجة من بره لازم تكون بضاعة قانونية مسموح بتداولها والتعامل معاها ولها ترخيص بيع وشراء في مصر.. يعني مينفعش اروح استورد كوكابين وافتح اعتماد في البنك بإسم بابلو اسكوبار مثلاً.. لا.. لازم تكون بضاعة قانونية.. تمام كده؟
- منطقي.. هو ال "RFID" طلع مش قانوني؟
- وقتها مكانش لسه بقي قانوني.. كان ملوش ترخيص.. زيه زى ال "GPS" في اوله كده.. ممنوع من التداول علشان مفيش حد يعرفه.. مفيش عليه حظر ولا حاجة.. انما حاجة جديده محدش يعرفها وملهاش ورق ولا كتالوجات.
- طيب.. عملت ايه؟
- الطبيعي بقي.. رحا اسأل اخد الترخيص منين يا أستاذ عبد المتعال.. يروح الأستاذ عبد المتعال حادفني على الأستاذ فرج الله.. منين يودي على فين يا أستاذ فرج الله.. روح يا ابني عند مدام افتخار في الدور الرابع.. يا مدام افتخار.. الهي يارب يدى جوزك قوة 7 حصان وميبصش بره.. اجيب منين ترخيص البتاع ده.. تقوم مدام افتخار تباصيني للأستاذ عبد المتجلي.. خدي بالك ان كل واحد من دول بقضى- معاه شهر او شهرين في حوارات وهدايا وفلوس علشان بس اعرف اروح فين بعد كده.
- اه.. الروتين وقرفه.. المهم انك وصلت للمراد.. الأستاذ عبد المتجلي.
- اه.. هو ده الى كان عنده الجواب الشافي الوافي.. قالي الجهاز ده هيبقي تبع الهيئة المصرية للتقييم.. كتر خيرك يا أستاذ عبد المتجلي.. خد حلى بقك ب 5000 جنيه.. هات بيهم كباب وبسبوسة ليك وللعيال.. وان شاء الله يكون الأكل مسموم وتموت انت وهم بأكل الحرام يارب وتتقلي في جهنم بكل قرش حرام خدته منى او من غيرى.. اللهم آمين.
- اعوذ بالله.. متدعش كده يا أخي.
- امال ادعيلهم بطول العمر؟؟ الناس دى عايشه بتاكل من الحرام.. وكل ما نبت من حرام النار أولى به.. يعني انا بأكد على كلام النبي مش أكثر.. بزود أسباب خلودهم في النار ليس الا.. الفلوس دى كانت شقايا ومرتبتي من شغل اوراسكوم المرهق المميت.. مرتب شهر كامل كان ممكن يروح في رشه او رشتين على الناس دى.. وافضل انا طول الشهر اكل طوب وزلط.
- لا حول ولا قوة الا بالله.. ورحا الهيئة؟
- ده كان حته يوم.. تاريخي.
- انت كل ايامك تاريخية يا عسل.. أنت موعود يا أبني!!!
- اه وربنا.. خدت بابا معايا ورحنا الهيئة المصرية للتقييم.. وهناك كان في انتظارنا كبشة مفاجآت أخرى.

- ازاى؟
- أولا فوجئنا بناس محترمه جدا في قمة الرقى والادب.. متعلمين ومعاهم شهادات عالية ودراسات عليا.. حاجه كده لا تمت للحكومة بأى شكل من الاشكال.. دى كانت الهيئة الى بتدي ارقام الباركود للشركات.. كل شركة لها ارقام مخصوصه بيها هي بس.. الباركود بيبيقي في العادة 13 رقم.. 7 يخصصوا الدولة.. وال 6 الى فاضلين يخصصوا الشركة والمنتج نفسه.. حلواني اخوان مثلا هتلاقى اول 7 ارقام من الشمال "6221029" .. 6 يعنى المنتج ده اتعمل واتصنع في مصر.. وال "221029" ده الكود بتاع شركة حلواني اخوان.. اما ال 6 ارقام الباقيين فدول كود المنتج جوا المصنع نفسه.
- ياااه.. وانت لسه فاكتر الأرقام بتاعة حلواني!!!
- امال يا بنتى.. انا قضيت هناك 4 سنين كامله قايم نايم وسط الكلام ده.
- ذاكرتك صعبه اوى يا ابو حمزة.. قولي بقي ان انتو أخذتوا التصريح على خير.
- لا حضرتك.. التصريح طلع مش من اختصاص الهيئة دى.. الأستاذ عبد المتجلي زحلقي بمعلومة غلط علشان يخلص منى.. معلومة لسع فيها 5000 جنية حار ونار في جثة امه.. لبسني زغروف علشان يخلص من الزن بتاعى.. المشكلة في مصر.. ان نص الوقت ضايع في معرفة الإجراءات والنص الثاني ضايع في استكمال الإجراءات نفسها.. الإجراءات علشان معقده وسككها شمال.. بتلاقى الموظفين القائمين عليها نفسهم مش فاهمينها.. فكل واحد يفتى فتوى شكل.. ده يحدفك على ده وده يرميك على ده.. وطول ما انتى بتلغي بتقابل ليصوص وحراميه كل واحد فيهم فاكتر انه بيفتح عكا لما بيقولك كلمه ولا بيرمي عليكى السلام ويبقي عاوز قصاها حاجه.. قولي يا اخ.. فين مكتب أستاذ فلان.. كل سنه وانت طيب يا باشا هتلاقى في الدور الثاني على ايدك الشمال معرفش فين.. وكل سنه وانت طيب برضه يا باشا.. ولما توصلي في الاخر تلاقى حد يقولك تعالى بكره.. وبكره عمره ما بيبجي ابداء.. المهم انك تيجي بكره علشان تلاقى حد جديد يقولك كل سنه وانت طيب يا باشا.. وطبعاً في مصر كل سنه وانت طيب يا باشا دى لا تعني الا هات رشوه او فلوس مش من حقي يا باشا.
- صوره سوداوية قاتمه.. وبعدين حصل ايه؟
- قصدك صورة حقيقية قاتمة.. المهم.. - الناس في الشركة المصرية للتزقيم فوجئوا ان في حد في مصر.. بيشغل في التكنولوجيا دى.. قالولنا احنا عندنا كم مهول من العملاء طالب مننا الحاجات دى ودايخين على حد يعملها ومش لاقين.. الراجل عرض عليا كم مراسلات مهول من شركات بترول وتوكيلات عربيات ومصانع الاكل.. الناس هتموت على البتاع ده واحنا ولا دريائين.. كل مشروع من دول ميزانيتته بالملايين.. جابكو بتاعة البترول مثلا كانت حاطه 7 مليون جنيه.. بى ام دبليو كانوا عاوزين تاج مع كل عربيه تخرج من عندهم.. منصور ورجب وحلواني اخوان ويونى ليفر وتوشيبا واحمد بهجت.. بقينا قاعدين انا وبابا متنحنين تماما وفاقدي النطق.. كل الاسامى الكبيرة دى.. معقول.. كل ده رزق!!! انا لو خدت ربع الشغل ده بس.. بالميت كده هعمل 50 او 60 مليون جنيه مستريح اوى في اقل من 5 سنين.
- احمد.. عندي ملحوظه اعتقد انها مهمه.
- ايه؟
- هو الملايين سهلة كده؟ انت عارف انت بتتكلم في كام؟ انت نفسك طول عمرك تقولي ان الفلوس مش بتيجي الا لما تاخذ قصاها عمر البنى آدم.
- كلام صحيح وفي محله تماما.. احنا بعد كده عرفنا بقي.. بابا كمان اخد باله علشان كده فضل ساكت.. انا طبعا انطلقت في الكلام مع الناس ودست في العشم جامد اوى.. الناس في الشركة المصرية للتزقيم كانوا محترمين بزيادة..

فهموني بالظبط المفروض اعمل ايه واروح لمين.. اتمنولى كل توفيق ورئيس الشركة بنفسه ادانى رقمه وقالى تكلمني كل يوم لحد ما الموضوع ده يكمل.. طبعا كان من حقه يطالب بعموله وانا مكنتش ممانع.. هو يجيبلى عملاء ويأخذ عموله 2.5%.. شيء قانونى وأخلاقي تماما.. وكده كده التورتاية كبيره اوى و تكفى الكل.. وانا كان عندي استعداد اعمل اى شيء لأى حد هيساعدنى.. ان شالله لو طلب امضيله على صك عبودية.. المهم يساعدني بجد.

- وبعدين طيب؟
- خرجت انا وبابا من الشركة.. قالى تعالى يا جناب المليونير اعزمنى على كباب عند شاكر بتاع مصر.. الجديدة.. عاوز أتكلم معاك شوية.
- وبعدين؟
- لأول مره وانا سايق عربية بابا ميدينيش ملاحظات عن سواقتي الزبالة.. لأول مره يكلمني بعمق واحترام.. لأول مره يقولى "لو سمحت".. وايه رأيك لو نعمل كده وشوف انت تحب ايه وقولي.. حسيت ان بابا مختلف اوى اليوم ده.. قلت بينى وبين نفسى— يظهر انه أخيرا شاف انى كبرت وبقيت راجل فقرر يعاملني معاملة الكبار.. كنت سعيد ومبسوط الى ابعد حد.. حلم عمرى قرب جدا لدرجة ان بابا بقي بيحترمنى.. وكمان رايح اكل كباب عند شاكر.. يعنى كيلو مشكل على الأقل وطحينا وسلطه بالهبل.. في ايه تاني في الدنيا اجمل من كده؟
- بالهنا والشفاء يا سيدى.. اوعي تكون مطلبتش رز بالخلطة كمان.
- لا طبعا ودى تيجى.. - واحنا قاعدين بناكل بابا صارحني بمخاوفه.. الصراحة كانت منطقيه جدا.. اذا كان الموضوع يجيب ملايين كده.. امال فين الحيتان الكبار؟؟ لا هو انت يعنى مفيش قبلك ولا بعدك؟ الموضوع يمشى— اه لو مليون.. اتنين.. لو عشره حتى ممكن.. دى فتافيت في سوق البيزنس.. انما لو الموضوع دخل في مئات الملايين.. اكيد طبعا دى فرصه استثماريه هائلة مش هتفوت ابدا من تحت عيون الكبار.
- اه.. كنت عاوزه أقولك كده.
- وقتها انا كنت متحمس جدا.. قتلته يا حاج انا الى معايا سر الصنعة.. ال "Know-How".. انا الى اعرف منين يودى على فين.. انا الى سافرت وذاكرت وعرفت.. هما عباره عن زكائب فلوس لا اكر ولا اقل.. العلم كله عندي انا.. انا البشمةهندس يا بابا.
- وقالك ايه.
- قالى انت فاكرا انهم هيغلبوا؟ انت مهندس وهما اسطوانات مثلا؟ دول ممكن بسهولة جدا يبعثوا يشتروا الشركات الى انت اتعلمت فيها دى نفسها.. وطبعا لا مجال للحديث عن الإمكانيات والفرق بينك انت وانت بطولك وبينهم هما كمؤسسات لهم اذرع في كل مكان.. هيطحنوك ويدوسوا عليك ولا حد هيسمع عنك.
- بس انا مش سهل كده اوى يا حاج.
- حتى لو.. مش هجادلك في دى.. لو غلبوا خالص معاك — وده مستحيل فعليا —.. بسيطة جدا برضه.. رصاصه بجنيه تقهر قلبي عليك انا وأملك وتجيبهم أرباح 100 مليون جنيه.. حادثه وانت مرووح وللا قضيه متلفقه.. وموت يا حمار.
- قصدك ايه طيب؟ انت قلقتني.

- لازم تقلق علشان تعرف تحسب خطواتك كويس اوى.. احنا هنمشي- في السكه القانونية.. في نفس الوقت انا هشوف حد من العالم دى يدخل معناا شريك.. اهو على الأقل نبقي في حمايته.
- ايه!! شريك!! بقي انا اتعب كل ده واتبهدل كل البهدلة دى.. وييجى واحد من دول مش محتاج أساسا.. ياخذ عرقى على الجاهز!! فكرك يعنى الشريك من دول هتقوله خدلك مليون واتوكل وهو هيقولك شكرا؟
- لا طبعاً.. غالبا هو الى هيقولك خدلك نص مليون واقعد في بيتك.. بس دى الطريقة الوحيدة علشان تغفلت من تحت أيديهم بأمان.. لازم هياكلوا معاك وهياكلوا اكر منك كمان.. حضر- نفسك لكده.. انا خايف عليك يا أحمد.. لو في مره واحده في حياتك هتسمع كلامي لازم تكون هي المره دى.. ربنا يحفظك وان شاء الله خير.. متقلقش اوى.. قبل ما حد فيهم يمس شعره منك.. هكون انا ميت.. أبوك مش شوية في البلد ياض.
- الف بعد الشر عليك يا حاج.. انا الف مره بدالك.. ان شاء الله خير.. عموماً.. انا مش هعمل اى خطوه الا بموافقتك ومعرفتك.
- وقفت شويه ابلع ريقى من الانفعال.. انا فاكرا احداث اليوم ده وكأنها من ساعتين.. انا كنت في اللحظة اللي يتمناها اى اب وأي ابن.. أبني بقي صاحبي وبتكلم معاه راجل لراجل.. الله.. اد ايه لحظه جميله اوى يهون علشانها شقى سنين طويله من التربية والسهر وتحمل سخافات العيال.
- مالك يا عسل؟ متنحه كده ليه؟
- بفكر طبعاً في الى انت بتقوله وبتخيل رد فعل مامتك.
- ماما مكانش عليها حاجه في الليله دى الا انا اتجوز.. هي كانت شايفه ان كل المشاكل دى حلها الجواز.. حتى لما قتلها انا ممكن اتقتل.. قاتلى فكرك يعنى هيقولك ويبتموا عيالك.. الجواز هيحميك ويعصمك من كل شر.. ست مصر-يه عظيمه جدا الحقيقه.. كل مشاكل الدنيا في نظر أُمى حلها حاجه من اتنين.. يا اما اتجوز وربنا يهديني يا اما تسخنلي شوية الباميه الى فاضلين من امبارح.
- انت عارف المشكله الكبيره ايه.. ان انت متعرفش مين عدوك بالظبط.. متعرفش خصم محدد.. متعرفش الهجمه ممكن تجيلك منين.. كل ما هنالك ان في حته لحمه كبيره اوى شايلها فأر داخل يتمختر وسط قفص اسود جوعانة ومفترسه بشده.. متقدرش تقول انهى أسد فيهم هو الى هينط عليك امتى علشان يأكلك انت وحته اللحمه.
- نفس التشبيه ده بالظبط قالتها اختى.. بس مقاتلتش انا فأر.. كانت اكر احتراماً ليا منك على فكره.
- مش قصدى والله.. انا اقصد فرق القوه مش اكر.. هي قالت ايه؟
- قالت كأني كلب شايل حته لحمه كبيره موزه محمره ومستويه اوى... ههههههه.. يظهر انها كانت جعانة وقتها.
- طيب يا سيدى.. انا براءة يعنى.. حصل ايه بقي بعد كده؟
- عرفنا الإجراءات الصحيحه.. الموضوع كله هيبدأ من الهيئه القومية لتنظيم الاتصالات.. دى هيئه تابعه لوزارة الاتصالات نفسها.. دول الى يقولوا اه ينفع.. لا مينفعش.
- اه.. حكومة يعنى.. عسل اوى.. بس انا اول مره اسمع عنهم.. دول بيعملوا ايه؟؟

- دول يا ستي بتوع الهواء.. أتااري الهواء ده طلع ملك للدولة.. مش اى حد يبعث فيه اى حاجه كده.. لا طبعا.. كله بتصريح وترخيص وضرائب كمان.. شركات الموبايلات بتدفع للدولة في مقابل استخدام الهواء.. وكذلك محطات الفضائيات وشركات الطيران.. اى استخدام للهواء المصري.. لازم يكون مصرح بيه وفي قصاده مقابل يندفع للدولة.
- يا سلام.. كل ده من الهواء!!
- اه تخيلي.. عبد الحليم خدعنا لما قال الهواء هوايا.. اتاويه هواء للدولة.
- ال وانا الى كنت فاكهه ان الهواء ده حاجه كده بترمي الناس على بعض.. زى ما حد يقولك أنت جيت وللا الهواء رماك اجمبييل.. هههههه.. اتاريك قبل ما الهواء يرميك.. لازم تكون دافع ضريبة.
- الهواء طلع ثروه قوميه واحنا منعرفش.. المهم يا ستي.. رحنا الهيئة القومية لتنظيم الاتصالات.. خدت معاد مع الموظف المختص.. بعد ما شرحت الموضوع ب 5 دقائق قالي آسف.. الموضوع ده ملوش ترخيص.. طيب سعادتك انا عارف.. ماهو انا جايلكوا علشان آخذ الترخيص.. انا عندي شركه مسجله وورقي كله سليم.. اعمل ايه بقي؟
- قالك ايه؟
- وشه كان الصورة المثالية للغباء وعدم الفهم.. اه يا ني لو بعرف ارسوم.. كنت رسمت صورته عالميه لوش الموظف ده اسميها الغباليزا.. أجدع من الموناليزا وربنا.. قالي الأول تقدم الملف كله ومعاه توصيف للأجهزة والخدمة المطلوبة.. هتخضع للفحص الفني من الوزارة والوزارة هتقدم تقرير يقول اه يصلح او لا يصلح.. بعدها يبقي في استعلام امنى.. بعد كده تاخذ الترخيص علطول.
- استعلام امنى.. يا لهوى.. ده الاستعلام الأمني بتاع الباسبور بتاعى خد سنتين لو تفتكر.
- طب ياريت على اد سنتين.. عارفه لو كانوا سنتين.. والله كنت صبرت.. كنت هشتغل عادي ويتعلمى قضيه اخد فيها حكم بالحبس والغرامة.. هدف الغرامة على خير ويبقي الموضوع قانونى بعد كده.. كنت هكسب في اول سنه 10 مليون مثلا.. ادفع منهم 5 او 6 مليون غرامة أحملها على العملاء بتوعي السنه الى بعدها.. وممكن يبقي فيها حبس سريع كده على ذمة القضية.. 6 شهور وللا سنه بالكثير.. بابا يبقي يكمل شغل مكاني وقتها وانا في السجن ومعاه اشرف ومحمود.. بعدها هخرج اشتغل زى الفل.. المحامي بتاعى هو الى قاللى كده.
- وانت كنت مستعد تتحبس علشان المشروع ده!!
- طبعا.. اديكى شايفه الأرقام عامله ازاي.. سنه في الحبس بعدها هعمل ملايين لو فضلت طول عمرى اشتغل مش هقدر اعمل ربعمهم.
- امال ايه الى وقف الدنيا طيب؟؟
- التقرير الفني سعادتك.
- ايه رفضوا؟
- لا طبعا.. الموضوع اتحول للتقييم الفني ومات بعد كده.. ملك الموت كان بينزل على مصر.. كل يوم مش بيعمل اى حاجه الا انه بياخد روح المشروع بتاعى انا بس ويطلع تانى.. كل ما اسأل على التقرير.. الاقي اجابه واحده.. لسه.. التقرير يا بشر.. لسه.. طيب آجي امتى.. بعد أسبوعين.. التقرير يا كفار.. لسه.. طب آجي امتى.. بعد شهرين.. التقرير يا ولاد ميتين الكلب.. لسه.. آجي امتى.. تعالى في دخلة رجب.. وهكذا.. 8 شهور على ده الحال وانا بلف على

- وبعدين؟
- لما زهقت.. حكيت لواحد صاحبي كان بيشتغل معايا في حلواني اخوان.. بنى ادم نظيف ومحترم.. ابوه وقتها كان فريق عامل في الجيش.. فريق في الخدمة على كتافه زحمه.. نسر ونجمه وسيفين متقاطعين.. قلت يمكن الاق عندده الحل.
- ها؟
- أبوه طلع جدد وقال ان انت محتاج واسطه تزق الورق.. هو سأل وجاب المستخبي.. اتارى حضرتك الورق بتاعي مركون في الدرج ومحدث فتحه أساسا.. لما رحت اطمئن عليه ومعايا واسطه كبيره بعد كده.. لقيتته بالبرشام الى انا كنت قافلده بيه.. ووده كان يوم تاريخي تاني برضه.
- 6 شهور ببسحبوا منك فلوس.. وحتى مبصوش في الملف!!! يا ولاد الكاااالب.
- كفر بين ورب الكعبة.. بل هو ما اكفر من الكفر الكافر نفسه.
- طيب رتبلى الأحداث كده وبالراحة عليا.. عملت ايه بالضبط؟
- بدأت ادور على واسطه.. واسطه بس علشان اعرف الورق فين ومع مين.. اكتشفت ان الموظفين الى بقابلهم دول ما هما الا شوية صبيع وبلطجية هفأ ملهمش اى لزمه في الحياه.. عايشين على كده.. يسرقوا فلوس من الناس وخلاص.. لا يفهموا حاجه ولا يعرفوا اى حاجه عن اى حاجه.. انا محتاج واسطه ادخل بيها لوكيل الوزارة ورئيس القطاع الفني.. البشمهندسين الكبار.. هما دول الى في أيديهم كل حاجه.. دول الى زمان كان بيتقالهم يا دولة الباشا.. المهنداس على رأى فاتن حمامه.. دول الى غلطول في مارينا ومراقيا.. ودول طبعا مش هينفع معاهم 500 وللا 1000 جنيه طبعا.
- وعملت ايه؟
- دى بقي كانت من حلوليات الحزب الوطني.. انا كنت اعرف طارق كامل وزير الاتصالات معرفه شخصيه.. كان معنا في جمعية اسمها جمعية شباب المستقبل "FGF" بتاعة جمال مبارك.
- دى ايه دى؟؟
- دى يا ستي نصباية كده كان عاملها جمال مبارك وعصابته.. جمعية اونطا كان بيلم فيها الشباب الى ممكن تنفع واجهه ليه ولنظامه الجديد.. ببصرف عليها شلته من رجال الاعمال الجدد.. معتز الألفي بتاع امريكانا واحمد عز بتاع الحديد ومحمد فريد خميس بتاع النساجون الشرقيون ورشيد محمد رشيد وزير الصناعة ومحمد منصور بتاع منصور شيفروليه.. كل فتره كده يعملوا اى حاجه وبطلعوا في التلفزيون شوبة عيال من الى بتستحي بتحط جيل

وكده.. رسالة بس للناس ان "الشاب" جمال مبارك هيقب وجه الحياة في مصر.. واهو.. زى مانتوا شايفين كل رجالته شباب زى الفل اهو.. والناس كل ده فاكراه ان العيال الحلوة دى بتوع الحزب.. مش موديل إعلانات مثلا.

- وانت علاقتك بيهم كانت ايه؟

- سنة 2002 كانوا اعلنوا عن مسابقه لكورس كبير اوى وغالى اوى تبع الوزارة.. اتقدمت فيه ونجحت.. خلصت الكورس على خير وطلعت الأول في مشروع التخرج بتاعه كمان.. فعملولنا حفله كبيره في دار القوات الجوية كان حاضرها جمال مبارك شخصيا.. يومها اتعرفت على الشلة دى كلها وطارق كامل طلب منى ادخل معاهم الحزب.. ودخلت الحزب فعلا وبقي معرفتي بيه معرفه شخصيه لأنى كنت بقابله دايمًا في مقر الجمعية.. قلت حلو.. اهو عن طريق كارنيه الحزب كمان ممكن ادخل بيوت الشباب في شرم الشيخ.. الليلة ب 5 جنيه بدل الفندق أبو 500 جنيه.. وكمان ينفعنا في يوم زى ده.. هو شكله اهل وضايح ويتهته في الكلام اه.. الا انه وزير برضه.. لما اروحله علشان مشروع زى ده ممكن هو يدخل معايا تحت شعار الحزب.. اهو دعاية ليهم في الاخر.. أدى مثال اهو من شباب الحزب الوطني الى بيشتغل لمصلحة الوطن.. انا طبعا مكتتش فاهم كل ده وقتها.. فهمته بعدين.. عرفتي بقي لما كنت بقولك انا اكتشفت انى كنت حمار كنت اقصد ايه؟

- يعنى انت دخلت الحزب الوطني مش علشان السياسة.. علشان لما تروح شرم الشيخ.. تقعد في بيوت الشباب ام 5 جنيه في اليوم؟؟

- بدمتك مش اوفر؟ امال انتى فاكراه ايه.. سياسة مين وقرف مين.. هو بعد الى شفته في اتحاد الطلبة أيام الكلية بقي ليا نفس للسياسة؟

- ههههههه.. وانا الى فاكراك من كبار مناضلي الفلول.

- انا مكانش في دماغي سياسه ولا زفت.. انا عاوز اشتغل.. عاوز اعمل فلوس.. عاوز افتح مصنع اشغل فيه 6 وللا 7 الاف بنى ادم اتحكم فيهم ليل ونهار.. عاوز العب بالملايين.. عاوز اشترى اراضى كتير وازرعها كلها و اغرق السوق خضار وفاكهة نظيفة بتراب الفلوس علشان الناس تاكل والباقي نصدره بره نقوم نجيب فلوس اكرت.. عاوز اعمل مراكز في البحر تصطاد سمك بالعبيط والناس تاكل فوسفور ويطلوا الفياجرا ويرجع العصب المصري شديد من تانى بدل ما البلد حصل فيها قفله على راي الراجل التخين بتاع فيلم النوم في العسل.. عاوز اعمل مشروع تسمين 5 مليون راس عجول والناس كلها تاكل لحمه كل يوم.. عاوز فلوس كتير علشان اعمل بيها فلوس اكرت.. عاوز العيال تشتغل ليل ونهار من غير رحمه.. عاوز العيل من دول يتخرج من هنا ويتسحل على قفاه في شغل يلف فيه زى الثور في الساقية ليل ونهار من غير ما يفوق ولا يبقى عنده وقت للقهوة ولا المز ولا الحك.. عاوز البنات تتجوز بدرى بدل ما هي قاعده تربي جهل وشحوم وتعمل لايكات على صفحات ابعتيلى اد يمكن أكون أبو الولاد والملك "... مؤسس مصر.. عاوز البلد تصحى وتغسل وشها الساعة 6 الصبح.. كان عندي أحلام كتير اوى كلها تتمحور حوالين الشغل.. يمسه الحك الى يمسه مش فارق معايا.. ان شالله يكون ابليس نفسه.. السياسة لأهل السياسة الله يحرقهم كلهم.. انا ليا ان الناس تشتغل وتاكل وتعيش كويس ويولع الحكم باهله.. ايه يا ناس.. كفت!!

- لا طبعا.. ده شعور نبيل وطيب.. بس في التوقيت والمكان ومع الأشخاص الغلط.

- مانا عرفت كده بعدين..

- المهم.. رحت للوزير؟

- ايون.

- وعملت ايه؟

- عملت صينية بطاطس باللحمة والحبان والشطة الخضراء.. حلوه اوى على فكره.. أقوم اغرفلك طبق؟
- لا
- لا.. هقوم اغرفلك طبق.. انا جعت يا وليه.. جرى ايه.. ده انتى نفساء..

- ماله ده راخر؟

- كان عنده ابن من سني بالظبط.. واسمه احمد برضه.. اتخرج من كلية الشرطة ومات بالسريطان بعد ما علق اول دبوره ب 8 شهور.. من ساعتها وهو غير متزن يا عيني.. الراجل كان قرب يتجنن خصوصا انه معندوش غيره.
- لا إله الا الله.. ربنا يرحمه.
- ويرحمنا احنا كمان.. المهم يا ستي رحنا الهيئة.. وفتحوا الملف قصاد الكل علشان الفحص الفني.. لقوا الموضوع كبير فطلبوا تأجيل الفحص لحين استدعاء متخصصين في امن المعلومات ومهندسين هوائيات وأبراج ومهندسين اذاعيين ومهندسين اتصالات وكده.. كونصولتو يعني.
- طيب خير.. الدنيا بتتحرك اهو.
- فعلا.. اتحركت بسرعه اوى.. الفحص الثاني كان بعد المعاد ده ب 3 أيام.. سبحان الله.. 8 شهور بجري يمين وشمال ومفيش فايده.. وبمكالمة الوزير وسيفين سيادة اللواء.. الموضوع كله خلص في اقل من أسبوع.. 4 أيام كل يوم 8 ساعات بيعصروني ويهدوا حيلي في أسئلة.. طلبوا منى طلبات تعجيزيه وطلبوا تجربته حيه.. والحمد لله كنت عامل حسايي تماما.. لولا بابا كان زماي ضعت.. بابا تقريبا كان متوقع 98% من اسئلتهم.. كنا متحضرين كويس اوى لدرجة ان رئيس اللجنة وقع التقرير فورا واحنا قاعدين في اخر يوم رغم ان المره دى مكانش معنا اى لواء.. الراجل انبهر بالمستوى والتطبيقات.. ده غير انى رزعتهم الم جامد اوى على قفا الخوف والإرهاب الى عاملينه للناس بالاونطا ده.
- ازاي؟
- الحاجات دى هما بيخافوا منها علشان سرية البيانات.. نضمن منين ان الى انت بتبعته ده ميكونش في معلومات سرية وللا اى مصيبه تضر بالأمن القومي؟
- قصدك يعني انهم مش واثقين في المحتوى الى انت هتبعته وتستقبله؟
- بالظبط.. أفلام الجاسوسية مسيطرة على عقلهم شويه.
- معاهم حق برضه.. نظره امنييه صرفه.
- بابا كان عامل حسابه.. قاللى انت عايش في دوله بوليسية محكومة بالحديد والنار.. طبيعي ان الفكر الأول كله يكون في الامن والخوف الأكبر كله يكون من كل جديد.. فكر واتصرف في الحدود دى.. وسعمت فعلا كلامه.. ورميت الكارت الأخير على التراييزه.
- الى هو ايه بقي؟
- الى هو انى مش عامل اى حماية على بياناتي من اى نوع.. انا بيعت وبستقبل البيانات في صورة نص عادى جدا.. علبة البيانات الى بتروح وتيجي في الهواء مفيش عليها اى حماية خالص.. تخيلي ان البيانات بتتبع في علبة مقفولة.. البنوك مثلا بيبيخ تخن العلبة دى 5 بوصه.. المؤسسات الكبيرة بيبيخ 4 بوصه وهكذا.. حماية وامن علشان محدش يقدر يطلع على بيانات حد.. انا بقي كنت بيعت البيانات بتاعتي من غير اى حماية خالص.. من غير بنطلون زى ما قتلهم يومها.. البيانات جايه عريانه بتقولك هيت لك.. اشقطنى على اى جهاز من فضلك.
- وده مش خطر؟ قصدى للعملاء بتوعك يعني؟
- اطلاقا.. لما حد يسحب البيانات دى مش هيقدر يفهم منها اى حاجه لان معندوش السوفت وير بتاعنا نفسه.. شوية حروف وخلاص.. كمان اى حماية هحطها على البيانات بتاعتي لازم ابعت للهيئة مفتاح فكها.. ده سوفت وير

ينزل على اجهزتهم.. يقرأ البيانات علطول من غير اى مشاكل.. كل الناس متقدرش تقرا البيانات دى الا أصحابها والهيئة.

- وبعدين؟
- الناس اتبسّطت جدا.. العرض كان هائل.. بابا كان بيتكلم بلسان صاحب العمل ذو الشعر الأبيض وخبره 42 سنه شغل.. وانا بتكلم بلسان المهندس النشيط اللى فاهم هو بيحكى في ايه.
- وبعدين؟
- طلع التقرير الفني بأنه لا مانع من الترخيص.. التكنولوجيا امنه وفعاله.
- الله أكبر.. كده فاضل التزكية الأمنية.
- لا.. كان في خطوه سريعة كده.. كان مطلوب شهادة من وزارة الصحة ان المنتج ده آمن صحيا وملوش اى اخطار على البشر.
- وعملت ايه؟
- المفروض الطريق الطبيعى انى اراسل الشركات المنتجة للهاردوير ده وهما يفيدوني بكل الكلام ده.. اكيد عندهم دراساتهم طبعا.. دى شركات كبيره مش هزار.. اخذ انا بقي الكلام ده واطلع على الوزارة.. أقدم التقرير ده في الملف بتاعى وتجيلى الموافقة بعد 3 قرون لان الطبيب المشرف على الكلام ده هيكون عنده حاله ولاده في يوم و مراته هتطلق في يوم تانى وابنه هيعمل حادثه في يوم ثالث وحماته هتضره في يوم رابع وهكذا.
- انت بقيت خبير.
- طبعا.. عرفت اكلم مين علطول في وزارة الصحة.. بمساعدة بعض الأصدقاء ومبلغ محترم ب 4 اصفار من تحت الترايزه بعد ما صلينا الظهر جماعه والحمد لله مع تليفون محبه وتوصيه من سيادة وزير الاتصالات.. الحمد لله استلمت التقرير الطبي في شهرين.. انجاز ما بعده انجاز.. كده مبقاش فاضل غير ختم النسر- الأخير بتاع التزكية الأمنية.
- بالضبط.
- عملت فيها ايه دى.. المفروض تكون سهله.. معاك لواء اهو.
- ههههههه.
- ايه تانى.
- اللواءات مستويات.. في لواء ميقدرش يخلص بطاقه من السجل المدني وفي لواء تانى يقدر يعمل انقلاب.. اللواء اللى كان معانا كان راجل بتاع ربنا.. اخره كان يظهر بس بالبدلة الميري.. انما في حقيقة الامر لو حد بخ فيه.. هيجيب ورا.
- امال عملت ايه؟
- رجعت تانى لمكتب دولة معالى الباشا وزير الاتصالات.
- وحصل ايه؟

- طردوني اول مره.. الوزير كان في المانيا ومدير مكتبه ميعرفنيش.. فضلت وراه لحد ما رجع من غزوة المانيا بألف سلامه.. رحت قابلته بطريقة الواد محروس بتاع الوزير كده.. على سلم الوزارة وقفت قصاد مره واحده.. هو شافني وعرفني وخدني على مكتبه.. سمع مني القصة كلها واتبسط ان التقرير الفني خلص.. وعدني انه هيتصرف لكن بدون اى التزام منه.. كده الموضوع بره ايده.. هو مسئول عن الفنيات بس.. انما الامن ده مش تبعه.
- تسمحلى اسألك سؤال؟
- أسألي؟
- ايه اللى يجبر وزير انه يسمعك؟ معلش يعنى انت مين علشان توصل للمستويات دى؟ مش معقول كل واحد عنده أحلام يقدر يوصل للناس دول.. بسهولة جدا كان ممكن يطردك من مكتبه ولا كأنك جيت أصلا خصوصاً ان انت وقتها كنت عيل صغير لسه؟
- ومين قالك ان ده مكانش بيحصل؟
- انت مقلتش؟
- انا مقلتش لأنى لو ركزت في التفاصيل دى مش هنخلص.. بس انتى معاكي حق في نقطة.. انا لما كنت بحتاج اقابل وزير.. كنت بقدر.. غيرى مش قادرين حتى يقابلوا امين شرطه.
- طب ايه السر بقي؟
- شخصين.. بعد توفيق ربنا سبحانه وتعالى.
- الأول باباك.. ده اكيد
- صح.. بابا كان زميل دراسة وزير الكهرباء الدكتور حسن يونس.. وكمان كان رئيسه في الشغل فيوم من الأيام.. بس بابا سافر الخليج فترقيات اتاخرت.. لو كان فضل في مصر.. كنا هنموت من الجوع 20 سنه اه بس بعدهم كان هيمسك الوزارة بعد ماهر أباطة علطول.. خصوصاً انه في الوزارة كانوا مسميينه فتى أباطة المدلل.. ده غير تاريخه العسكري المشرف جدا والوسام اللى اخده من عبد الناصر وقت بناء السد العالي والوسام بتاع حرب أكتوبر.. ومتنسش كمان انه كان من الشركس.. مملوك اه.. بس كانوا امراء في يوم من الأيام.
- والثاني؟
- الدكتور حسام بدر اوي.
- ده بتاع المستشفى اللى في المعادي.. النيل بدر اوي.. صح؟
- اه هو.. الراجل ده من اشد الناس في الكوكب ده احتراماً.. رجل ذو خلق فعلاً.. هو كان معانا في الحزب بس كان من تيار المعارضة لعز وشلته جوا مطبخ الحزب.. محدش قدر يعمله حاجه لأنه غنى اوى وعيلته كبيره جداً.. ده غير انه من الحرس القديم.. ساعات لما الدنيا كانت بتضلم في وشي.. كنت اروحله المقر الانتخابي بتاعه في وسط البلد او اقبله في مقر الجمعية في الدقي.. احكيه وهو كان دايماً بيتصرف.. كان له معارف في مواقع مهمه اوى.. مش شرط يكونوا ذوى رتب.. المهم انه يكون الشخص الصح.. يعنى مره مثلاً بعثني لملازم اول.. يبقي مش عارف جوز بنت اخت مين من اسرته.. عيل صغير اه.. لكنه كان افيد من عميد شرطه.. المهم المكان الصح والشخص الصح.
- طيب اسمحلي يعنى.. كل دول كانوا بيخدموك كده في مقابل ايه؟

- في مقابل انى عضو نشيط جدا في الحزب.. في انتخابات 2005 انا واخذ معايا اكثر من 6000 راس زى الخرفان علشان ينتخبوا العبيط بتاعهم في الحداثق.. انا كنت بحضر اجتماعات وسراقات الانتخابات لمرشحين الحزب.. كنت بقوم بدور المعارضة الكرتونية.. اسأل أسئلة قوية معروفة ومتفق عليها مع المرشح مسبقا.. وطبعا المرشح يرد بقوه وباحترام وبصبر على العيل القليل الادب ده الى هو انا.. فيبقى في نظر الناس واسع الصدر ومتفتح وخدم وعنده حلول.. يخلص السراقدق الانتخابي.. المرشح أسهمه تعالى ويلم اصوات.. وانا اقبض ال 10 بواكي بتوعي.. بعد الانتخابات أدى دقنى لو شوفتوا المرشح ده تانى.
- أخيه يا احمد.. كذاب زفه!! شغلانة مش الى هيا ابداء.
- وهو انا كنت اعرف؟ وللا كنت بعمل كده لوحدي؟ مش قلتلك ضحكوا عليا.
- يعنى ايه؟
- دى كانت سنة الانتخابات في مصر.. كله كان بالاتفاق يا قطي الحلوة.. بتوع الحزب كانوا بيعملوا كده ويسموا ال 10 الاف جنيه دول حلاوة.. بتوع ربنا كانوا بيدفعوا اكثر على فكره ويبسموها جهاد بالمال في سبيل الله.. الى كان زي في سراقات الجماعة التانيين كان بيحيله عربييه او بيشتغل شغلانة كبيره في شركه من شركاتهم.. كان معروف جدا ان الحزب الوطني حزب الشحاتين والجماعة بتوع الدين دول فلوسهم متلتله.. لكن الحزب كان آمن.
- آمن ازاي؟
- يعنى لا يتقبض عليا ولا البوليس يهوب ناحية بيتي.. بينما الجماعة التانيين كل يوم والتاني في المعتقل.
- يا سلام.. للدرجة دى كانت البلد لعبة في أيديهم؟
- واكثر وربنا.. اقولك على حاجه؟
- قول.
- واحنا في الكلية كان معانا واحد اخوان.. معروف انه اخوان ويبدخل انتخابات الاتحاد باللوجو بتاعهم.. مش بس كده.. ده كمان كان مسئول عن موقع اخوان اونلاين.
- ماله ده؟
- بعد يناير 2011 فوجئنا انه أمنجى.. كان مزروع في وسط الاخوان علشان ينقل اخبارهم في المجمع بتاع الكلية اول بأول.
- يا أولاد ال.. كل المدة دى!!
- مش ده الخبر القوى او المفجع.. وسطهم جاسوس ماشى.. هبل وانضحك عليهم للمرة التسعاشر مليار.. ده امر لا يعيبهم في شيء على فكرة.
- امال ايه؟
- المفجع فعلا ان الكبار كانوا عارفين انه أمنجى.. عارفين وساكتين.
- يا دين امي!!!!!! انت بتتكلم جد؟

- والله زى ما بقولك كده.. الجميل في الجماعة بتوع الدين دول هو التطرف في المشاعر.. لما يحبوا.. بيقولوا قصائد.. ولما يكرهوا.. بيقولوا افطع من المتنبى وهو بينفخ كافور الإخشيدى.. راقبي المنشقين منهم شو في بعد الخروج بيقولوا عنهم ايه وينتقال عليهم منهم ايه.. احذفي المبالغات وهتتفرجى على مسخره.. لا هو المتنبى كان قال كم بك يا مصر من المضحكات ولكنه ضحك كالبكاء من فراغ.
- ليه.. هو المتنبى راخر كان اخوان؟
- لا.. مكانش اخوان.. بس كان بيحترمهم.. ههههههه.
- الله يحظك يا اخى.. المهم.. وبعدين حصل ايه؟
- اه يا ستي.. وقفنا فين؟ الى حصل مع الوزير.. اه.. شكرته ومشيت من مكتبة.. بقيت اكلمه مره كل شهر اطمئن على الأخبار.. والرد هو هو.. انت مستعجل اوى يا احمد.. طبعا الكلام مع الوزير غير الكلام مع امين الشرطة.. الوزير لما يقول خلاص.. يبقي خلاص.. امين الشرطة ممكن أقوله ابوك لابو الى جابوك.. الوزير مينفعش.. دى فيها معتقل وش.
- وبعدين عملت ايه طيب؟
- 3 شهور بجري ورا سيادة وزير الاتصالات.. 3 شهور وبابا بيحاول يلاقى شريك ميكونش متوحش.. الغريبة ان الكبار رافضين.. في حاجه غامضه في الموضوع ده.. مش قادر افهم ولا اصدق ايه الى بيحصل بالظبط.. الناس بتحاول تموت المشروع ولا كأنه مخدرات.. انا خوفي كله ان الموضوع ينتشر والفكرة تتسرق.
- طيب سؤال.. عملت ايه مع شركة التليفزيونات الى قبضتوا منها العربون.
- اهي دى كانت طعنه في الظهر والقلب معا.
- ليه!! هو لغى المشروع؟؟
- لا.. انا رحت اتكلمت معاه وشرحتله الموقف.. عرضت عليه حل من اتنين.. نلغى الفكرة كلها ويسترد فلوسه كامله لحد ما انا احل المشكلة.. او نبدأ نشتغل وانا اتحمل المخاطر كلها.
- وقال ايه؟
- كان راجل محترم.. قالي معاك 6 شهور.. لو الأمور مشيت.. مفيش مشكله.. مش شرط يكون الترخيص موجود فعلا.. المهم يكون في بواذر ان الموافقة هتيجي.. كده كده في بيانا عقد وانا ملتزم بكلامي معاك.. الفلوس معاك مفيش مشكله.. مش هنختلف عليهم.. انت جاي من طرف ناس أفاضل اثق فيهم.
- والله راجل محترم.
- اوى.. مش كده وبس.. ده عرض عليا انى اشتغل عنده في المصنع.. كان هيعمل اداره كامله للمشروع ده اعين فيها الى يعجبني واعمل فيه المشروع كله زى ما يبجى على كفي.. ادانى عقد الشغل وخانة المرتب فاضيه.. بهزر معاه وحتيت مرتب 25 الف جنيه شهريا.. لقيته قاللى لا.. وحت 30 الف.. زيك زى اى مدير عندي.. وعربيه دايو موديل السنه كمان.. الكلام ده كان سنة 2007.
- ما شاء الله والله اكبر.. كنت قبلت الشغل عنده يا عم.. سنه واحده تأمن مستقبلك.

- مكنتش اقدر اقبل لكذا سبب.. أولا ده مش سعري الحقيقي كموظف.. كده انا بغش نفسي... لو المشروع كله فشل اكيد هيطردني.. اعمل انا ايه بعدها؟ كمان لما يبقى عندي 29 سنه بالرقم ده.. الخطوة الجايه هتبقى ايه؟ ده غير اني كنت مبسوط جدا في اوراسكوم.. المهندس نجيب ساويرس كان بيعاملنا معاملته خاصه لأننا كنا اداره بتخدم كل شركاته وموفرين عليه كتير اوى.. وكمان محبيتش ان علاقتي بعميل عندي تكون ان هو اشتراني.. لا.. انت عميل عندي ودمتم.. اخلص مشروعك وبعدها اقلب على عميل غيرك.
- بس اغراء الفلوس صعب.. انت بتتكلم عن مبلغ يساوى 6000 دولار تقريبا في الوقت ده.
- اه.. بس الفلوس القليلة دى مكنتش شغلي الشاغل.. بابا قدر انه يحصني تماما ضد الاغراءات العبيطة دى.. كان يهمني النجاح نفسه.. الإنجاز.. كمان خدى بالك من حاجه.. لما رجل اعمال يعرض عليا 1000 جنيه في الشهر.. ده معناه اني استحق 5000 جنيه على الأقل.. انا كنت بنام واحلم بسمارت سوليوشنز.. مبنى كبير في القرية الذكية عليه الاسم من فوق بالنور الى تشوفه القاهرة كلها.. كنت عاوز اعمل مشاريع تانيه من ورا الكلام ده.. حلمت بحاجات كتير اوى.. حلمت وطلعت فوووووووق.. وبعدها وقعت على جدور رقبتى غير مأسوف عليا لما اكتشفت مصر على حقيقتها.
- معلىش.. يكفيك شرف المحاولة.
- عمرى ما اقتنعت بالجملة دى.. طالما حاولت.. يبقى لازم انجح.. محدش يقولي المشيئة.. مشيئة ربنا دايمًا في صف خير الانسان.. الى انا بتكلم فيه ده مش شر ابدأ.. لما افكر اشتغل واشغل ناس حواليا.. دى هي لازم تبقي المشيئة.. ربنا خلق الكون بالفيزياء.. كل فعل له رد فعل.. دى القوانين الى احنا بنكتشفها كل يوم.. لما انا اعمل فعل لازم وحتما يكون له رد فعل.. انا عملت فعل كويس ربنا نفسه امرنا بيه.. وقل اعملوا فسيرى الله عملكم ورسوله والمؤمنون.. مش ده القرآن بتاع ربنا وللا انا بألف؟ قوم لما اجتهد واجود بزيادة في أوامر ربنا.. حد يقولي يكفيك شرف البطيخ.. والنبي ده كلام؟؟
- بيفحمنى منطلقك يا اخى رغم انك بتبصلي في اللقمة.. هات حتة لحمه كمان وانت بتحكيلى حصل ايه بعد ما الوزير ظهر انه مش قادر يعملك حاجه.
- فكرك انتى عملت ايه؟
- شفت واسطه تانيه؟
- طبيعي
- وزير تانى؟
- لا
- وزير ثالث؟
- لا
- لواء اكبر؟
- لا
- امال ايه يا عم.. حيرتني.

- الواسطة الى بعد كده جت بالصدفة البحتة.. ولا كنت اتخيل ابدا انه ممكن يرد عليا.. في يوم من الأيام كنت بقرا بريد الاهرام بتاع الجمعة.. لقيت ناس بتبعك شكوى وكده.. فقررت اعمل زيهم.
- بعت شكوى؟
- ايون.
- لمين؟
- للميلامين.. ههههههه

الإرهاب والكباب

- أحمد.. تغسل المواعين وللا تقعد بالواد؟
- وده سؤال.. ده انا اغسل المواعين واسياً الشقة والحمام وبعد ما أخلص هروح أغسل مواعين الجيران كمان.. حرام عليا اقومك كده وانتى نفساء.. يا شيخه.. هو الرحمة انعدمت من القلوب يعنى.. جرى ايه في الدنيا يا جدعان.
- طيب ماشى.. اغسل المواعين بسرعه وتعالى احكيلى بقي عملت ايه مع الوزير.
- هوا.. فريره.

يا ترى ايه العلاقة الوثيقة بين غسيل المواعين وتهيج الذكريات السيئه عليك؟ افكر انى قرأت مره تعليق قالتة أجاثا كريستي عن ان أفكار الجرائم كلها بتجيلها وهي بتغسل الصحون.. فلا يوجد في العالم عمل أقدر من هذا.

من المرات القليلة الى بعذر فيها حرمانا المصون على عصبيتها هي لما بيكون عندها مواعين.. اعوذ بالله من دى شغلانة.. هو كائن المواعين ده بيتكاثر ذاتيا وللا ايه؟ انا دخلت المطبخ علشان اعمل صينية بطاطس.. يعنى المفروض الاق في الحوض سكينه وصينية وطبقين أكلنا فيهم وشكرا.. كل الأدوات دى جت منين واتوسخت أمتي؟ الطبخ اخذ منى ساعتين.. والمواعين وتشطيب المطبخ 4 ساعات.. يعنى ربع اليوم راح في المطبخ.. ومطلوب من الانسان بعد كده انه يكون كائن منتج ومبدع!!

طب ازاي وربع حياته رايح في المكان الموبوء ده؟

ولكن ما باليد حيله.. أهلي معروفش يعلموني ازاي أكون قذر ووقح الى الدرجة الى تخليني أوافق ان مراتي الى لسه والده من كام يوم تقوم من السرير علشان تغسل المواعين او تطبخ.. حرام والله.. كفايه عليها عياط الواد ومواعيد نومها المضطربة.. في رأيي ان اكبر تعذيب للسيدات انها تخلف.. هلاك جسدي ومادى وعصبي ومعنوي.. لو مضايق من مراتك وعازي تعلم عليها بالأدب.. اضحك عليها وخليها تخلف.. هي زى الهابله هتفرح بالحمل والولادة والأمومة والحاجات ده كلها.. بينما انت في الواقع بتقتل فيها كل حابه.. مش هتاخذ بالها من كده الا بعد 20 سنه لما عمرها كله يتسرق في خدمة البيت والعيال.. خليك ناصح واوعي تتخانق معاها ولا تنكد عليها.. اديها بس عيال وانت برئ وزى الفل.. ولو حابب تجود.. اديها بقى احاديث او مواقف من السيرة عن الأم والأمومة وست الحبايب يا حبيبة.. ومفيش مانع تفتي وتقولها قال الله تعالى في كتابه العزيز "الجنة تحت أقدام الأمهات" كما ورد في سورة طلع البدر علينا.. هو حسين رياض أنصح منك يعنى؟ الرحم ده غالبا انتقام الهى من المرأة بسبب الزن وإصرارها على انك تاخذ كيس الزبالة وانت نازل الشغل كل يوم.

بكفاءة نادره قدرت انجز مهمة المواعين وتشطيب المطبخ في 4 ساعات والحمد لله.. على رأى عبد الفتاح القصرى.. الرجل لازم يعرف في المعلومات العامة.

أبو الموز نايم زى الملائكة.. فرصه ذهب اقعد مع مراتي في التراس ونشرب شاي ونتجاذب اطراف الحديث زى الأفلام الاجنبى كده.. بس الأزمة ان درجة الحرارة كانت 22 تحت الصفر.. خلاص.. بلاها تراس ونقعد قصاد الدفاية.

- ها يا غسل.. عملت ايه بقي بعد ما الوزير طلع كفته؟
- المفروض ان الموقف منتهى.. معايا تقرير اللجنة الفنية بالموافقة.. وتقرير وزارة الصحة ان التكنولوجيا آمنه صحياً.. مش ناقص حاجه بقى.. المفروض اخذ الموافقة واتوكل على الله.. اقابل واقعد زبائني يا ريس ولم ملايينك المتبعثرة في السوق يابو حسنى.
- ده المنطق.. لكن معاك انت اكيد حصلت حاجه ثانيه.
- بالضبط كده.. رحت فيوم على الهيئة ومعايا كل الورق وطلبت اقبال الرئيس علشان استلم الموافقة والتصريح.. قالولى انه مش موجود وعنده مؤتمر في المانيا.. طلبت اقبال وكيل الوزارة.. بعد رخامه منى وبعد ما اتلطعت 3 ساعات منتظر.. دخلوني اقبله.. قعد يهلفظ في كلام كتير مش فاهم منه حاجه.. وفي الاخر اتصل بواحد من المهندسين بتوعه وقاله خليك مع المهندس احمد لحد ما الموضوع يخلص.

- وبعدين؟
- رحت مع المهندس ده.. بنى ادم تعبان في مكتب تعبانة.. مخ تعبان ومعلومات اكثر تعباً.. اه لو دكاترة الكلية يشوفوا الناس دى.. كان زمانهم قفلوا الجامعة من زمن.. اتاريه ميعرفش اى حاجه عن اللى بتكلم فيه وطلب منى اعيد الحدودة كلها من الأول.. كنت صبور جدا وعرضت عليه كل الورق الى معايا.. بعد ساعه من الرغى الغير مفيد.. حولني على موظف تاني.. ومن موظف تاني لموظف ثالث.. لحد ما لقيت نفسى قاعد مع مين؟
- ها؟؟
- نفس الموظفين اللى كنت بروحلهم في الأول علشان اشوف أخبار الملف بتاعى ايه قبل الوسائط.. تخيلي!!
- يا نهار.. وتلاقيهم طبعا كانوا قرفانين منك جدا لأنك جبتلهم الموضوع من فوق.
- تمام كده.. ده اللى حصل بالظبط.. اللى كانوا بيقوموا ينطوا من على المكاتب يستقبلوني بالورد والزغاريط.. بقوا يقولوا اتفضل اقف بره شويه لحد ما نخلص اللى في أيدينا.. وأفضل واقف بره منتظر بالساعتين.. ولا حياة لمن تنادى
- وبعدين؟
- فضلت شهر كامل على الحالة دى.. اروح الصبح اقضى.. يومي انتظار وكل يوم اسمع منهم حجه شكل.. لدرجة انهم مره قالولى ان وكيل الوزارة مش موجود في مكتبه.. وانا لسه مسلم عليه قبلها ب 5 دقائق بالظبط.. كل ده وانا متحكم في أعصابي تماما ومستحمل المعاملة اللى زى الزفت.
- وبعدين؟
- لحد ما فيوم رحت وانا مصمم على انهاء الموقف.. سلبا او إيجابا بقى.. المهم لازم اخذ عقاد نافع.. دخلت مكتب وكيل الوزارة بدون استئذان.. تقدرى تقولي انى اقتحمت المكتب.. كلامي كان في منتهى العنف والاستفزاز.. الراجل مسمعش نص كلامي وراح قايم على حيله مصرخ وكلايه اتملوا حواليا.. وقتها حجمي كان مرعب وغير مغرى ابدا بأى اعتداء جسدي عليا.. لو كنت رفيع وللا قليل في الحجم.. كانوا اكيد ضربوني بلا رحمه.. واحد منهم خدته الجلالة ومسك دراعي وحاول يشدني بالعافية بره المكتب.. رفته بالرجل في بطنه رفسه ولا كأنها رفسة الف حصان برى.. الراجل اترى على الحيط ووقع وقع معاه كام رف من بتوع الملفات وقعد يخور بأصوات من بقه كأنه بيموت.. يومها انا فقدت التمييز فعلا.. بقيت اصرخ واقولهم انى هقتلهم كلهم لو مخدتش الموافقة بتاعتي.. وطبعا الزعيق والصراخ لا يصح بدون شتائم بالأب والام واتهامات بالرشوة ليهم ومعايرتهم بكل الفلوس والهدايا اللى أخذوها منى.
- ايه ده.. الله.. الأرهاب والكباب.. بحبه موت الفيلم ده.
- تقريبا.. بس النهاية كانت مختلفة شويه.
- عملوا ايه.. اكيد بلغوا البوليس.
- طبعا.. ودى فيها كلام.. دى جنائية.. التعدي على موظف حكومي اثناء تأدية وظيفته.. انا كمان مخليتش.. قعدت على الأرض في المكتب بتاع وكيل الوزارة وقتلهم انا معتصم هنا.. انا مش همشى لحد ما يجيلى الوزير.. ينعل يحرق يسب يولع يا أولاد ال.. وال.. وال..
- يا خبر يا احمد.. انت كان ممكن تضيع مستقبلك في حركة جنونية زى دى.
- الجنون انا كنت وصلته فعلا.. مش عارف حاجه عن اى حاجه.. اكر من الوزير هروح لمين؟؟ ورقى واقف ليه وهو متوافق عليه فنيا وطبيا.. انا غلطان في ايه يا بلد الوساخة هربت منها قرفانه.. الناس دى بتعاملنى كده ليه وهما كروشهم مليانه من فلوسي.. لو عايزين فلوس تاني يقولوا.. ممكن ادفع.. بس يحصل حاجه.. اى حاجه.
- وبعدين
- بعد ساعه جه البوليس.. مقدم من أمن الدولة.
- عرفت منين انه من أمن الدولة
- شوفي.. الضباط العاديين بيبانوا.. ضابط المباحث مثلا بيبقى على وشه تعبير سفاله كده مميز جدا.. بحكم تعامله المستمر مع المجرمين واللصوص اخلاقه بتتغير.. هو اتخرج من الكلية ابن ناس وكويت وبيحط جيل.. لما يترى في قسم شرطه تعبان وسط ناس كلهم مجرمين وافاقين لازم هيطلع على وشه الكلام ده.. انا بشوف بتاع المباحث من بعيد اقدر علطول اميزه.. غير بتاع المرور مثلا.. أمين الشرطة اللى واقف على مكان أثرى.. يختلف كلا وجزئا وخلقا

وسلوكا عن أمين الشرطة بتاع المباحث.. ظباط امن الدولة دول بقى عالم تانى خالص.. هتلاقه راجل هادى جدا.. مهذب "ظاهريا" الى ابعد حد.. وشه يحمل من ملامح الثقة بالنفس الى تخليكي تقولي ان الراجل ده بالسميت كده اخذ نوبل أو يملك مليارات.. ظابط امن الدولة مستقيم الجسد.. قوى.. كلامه كله بعد اذنك ولو سمحت.. سيبك من صورة السينما وعباس أبو الحسن في يعقوبيان والهبل ده.. هما بيعملوا فعلا كده في الحقيقة اه.. ولكن بمنتهى الهدوء.. الزعيق والشخط والهمجية دى ممكن تاكل شويه مع ظباط المرور او ممكن تهد شويه ظباط المباحث.. كده كده مفيش في أيديهم اكثر من محضر- تحرى او تلفيق قضية سرقة او اى اونطا من دى يقدر اى محامى يقدر يطلعها فشنتك في النيابة.. لكن الكلام ده كله مياكلش مع امن الدولة خالص.. هتعملى كل ده وفي الاخر ممكن يدفنتك بالحيا انتى واهلك كلهم في بئر غويط ملوش قرار.. عارفه انتى لو واحد واخذ افراج بأمر المحكمة.. مش هيطلع ولا يشوف النور الا لما ظابط أمن الدولة يقول انه يطلع.. من الاخر كده ظابط أمن الدولة يملك ثقة القادر على فعل كل شيء واي شيء في بلد يحكمها قانون الغاب.

- وعملت ايه معاه؟
- رحت معاه بمنتهى الهدوء.. قعدنا في مكتب فاضي.. سمع منى الحدودة كلها.. قالي كلمتين بالظبط فيهم الشفاء بعد ما طبلي شاي وميه ساقعة وخلاني اغسل وشى واصلى ركعتين علشان اهدأ.
- قالك ايه؟
- قالي شوف يا هندسه.. العالم الى انت عمال تتخانق معاها دى كلاب.. جرابيع جعانين لا يملكو من الأمر اى شيء.. لو الموضوع كان في أيديهم كان اخرهم كام الف ترميهم على الأرض وهما هيوطوا ياخدوهم ويبوسوا ايديك.. موضوعك اكبر من كده صدقني.
- وانت صدقته؟
- مكانش في ايدى غير كده.. كمان التهديد في كلامه كان واضح جدا رغم نبرة الصدق والأسى الواضحة جدا في كلامي وكل الورق الى معايا.. قالي بهدوء جدا انت عملت جناية دلوقتي.. تحب نمشى- قانونى واوعدك محدش هيلمسك واوعدك كمان بكام سنه حلوتين في الحبس.. وللا تروح تعتذر للناس دى ووتأسف ومنشوفش وشك هنا تانى وتخرج زى ما دخلت وبلاها مشاكل؟ طبعا انا قعدت اقاوح شوية.. هو يعنى موظف الحكومة ده من ضمن شغله انه ياخذ رشاوى من الناس.. طبعا الكلام ده مكلش خالص مع المقدم.. قالي لو تحب اعملك قضية رشوه ليهم معنديش مانع.. انت دفعت رشوه وهما اخدوا منك رشوه.. مش عاوز منك ادله كمان.. انا مصدقك.. ها.. موافق؟
- طبعا مفيش اختيار.
- طبعا.. قمت زى الكلب اعتذرت للناس دى كلها.. ودفعت 5 الاف جنيه ترضية للراجل الى انا ضريرته.. مش محتاج اقولك طبعا ان طلع عنده الكبد والربو والسكر وكل الامراض الى حتي لسه مخترعوهاش.. اى كلام طبعا.. انما اهو.. اى حاجه ياخدوا بيها فلوس وخلص.. كم رهيب من الذل حسيت بيه وانا بعذرلهم واسترضيهم وهما زى الكلاب رافضين.. واحد منهم كنت جبته موبايل غالى اوى من ايطاليا.. بقى يهددنى وقت الخناقة انه هيبليغ عنى لواء قريبه معرفش فين وطلع الموبايل.. الى انا جبتهوله.. علشان يكلم منه الراجل قريبه ويحبسونى.. وانا مش عارف اعمل ايه.
- ولا بيصونوا اللقمة الحرام يا اخي.
- علشان كده مهما اسمع عن أزمات او مصائب وقعت على دماغ موظف حكومة.. لا يمكن يصعب عليا ابداء.. من غير ما تقولي التعميم غلط.. ارد اقولك وما ربك بظلام للعبيد.
- وبعدين عملت ايه.
- ولا حاجه.. عملت بنصيحة مقدم امن الدولة.. خدت بعضي- وخرجت من الهيئة قفايا يقمر عيش.. مجهود 8 شهور كامله راح على الأرض بالإضافة الى الفلوس الى اندفعت وحرقت الدم والإحباط.
- معلش سؤال.. انت كل ده كنت بتصرف من مرتبك بس؟
- لا طبعا.. انتى ناسيه انى قابض 550 الف جنيه من مصنع التليفزيونات؟
- اوعى تقول صرفتهم على الناس دى.
- مش كلهم طبعا.. انما لما جيت اسدد للراجل فلوسه.. لقيت عندي عجز في حدود 200 الف جنيه.

- يا نهار.. كويس ان الراجل كان صابر عليك.. هو في ناس كده في الدنيا
- اه والله.. الله يرحمه بقى.. كان راجل محترم جدا.
- وبعدين عملت ايه؟
- كده نقدر نقول انى رجعت تانى لنقطة الصفر.. بس المكسب هنا انا معايا التقرير الفني من الهيئة والطبي من وزارة الصحة.. مش محتاج بس غير واسطة كبيره والموضوع ان شاء الله يمشى.
- طيب عندي ملاحظة كده.. أتوقع يعنى مش اكيد.. هقولك وانت تقولي انا صح وللا غلط.
- ايه؟
- انت اكيد مسكتش على الناس بتوع الهيئة دول.. انت عملت معاهم مصيبة واكيد هي دى السبب في الحبس الى انت قتلتي عليه في الأول.. صح؟
- ههههههه
- ليه خمنتى كده؟
- انت جوزي وانا عارفك.. قلبك أبيض اه.. بس مش بتنسي- الإساءة ابدأ.. انت عامل زى الجمل.. تفضل تخزن من سكات ويوم ما بتقوم بتقطع الهدوم على رأى حماي.. قول قول.. انا صح مش كده؟
- صح وغلط في نفس الوقت.
- يعنى ايه؟
- يعنى اه مسكتش على الناس بتوع الهيئة.. بس مش ده سبب الحبس.
- عملت ايه معاهم؟
- رحت لمحامي صاحبي عفر ابن لذبنا.. حكيته الموقف كله وقتله انا عاوز انتقم من الكلاب دول.. ابن الايه حط خطه ميقدريش يكشفها ديفيد شارل سمحون بنفسه.. جبنا اى فكره بطيخ وعملنا انه اختراع ومحتاج تسجيل وتصريح وكده.. وطبعا انا عارف الناس دى بتعمل ايه.. بلغنا البوليس عن وكيل الوزارة انه طالب منا رشوه والكلام ده.. والمحامي كمل اللبلة كلها والبوليس كبس عليهم وهما بياخدوا الرشوة.. قضية عنب متستفه تستيفه زى الفل.. مبلغ الرشوة مكانش كبير اوى.. لكنه كان كافي انه يتحبس بتهمة التريب وتقاضى الرشوة.. وطبعا اتفصل من شغله وباقي التفاصيل دى.. الجماعة المحاميين دول غالبا هيدخلوا النار قبل ما القيامة تقوم.. لكن اهو.. كل ظالم وله الأقوى منه.. عارفه انتى مصر- دى لو يمسكها محامي.. والنبي لنطلع إسرائيل من خناقة فلسطين دى وهى عريانه ملط.
- يخرب عقلك.. انت في ايه وللا في ايه؟
- يا بنتى حذارى الف مره من المظلوم.. اذا دعتك قدرتك على ظلم الناس فتذكر قدرة الله عليك.. ربنا لم يحرم شيء على نفسه وهو الخالق الأعظم الا الظلم.. الظلم قهر وذل ومهان.. يمكن من الحاجات القليلة اوى الى اتفق فيها مع الموروث الشعبي بتاعنا هو يا بخت من بات مظلوم ولا باتش ظالم.
- طيب حسيت بالرضا لما حبسته بتهمة مزوره؟
- الحقيقة لا.. كان نفسى- يموت في الحبس بعد معاناه طويلة مع المرض او المحكمة تحكم عليه بالإعدام بعد ما يشوف تشرد عياله في الشوارع.
- يا ستار.. وفين العفو عند المقدرة
- راح مع الظلم بلا سبب.. غرق مع الشباب في مراكب الهجرة غير الشرعية.. اتحرق مع الفقراء في قطر الصعيد.. داس عليه الكفيل بمداسه وهو ماسك جواز سفري ومش عاوز يخرجني من بلده.. اتسمم بالأكل الفاسد المسرطن.. جاله هبوط حاد في الدورة الدموية بسبب الأدوية الغلط.. كليته اتفتركت بسبب الميه الملوثة الى بنشر بها في البلد الكثيبة دى.. المظلوم يبقي مشروع ظالم قوى جبار فاجر.. مفيش في الدنيا كلها اصعب من إحساس القهر.. المظلوم ده بسهولة جدا يكفر ومحدث هيجرؤ يقول حرام وبتاع.. حطي نفسك مكانه.. اتظلمي الأول ولما تقدرى تحسبني وتكتفى بالكلام وانتي مظلوم فعلا.. ابقى ادعى للآخرين بالبرود وهدوء الأعصاب.. افتكرى دايم ان عتريس بدا رومانسي وحبيب.
- فهمت.. فعلا والله يا اخى.. الله لا يجعلنا ظلمه ولا مظلومين

- آمين يارب.
- طيب.. عملت ايه تانى بعد ما بدأت من الصفر.
- فيوم جمعه كنت قاعد بقرأ الأهرام.. كان في باب كده اسمه بريد القراء.. شكاوى الناس بتبعتها علشان مضايقين من حاجات معينه.. كنت دايم بعدى عليها سريعا على اعتبار ان الكلام ده كله فستك في بلد الظلم.. الواسطة بتحل كل حاجه فمصر.. بقى والنبي في وزير هيمسك الجرنان يشوف من باعت فيه شكاوى.. وللا الاهرام مثلا هتضحى بنص صفحة تمنها مليون جنيه اعلانات علشان تحط فيها شكاوى الرعاع والفقراء والمهمشين من الشعب ده؟
- امال ايه بقى.. ايه الى لفت نظرك في الجرنان؟
- الشكاوى نفسها.. قلت لنفسى هو انا ليه مبعثش شكاوى لحد من الكبار.. الكبار اوى؟
- وهو في اكبر من الوزير؟
- اه طبعاً..
- رئيس الوزراء قصدك؟
- السيد الدكتور أحمد نظيف رئيس مجلس الوزراء.. متظلم بباب سيادتكم.. أحمد حسنى حامد.
- ايه ده؟
- ده كان نص التلكس الى بعته على مكتب الكبير.. الكبير أوى.

[illegible]

.....

- الو.. المهندس احمد حسنى
- تحت امرك
- حضرتك كنت بعث شكوى لمكتب رئاسة الوزراء
- ايوه..
- أقدر اعرف فحوى الشكوى دى ايه
- مين حضرتك؟
- انا "....." مدير مكتب الدكتور احمد نظيف
- اهلا وسهلا.. الموضوع كيت وكيت وكيت
- طيب.. انا هراجع جدول مواعيد الدكتور وهبلغك بالمعاد
- طيب حضرتك انا متاح 24 ساعة وتليفوني متاح جوا وبره مصر..
- طيب ماشى.. شكرا.. مع السلامة
- في رعاية الله.. في انتظار اتصال حضرتك وشكرا للاهتمام

.....

- بس كده؟
- بالضبط.. هو ده الحوار اللى حصل.. لا كلمه زيادة ولا كلمه ناقص
- وبعدين؟ اتصلوا بيبك؟
- اه.. بعدها بأسبوعين جالي نفس التليفون تانى.. حضرتك مطلوب بكرة الصبح الساعة 10:45 دقيقه صباحا.. هتقعد مع الدكتور احمد 15 دقيقه بالضبط.. ياريت تكون مجهز كل حاجه علشان وقت سيادته ضيق جدا.. طبعا انا فاهم كل ده ومستعد تماما انى اقعد مع النبي دانيال نفسه ومستعد لحساب الملكين.
- يا لهوى يا احمد.. انت قلبك كان ميت اوى يا اخى.
- ليه يا بنتى.. هو انا كنت رايع اتخانق معاه؟ انا رايع في حاجه فيها مصلحة له وللبلد وليا.
- عمى جه معاك؟
- طبعا.. بابا كان هو الى مرتب كل ده.. كلم وزير الكهرباء يومها ووزير الكهرباء اتصل بالدكتور طارق كامل وزير الاتصالات.. الثلاثة هما الى رتبوا زيارة الدكتور احمد نظيف.. في معلومة هنا مهمه جدا.. احمد نظيف كان وزير الاتصالات قبل ما يكون رئيس الوزراء.. مين كان دراعه اليمين ومدير مكتبه أيام ما كان وزير؟

- ها؟
- ها.. قولي
- قول يا اخي.. انا أساسا معرفش نظيف ده الا من كاريكاتير الاخبار بتاع مصطفى حسين.
- طارق كامل.. الى هو بقي وزير الاتصالات بعد كده.. احمد نظيف كان رئيسه السابق وولى نعمته.. انا قلت خير وبركه.. اهو يعرفوا يتفاهموا مع بعض ويقدر يوصله اى معلومة انا مقدرش اوصلها.
- تفكير منطقي
- المهم يا ستي.. رحت رئاسة الوزراء... وقابلنا الدكتور احمد نظيف
- مخفتش؟
- لا أبدا.. انا كنت في حالة اثاره غير عاديه.. ايدى كانت بتترعش وركبى بتخبط على الجيران.. حرقت 900 مليون سيجاره علشان اسيطر على أعصابي.. كلت نص طن لبان كلوريس علشان افك التنشنه وكمان علشان ابويا ميشمش ريحة الدخان.. عيب برضه ابويا يعرف انى بدخن.. ميصحش.
- وبعدين؟
- دخلنا مكتب الرئيس.. انا كنت محدد جدا.. قتلته الآتي.. دكتور نظيف.. انا جاي النهارده للمهندس احمد نظيف مش الوزير احمد نظيف.. كتب حضرتك وارثك درسناه في الكلية.. في ايامك شفنا عز وخير مش هيتكرر تاني ابداء.. انا عاوز أذن المهندس احمد نظيف مش رجل السياسة احمد نظيف.. مهندس صغير بيكلم مهندس كبير مقام وليس سنا.. هل ممكن وقت المهندس الكبير يتسع لدقيقتين يسمع فيهم المهندس الصغير؟ ان أخطأ المهندس الصغير فهيكون سعيد جدا بتلقي النصح من المهندس الكبير أحق الناس بتوجيه النصح والأرشاد.. وان أجاد.. فالقرار كله لحضرتك وربنا يباركلنا فيك.
- الصلاة على النبي.. ده ولا مصطفى بكري يقدر يدخل الدخلة دى.. ههههههه
- على فكرة.. أنا كنت صادق تماما وانا بكلمه.. مصر.. فعلا شافت في أيام دكتور نظيف طفره تكنولوجية شايفها مش هتتكرر تاني أبدا.. لو كان نظيف فضل وزير اتصالات وكان جه رئيس وزراء أصبع منه شويه.. كانت مصر.. اتعدلت بالرغم من ان حكومته لبستنا اسود.. ده رأى هندسي تكنولوجي بعيدا عن أي سياسة.
- أيا كان.. كلهم لا مؤاخذه شمال.. معتقدش انه كان هيقولك لا مش هسمعك يعنى.. امال انتوا رايجين تعملوا ايه أساسا؟
- بالضبط كده.. ابتسم وقالى قول يا حضرة المهندس اللبق.. المهندس الكبير كله آذان صاغية
- وبعدين؟
- عرضت كل الى عندي فيما لا يزيد على 3 دقائق.. ركزت اوى على انى مسنود "تكنولوجيا" بالشركات الى بره.. ركزت اكرت على العائد القومي للمشروع ده كفرص عمل وتطور للخدمات وما الى ذلك من كلام يعجب السياسيين.. هو بدأ يتكلم عن إمكانية استغلال المشروع ده إعلاميا والحركات الاونطا بتاعتهم دى.. الراجل كان فوق مستوى الذكاء المرعب.. لقط الخيط منى بعد 30 ثانية كلام تقريبا واقترح كمان تطبيق فكره زى دى في مشروعات تانيه قوميه.. زى الكباري واستصلاح مش عارف كام مليون فدان في الساحل الشمالي وشركات الكهرباء علشان منع

السريقات.. وطبعاً في اللحظة دى تدخل الدكتور حسن يونس وزير الكهرباء هو وبابا.. وزاطوا في النص.. هما فعلاً كانوا شغالين في مشروعات لمكافحة سرقات الكهرباء بالاشتراك مع مصانع السويدي.. كانوا 15 دقيقة تحفه الصراحة..

- وهو سرقات الكهرباء ازمه اوى كده.. ايه يعنى واحد عنده كشك وللا عربية كبده واخذ كهرباء من العمومي.. هو ده يعنى الى ميل حال البلد.

- رغم انها نقطة فرعية الا انها مهمة.. لما اقولك سرقات كهرباء او استهلاك زيادة.. يبقى الناس العادية بره الحسبة خالص.. احنا في الاستهلاك حثالة لا تساوى.. المقصود هنا هو المصانع والشركات الكبيرة والقرى السياحية.. دول فعلاً الى بيسفحوا كهرباء بشكل مرعب ومبيدفعوش.. على الماشي كده.. تعرفي ان قرى الساحل الشمالي كلها مش بتدفع كهرباء من سنة 90؟ تعرفي ان جمعيات الاستصلاح الزراعي بتاعة الاراضي الموجودة في مديرية التحرير والصالحية الجديد والمناطق دى كلها مملوكة للواءات سابقه وحالية وكلهم مش بيدفعوا كهرباء من اكر من 20 سنه؟ تعرفي ان الديون المعدومة لشركة كهرباء صغيره زى شركة توزيع كهرباء البحيرة مثلاً عند الناس دى قربت من المليار حنيه؟

- يا لهوى!! معقول

- امال انتي فاكركه بابا خرج من الخدمة ليه؟ هو خبط في الموضوع ده وامر الشئون القانونية انها تشتغل في قضايا ضد الناس دى.. قاللى يومها مليار جنيه لو قدرت اخذ نصهم فده معناه انى هقدر أنقل الشركة 900 سنه قدام على الأقل.. ومن ورايا بعد كده باقى شركات توزيع الكهرباء في الديون الى كنا فاكرينها معدومة بينما اللصوص الكبار حابسينها عندهم.. مصر فيها 7 شركات توزيع.. اصغرهم هي البحيرة بطاقة مليون عداد كهرباء.. شركه زى دى ولها مليار.. ما بالك بشركه زى القاهرة او القنال يبقى لهم كام؟ شركات التوزيع بتسدد لشركات النقل.. الى بدورها هتسدد لشركات انتاج الكهرباء.. دى اسمها ميزانية الوزارة.. لما أزود 7 مليار على الأقل في وزارة ميزانيتها اقل من مليار فده معناه انى هصرف للموظفين أرباح تقترب من 700% من مرتباتهم وأورد الباقي لوزارة المالية "خزينة الدولة".. وأي فلوس للبلد مصلحه طبعاً.

- انت بتتكلم جد؟

- اه والله.. وعلشان كده طردوه.. اتارى سعادتك ان المصانع والمزارع دى بتاعة اللواءات الكبار.. او اللواءات الكبار داخلين فيها شركه باساميهم بس مع رجال اعمال في مقابل الخدمات الى زى دى.. ميدفعوش ميه ولا كهرباء ولا ثمن الأرض ولا ثمن اى خدمه بتقدمها الدولة ويشغلوا على كده. بس الحمد لله ربنا ستر.. بابا كانت سمعته نظيفة وموقفه قوى جدا ومسئود من الوزير.. خرج من الخدمة 63 سنه وبالتدريج.. من نائب الوزير الى رئيس شركة الى عضو مجلس اداره لحد ما استقال علشان المشروع بتاعى.. لو حد غيره كان زمان متلفقه قضيه محترمه تدمر سمعته زى الدكتور أنور المفتي مثلاً بتاع كهرباء إسكندرية الله يرحمه رحمه واسعه.. الراجل بعد ما بهدلوا سمعته ودمروا مستقبل عياله.. المحكمة حكمت ببراءته ومات بقهرته المسكين وهو كان من عباقرة الهندسة في مصر.

- لا لا لا.. الموضوع ده كبير.. انت تحكيهولى لوحده.. المهم.. عملتوا ايه مع نظيف؟

- مشينا من المكتب والراجل كان مبسوط ومتحمس جدا جدا.. قصاد عيني أدى تعليمات مباشرة لطارق كامل بتتبع الموضوع ده.. مدير مكتبه اتصل بالهيئة القومية لتنظيم الاتصالات قصادي.. تعليمات مباشرة اهو من مكتب دولة رئيس الحكومة المخول بسلطات رئيس الجمهورية.. يعنى المفروض مفيش حد اقوى من كده الا ربنا عزوجل.. يعنى الموضوع لو وقف تانى.. يبقى ربنا هو الى وقفه.. وفي الحالة دى مش هيبقي عندي حاجه اقدر اعملها الا قبول القضاء والقدر.

- جميل.. حصل ايه بقي؟ متقوليش ان احمد نظيف طنش.
- انا لا هقول ولا هعيد.. احنا مشينا من المكتب ومعنوياتنا كلنا في السماء.. دكتور حسن يونس وزير الكهرباء ادانى رقم موبايله الشخصي.. وطلب منى اتصل بيه مباشرة بشكل دوري علشان هو ممكن يساعدني بإمكانات الوزارة في الموضوع ده.. كمان قالي احنا هنكون عميل عندكوا.. وزارة الكهرباء بجلالة قدرها عاوزه تبقي زبونه عندي.. انا فاكّر يومها في طريق العودة فضل يهزر ويضحك معايا ويقول ان انت عارف ان انا وابوك كنا دايما نذاكر سوا؟ كنا فاتحين كشك في الكلية بنبيع فيه أدوات الرسم وعدد السكاشن.. بس ابوك بقى فقري.. جه في البكالوريوس وقال انا عاوز اركز علشان دى اخر سنه.. لو كان سمع كلامي كنا كلنا في التجارة وكان زمان عندنا مصانع ورق واقلام دلوقتي.. ههههههه
- يا فرج الله.. شكلها هتلعب يا حماده.. وبعدين حصل ايه؟
- مفيش.. هديت شويه كده استف الورق والملم خيوط الموضوع.. اتصلنا طبعا بصاحب شركة التلفزيونات بلغناه بالتطورات.. في الفترة دى عرفت ان توكيل بي ام دبليو عاوزين من الليلة دى هما كمان.. بابا حس انه خلاص مفيش حاجه تاني يقدر يعملها.. الأمور وضحت اهي والدنيا ماشيه كويس.. مش مطلوب منى الا اني اشوف شغلي بس وهو يرتاح بقي.. امي بدأت تعلّى مستوى العرايس الى بتجيبهم.. أخواتي بدأوا يعيشوا باعتبار انهم اخوات مليونير محتمل.. انا نفسي صرفت كتير في الفترة دى من الفلوس الى قبضتها كأول عربون شغل للمشروع ده.. بقيت اصرف براحتي على أساسا ان الملايين جايه اهي.. انا حتى فكرت اشترى ماكينة من الى بتعد الفلوس زى فيلم بخيت وعديله كده.. بقيت ماشى في كل حته بغنى انا من البلد دى.. اتصلت بأشرف ومحمود بلغتهم الاخبار.. الاتنين فرحولي جدا.. بس محدش فيهم خد الريسك انه يستقيل من شغله في قطر وينزل مصر— علشان سمارت سوليوشنز.. محمود قالي لما تقبض اول مليون ابقى ابعثلى منهم 3000 جنيه سلف علشان انزل مصر.. واشتغل معاك.. معلى بابو حسنى.. البلد دى ادتنى في القلة كتير اوى وانا بصر—احه تعبت.. كفايه لحد كده.. الله يباركلك الف مره في كل قرش هتكسبه من ورا الموضوع ده.. لو في حاجه اقدر اعملها وانا هنا.. عنيا يخدموك قبل ايديا.. انما ارجع تاني.. معلى سامحني
- طيب و اشرف؟
- اشرف قالي انا راضي ذمتك.. بلد زي دى ارجعها أنا ليه والنبي؟ بقي نبي بجلالة قدره خرج منها خائفا يترقب.. ولى مدبرا ولم يعقب.. دور الجري وقال يا فكيك.. أقوم انا أبو 3 عيال وامهم ارجع بمزاجي!! يا اخى ده ربنا قال ولا تلقوا بأنفسكم الى التهلكة.. واي تهلكه اكبر من انك ترجع طائعا مختارا لأرض حبست نبي كان فحاله واغلب من الغلب.. الله يكرمك يا عم احمد انا راجل صاحب عيال ومش حمل المغامرات بتاعتك دى... انت راجل قلبك ميت.. انا خلاص كده.. ياللا حسن الختام.. نجوز العيال وبعدين نشوف هنعمل ايه.. بقيت أقوله يا اشرف لا تزر وزارة وزر أخرى.. وهو يقولي سوء الظن من حسن الفطن.. طبعا مش هغلبيه في الكلام ده.. لكنه موقفه كان زى موقف محمود.. الاتنين فعلا اشتغلوا معايا كتير من قطر.. بس رجوع لا.. رفضوا تماما.. كانوا دايما يقولولى مصر— دى زى الكهرباء.. كلها منافع بس من بعيد لبعيد.
- مع انهم يعنى مشافوش ربع الى انت شفته
- مين قالك.. محمود اتربى هو واخواته ايتام بتجري عليهم واحده ست بسيطة معندهاش اى دخل.. البلد دورتلهم وشها تماما وطحنت عظامهم بقسوة.. علشان كده كبروا وهما مش شايفين اى خير للبلد دى عليهم.. حتى لما اتخرج واشتغل.. لبس في الجيش 3 سنين.. بقي يضرب كف على كف ومعاها حق الصراحة.. واحد زى ده يروح الجيش بهيب ايه بس.. ماهو شغال وبيجري على امه وأخواته.. 3 سنين ضيعوهم من عمره قاعد ولا بيعمل اى حاجه علشان يخرج بعدهم يبدأ من تحت الصفر.. قصه مأساويه فعلا..
- لا حول ولا قوة الا بالله العلى العظيم.. مصر قاسيه اوى على أهلها

- لا.. مصر.. قاسيه اوى وفاجره وبنت ستين كلب مع الغلبان بس.. انا شفت مستويات ناس مصر.. مش قاسيه معاهم ولا حاجه.. مصر.. شديده وعفيه اوى على اليتيم والمسكين.. مصر.. ظالمه اوى على الغلبان والضعيف.. مصر.. بتتحول الى سليمان الناجي لو كان الى قصادها شطا الحجري.. بينما بتقلب سوسن لو كان الى قصادها عتريس.. عارفه انتي القران بتاع ربنا.. في ايه بتقول واما اليتيم فلا تقهر.. غالبا كده نسخة القرآن بتاعة مصر.. سقط منه الايه دى... لانها فعلا زى ما تكون بتتعمد تقهر اليتيم وتذل المسكين وتطحن الأرملة وتشرذم المسكين وتحرم المحتاج.. مصر.. تدى الى مش محتاج بس.. مصر.. ينجح فيها الرقاصة والزانية والخمورجي.. دول اسمهم فنانون ونجوم واهل القمه.. بينما احنا ولاد الكلب الشعب.. كويس اوى اننا معانا جوازات سفر نساfer بيها.. الى زينا بيترموا لسمك القرش علشان خساره فيهم العيشة.
- يا سيدى خير ان شاء الله.. بكره تتصلح.. خلى املك في ربنا كبير.
- وايه علاقة ربنا بالموضوع؟ لا هو يعنى الى قبلنا كان أملهم في ربنا صغير لما اترقوا علقه موت على الجبهة في 67؟ لا هو الرئيس المرمى في السجن ده مكانش عنده أمل في ربنا؟ مال ربنا ومال عك البشر؟
- اه والله.. راجل مظلوم فعلا
- كان عبيط وصبح مظلوم.. هو كان جزء من منظومة العنف.. مانا قتللك انى حضرت اتفاقات سنة 2005 أيام انتخابات المجلس بين الجماعة أصحاب الكؤوس والجماعة أصحاب الدقون.. الناس دى في بينهم وبين بعض شغل ونسب كمان.. دى لعبه من زمان اسمها عسكر واخوان.. احنا في الآخر الحطب الى بيخلي النار مستمرة علشان تحرقنا احنا بس.. لو قلنا تطهير يبقى لازم تطهير شامل.. لازم كله يبقى وشوش جديده.. يكونوا اخوان.. يسار.. ليبراليين.. كفار.. مش فارق.. المهم اننا نشوف شعر اسود.. ذوى الشعر الأبيض دول كفايه عليهم اوى كده.. بكره مش بتاعهم.. يخططوله ليه؟ ايه الغلط ان يكون عندنا رئيس وزراء في ايده كل السلطات وعنده 40 او 45 سنه بالكثير.. اهو على الأقل يكون عنده صحه يشتغل.. عيل صغير يصبى البلد ويصبغ شيب الفساد ده باللون الاسود المبهج.. 4 او 8 سنين ويتوكل على الله يخرج على بيتهم بألف خير.. لا يخرج مقتول ولا مسجون.. ايه العيب ان مراسلات الكبار دول وحساباتهم في البنوك كلها تكون مكشوفه.. ايه العيب ان الناس تختار واحد يحكمها وبعدين يمشى.. ايه العيب في التقاعد انا مش فاهم.. ايه العيب انى أدى العيش لخبازه ومع الوقت هتعلم انه مضحكش عليا ومياخدش أكثر من حقه.. لا نصه ولا ربه..
- كلها أحلام وتطلعات يا احمد.. مشروعه طبعا.. لعلمك والله انا متفائلة خير.. ان شاء الله الأمور تمشى كويس..
- هتمشى كويس طبعا امال ايه.. مش معقول ربنا هيسيب الشعب المتدين بطبعه كده.. ضحكه رقيقة عالية ساخرة تنتهى بالقبض عليا بتهمة خدش الحياء العام.. انتى مش واخده بالك اننا رجعنا الى نقطة ما قبل الصفر.. مش جه واحد بالصندوق وبانتخابات نظيفة لأول مره في تاريخ مصر من أيام رمسيس ما قبل الاول.. حصل معاه ايه؟
- الله.. انت مش كنت مش بتحبه!!!
- مش بحبه اه.. ولكن ده لا يعنى انى أوافق انه يمشى.. او يعتقل كده.. زى ما جه زى ما يمشى.. انا اعرف ان الجماعة دول مش تمام في السياسة ولكن ده لا يعنى ذبحهم.. الشعب ده مش عارف مصلحته ولا عارف ينتخب مين.. مش معنى كده انى أبقي وصى عليه.. الشعب اختار غلط.. صح.. هو حر.. نسيبهم يتعكوا في اختيارهم علشان تانى مره ميصدقوش اى حد ويتعلموا الحيادية.. ماهو لو كل مره كده.. يبقى احنا خلاص.. أسرى أصحاب الدبابات.. بالظبط زى ما تسيبي ابنك يغلط علشان يقع من فوق السفرة ويتعلم انه يبطل شعبطه.. حتى لو حد قالك اصل الجماعة دول هبل ومش يفهموا سياسه.. وماله يا ستي.. نسيبهم يتعلموا.. امال هيتعلموا ازاي واحنا بالمنظر ده؟
- فكرك طيب الى ممكن يحصل؟

- حملة تأديب للبلد كلها.. أنا اهو وانتي اهو.. مصر.. كلها هندفع تمن الى حصل ده غالي اوى.. الفكر ده نفسه خطر عليهم لأنه مختلف معاهم.. انا اطمئن لو كل المتصارعين متفقين في الهدف ومختلفين في الاجراء.. انما مصيبتنا ان الفريقين مختلفين تمام الاختلاف.. ظهور واحد فيهم للحياة معناه موت للباقي لأننا جهله وبهائم مش قادرين نفهم ان الحياة تتسع لكل.. عارفه مثلا لو المنافسة بين عمر سليمان وشفيق... او بين سليم العوا وخيرت الشاطر.. اقولك اه.. اطمئن.. الفكر واحد انما الأسلوب يختلف.. انما لما تكون المنافسة بين الإسلام والكفر.. اليمين والشمال.. الأهلي والزمالك.. يبقى مينفعش أبدا نطلع تعادل.. لازم في الاخر واحد بس هو الى يكسب ويأخذ الدوري.. الدرع لا يقبل القسمة على اثنين أبدا.. هي دي معضلة مصر.. حاليا.. ان الأهلي دايم بيكسب.. سواء كان كويس او كان بالرشوة والحكام.
- كلامك يخوف يا اخي.. خوفتي على أبني.
- ابنك مين.. مستر هامزا؟ لا هو حضرتك احنا كنا رقعنا المشوار ده بالمصاريف دي علشان اقلق على مستقبله؟
- هههههه.. شوفت البت الممرضة.. عينها تندب فيها رصاصة.. عماله تقول هي از بيج.. هي از بيج.. مهانش عليها تقول ما شاء الله ولا حاجه
- انتي ابقي قوليلها جرى ايه يا ليدي.. فايف اند فايف يا اختشششششسي.. خمسه وخميسه في يور آيز يا ام عينين بلو ومدوره.
- طيب قولي بقي.. عملت ايه بعد كده.. نظيف عملك ايه؟
- هقولك حاضر.. بس نصلي العشاء الأول.

مشروع بقرار جمهوري

- تقبل الله يا مولانا..
- منا ومنكم ان شاء الله
- ها.. حصل ايه بقي بعد مقابلة احمد نظيف؟
- عارفه المثل الى بيقولك وكأنك بتدن في مالمطة؟؟
- اه.. بس مش عارفه القصة.
- سنة 902 المسلمين فتحوا جزيرة مالمطة بدون أي اكرام لحد من أهلها على الدخول في الإسلام.. بس كانوا بيرفعوا الأذان عادى.. مكانش حد بيستجيب لان اهل الجزيرة كلهم مش مسلمين.. فبقي المؤذن يرفع الاذان ومحدث يعبره.. يا ناس حي على الصلاة.. ولا حياة لمن تنادى.. طب حي على الفلاح طيب.. مع نفسك يا نجم.. اهو ده الى حصل معانا بالظبط.. حي على التكنولوجيا يا قوم.. ويجيبك صمت الحملان.. صوت صرصور الحقل.. مقابلة احمد نظيف معملتش اى تغيير من اى نوع.. نفس الردود هي هي ونفس التسويف هو هو.. بقيت اضرب كف على كف والكفين على وشى.. امال لو مكانتش التعليمات من الكبير مباشرة.. كان بقي ايه الموقف.
- معقول؟ يعنى هما طنشوا وللا ايه؟
- مقدرش أقول طنشوا ومقدرش أقول اهتما.. كل مره كنت بلاقي رد مختلف.. كل مره ارجع بخفي حنين لابسهم في دماغي.. المحصلة بالنسبالي كانت ان المشروع واقف والترخيص مش بيطلع.. وقت في الأرض وفلوس عمال ادفعها للبلطجية موظفين الحكومة بلا اى داعي.
- طيب ما يمكن فعلا مش قادرين يعملوا حاجه او الموضوع أكبر منهم؟
- أكبر منهم ومش قادرين بس عادى يفضلوا يسحبوا منى فلوس؟؟ طيب كانوا قالولى ان الموضوع مش في أيدينا.. كنت هتقبل الفكرة دى من منطلق ان مصر.. هي ارض كل ما هو سيء وفاسد وغير منطقي.. انما يفضلوا يسحبوا الفلوس كده ويضيعوا في وقتي بأنهي منطق؟ وبعدين أكبر من نظيف!! الى هو ازاى يعنى؟
- رزقهم بقي.. انت كنت بقره حلوب.
- رزق حرام ان شاء الله يكون احبال من نار تخلصهم في الجحيم للأبد.
- طيب... عملت ايه معاهم بعد كده؟
- انتقلت للمستوى الأعلى
- اعلى من رئيس الوزراء؟
- ايون
- مين.. أوباما!!
- لا.. السيد الرئيس محمد حسنى مبارك اخترناه اخترناه من اول كلمه بايعناه يوم ما عبر وعبرنا معاه والسلام عليكم ورحمة الله وبركاته

- أبو عيلاء!!

ام حمزة متنحه.. شكلها مش مصدقه.. لولا انها عارفه انى مش بكذب ولولا انها سمعت القصة بصورة مختصره من بابا الله يرحمه قبل ما يموت.. كانت قالت عليا اتجننت.. انا عاذرها فعلا وعاذر اى حد ميصدقش.. مين انا علشان اقابل رئيس الجمهورية؟ وعلشان ايه؟ حنت مشروع عبط لا طلع ولا نزل.. معاها حق طبعاً.

بس هو السؤال الازلى..

- مين قالك يا عسل اني قابلت رئيس الجمهورية؟

- انت اللي بتقول يا أبني.. مش بتقول نقلت الشكوى للمستوى الأعلى؟

- ۵۵۱

- طيب.. اهو

- انا قلت انى اشتكيت اه لرئيس الجمهورية.. الشكوى حق مشروع لكل الناس.. ولكن ده لا يعنى انه اهتم او عبرني او طلب مقابليتي.. علشان رئيس الجمهورية يقابلني يبقى لازم اروحله عن طريق مفيد فوزي مثلاً.. علشان يبقى فيها اعلام وحركات والاب الحنون الى بيعطف على ديك ام الشعب الوسخ.. الاب الى يقطع من قوته وقوت عياله علشان يسمع ويشوف مشاكل المرفهين الى زى حالاتي.. انا اه بعت شكوى للرئاسة.. بس الموضوع ده طويل اوى وفي كم مهول من التفاصيل والحركات.

- قول طیب.. احنا ورانا حاجه.

- لما الطرق انسدت في وشی.. تعددت مکالماتي او بمعنی اخر مطارداتي لطارق کامل وزیر الاتصالات.. لدرجة ان الراجل بقي بیتهرب منی وبعیدن قالی صراحة کده انا مقدرش اعملك حاجه.. الموضوع فعلا أكبر مننا.. ربنا یوفقک.. وطبعاً مینفعلش کل کام یوم ابعت شکوی للدکتور نظیف.. الراجل مش فاضیلی وعنده مسئولیات اهم وأخطر من انه یسمع لشاب بیعتبر نفسه رمز من رموز مستقبل البلد دی.. مستقبل ایه وبتاع ایه یا بنتی دی الدنیا متفاتة وباللا حسن الختام.

- رحت جای باعث شکوی للریس..

- بالظبط كده.. نفس مكتب بريد العتبة.. نفس نص الشكوى.. كان نفسي- ازود شتيمة.. متظلم بباب سيادتكم يا أولاد الحرام.. يا أولاد العهر والفساد.. متظلم ومظلوم يا اكفر من فرعون واوسخ من النمرود.. متظلم وعاوز حد يسمعي يا زبانية جهنم.. يا من حولتم مصر من ارض فقر الى ارض خراب وفقر ومرض وجهل وجوع وظلم.. متظلم يارب والشكوى الى غيرك مذله.. وانا وعزتك وجلالك قابل المذلة.. بس يدوني الترخيص.. قابل المهانة بس يدوني الترخيص.. قابل اسف التراب بس يدوني الترخيص.. انسدت في وشي كل الأبواب ومبقاش فاضل اى حد الجأ اليه الا اعطفك وكرمك يا كريم.. وطبعاً منسيش احط الرقم المنوفي اللي بيفتح الأبواب الى حد ما.

- وبعدين؟

- ااااخخخ.. ده كان حتى يوم يا ميبييس .. يا لهواااااااي.. مقابلة الرئاسة دي يتعمل عليها فيلم لوحدها.

- ليه؟

- جالي تليفون من رقم مجهول.. مش عارف الناس دى بتخاف تتصل من ارقامها ليه.. هو انا يعنى هقضيها ميسدات عليهم واوزع ارقامهم على أصحابي؟ المهم.. جالي التليفون وطلب منى اروح قصر- الرئاسة في اليوم الفلاني.. هلاقى تصريح على الباب بأسمى.. هسأل على اللواء ثروت.. وهما هيتصرفوا في الباقي.
- انا لاحظت حاجه معلش.. اعذرني على المقاطعة.
- ايه؟
- حكايتك دى فيها لواءات كتير اوى.. هو اللواءات دى بتعمل ايه في البلد؟ مش المفروض ان الناس دى بتبقي قادة أفرع او في الكتيبة او في الخدمة في اجهزه أمنية معينه سواء كانوا شرطه او جيش؟
- مضبوط
- طيب اللواءات دى اسامياها ظهرت ليه؟؟
- انتى مش سمعتي الناس بتقول يسقط حكم العسكر؟ ماهو ده حكم العسكر.. اللواء ده راجل مصدر ثقة.. لا يمكن يخون او ينقلب على سيده وولى نعمته ابدا سواء كان بيخدم في الميري او المدني.. لما بيخرجوا من الخدمة الميري.. بيمسكوهم اجهزه وشركات وحاجات كده.. بيعملوا منها فلوس اكر من فلوس الخدمة نفسها.. كل مكان في لواء شرطه او جيش.. دوله بوليسية تماما.. اللواءات دى هي عيون القصر.. على الناس.. ينقلوا اخبار اى شيء مش طبيعي ويمنعوا حدوثه من الاساس.. اى مكان يحصل فيه اى فكر من اى نوع يكون مضاد للكبير بيبي مرصود ومتراقب علطول.. فاكده لما قتللك ان بابا قفش مع كمال الشاذلي قبل ما يطلع معاش بشهرين؟
- اه.. الحقيقة مكتش مصدقك
- بابا كان عنده مدير عام في الشركة يستحق الترقية الى رئيس قطاع.. حسب اللوائح والقوانين الراجل انطبقت عليه كل الشروط.. نجح في المسابقة وطلع الأول.. سمعه حسنه وتاريخه مشرف.. دراسات عليا من معهد اعداد القادة.. يعنى مفيش ما يمنع "قانونا" انه ياخذ الترقية بتاعته.
- طيب.. ما يترقى.. ايه المشكلة؟
- المشكلة ان الراجل ده كان من الاخوان المسلمين.. كان منافس ليه في الترقية واحد تاني من رجالة كمال الشاذلي في الحزب.. مراته تبقي اخت مساعد مدير امن القاهرة.. بابا اسقط الجزء السياسي في الموضوع وتعامل بما يرضى الله وضميره.. كمال الشاذلي في واحده من زياراته المكوكية كان عند محافظ البحيرة في دمنهور.. المحافظ كلم بابا في مكتبه وطلب انه يعدى عليه وبابا راح بسلامة نية.. كان متعود باستمرار على مقابلة المحافظ.. يعنى مفيش ما يثير القلق.. في مكتب المحافظ كمال الشاذلي قال لبابا بالمستخبي كده ان الراجل بتاع الاخوان ده لازم ميترقاش لأنهم مش بيحبوا الجماعة بتوع الدقون دول.. بابا رده كان غبي الصراحة.. قاله وهو الترقيات بالحب؟ فكمال بيه قاله طبعاً بالحب يا بشمهندس.. حب البلد.. حب الوطن.. حب النظام.. احنا عارفين بنعمل ايه وعارفين مصلحة البلد فين.. عندك المهندس فلان مثلا احق منه بالترقية.. مينفعش ترقى حد من الجماعة دول لمنصب عليا.. دول على خلاف مع النظام.. بابا سمع الكلام ده وقاله من عينيا الاتنين يا كمال بيه.. حاضر.. بكره ان شاء الله كله هيبقي تمام.. أوامر معاليك.
- وعمى عمل ايه؟
- مشى من عند المحافظ ورجع على مكتبه.. وراح جاي موقع على خطاب ترقية الراجل بتاع الاخوان علطول.. وبعته للوزارة والرقابة الإدارية والتأمينات وكل الجهات دى.. ال ايه علشان يقطع خط الرجعة على اى حركه قارعه من حركات كمال بيه.

- يا لهوى.. يعنى كأنه تف في وشه
- بالظبط كده.. الجماعة قالوا بقى الراجل ده بتاع قلق.. مره خابط في لواءات الساحل علشان فلوس الكهرباء المتأخرة.. ومره مزعل كمال بيه.. هوب شهرين وسمعنا خبر الإحالة الى التقاعد.. سجدنا لله شكراً والله.. كنا متوقعين حاجات أسوأ الف مره.. لكن دكتور حسن يونس كان جدع.. خلى بابا يتقاعد تدريجيا علشان يقطع الطريق على الصحافة وكلاهما.
- وهى الصحافة مالها؟؟ وزارة الكهرباء يعنى مش من الوزارات الإعلامية.
- قلبك أبيض من اى فائلة مغسولة بىرسيل.. حضرتك الجماعة الصحفيين بتوع الجرائد الكبيرة بيطلعوا رحلات عمره وحج ومصايف وما شابه منه على حساب شركات قطاع الاعمال.. زى الكهرباء والبترول مثلاً.. تلاقى الشركة من دول بتقصقص من أرباحها علشان تطلع موظفينها مصيف او عمره.. وتلاقى ضمن اسامى الناس الى طالعه سمير رجب بتاع الجمهورية مثلاً او حد من رجالته.. وفي المقابل ريبورتاجات وكلام حلو عن الكهرباء في المحافظة دى مع اشاده برئيسها وجولاته المكوكية للقضاء على الفساد.. وسمعينى سلام الصحافة سلطة رابعة.
- وهما الصحفيين دول محتاجين؟؟ ما اكيد عندهم شيء وشويات
- أبو بلاش كتر منه يا عسل.. وبعدين الهدف من العمرة هو صورة بالأحرام لزوم الحركات.. الثواب نفسه مش في الدماغ.. يبقى مش هيفرق بقى ان كانت فلوس السفر دى حلال وللا حرام
- للدرجة دى!!
- امال انتى فاكركه الناس ثارت ليه.. هو ده حكم العسكر الفاسد.. هي دى الشلة المصرية الحاكمة.. هي دى عواقب الظلم والاستبداد والديكتاتورية.. ابقي اقرى كتاب الطبائع بتاع عبد الرحمن الكواكبي.. هيفرق معاكى كتير.
- حاضر.. عملت ايه في الرئاسة بقى؟
- رحت في اليوم المحدد.. بطولي كده ومع نفسى.. بابا كان الكبد اشتد عليه اوى ومبقاش بيخرج من البيت.. كنت شغال بجنون يمين وشمال.. زى ما أكون عاوز اعمله اى حاجه تفرحه قبل ما يموت.. حتى انى خطبت 4 مرات في اقل من 6 شهور.. والله كنت هتجوز بس علشان ابسطه مش اكثر.. لا كنت بحب ولا عاوز ولا كان ليا دماغ لأى حرمه.. خصوصاً بعد ما هيا تم خانتني واتجوزت للمرة الرابعة.. فقدت الثقة في كل الستات.
- وهى ازاى تعمل كده.. ملهاش حق
- ما هى الستات كده.. لما فشلت في المشروع راحت اتجوزت واحد غنى.. لو كنت نجحت في مشروعى كان زمانها دلوقتي بتقولي يا محاميحو.. وانا يغى عليا من السعادة.
- اتلم يا اسطى بدل ما اقوملك.. انى دلوقتي ام الواد اطلقى البخور يا خاله نظيما.
- اتلمييت..
- وبعدين.. كمل
- اكمل ايه بقى.. ماهو هيا تم اتجوزت خلاص.. ميصحش نتكلم على ست متجوزه.
- يا ابني كمل حكاية قصر الرئاسة.. يا دى النيلة..

- اااااا.. معلى.. اصلى افكرت الغالىة.. المهم يا ستي.. رحت فى الیوم المحدد الى قصر.. القبة.. عنوانه معروف طبعاً ومیتوهش اطلاقاً.. كنت دایماً انا وأصحابى نزل نجرى حوالیه علشان التخصیس.. وبعد الجرى نطلع على أبو ربیع.. اشهر من عمل طبق كشرى نووى فى كوكب حدائق القبة علشان نعوض اللى خسرناه بالجرى.. على الباب فعلاً لقیتم تصریح بأسمى.. قالولى انتظر شویه وجت عربیه أخذتني من البوابة الى حیث التقیتم باللواء ثروت.

- مین ثروت ده بقى؟

- لواء وخلاص.. واحد بیشتغل جوا فى القصر.. ولا اعرف عنه حاجه ولا اعرف اسمه بالكامل ایه.. لحد اللحظة دى معرفش عنه اى حاجه.. حتى لما حاولت ادور على تاریخه.. معرفتش أوصل لأن مفیش معلومات.. هو اللواء ثروت وكفى وغالباً مش أسمه ثروت كمان.. وتصدقی بقى.. انا دلوقتى حاسس انه كمان مش تبع الرئاسة ولا حاجه.. غالباً ده كان راجل هجاص شغال فى سكرتارية القصر استقبل التلكس بتاعى وحب يعمل جو ونمره كده.

- لیه.. هو حصل ایه.. انت رحتله القصر فعلاً؟

- اه طبعاً.. رحت القصر.

- وقابلته؟

- اه.. قابلته

- وحصل ایه

- یووہ.. ده حصل بلاوى.. قعد یاخذ رأى فى مواقف الرئيس المشرفة على الساحة العربیة ورأى ایه فى اتفاقية السلام.. ولو كان عندي اى شىء اقدر اساعد بیه فى دفع عملیة السلام المكعبله فى الشرق الأوسط

- هنهزر اهو

- والله یا بنتى الى حصل لا یصح معاه الا الهزار.. عموماً.. أكملك بكره الصبح ان أحياناً المولى عزوجل

-

لوكل واحد ركز فى كلام مراته وهى عصبیه.. مكانتش البيوت عمرت.. حاول دایماً تتصرف من منطلق انهم ناقصات عقل ودين.. متحاولش تقفش على كل كلمه.. یا سیدی كبر مخك.. لا تفترض ان الشتیمة او الزعيق او بعض الالفاظ الى ممكن تطول نوعك البيولوجى او اهلك او سلسال عائلتك تعتبر مهانه فى حد ذاتها.. افترض انها وسیله من وسائل الاعتراض.

تمام زى مانا عملت كده لما قطعت الحدوتة عن مراتى.. وادینى عایش اهو زى الفل الحمد لله ومحتفظ برقبتي فوق كتافى.

جيل ايه المهب ده!!

- ونزل حنفي في عاصفه ثلجية علشان يجيب الطعمية.. اعتقد ان بجانب سلق المكرونة وصينية البطاطس.. لازم اخط قلى الطعمية في السى فى بتاعى.

على مائدة الإفطار الشرقي.. بدأت أم حمزه تنكشني علشان تعرف باقي احداث رحلتي في الكفاح على أرض طيبة.. كنت ناوى الوعها شوية.. لكن مجموعة جمل خرجت منها وهى نايمه من عينة "هقتله" و"جرعه اديه في الاكل تكون كافيه" و"مش هيحس بحاجه خالص وهو نايم؟" نزلت منى شقاوة الشباب وزرعت مكانهم حكمة الشيوخ.

الطيب أحسن.

- ها يا غسل.. وبعدين حصل ايه مع اللواء ثروت؟

- اللواء ثروت ده بقي طلع حدوته الحواديت.. حكاية من حكايات ألف ليلة وليلة لوحده كده.. راجل مش ممكن تقابلي زيه ابدأ الا في الأفلام.. راجل سينمائي مسرحي تماما.. بعد دقيقه واحده من الكلام معاه مبقاش في ذهني اى تصور او انطباع عنه الا شخصية يوسف وهبي في فيلم إشاعة حب وهو بيهزأ عمر الشريف ويقول اه يا فلاقي يا عجري يا نقرى.. انت لطخت اسم العيلة وعيلة العيلة.. الجلالة اخدته في كلامه معاها جدا وبطريقه مبالغ فيها اوى.. كلامه كان كبير جدا وأسلوبه مسرحي تماما.. ولا كأنه بيعرض مسرحية هاملت على مسرح من مسارج الدرجة الثالثة في لندن.. اعظم ممثلي العالم يخر على ركبته انهارا بالأداء التمثيلي للراجل ده.. سيدني بواتييه مثلا ممكن ييجي ياخذ عنده كورس القاء وأداء.. مارلون براندو وجريجورى بيك وهمفري بوجارت قصاص الراجل ده ولا يسووا بصله.

- يا سلام.. ازاي يعنى؟

- اقولك يا ستي.. الراجل ده سمع منى بالتفصيل الممل.. سمع كل قصة حياتي من اول يوم 24 يوليو 1977 الى يوم 18 أغسطس 2007.. كان بيسأل عن كل شيء واي شيء.. عينيه زى الصقر وهو مركز ويبسمع بعق تالام.. بعث جابلنا فطار فخم اوى والمشاريب فضلت شغاله.. واضح ان له اصل ريفي لأنه كان دايمًا بيعزم بطريقة تعمدني لتاكل سندوتش الفول ده.. انتي عارفه الجماعة الفلاحين لما يعزموا.. بيخلوكي في الاخر تاكلي علشان تهربي من كم اللاحاح الرهيب ده.. هما بيعتبروه كرم.. يشكروا عليه طبعًا.. الراجل ده كان كده.. كنت عاوز أقوله ابوس ايدك سيبك من دور قلب الام الى انت عايش فيه ده وركز معاها شوية في الحدوتة.. هو مركز طبعًا وواي.. كان بيخليني اعيد بعض الجمل او احكي موقف معين بطريقه مختلفة.. خلاني اكتب تفاصيل الموقف كله من اول ما بعث الشكوى لوزير الاتصالات لحد ما قابلته.. وبعد ما كتبت خلاني اقرا الى كتبتة وبقيت ازود تفاصيل او اشطب حاجات.. كتبت لحد ما صوابي نملت.. قعدت عنده في المكتب من الصبح لحد ما مشيت معاه اخر النهار.. محسيتش بالوقت بصراحه.. كنت سعيد اوى من الكلام الى سمعته منه.. كنت حاسس ان فرج ربنا قريب اوى.. بقيت أقول لنفسى يا حبيبى يا مبارك.. اول ما دقيت بابك الأمور كلها اتحلت.. صحيح يا ولاد.. الراجل ده له افضال وإنجازات في البلد ومحدث حاسس.. الله يقويه على المسئولية وينصره على شوية العيال الهفأ بتوع 6 ابريل دول.

- ليه هو قالك ايه؟

- بعد ما خلصت كلام.. قام وقف كده وفرد طول.. بلهجه مسرحيه تماما قاللى الاتي.. عارف يا احمده.. في 72.. كان عندنا اسقاط خلف خطوط "ولاد الش..." على الجبهة.. رحت انا واتنين زمايلي.. رجعت لوحدي.. بس رجعت معاها 3 خرفان منهم.. اصريت اني اذبحهم على الضفة الغربية للقناه.. في المعسكر بتاعنا.. علشان يبقي ماتوا على ارض مصر.. تبقوا مصر.. الى دخلوها فاكرين نفسهم عنتر اندفنوا في ارضها وهما عبله.. في اليوم العظيم يوم 6 أكتوبر.. كنا بنعوم في القنال والقنابل حوالينا زى المطر.. كبسنا على مبني انذار مبكر من بتوعهم.. رميت الاناناسة ودخلنا على ولاد "الوس..." دخلة بلدى.. قفشت منهم واحد كان بيحاول يفلص.. مسكته من شعره وطلعت بيه بره الخندق.. ذبحت بالسونكي زى الفراخ من الودن للودن.. علشان تبقي دى رساله "للخو..." التانيين صحابه.. علشان يعرفوا ان الجيش المصري مفيهوش غير وحوش مبرتحمش.. وحوش بتاكل لحم البنى ادمين احياء.

- الله ينور يا فندم.. بس هو ايه الاناناسة دى حضرتك؟

- القنيلة البدوية.. كنا بنقول عليها أنا ناسه.. بندلعها يعني.. ها ها ها ها.

- یا فندم حرب اکتوبر دی یتکتب فیہا مراجع.. بابا کان فی الحرب وعنده منها أصابه.. کل من شارك فی الحرب دی ابطال بلا ای استثناء.. تضحیانکوا احنا عایشین بسببہا دلوقتی فی عزه وکرامه.. ربنا یکرمکوا یارب.. اید حضرتک ابوسہا.. دی اید دافعت عنی وعن اہلی.. لولہا کان زمان عرضنا کلنا مکشوف.. صحیح.. اید تحس معاہا بالأمان.

- عارف وقت الحرب دى كنا بنعمل كده ليه وبنموت بالشكل ده ليه؟

- مش محتاجه ذكاء يا فندم.. علشان انتو رجاله بحق.. تحرير الأرض كان قصاد عينيکوا هدف واضح مفيهوش هزار.

- مش كده بس.. كان ممكن نلتزم بالأوامر وناخد منهم أسرى بس.. انما احنا كنا بنجود.. الى قلع لباسه علشانه يلحوسه شحم ويلزقه في البارود علشان يعمل قنبلة بدائية لما سلاحنا خالص مكانش مضطر يعمل كده.. الى رمي نفسى.. في وش النابالم علشان يفدى زمايله مكانش مضطر يعمل كده.. الى طلع بالعلم لوحده في الأول وهو عارف انه هيموت مكانش مضطر يعمل كده.. احنا عملنا كده علشان سبب تاني خالص.

طبعاً أنا نتحت في الجزء ده.. أنا دلوقتى بسمع اسرار عسكريه من مصدرها اهو.. فرصه ذهب مش بتيجي لأمثالي من الحثالة
الامرء واحده فى العمر.. كمان أسلوب اللواء ثروت يجبر اى انسان يسمعه للآخر..

- امال ايه السبب يا فندم؟

- السبب اننا مؤمنين ان مصر—دى ام الدنيا.. اووم الدنيا.. اووووم الدووونيا.. كنا عارفين اننا بنأمن مستقبل لبلد هيطلع فيها عيال زيك كده.. عيال حلوه تفهم يعنى ايه حرب جديده.. انت كويس ياى احمد.. انا حبيتك.. انت حسستني ان ودنى الى طارت من قنبلة "ابن الم..." اليهودي قبل ما افرتك لحم امه مراحتش بلاش.. انت واللى زيك المقاتلين الجداد.. انتو اللى هتخلوا اسم مصر عاااااالى اوى.. مصر هتوصل للنجوم بمجهودكو وشغلكو.. ااه يا مصر.. ااااااااااا يا مصر.. تعالى شوفي ولادك يا مصر.. ولادك حلوه يا مصر.. ولادك فيهم خير.. كتر الف خيركم يا ولاد.. ربنا يبارك فيكم.. انتو اللى هتكملوا العبور العظيم.. احنا عدينا المياه.. وانتو هتعدوا بينا للقرن الجاي واللى بعده.. مصر—عمرها ما هتتهان أبدا طول ما فيها عيال زيكو طمر فيهم التعليم والتربية.. تعالى ياى فى حضني.. تعالى احضن فيك مصر.. تعالى احضن فيك البرقوقي والفريق رياض والنقيب عبد المسيح.. تعالى فحضني يا حبيبي.. بص يا مختار.. شوف يا مختار ولاد مصر بيعملوا ايه.. مد ايديك يا مختار معايا سلم على البطل الجديد ده.

أَمْ حمزه على وشها تعبير يهلك من الضحك.. بنسبه كبيره جدا هي مصدومه من سينمائية الراجل وطريقة كلامه.. معاها الف الف حق.. انا نفسى- الى كنت واقف قصاده وحضرت الموقف ده لحد هذه اللحظة مش متخيل ولا مصدق ان الراجل ده حقيقي.. الراجل كان على وشه عليه كم مرعب من التعابير والتفاصيل.. اى رسام او مخرج محترف لو شاف المنظر ده هيقع من طوله ويهتف بقوه و حراره.. انا عاوز الراجل ده ممثل عندي.. وش الراجل وعينيه بيقولوا كل حاجه.. لو شفت المنظر ده من بعيد من غير صوت.. استحاله تقول الا ان الراجل ده ببدأ دور عظيم في مسرحيه من مسرحيات شكسبير.. في الأول قلقت منه.. تعالى فحضني يا حبيبي دى تقلق.. خصوصا ان فيلم عماره يعقوبيان كان لسه مبردش وحاتم رشيد كان عامل رعب للناس.. حضن مين يا باشا.. ده انا راجل اوى ومأحلي اوى واعجبك اوى اوى بصوت محمود عبد العزيز في جرى الوحوش كده.. كنت عاوز أألش على كلام الراجل السينمائي والخطبة العصماء دى.. كنت هقوله يا باشا ابوس رجلك بلاش موضوع ناخد مصر- الى النجوم ده.. اخر واحد قالها كان الشهيد موسوليني وبعدها اتعلق من كعوبه زى الذبيحة.. بس طبعا مقدرش أقول كده.. الراجل له هيبه رهيبه.. ده غير انى ممكن أخرج من عنده على القبر مباشرة.. لقيت نفسى- بسأله تلقائيا كده..

- مین مختار ده یا فندم؟

- الرائد مختار البدرى.. كان زميل القروانة والخندق في الجيش.. كان ريس وحدتي وصاحبي والبونتي بتاعي.. جمعت جسمه بعد ما "ولاد الأ.." رموا علينا طن ونص قنابل علشان يهدونا.. مختار كان اسد.. مختار خد القنابل في

کائنات

الوسادة الخالية

وقفت الذكريات مع نظرات خاويه فضوليه ضاحكه من ام حمزة.. طبيعي ان يكون عندها اسئله.. من امتي الحريم بتسمع من سكات؟

- ايه الراجل ده.. هو فعلا في كده؟
- اه والله زى ما بقولك كده.. راجل سينمائي مسرحي من الدرجة الأولى.. خرجت من عنده من المكتب والسلام الوطني بيعزف في وداني.. مكانش ناقص الا انه يقولي مصر- محتجالك يا ليفي.. وانا أقوله متقوليش يا ليفي.. رقبتي فداء مصر يا محسن بيه.
- انا حاسه انه كان مؤمن باللي هو بيقوله.. اكيد الراجل ده مش بيمثل.. المنظر اللي انت بتقوله ده بيبقي عايش في دنيا تانيه مع نفسه كده..
- اغلب ظني وتقديري ان الجيل ده وقف عند حرب أكتوبر.. هما فعلا عملوا مجهود جبار وحققوا انتصار عظيم.. مين كان يقول ان بحال البلد الخائب ده بعد 67 ممكن نعمل اى حاجه.. دى فعلا تعتبر معجزه.. ولكن مش معنى انهم كانوا ابطال في موقف ما انهم ياخدوا صكوك الغفران للأبد.. لا طبعاً.. هما ادوا دورهم كاملا وقدموا خدمات جديله للبلد وكل الشكر ليهم.. ولكن لازم ييجى عليهم الدور علشان يوسعوا سكه للجيل الجديد اللي يحافظ على اللي هما عملوه ويطور البلد ويقدر يتعامل مع معطيات العصر- الجديد.. انتى عارفه ان ونستون تشرشل بجلالة قدره.. الراجل اللي قدر فعلا انه يهزم هتلر والمانيا وقت ما المانيا كانت طايحه في أوروبا.. اترشح للانتخابات بعد الحرب ما خلصت.. وباللهعجب.. تشرشل البطل القومي اللي لسه بيحلفوا بيه لحد النهارده.. سقط في الانتخابات.. الناس قاتلته لا.. مش عاوزين.. الراجل ده "كان" مناسب لوقت وعصر- ما خلاص انتهى.. كذلك شارل ديغول وجورج واشنطن.. نفس الكلام عندنا.. مبارك كان مناسب لعصر- ما.. الجيش كان مناسب لعصر- تاني.. خلاص.. الأيام دى خلصت.. أيامنا مبقيتش ايامهم.. لازم يمشوا ويسيبوا البلد لحد تاني.. حد أصغر في السن واجدد في الأفكار.. حد يخطط لبكره ويكون بكره يفرق معاه مش دولة العواجز اللي عايشين بمبدأ ياللا حسن الختام.. لو قريتي تاريخ كويس هتلاقي نفس الكلام.. كل اللي عملوا إنجازات وحققوا نجاحات كانوا شباب.. الشباب يعني أمل.. يعني بكره.. يعني قلب ميت مستعد يجرب ويجرب ويخوض مخاطر.. الشعر الأبيض معناها البحث عن الاستقرار والتفكير في نهاية مناسبه.. وده غير مناسب أبدا لوطن محتاج يتطور ويعالج طن من المشاكل المزمنة.. عارفه بابا لما مسك اول منصب قيادي كبير من دول في الوزارة.. كتبوا في الجرائد ايه؟ كتبوا ان الوزارة بتدعم شغلها بالقيادات الشابة.. بابا وقتها كان عنده 55 سنه.. 55 سنه وقيادات شابه.. هنا في أمريكا اديكى شايفه الناس اهو.. 50 سنه ويتقاعد ويقولك شكرا.. انا عاوز الانجوى ماي لايف.
- دولة العواجز ودتنا في داهيه.. طيب قبل ما نكمل.. انت قلت اسم اذهب صهيب في النص كده.. انا متهيألى سمعت الاسم ده قبل كده.. مين ده؟
- ده شاب عشريناتي كانوا قالوا انه حاول يقتحم قصر الرئاسة.. ال ايه خرج متخاف مع ابوه فقرر ينتحر باقتحام قصر القبة.. طبعاً نخلوه بالرصاص قبل ما يلمس بوابة القصر.. المعلق في القصة بس انه كان مسيحي واهله نفوا تماما اشاعات خلافه معاهم.. الموضوع هاج شويه وكعادة مصر.. نام تماما بعد ما شوها صورة الواد.. الله يلعن أبو ذاكرة الجمبري.
- طيب وبعدين.. انت خدت رقم الراجل اهو.. لواء في رئاسة الجمهورية.. وشكله مش اى لواء.. يعني المفروض خدت زقه محترمه.
- اه.. خدت زقه.. زقنى ابن الوارمة لحد ما وقعت على وشى.. يظهر ان الزقه كانت شديده حبتين.. ههههههه.

- ازای؟

- خرجت من المكتب عنده وانا على ثقة كاملة ان الموضوع خلس.. اتصلت بابا افرحه بالأخبار دى.. خلاص بقي كله اتحل اهو.. معنا سيادة اللواء ورئاسة الجمهورية.. فى ايه تانى؟

- ۵۵.. صحیح.. ایه ممکن يعطل؟

- المفروض مفيش.. لكن المفيش ده هو الى حصل.. مصر- بلد المفيش.. ثالث اكتر كلمه عبقرية في العامية المصرية بعد "بتاع" و "بس".. خرجت يا ستنا من مكتبه وانا طابر وبغني يا أصحابي يا أهلي يا جبراني.. انا عاوز اخدكم في أحضاني.. رح جري على قهوة كابتن الدو في حدائق القبة.. ملتقى التجمع والسهرات الحلوة الى راحت وقالت يا فكيك ومش عاوزه ترجع تاني.. المكان الى كنت بستمد منه كل قوة علشان اعرف اعيش.. قعدة الصحاب الى ميتقدروش بمال قارون.. قعدت ارغى مع أصحابي في الى حصل.. طلبت رقم اللواء ده.. قلت اشكره للمرة المليون واتبت عليه في المعاد الى اداهولى وكده.. عندي صديق لواء في رئاسة الجمهورية يا ناس.. مين أدى بقي.. قعدت أرن على الموبايل.. ويجيلي الرد الآلى.. الهاتف الذي طلبته غير متاح.. أرن تانى والرد الآلى يقولى الهاتف الذي طلبته ربما يكون مات في حرب أكتوبر.. من فضلك حاول في حرب نوفمبر.

- اطلب تاني،.. خليك وراه.

- طلبت تانى وثالث وعاشر.. كل مره ولا الهواء.. لا حياة لمن تنادى.. ساعتها وقعت على قفايا من الضحك.. يا لهواااااااااااااااا!! هو في كده!! دى خدعه قديمه اوى ازاي تفوت عليا.. ازاي أساسا سيادة اللواء يبقي رخيص اوى كده.. يديني رقم غلط!! اه يا ابن الكااااالب.. طب كنت اديني رقمك ولما اتصل متردش او كانسل عليا وانا هفهم.. انما رقم غلط!! اونط.. كفته!! اه يا "ابن ال..."

- ههههههه.. يا ختاناااي.. هم يضحك والله

- اتصل يا بنتي مهما اتصل.. عملت المستحيل.. حتى اني رحت القصر- تاني علشان اقابله.. طبعاً مفيش تصرّيح بأسمى على البوابة يبقى امشي- احسن قبل ما يفرغوا فيا الرصاص واتحول الى حصى صهيب جديد.. خلاصة القول.. سيادة اللواء طلع فستك.. الوسادة الخالية.

- لا حول ولا قوة الا بالله.. كده الأمور بانتي بقي.. كده انت رميت طوبة المشروع كله ولميت عزالك وعلى بره.. صح؟

- لا طبعاً.. صح ايه.. ده كده نص المشوار.

- يا لهوى يا احمد.. لاهو انت بعد كل ده كان لسه عندك امل!!

- اه والله.. امل وعمر وأمي وإني وكتاب القراءة بتاع أولى ابتدائي كله كمان..

- عملت ايه يا منيل.. بعت تشتكي للأمم المتحدة؟

- لا.. قررت انى هشتغل وينعل أبو الحكومة.. اعمل كام مليون ومفيش مانع من الحبس.. كنت هكذب على بتوع مصنع التليفزيونات.. اعمل المشروع كله في سنتين.. اقفش ال 5.5 مليون.. ولما يتعرف الموضوع ويتقبض عليا.. أبقى اعترف بكل حاجه.. يتحكم عليا بالحبس والغرامة.. مش همدف الغرامة لأني هدى الفلوس كلها لأبويا.. هأخذ حكم من سنه الى 3 سنين اقضيهم في السجن بفلوسي ملك.. سنة السجن ب 9 شهور.. وممكن أقدم تظلم او اى حاجه للأفراج عني باعتبار ان سمعتي حسنه او اى لعبه من العاب المحامين دى.. اخرها 9 شهور في السجن.. اخرج بعدهم المعلم احمد أبو راس عدو الحكومة بس هيبقى معايا 5 مليون جنبه.. ارميهم وديعة في البنك تطلعلى

40 ألف جنيه كل شهر.. ويبقي كده جبرت على خير وبقيت من ذوي الأملاك.. مش عايز حاجه من أم البلد دي تاني.. ابقي افتح بقي مكتبه وللا قرن عيش وللا أي مشروع اتسلى فيه واتجوز واخلف عيال وشكرا يا مصر على كده.

- يا قلبك يا اخي.. وتبقي رد سجون!

- مش كل رد سجون بيبقي مجرم.. احمد فؤاد نجم رد سجون.. الاخوان رد سجون.. السادات نفسه كان رد سجون.. السجون المصرية تعتبر علامة من علامات الجودة والشراف.. سيدنا يوسف نفسه اتحبس في مصر- وخرج بقي ملك.. خريج السجون المصرية مشروع رئيس جمهورية بشرط انه يكون منوفى.. لما اتحبس علشان عاوز اشتغل بمجهودي وبفكره تكنولوجيه.. لما اتحبس وانا لا سرقت حد ولا اخدت مجهود حد ولا دلست ولا كذبت ولا اخدت رشوه.. لما اتحبس وانا ولا تاجرت في المخدرات ولا فتحت بيت دعاره.. ساعتها هبقي بطل.. مش بعيد قصتي توصل للأعلام واتحول مع الوقت الى رمز من رموز التاريخ.. مش بعيد كمان اهاجر الى اى دوله تعاملني معامله اللاجئ السياسي واشتهر على مستوى العالم.. ههههههه.. ابقي حسنى يوسف زاي مثلا.. يا بنتي السجون المصرية دي نعمه مش نقمه.. بس مين يفهم.

- انت واخذ الموضوع ببساطه اوى.

- مش أحسن ما كان يجيلي سكته.. المهم.. بعد القرار الجريء ده حصل موقفين.. أحدهما خازوقي كان بمثابة طعنة في سويداء ن عيني من جوا.. والاخر كان امل ادانى دفعه حلوه لقدام.

- نبدأ بالخازوقي.

- مصنع التليفزيونات.. لغى فكرة المشروع.. الناس كتر ألف خيرها فضلت منتظره كثير بلا اى امل في اى تقدم.. الناس كلموني وبلغوني بالخبر.. اعتذرتلهم عن التأخير وخذت منهم معاد علشان اسددهم فلوسهم..

- معلش.. ربنا يعوض عليك.. بس ليه خازوقي.. دول انقذك من السجن الى كنت هترى نفسك فيه

- حضرتك انا كنت صرفت من الفلوس فعلا.. جبت ذهب لأمي وأخواتي.. دفعت 75 ألف جنيه مقدم عربيه بي ام دبليو سكستين فالف والباقي كان على 4 أقساط.. قولي موضوع ال بي ام سهل.. هسترد المقدم مش مشكله.. انما الى صرفته في بيتنا ده اعمل فيه ايه.. ده طبعا غير رشاي الموظفين إياهم.

- انت كنت صرفت كثير؟

- قلتلك.. في حدود 200 ألف جنيه.

- يا لهوى.. وعملت ايه؟

- عن طريق شغلي في اوراسكوم أخذت قرض من سيتي بنك.. عرفت الدين لأول مره في حياتي.. بس الحمد لله.. قدرت اسدد الفلوس لمصنع التليفزيونات وفضل القرض عليا.. كل تفكيري كان انى مخسرش سمعتي في سوق الشغل.. لعل وعسى الأمور تتفك وارجع اشتغل تاني.. لو كنت نصبت على الناس مكانش حد هيصدقني بعد كده.. السمعة تمنها غالى اوى على فكره.

- وفيها حرمانيه برضه..

- طبعا.. المال الحرام لا بيغنى ولا ببسد.

- طيب ده يعتبر خازوق لطيف.. حاجه سريعة جمب الى انت شفته.. نكزه يعنى بلغة الفيس بوك.

- اه.. نكزه.. نكزه بس تأثيرها المعنوي كان قاتل.. انا كنت مستقوى بيهم.. لما كنت بقابل اى حد يتوسلى كنت بقول ان عندي عملاء تقايل والشغل ده مطلوب.. دلوقتي انا رجعت تانى الى نقطة الصفر او اقل كمان.. دلوقتي انا بقيت مديون ب 200 ألف جنيه ومعنديش ولا عميل عاوز يشوف وشي ومش عارف اجيب التصريح.
- معلىش بقي.. الشغل موجود وربنا يدريك الصحة.. انت قلت ان مرتبك في اوراسكوم كان كويس.
- اه.. الحمد لله.
- طيب.. ربك يقطع من هنا ويوصل من هنا.. ايه بقي الى حصل تانى ادالك امل؟
- عروسه..
- نعم يا أخويا؟
- اه والله.. عروسه
- عروسة؟؟ وانت متجوزني!! ليه يا احمد.. هو انا قصرت في ايه.. بتخوني ليه!! بتخوني بعد ما ضحيت بأجمل سنين عمري وفنيته في خدمتك انت وعيالك.. بتخوني بعد جبتهك الواد.. أخص عليك راجل ناقص من دون الرجاله.. انا قلبي كان حاسس أنك كده.. وانا الى ضحيت بكل حاجه علشانك واتحديت أهلي واتجوزتك رغم ان انت من طنطا وانا من الشرقية.. كونتا كنتي نفسه كان هيموت ويتجوزني وانا قلت لا.. ماخدوش يا ماما ماخدوش يا ماما.. مش هأخذ الا الفارس الطنطاوي خليفه.. قولي ومتكذّيبش عليا.. خنتني كام مره.. عرفت كام ست قبلي وبعدي.. خلفت منهم وللا لأ.. الولد الى انا لسه مخلفاه ده.. مين امه يا فلاّتي يا بو عين زايغه.
- انتي شكلك متأثرة باللواء ثروت على فكرة.. ههههههه
- الصراحة اه.. هههههههه.. كان راجل عنب أوى
- طيب نضفي ودانك بقي علشان العروسة دى مش أي عروسة.. دى عروسة من جهة أمنيّه.

عريس يا أماي

مجرد ذكر سيرة اى ستات في حياتك وانت متجوز.. فده لا يعنى الا ان مراتك تتحول الى خفاش عظيم الاذنين دقيق الحواس جدا.. جرب كده تحكى لمراتك عن مأساة اغريقه ويكون فيها اسم بنت او قصة حياتك كلها وفيها لمحہ سريعة كده عن واحده ست غير أمك واختك.. وراقب مراتك هتعمل ايه.

الأذن بتتحور من اذن بشريه الى مجسات الكترونية شديدة الحساسية تلتقط اى كلمة أو صوت مهما كان منخفض.. العيون بتقلب وتشتغل بالأشعة فوق وتحت وجنب الحمراء علشان تسجل اى تغير في وشك او صوت بلع ريقك او عينيك الى رمشت او نفسك الى دخل صدرك غصب عنك.. المناخير بتتسع طاقتها بكل قوه.. اكيد علشان تشم ريحة الخيانة.. ومن ورا كل دل مخ جبار رهيب.. أجده من مخ شرلوك هولمز بنفسه.. بيحلل ويبستف ويرتب ويربط الاحداث تباعا بلا أي منطقية علشان ينكشف المستخبي ويبان وسرك يتفضخ وتتعرف خيانتك على الملأ.

بس انت مكنتش خاين أصلا!!

مين قال؟

امال يعنى ايه عينك ترمش 3 مرات في نص ساعة كامله؟

خدت نفسك ليه وانت بتتكلم؟

ليه بلعت ريقك؟

صوت الرعد الى جه فجأة كده لما جت سيرة البنت في الكلام.

معقول كل ده صدقه؟

دى لغة الجسد وحركات عصبية جسمك بيعملها لا اراديا علشان رافض كذبك.. وطالما بتكذب.. يبقى انت خاين وفي ست تانية علطول.

- حتى لو فرضنا في ست تانيه.. انا مكنتش متجوزك ساعتها.. يعنى انا حر.

- كمان مكنتش متجوزنى!! طبعاً.. ماهو انا الخدمة الى قاعده منتظرة حضرتك..

- يا ولية انا كنت عاوز اتجوز اى حد.. علشان افرح ابويا بس والله.

- أخص عليك يا أحمد.. بتفكر تتجوز غيري وانا الى فضلت مستنياك طول عمري.

- في الوقت ده انتى كنتى لسه بصفائر في الكلية.. الى حصل انى اتعزمت مره على الغداء عند صديقي الى حكيتلك عليه.. ابن الفريق بتاع الجيش.. هما كانوا بيحبوني اوى لأنى كنت بجيبهم الفسيخ بتاع كل شم نسيم من مكان ميعرفش عنه حاجه الا ابليس.. عزموني عندهم في البلد يوم جمعه.. غداء وفطير ومش وطواجن وحاجات كده من طعام أهل الجنة.. رحت طبعاً.. الا الفطير المشلتت.. ده بينى وبينه عشق وارتباط من أيام ما بابا خطب ماما.

- وبعدين؟

- هناك بقي عندهم في البيت قابلته.. سيادة اللواء.

- سيادة اللواء... تانى!!

- لا.. ده لواء غير اللواء الاولانى والثاني والثالث.. معرفش انا لواءات مصر مالها ومالي.. مفيش وراهم غيرى ولاد ال...
- ده اللى انت قلتلي كنت هتتجوز بنته..
- ايون.. الله ينور عليكى.. اتعرفت عليه وسمع قصتي في عجاله قصاص دكر بط عظيم جدا فاقع لونه بنى يسر—
الناظرين.. طلب منى اقبله في يوم تانى يكون رايق عن كده شويه لأنه هيقدر يساعدي.. البط طبعا له حرمه
وميصحش نتكلم في الشغل قصاده.. ساعتها انا ابتسمت بسخريه.. ما هو كل واحد قابلته قالي الكلمة دى وكل
واحد في الاخر طلع الوسادة الخالية او اخذ رشوه طلع بعدها الوسادة الخالية برضه.. وده لواء من الكبار مقدرش
على الرشوة بتاعته أبدا.. ويبدو كده ان السخريه دى مغابتش عن عين الصقر الفريق أبو صاحبي.. فقالي اللواء
"....." يبقي مدير مكتب اللواء ".....".. تعرفه؟ لا يا فندم والله.. انا بتشرف بحضرته لأول مره.
- طلع مين بقي؟
- حضرتك اللواء ده طلع الدراع اليمين لواحد من كبارات المجلس العسكري وقتها.. لاحقا بقي كلنا عرفنا وفهمنا ان
المجلس العسكري هو الحاكم الفعلي لمصر.. الرئيس مبارك ماهو الا شرابة خرج.. اللواء الى قابلته ده بعد كده هو
نفسه أصبح من لواءات المجلس العسكري الى طلو علينا في يناير.. ده مش بس كده.. ده بعد كده كمان اكتشفنا
انه واحد من الذئاب الى رسمت وخططت ونفذت خطة استرداد البلد تانى برعاية الذئب الاغبر عمر سليمان.
- طيب حلو اهو.. اعتقد ان كده الدنيا بدأ.. تنور تانى.
- اه فعلا.. نورت.. بس يبدو ان نورها كان فلاش قوى زغلل عينيا وعماها
- ليه يا مسعود سعيد أبو السعد؟
- سيادة اللواء طلب منى اقبله منفردا علشان اشرحه الليلة كلها.. عارفه طلب منى اروحه فين؟
- فين؟
- نادى الجزيرة
- يا حلاوة.. بتاع الملك فاروق!!
- ايون.. انا أخرى كان قهوة الكابتن الدو.. ولما البلية لعبت معايا.. رحت مره نادى هليوبوليس معزوم بتذكره.. طب
وربنا مره دخلت نادى الشمس مع جماعه صحابي كده جدعنه وقعدت اعاكس في البنات لحد ما الامن طردني.
- يا خيبر انت يا خيبر
- أقوم الاق نفسي.. هروح نادى الجزيرة.. الباشا بيجري هناك كل يوم ساعتين.. فقر علشان خاطري انه يخليهم
ساعة ونص ويسمعي في النص ساعه الى فاضله.. في اليوم ده انا استحميت بتاع 3 مرات.. نزلت اشترت طقم
سبور مخصوص من اديداس كلفني دم قلبي.. هو انا يعنى هروح نادى الجزيرة كل يوم..
- ورحت؟
- طبعا.. ده انا قلت لمصر.. كلها انى رايق نادى الجزيرة.. جبراني في الحقائق وانا رايق الصبح وقفولي في البلكونة وبقوا
يزغرطوا ويصيحوا بعض من النوم.. يا ام فاروووووق.. قومي يختي شو في الواد احمد ابن ستيتة.. الواد رايق نادى
الجزيرة يختي.. يخيبه.. هيرج كده من غير ما ياخده امه وابوه.. عيال عايزه قطع رقابيه.. ولما هو فالح وشملول
كده ويروح نادى الجزيرة.. طيب ما يتجوز ويتلم.. وقفت تاكسي.. في نص الشارع وبعلو صوتي قتلته "نادى الجزيرة

يا أسطى من فضلك" علشان الحته كلها تسمع وتعرف ان في انسان خرج من المكان ده دخل نادى الجزيرة فيوم من الأيام.. ههههههه

- يا لهوى على احداث النعمة.
- مقدرش أقول عليه احداث نعمة.. الكلام ده لو هيتكرر بعد كده يبقى اه احداث نعمه.. انما انا دخلت النادي ده مره واحده في عمري كله.. يبقى لا حداث ولا تحديث.. ممكن تسميه فردية نعمه ماشى.. هي حادثه بتحصل لأمثالي مره واحده في العمر وشكرا على كده.
- وبعدين؟
- بقيت قاعد في النادي خايف وكاشش في نفسي- كده.. حاسس ان الناس كلها بتبصلي وعايظه تتف.. مرضيتش حتى اطلب اى حاجه اشريها.. تلاقى الشاي هنا مش اقل من 100 جنيه مثلا.. حسيت ان حد من ولاد الذوات دول هيبجى يقولي انتي ايه الى جابك هنا خسيس خرسيس.. انتي أصل يوك.. فلوس يوك.. مستقبل يوك.. انتي خومارا اشتغلى جناينى في مزارع حظرت افندينا.. امشي اطلعى برا يا كلبه.
- ايه يا أبني ده.. الكلام ده كان زمان.. انت قديم اوى.
- قديم!! هاوأوأوأ.. حضرتك نادى الجزيرة زى ماهو.. ما زال لعلية القوم.. كل الى حصل ان أيام الملك نادى الجزيرة كان للأسرة العلوية.. بعد 52 بقي للأسرة العسكرية.. بدل ما كان النبيل كمال بيبجى هنا علشان شاي الساعة 5 بصحبة النبيلة انجى.. بقي اللواء برهامي بيجى هنا مع الكبار علشان غداء وشاي وقهوة وحلويات من الساعة 3 الى الساعة 9 ويقضوا وقت لطيف يتفقوا فيه على شغل جديد.. وولاد الكلب الشعب يخدموا وبس.. هما دول الى فضلوا في النادي بدون تغيير.. النادي من جوا كان ولا نادى الجلاء للقوات المسلحة.. كل دول اسر ظباط من رتب كبيره.. باشوات زمان مماتوش.. سلموا بس الراية لباشوات جداد.. زمان كان الباشا بيلبس طربوش وبدله سموكنج.. دلوقتي الباشا بيلبس كاب وعلى كتافه سيفين.
- طيب احمد ربنا إنك قعدت مع الباشوات اهو..
- اه.. على رأيك.. صواب ايدى اليمين سلمت على كف لواء أصبح من كبار لواءات المجلس العسكري الى اكنا كلنا البالوظه في يناير.
- طيب.. حصل ايه بعد كده؟
- سيادة اللواء عجبه كلامي جدا.. انا كنت فاكرا ان التكنولوجيا نفسها او الشخصية او الاصرار هما الى عجبته.. اتاريني كنت عبيط.. الفكرة كشغل عجبته.. ملايين في الهواء محتاجة صياد.. سعادته عنده شركه شغاله في السوق في الاستيراد والتصدير – ده الى عرفته بعد كده – الراجل أحسن استقبالي وأحسن الحديث معايا.. طلبلى شاي من بتاع نادى الجزيرة.. الشاي الى بيشرجه في فناجين ده مش الشاي المعفن الى انتي بتعمليهولى في كوبايه ازاز.. علشان تعرفي بس انى تواضعت لما اتجوزتك بينما انا كنت هتجوز الاميرة فايقة اخت الملك فاروق الله يرحمها.
- والنبي تتوكس.. وهي الأميرة فائقة كانت هترضي بقفص الكيوي الى انت دخلت بيه علينا ده.
- وماله الكيوي يا بنت فواز.. اتريأى اتريأى.. الله يرحم المقلوبة بتاعة أمك الى مكانش فيها الا 2 كيلو لحمه عمى.
- اردح كمان.. يا بيته يا سوفاج.
- سوفاج وأسيوط.. تم تارارام.. تم تم.

- قادر ربنا يقلبك قرد على الألبس الرخيص ده.. المهم.. عملت ايه مع سيادة اللواء بتاع المجلس العسكري.
- تعددت الزيارات والراجل اتعرف على ابويا فعلا.. كان لازم شعر أبيض في الموضوع علشان الراجل ميستقلش بيا.. الزيارات زادت وكلام الأمهات اشتغل في الخلفية.. أمي تعرفت كويس أوى انها تعيش في دور بكيزه هانم الدرمللي.. لحد ما يوم خدت ابويا وأمي وجدي علشان نزورهم في البيت.. عنده بنت سنهها مناسب واكيد حلوه.. العالم دى بياخدوا من الدنيا كل حاجه.. رحنا زرناهم فعلا في قصرهم في المريوطية.. لقيت بعيد عنك وسط تاني تماما.. كله بيبوس في كله.. الخمر عندهم عادى كده ويحطوها على الاكل ومعاه.. يعنى بدل ما تاخد كوابية عرقسوس وللا تمر هندي مع الاكل.. ممكن تلاقي كاس نبيت فرنساوي او ريميه مارتان او كونياك اللى هو مشروب البنت المهدبة زى ما أخبرنا الأمام ستيفان روسى في رائحته "حب ودموع".. بيت الكلاب اللى في الجنية يمكن كان أكبر من شقتي اللى في العبور.. العروسة كانت من دنيا تانيه خالص غير دنيتي.. حسيت ان الموضوع مش هيمشي- الاكده.. أبويا كمان كان ده نفس احساسه.. واحنا راجعين في الطريق قالي هو هياخدك تحت جناحه تماما.. هيدريك البنت وياخد منك المشروع كله ومفيش مانع يرميلك 2 او 3 مليون تعضض فيهم.. فهمت انى مطلوب منى انى اتجوز بنته وهو يشاركني طبعاً وهشتغل باسمه.. هياكل هو التورته كلها ويرملي الفتافيت.. ويوم ما اقرر انى اخلع من بنته او من الشغل معاه لأي سبب.. يبقى إنك محبوس يا ولدى.. وزى ما دخلتها ملط.. هخرج منها اكثر ملطنه.
- ليه التشاؤم ده.. ما يمكن كانت الأمور تمشي..
- الأمور عمرها ما كانت هتمشي.. انا راجل فلاح.. النسوان في عرفنا محدش يلمس اجسامها الا اجوازاها.. ممكن اسمح لحمايا ييبوس مراتي باعتبار انها بنته وكده.. انما ممكن دمي يتغير لو اخوها باسها رغم انه مش عيب ولا حرام.. كرامتي مقبلتش انى اتجوز واحده شبه عارية من فوق ومن تحت علشان ابوها هيقفني على رجلي.. وطبيعي بعد كده انى ابقي مكسور قدامه وقدامها.. ابويا مريانيش على أنى أبقي مكسور جوا بيتي ومشفتوش مكسور في بيته علشان أوافق على كده.. مش أنا اللى واحد يقولي ما شاء الله مراتك جسمها حلو اوى بعد ما خست.. مش أنا اللى آخذ حاجه من مراتي.. اديها اه.. هي تبعزق فلوسي وتعيش بحسى ونفسي في الدنيا ماشى.. تتدلع وتتبعدد وتحرق في شقي عمري هي وعيالها مبيضرش.. دى اسمها القوامة.. انما انا ماخدش منها اكثر من اللى يستاهل ضرب النار في الصباحية.. بعد كده لا.. حد الله.
- يعنى اطمئن على صيغتي يا أبو حميد.
- اطمئني.. مش انا ابدأ اللى اقولك ببقي الكردان اللى في صدرك يا رشا.
- يعنى الجواز اتفشكت يا وائل..
- والنبي ده سؤال؟؟ حضرتك ماهو لو مكانتش اتفشكت كان زمانى بقيت ملتي مليونير ومكانش ربنا انعم عليكي بجوازك منى.. اتفشكت ومعاه المشروع طبعاً.. لواء اخر طلع وساده خاليه.. يبدو ان الناس دى كلها كده.. مش هتبقى وسادة مليانه الا لناس معينه في مواقف معينه بمقابل معين.. اليوم ده كان يوم تاريخي ممكن ابقي أحكيك عنه بعدين.. الوحيد اللى طلع كسبان من كل الليلة دى هو جدي.. الراجل جاله صرع من كثر النسوان الملط اللى شافها.. نزل معاهم في المعركة دى وفضل ييبوس في كل الستات.. كبار وصغيرين ومحجبات وسافرات.. الراجل معتقش حد.. طب وربنا كنت خايف عليه يجراه حاجه.. الراجل مراته ميتة من فتره واكيد حاسس بالحرمان.. حتى انى ضحكت معاه وقتله اروح احجزلك اوضة في فندق جميننا هنا تشقظ فيها المزى دى.. قاللى بوس يا ابني ولا يهكم.. ده احنا جايبين علبة شوكلاتة بالشيء الفلاني.. طالما مفيش أكل ولا جواز.. يبقى ناخذ حقنا بوس.
- يا لهوى على ده راجل.. وباباك عمل ايه طبيب؟
- ماما كانت قاعده زى الصقر.. متهيألى لو كان سلم بس على حد كانت رفعت عليه قضية خلع.
- وبعدين؟

- الظريف بقي ان قبل الجوازة ما تتفشكل.. كانت الاقدار شايلالى فصل جديد من فصول المأساة دى عن طريق سيادة اللواء ده برضه.
- ايه تانى.. أتحنفي
- بالمناسبة صحيح.. تعرفي رتب الجيش.. الرتب العسكرية؟
- اه.. الى حد ما.. في أمين شرطه وملازم ونقيب ورائد وعقيد وعميد ولواء.
- أمين شرطه ايه يا وليه.. بقولك الجيش.. الجيبييش.
- ايوه صح.. يبقى نشيل أمين الشرطة.
- طيب حضرتك كده سقطتي رتبة كاملة.. المقدم.. نقتله وللا ايه رأيك؟
- اه اه.. في مقدم.. ده الى هو اعلى من العقيد.. صح؟
- لا يا عسل... المقدم رتبه رمزها نسر ودبوره.. بعد الرائد وقبل العقيد علطول.
- اممم.. ده ايه علاقته بالموضوع؟
- تعرفي بعد اللواء في الجيش في ايه؟
- وزير الحربية؟
- وزير مين يا ولية!! اسمها وزير الدفاع.. وزير الحربية ده كان عرايى الله يرحمه.. عموما.. بعد اللواء في رتبه شرفيه اسمها فريق.. طيب بعد الفريق؟
- فريق اول
- الله.. ما انتى عارفه اهو
- لا.. بس خدت بالى لما انت قلت.. انت ناسي الفريق اول عبد الفتاح السيسي وزير دفاع الثورة.
- اه.. شفته.. ماهو ده كان من ضمن المجلس برضه.
- بس ده حاجه تانيه.. بيقلوا بتاع ربنا ومحترم ويصلى.. مشفتش علامة الصلاة في وشه اد ايه؟
- شوفي.. الدنيا علمتني ان الرتب الكبيرة دى في الغالب بنسبة 99.9999% بيبقوا أولاد حرام.. قله قليله اوى منهم الى بتبقي أولاد كلب علشان منعمش بس.. ربنا يستر.. المهم.. في ايه بعد رتبة الفريق اول؟
- مش عارفه.. هو في حاجه اكبر من الفريق اول؟
- اه.. في رتبه شرفيه في كل النظم العسكرية في العالم.. اسمها بره فيلد مارشال.. عندنا اسمها المشير.. دى رتبه مش بياخدها الا شخص انتصر في حرب كبيره او أضاف الى علوم العسكرية شيء جديد.. زى الفيلد مارشال مونتهجومي والفيلد مارشال روميل.. زى المشير أبو غزاله والمشير الجمسي والمشير احمد إسماعيل.
- والمارشال برعي بتاع شمس الزناتي برضه.

- اه.. ماهو ده أضاف للعسكرية خطة الاستيلاء على ال 3 غنمات بتوع الشيخ عثمان.
- طب والمشير عبد الحكيم عامر.. أضاف ايه للعسكرية ولا مؤاخذه.
- المشير عامر اتجوز ست الستات برلنتي عبد الحميد وتوبها.. برلنتي.. يعنى نسمع احلى سلام لمزز الأبيض والأسود.. هياتم العصر الماضي.. يعنى الدلع كله والفرفشة كلها ونظرة العين الى تندب فيها دانة مدفع.. فكرك انتى مزه بالقوة والصاروخية والجبروت ده كله.. الراجل الى يقدر يهد حيلها ويقعدها في البيت.. ميسـتاهـلش يـبقي مشير؟ طب والنعمة انا بتخيل الراجل ده وهو معاها في البيت لوحدهم.. بـبقي عاوز اجـمعهـلـه تبرعات.
- افحمتني يا أخي.. برضه ايه علاقة الكلام ده بالموضوع.. عملت ايه في المشروع يا عم؟
- احنا قلنا اخر رتبه كانت ايه؟
- المشير
- طيب
- طيب ايه؟
- المشير يا ست
- ماله
- كويس.. ابقى اشربي من عنده عصير قصب.
- انا غلطانه انى قاعده اسمك.. انا هقوم ارضع أبني افيد

الكبير أوى

- احمد
- نعم
- مش هتكمل الحكاية؟
- تدفعي كام؟
- عشرين دولار كلهم ورق خمسينات
- لا.. انا عايزهم فضه.. صرة من الدنانير.. بواهاهاهاهاهاها
- اذن هلم.. استمر في الحكاية يا حزقيل.
- ماشي.. قتللك انا بقي ان قبل ما جوازتي من بنت سيادة اللواء تتفشلك كان في تكة كده..
- اه
- دى تقدري تسميها الامل الأخير.. او النزاع الأخير.. او القشة التي قصمت ظهر البعير.. والبعير هو انا.. ورب العزة ما كنت معترض على اني ابقي بغير.. كنت مستعد أكون بغير واقل أنواع البعير كمان بس يسيبوني اشتغل.. كنت مستعد ابيع عمري بس يدوني الترخيص.. على رأى الشاعر الى قال:
- ابيع نفسى لأول مشتر آت..
- ابيع مضطرا حبيباتي وكلماتي..
- شاعر مين يا راجل.. مش دى قصيدة الحلزونة يامه الحلزونة
- اه هي.. ما هو ده الشاعر ضياء الميرغني من ديوان مرجان احمد مرجان.. ههههههه
- طيب.. ايه اللي حصل؟؟
- سيادة اللواء فهم الفولة كلها.. عمل كبشة اتصالات وجاب المستخبي كله.. عرفت أخيرا الموضوع واقف ليه.. بعد سنتين ونص شقى ولف وبهدله و رشاوى وفلوس اندفعت فوق وتحت وجنب الترايزه.. بعد الذل والمرمطة وبوس الأيادي وتسلم الأيادي وكل زبادي.. بعد كم مهول من الإحباط والامل والإحباط والامل تانى.. قدرت أخيرا اعرف مشروعي واقف فين وعند مين وليه.
- ايه بقي؟
- الفكرة كانت مرفوضه امنياً.
- امنيا ازاى يعنى.. امن الدولة؟
- لا.. امن الوطن.

- اللى هو ازاي؟
- امن الدولة ده جهاز وظيفته حماية الرئيس واغتصاب المواطنين.. انما امن الوطن كله دى وظيفة المخابرات العامة المصرية.
- استني بقي.. ثواني كده.. موسيقي رافت الهجان هتساعدك وتفك اعصابك وانت بتحكي.. يالا قول يا ليفي.
- متقوليش يا ليفي.. انا اسمى حسنى على سليمان الهجان
- انت شكلك شعشعت اوى يا ابو حميد.. مخابرات مين يا عم الله لا يسيئك.. ده احنا ماشيين بعلاج.
- ايه ده يا وليه.. انتى بتتريأى عليا؟
- طبعا بتريأى.. ده انا مش بس هتريأى.. ده انا هبعت اجيب امي من مصر—تتريأى معايا.. يبدو كده ان نبيل فاروق اثر على عقلك فعلا.. مخابرات مين يا ابو مخابرات.. وهي المخابرات مالها ومال ولا مؤاخذه يعنى واحد زيك.. انت ناقص تقولي ان جالك واحد قالك احنا منظمه تدعو للسلام وعاوزينك تدينا معلومات عن أسعار الزيت والسكر.. وللا تقولي انهم قبضوا عليك وكلمة السر كانت خالي بيسلم عليك وهي دى مصر يا عبلة.
- اسمها خالتي بتسلم عليك على فكره.
- لا خالي.. ماهو خالتي ده كان بتاع المناضلة نادية الجندي
- والنبي يا بنتي انا ولا افهم كل ده ولا اعرفه.. كل اللى اعرفه اللى قاله سيادة اللواء.. قاللى بالنص كده.. التكنولوجيا دى لسه متوافقه عليها.. المشروع بتاعك وال "Online GPS" وحاجات تانيه كمان.. مرفوضين منها لانهم لسه مش مستعدين ليها.. ال يعنى لما يستعدوا.. هيفرق.. اهو.. اى حاجه والسلام.
- وبعدين طيب.. قولي بقي ان انت قابلت عمر سليمان.. ماهو ده اللى ناقص
- والله مش هخبي عليكى.. طلبت كده فعلا من سيادة اللواء وسعيت فعلا في الحكاية دى.. لكن الابتسامه الساخرة جدا على شفايه كانت أبلغ رد.. اجري العب بعيد يا شاطر.. انت تقابل وزير اه.. ريس البتاعة دى اللى اسمها الحكومة ماشي.. انما القيادات الحقيقية.. يبقي اخرس.. قطع لسانك.
- عندهم حق.. بقي عمر سليمان.. هيقابلك انت!!
- بصي.. انا فعلا اقتنعت تماما ان البلد دى محكومة من العسكر بعد الأيام دى.. لما حبيت اقبال وزير.. قدرت.. رئيس الوزراء.. قدرت.. حتى قصر—الرئاسة نفسه.. دخلته.. انما لحد عمر سليمان.. انسى.. ملقيتش اى سكه توصلني ليه اطلاقا.. حتى الفريق أبو صاحبي ده.. قاللى مقدرش اعملك حاجه فيها دى يا أبو حميد.. حسيت لو هله ان عمر سليمان ده ماهو الا شخصيه وهميه ملهاش وجود.. محدش يعرف عنه حاجه.. الرجل الغامض.. الزعيم رقم صفر.. العقرب السام فعلا.. محدش يعرف موجود فين ولا ساكن فين.. محدش يعرف مكتبه فين ولا بيركب انه عريبه.. شخص زبقي تماما.. كائن وهمي هلامي تماما.. فشلت تماما اني الاقي اى سكه توصلني ليه.. فرجعت تاني لسيادة اللواء خالي الوفاض.. راسي في الأرض وطالب النصيحة والمشورة..
- ولقيت عنده حل؟

- لا طبعا.. انما قالى هنعمل محاوله كده.. قابلني يوم الجمعة بعد الصلاة في مساكن الضباط اللى في شارع جسر- السويس.. أوصل هناك عند البوابة وكلمني.. هبعثلك عربيه تاخذك.. مكانش في ايدى حاجه تانيه اعملها ولا عندي اى اختيارات.. وافقت طبعا

- ورحت؟

- اى نعم

- كان في ايه هناك؟

- مانا جايلك في الكلام اهو.. لما وصلت مساكن الضباط.. لقيت اسمى على البوابة.. بعثلي فعلا عربيه تاخذني.. مشيت بينا جوا الكومباوند لحد اخره.. الحراسات بتزيد.. طريق فردى كده في اخره فيلا عاديه خالص.. لقيت سيادة اللواء في استقبال في الجنينة.. وكان يوم فارق في تاريخ حياتي

- حصل ايه؟

- حصل الحوار الاتي:

.....

- احمد.. انت هتقابل المشير دلوقتى.. قوله على اللى عندك باختصار وانا هتابع الموضوع معاه.

- مشير مين!!

- هو البلد فيها كام مشير؟ المشير طنطاوي طبعا

- وزير الدفاع؟

- ايوه هو.. في حد ميعرفش المشير طنطاوي

- لا يا فتندم اعرفه طبعا.. معلش اصل المفاجأة شديده عليا شويه... حاضر حاضر.. أوامر حضرتك.

.....

- وقابلت المشير؟

- اه.. قابلت المشير..

- شكله عامل ازاي بقي.. زى ما بيطلع في التلفزيون كده؟

- شكله اخضر.. وبأستك من فوق.. جرى ايه يا ميساء.. بنى ادم عادى زى اى بنى ادم.. شيخ طاعن في السن اكل منه الزمان وشرب.. مشير مين والنبي.. ده الراجل مش قادر يصلب طول.. الزمن جبار برضه.. بقي ده يا ناس يبقي وزير الدفاع.. ليه.. مصر خلص منها العساكر..

- يا أبني ماهو الوزير بدماغه مش بصحته..

- حضرتك الجسم المتهالك الى انا شفته ده لا يمكن تكون دماغه سليمه ابدأ.. انتى نسيتى وللا ايه.. العقل السليم في الجسم السليم.. اقتباس من ابله عواطف.. الاذاعة المدرسية في الابتدائي.
- طيب.. حصل ايه عند المشير؟
- ولا حاجه.. شرحت للراجل الى عندي.. ده بقي الوحيد الى كان مختلف عن الكل.. فعلا.. رجل عسكري بحق وحقيق.
- ليه.. عمل ايه؟
- كلهم أكلوني الاونطا واه هنعمل واه هنسوى ومتقلقش.. ده الوحيد الى قالي لا مينفعش في وشى كده علطول.. تقريبا كده طردني بالذوق.
- تفاصيل يا عم.. تفاصيل الله يباركك.
- عينه كانت زى الصقر.. مشالش عينه من عيني ابدأ زى ما يكون بيحاول يخترقني.. بعد ما خلصت كلاي قالي هو مش الموضوع ده اترفض امنيا؟
- ايوه يا فندم.. حضرتك عرفنا ان المخابرات حطت ختم احمر على الورق.
- طيب.. عاوزنى اعملك ايه؟ شغلهم وهما ادرى بيه.
- العشم بعد ربنا كبير في حضرتك.. مهندسين وزارة الاتصالات طلعا تقريرهم ان التكنولوجيا امنه تماما.. كمان مش مقفولة ولا حاجه.. يعنى مفيش فيها اى سرية.. الفكرة هنا ان في خلط ما بين التكنولوجيا بتاعتي وال "GPS" .. هي اتحطت في نفس الكفة مع ال "GPS" .. وده مش صح.. ال GPS اه ممكن يكون في خطورة علشان تحديد المواقع.. انما ال "RFID" لا.. مفيهوش كده خالص.. القرار الفني هنا المفروض يكون لوزارة الاتصالات مش لأى جهة تانيه انا خضعت للجنة تقييم وفحص حضرتك وقالوا ان الموضوع مفيهوش اى مشكله.
- طيب.. انا هشوف الموضوع ده واببلغ اللواء "... بس حط في بالك.. المخابرات عارفين شغلهم كويس اوى.. مش انت الى هتقول المفروض ومش المفروض.
- طبعاً يا فندم طبعاً.. انا بس بعرض رأى فني مش أكثر.. اسف لو كلاي وصل بطريقة تانيه.. بالمناسبة.. لو المخابرات حبت اني اخضع لفحص تاني بوساطة خبراءهم.. الى هما بالقطع اشطر من خبراء وزارة الاتصالات.. انا تحت الامر في اى وقت.
- طيب ماشى.. اشرب الشاي بتاعك.
- تسمحلى احتفظ بالفنجان ده يا فندم؟
- ليه؟
- هو حضرتك انا كل يوم هقابل شخصيه زى حضرتك!! العمر كله ممكن يخلص من غير ما اشوف عميد شرطه.. حضرتك انا قاعد في حضرة العميد محمد حسين طنطاوي بطل حرب أكتوبر.. لو مفيهاش إساءة ادب منى كنت طلبت أتصور مع حضرتك علشان أبني فيوم يعرف ان ابوه سلم على وزير الدفاع.. اليوم ده فارق في حياتي جدا.. اشكر لحضرتك جدا سعة صدرك وموافقة حضرتك على سماعي.. لا اخفى على حضرتك اني في الأول كنت هايب الموقف وخايف ومش مصدق.. لكن بساطة حضرتك تقول ان ورا الوجه العسكري الصلب في قلب اب سمعي

وعاوز يساعدي بدون خرق لأي قانون.. ان شاء الله يكون الخير على ايدين حضرتك.. في الأول والاخر انا عاوز اشتغل في مصر.. عاوز ارد الجميل للبلد يا فندم.. والله انا اقدر اعمل حاجات كتير اوى.. حضرتك ثق تماما اني لا يمكن أكون مصدر خطر ولا خذلان لأي شخص اداني من وقته دقيقه واحده او وقف جمبي ووثق فيا بأى شكل من الاشكال يوما ما.

- شكرا.. انت بتعرف تتكلم يا ولد.. انت المفروض تكون صحفي مش مهندس ها ها ها.
- تحت امر حضرتك لو حبيت.. لو حبيت اقلب صحفي.. بكره اقدم ورق في الاهرام وابقى احسن من الزميل أنيس منصور.
- بالتوفيق دايما..
- يوم حضرتك سعيد ان شاء الله.. تسمحلى استاذن.. انا خدت من وقت حضرتك اكثر من اللازم.
- مش تستني تتغدى مع الأولاد.
- اشكرك من كل قلبي يا فندم.. لا يصح انى ازعج حضرتك في يوم الأسرة.. سلام عليكم.

.....

- ايه كل كمية حضرتك دى؟ انت كان ناقص تبوس رجله.
- والله كنت مستعد.. وكنت مستعد لما هو أكثر من كده كمان.. لو كان طلب ايه.. كنت هوافق.
- ها.. وبعدين؟
- الكلام ده كان يوم الجمعة 22 فبراير 2008.. كانت سنه كبيسه كئيبة.. فاكه زى مانا فاكرك كده.. خرجت من عند المشير وانا قلقان.. الراجل قالي بصريح الكلام لا.. لا يعنى لا.. كل الأونطجية الى قابلتهم قبل كده قالولى اه وهنعمل ونسوى.. الا ده.. ده قفلها في وشى مباشرة بالضبة والمفتاح من الأول كده.. وبعدين انا مين يعنى علشان يكلف خاطره ويبيع للمخابرات علشانى؟ بالكثير اوى اللواء الى ودانى هيتكلم مع المخابرات ويطلب إعادة فحص.. ماهو عايز ينط في الحلل بقي.. ويطلع التقرير انه برضه لا.. بابا كان متفق معايا ان الموضوع مش ماشى.. بدأ يدعيلى كتير اوى.. قعد معايا مره وقالى انا لو مت النهارده.. اعرف انى هكون فخور بيك اوى.. لحد كده يا أبني وده اخرنا.. عملنا كل حاجه.. كده اقدر اقولك بقلب جامد ان ربنا مش رايد الموضوع ده.. توكل على الله وشوف مستقبلك في شركتك.. ركز في شغلك وربنا يوفقك.. مين عارف بكره في ايه.
- وبعدين؟
- بس بقي.. فضلت 3 شهور اجرى ورا سيادة اللواء لحد ما يوم تقريبا زعقلنى في التليفون وقالى خلاص يا احمد.. الموضوع مقفول ومنتهى.. شوف حاجه تانيه اعملها.. مش هقدر اعمل حاجه أكثر من كده.. وقفل الخط فوشى.
- معاه حق.
- كلهم معاهم حق طبعاً.. انا الى غلطان.. انا ايه الى خلاني افكر في كل ده؟ انا كنت ركزت في شغلي.. خسيت شويه وقضيت حياتي مع المزز.. راجل بسافر كل أسبوع بلد شكل.. تكنولوجيا ايه وزفت ايه.. هي دى بلد لها في التكنولوجيا؟

- وبعدين طيب؟
- اخر مكالمه كانت مع سيادة اللواء كانت في مايو 2008.. ادركت تماما ان الموضوع فاشل.. رفعت الراية البيضاء تماما.. اتصلت بأشرف ومحمود حكيتلهم على كل ده.. واسوني كأفضل ما يكون من صديق.. في الآخر فضلت لوحدي مع همى الكبير.. حسيت انى محتاج اقعد لوحدي.. خدت بعضي وطلعت على اسوان.. أبو سمبل تحديدًا.. عندي جماعه معارف هناك قعدت عندهم.. كنت حابب اقعد لوحدي ومش عاوز اكلم حد.. مجبتش سيره لحد الا بابا بس.. قفلت تليفوني واختفيت تماما لمدة 10 أيام.. مديري في الشغل كان هيتجنن لحد ما كلم بابا.. الراجل مشكورا حط اسمى على مشروع في تنزانيا علشان محدش ياخذ باله من غياي.. كلمته وعرف منى الموقف كله.. قدر حالي جدا.. قتلته انا مش عاوز اشتغل في مصر يا إيها.. انا بجد محتاج ابعد عن البلد دى تماما.. نصحني بالسفر وقالى انت لازم تغير كل الجو ده.. لو حابب تاخذ اجازة مفتوحه براحتك ولو حابب تسافر تشتغل بره في شركه من بتوعنا برضه براحتك.. كتر الف خير.. كانت شركه وناس محترمين جدا.. حسيت بالأمان في أبو سمبل.. حسيت ان دول أهلي الحقيقيين.. حسيت هناك انى انسان له أصل وفصل وجدود مش مجرد عيل لقيط.. شيء غريب بحسه دايمًا في الأماكن القديمة.. أوقات كتير اوى بحس ان مكاني مش في العصر ده.. مش عارف ليه في أبو سمبل حسيت انى انتمى للمكان ده.. رغم انى هناك كنت ماسك قهوة بتاعة واحده صاحبي.. شوفي الفرق.. من مهندس بيجري ورا ملايين الى قهوجي.. لكن من السلام النفسي والأمان الى حسيت بيهم هناك مكانش لهم مثيل.
- قهوجي!!
- اه.. قلت أسلي وقتي.
- بس انت سافرت السعودية في التوقيت ده.. صح؟
- اه.. سافرت على البلد الى كان عايش فيها حاتم الطائي.. حائل.. في شمال المملكة.
- الله.. انت مش رحت الرياض؟
- لا.. ماهو الرياض دى ثاني مره.. اول مره رحت على حائل.. وكأن الخوازيق الى فاتت مكنتش كفايه.. فكانت الأيام مخبيالي زغروف كده على الماشي.
- ليه؟
- هقولك.

طعنة في القلب

- أحمد.. عندي سؤال قبل ما تكمل الحدوتة الكئيبة دى.
- خيرا؟
- انت دايما بتتكلّم عن الفترة من 20 الى 30 في حياتك على انها اجمل سنين عمرك.. بس من اللى انت بتحكيه ده.. انا شايفها مأساة مش حاجه حلوه خالص.. ازاي بقى كده وكده؟
- لما بتقفى في المطبخ تعملي الأكل.. مش بتبقى سعيدة؟
- والله على حسب.. لو فيها خاتم ذهب مثلا.. اكيد هبقى سعيدة
- لا فعلا بتكلم جد
- لو هنتكلم جد من غير ألس.. اه طبعاً.. ببقى مبسوطه جدا
- رغم ان في اغلب الأحوال.. اللى بيطبخ بعد ما بيخلص طبخ بتبقى نفسة اتسدت عن الأكل
- حقيقه برضه
- هو الدنيا كده.. السعادة دايما في الرحلة مش في هدف الوصول.. السعادة في انتظار الإجازة مش في الإجازة نفسها.. السعادة في الصيد مش في الشوي ولا القلي ولا السنجاري.. السعادة بتكتشفها بعد ما العمر يعدى منك والأيام تتسرب من بين صوابك.. بعد الموضوع ده ب 10 سنين اهو انا اكتشفت ان فعلا دى كانت أجمل أيام عمري.. المشاعر كانت خضراء بريئة.. كنت بتفاجئ وبندهش.. كنت مستمتع جدا بارتكاب الأخطاء عن جهل.. كل يوم بتعلم درس جديد واكتشف انى كنت حمار في اليوم اللى قبله.. متعة استكشاف الحياة لا تضاهيها أي متعة في الدنيا.. مع الوقت لما الانسان بيكبر بيحس بالملل.. بيتضخم جواه شعور عام بالزهق من كل شيء وأي شيء لأن مفيش جديد ولا تجديد.. معادش في حاجة قادره انها تدهشني.. أيام الكلية مثلا تلاقي الشباب بيطلعوا رحلات مرهقه جدا.. كلهم مفلسين تقريبا.. مكان المبيت زى الزفت والاكل اى كلام واخر بهدله.. ويرجعوا في منتهى السعادة وصوت ضحكهم يزعج الملائكة في السماء.. بعد كده لكا يكبروا والعمر يعدى بيهم ممكن كل واحد فيهم يروح يقضى- اجازه في اوتيل 5 نجوم ويصرف اضعاف الى كان بيصرفه هو وزمائله في الكلية.. ويرجع مش مبسوط.. اختصارا كده.. تقدرى تقولي انها روح الشباب.
- بقيت فيلسوف يا أبا حمزه.
- الا ليت الشباب يعود يوما.. فأخبره بما فعل المشيب.
- طيب حضرتك بدل ما انت عاوز تخبر الشباب بما فعل المشيب اللى هو أساسا لسه مجاش.. يا ريت تخبرني انا الأول ايه اللى حصل بعد ما عرفت ان المشير مش هيقدر يساعدك.
- اه.. عملت خطأ آخر من أكبر أخطاء العمر.
- الا وهو؟
- سافرت.
- وايه الغلط في كده.. ما انت فعلا مسافر اهو دلوقتى.

- انا مش ضد السفر نفسه.. انما السفيرة الى سافرتها دى كانت هي فعلا أكبر أخطاء العمر
- ليه؟
- كنت في حالة نفسية سيئة بعد تأكدي التام من موت المشروع للأبد.. مكنتش مؤهل انى اخذ قرار خطير زى ده.. سعيت للسفر بجنون بعد ما كنت برفض كل يوم عرض واتنين.. عرضت نفسى- رخيص بعد ما كنت غالى جدا.. رخصت نفسى فكان طبيعي ان الشاري ميدفعش حاجه.
- ازاي.. المرتب مكانش كويس؟
- المرتب كان سيء.. التأشيرة كانت سيئة.. مكان الشغل كان سيء.. وفوق من كده كله.. البلد نفسها كانت غلط
- ازاي يعني؟
- قبلت شغلانة في مصنع فراخ ومنتجات زراعية.. التأشيرات المتوفرة عندهم كانت تأشيرات عماله دنيا.. علشان تشتغلي في الخليج لازم يكون معاك تأشيرة عمل بمهنة معينة.. قانونا لازم تكون المهنة في التأشيرة مطابقة للمؤهل بتاعك.. لكن بيحصل ان شركه مثلا عاوزه مهندسين ومهندهاش تأشيرات الا لسباكين.. فيجبوا ناس من بلادهم بتأشيرة سباكين وهما هيشغلوا مهندسين.. تحايل يعنى.. في نظر القانون هو سباك.. لكن في الواقع هو مش كده.. انا اضطررت انى اغير المهنة في البطاقة بتاعتي الى عامل زراعي بدل ما كانت مهندس.. وطبيعي ان الراتب كان يتناسب مع مهنة العامل الزراعي.. وطبيعي ان الشركة عاملتني على انى عامل مش مهندس بالرغم من انى بشتغل مهندس بالفعل.. الكفيل دايم كده.. معندوش رحمه ولا يعرف اى ادميه من اى نوع.. طالما سافرت عنده بلده.. بقيت ملكه تماما.. سافرت وفوجئت انى هعيش في بلد شديد الكآبة.. اكبر نشاط فيها هو ان الواحد يروح ياكل نص فرخه في مطعم وحيد في البلد دى.. بدو تماما كمعيشه واخلاقيات وسلوكيات.. معنديش اعتراض طبعا على البدو وحياتهم.. انما دي مش حياتي.. انا كنت شخص اجتماعي جدا متعدد ومتشعب العلاقات في مصر.. بأي منطق اروح ارمى نفسى- في الصحراء وحيد زى الكلب الاجرب.. عايش في سكن مشترك مع هندي وفلبيني يختلفوا عنى تماما في حياتهم وعاداتهم الصحية والغذائية.. اكتشفت بعد أسبوع واحد من الشغل انى ممكن اموت في البلد دى من الكآبة او الحزن.. خصوصا ان ابويا كان في مرض الموت.. وحالتي النفسية لا تسمح أبدا بالعزلة دى.
- طيب بسيطة.. استقيل وامشي
- ده الى حاولت اعمله.. لكن الكفيل رفض استقالي.. من حقه طبعا لأنه اتكلف فلوس علشان يجيبني من بلدى لبلده.. يبقى على الأقل اخدم مدة العقد الى اتفقنا عليه.. انا طبعا قررت انه مستحيل أعيش في البلد دى كمان شهر واحد مش سنه كامله زى ما العقد بيقول.
- وعملت ايه؟
- باسبورى معاه.. فكرت اقدر اعمل ايه؟
- ولا حاجه.. دى ازمه فعلا.
- اكتشفت انى مش هقدر اسافر الا لو هو قرر انى سافر.. حتى لو اشتكيت للشرطة.. انا اجنبي مليش ثمن هنا.. حتى لو معايا الحق.. عمرهم ابدا ما ينصروني على ابن البلد ولو معايا جيش من الملائكة بيأيد كلامي وموقفي.
- ده ايه الحوسه دى.. هو انت كنت ناقص يا ابني!

- فعلا والله.. في الفترة دى كنت بحط راسي على المخدة واسرح في ذكريات كلها اليمة.. كنت بكلم ابويا كل يوم بالساعة والساعتين.. دموع أمى كانت بتنزل عليا زى مية النار.. صوت ابويا المكسور بفعل المرض والفشل الى عشناه كان بالنسبالي اقسى- من 10 سنين في المعتقل.. بعد أسبوعين بالظبط من الشغل هناك قررت انى مش هكمل واللى يحصل يحصل.
- عملت ايه؟
- خرجت للشارع اتحرش بالستات.
- نعم!!!
- مكانش قصادي الا كده.. اعمل جريمة أخلاقية يرحلونى بيها من البلد دى غصب عن عين كفيلى.. ومفيش في السعودية العن من الجرائم دى.. اى حاجه تتعلق بالستات.. مصيبه علطول.. ممكن يتحرك فيها وزير الداخلية نفسه.
- وعاكست الستات؟
- طبعاً.. ده انا قلبتها درمغه.. ومخدتش وقت كبير.. مفيش ساعتين والشرطة كانت قابضة عليا.. كان بينى وبين النفخ تكة صغيره أوى.. لولا ان الظابط الموجود في القسم وقتها حس انى مش عامل زراعي ولا حاجه.
- وبعدين؟
- حكيتله القصة كلها.. انا عاوز امشى- وكفيلى مش راضي.. مستعد أعوضه عن الخسائر المادية بس يديني جواز سفري ويسيني امشى.
- هو الظابط له سلطة عليهم؟ يعنى مثلاً ممكن بأمر القانون يسفرك؟
- المفروض لأ.. بأمر القانون المفروض يحبسني.. بس في بلد صغيرة زى دى.. قعدات العرب الودية تحل كل المواضيع.. الظابط قدر يقنع كفيلى انى اسافر في مقابل 5000 ريال تعويض.. كمان كفيلى موقفه قانونا مكانش قوى.. يكفي انه تحايل على القانون في التأشيرة بتاعتي.. الظابط لمح بكده في وسط الكلام علشان يجبره انه يسفري.
- وانت كان معاك فلوس وقتها؟
- لا.. ما انا اشتغلت بيهم.
- يا ستار يارب.. ايه الناس دى
- بصي... مقدرش أقول ان هو غلطان.. العقد شريعة المتعاقدين.. هو غلطان لما اصطادني في الأول.. عملي البحر طحينه عن البلد ومستقبلي الزاهر فيها وانى اقدر ابني مستقبل صح واعمل كل الى نفسي.. فيه هناك.. لما سافرت لقيت الكلام ده كذب.. علشان كده اديت لنفسى الحق انى افصل العقد بيني وبينه ووظظ في اى حاجه تانيه.
- ورجعت على مصر؟
- طبعاً.. لا تتخيلي فرحة بابا وماما بيا كانت اد ايه لما رجعت.. رغم انى سافرت تانى بعدها بشهور قليله جداً.. لكن شتان الفرق بقى.

- محاولتش تشتغل تاني في المشروع بتاعك لما رجعت؟
- لا خالص.. ولحد يومنا هذا.. محاولتش تاني اطلاقا.. كنت مليون وقتها كراهية وغضب على النظام يكفوا لحرق الكوكب ده 3 مرات.. رجعت شغلي تاني في اوراسكوم بهدوء تام.. مشيت جمب الحيط تماما.. فحالي وفشغلي بس.
- مفكرتش تتجوز طيب؟
- محاولتش لأنني مكنتش مؤهل نفسيا.. الفترة دى حتى بعدت عن اصحابي كمان.. كنت عامل زى المغتصبة اللي خايفة من كل الدنيا ومنعزلة لوحدها في اوضتها وبس.. كنت باكل زى الثور.. الإحساس النفسي.. بالهزيمة والفشل كنت بحاول اعوضه بالأكل.. وزنى زاد اوى بصورة ملحوظه.. دقنى مش محلوقه وبستحمى مره كل أسبوع وساعات كل أسبوعين.. نظرات زايغه باستمرار.. فقدان تركيز في كل شيء.. عصبية شديدة جدا في التعامل مع الناس.. عدوانية غير طبيعية مع كل البشر.. في الفترة دى كان طبيعي جدا انى اروح قسم الشرطة مره او مرتين في الشهر علشان عامل مصيبه.. مره ضارب حد.. مره مكسر عربية حد.. وكل مره بدفع قرشين لأمين شرطه مشهور عندنا في حدائق القبه واخرج صاغ سليم.
- ياه يا احمد.. حياة صعبه اوى
- كنت اقرب للميت الحي.. حسيت ان مستقبلي اتدمر وانتهى.. مكانش ليا أصحاب غير الكلب بتاعى.. عشت على كده 6 شهور كامله لحد ما سافرت للسعودية تاني.
- سبحان الله.. نفس البلد!!
- اه.. بس المره دى كانت السفرية مختلفة.. بابا قرأ معايا شروط العقد وشجعتني.. المره اللي فاتت كان محصور اوى وهو بيقولي سافر لو تحب.. المره دى قاللى انا اشجعتك بقوه على السفر.. سافر.. يمكن تقدر هناك تعمل الى مقدرتش تعمله هنا.. يمكن تقدر فعلا تكون سند لأخواتك من بعدى.
- كلمات صعبه جدا
- وانا صغير حد مره قالى ان الانسان بيحس دايميا بدنو الاجل.. مش عارف الكلام ده صح وللا لأ.. بس بابا الله يرحمه قبل موته بشهور كان كلامه كله عن الآخرة والموت.. لأول مره في حياته يطلعني على كل أموره المالية واوراقه.. أول مره يوصيني على اخواتي وماما.. اول مره يفهمني انه لما كان بيقسى.. عليا وانا صغير.. فده كله كان لمصلحتي.. كل ده بيعمله وهو حاسس انه خلاص رايح.. وانا مش فاهم.. انا قلت يمكن علشان انا مسافر وكده.. واهو كل أب بيوصي ابنه دايميا.
- وسافرت؟
- اه.. صحابي الى كنت شغال معاهم في اوراسكوم استقال منهم 6 وسافروا السعودية سوا.. اشتغلوا بمرتبات كبيره اوى في شركه لسه بتفتح جديد.. كلموني لما عرفوا انى في مصر— وقالولي تعالى يا حسنى.. مكانك فاضي واحنا عاوزينك.. طيب.. ابعتولى تأشيرته يا جماعه وانا جاى.. انا مش هقععد في البلد دى تاني.. كفايه عليها اوى كده.. وبدأت رحلة الغربة ومعاناة من نوع آخر.
- واتجوزت في الفترة دى.

- نزلت من السعودية زى المجنون.. دخلت عليه أوضته لقيته نظيف جدا رغم انه مكانش لسه اتغسل.. نايم في هدوء زى ما كان بينام طول عمره.. وشه مفروود وناعم.. راسه بس ملفوفه بمنديل أبيض علشان البق يفضل مقفول.. خلاص.. الروح الى كانت بتدي الانسان الإرادة انه يفتح ويقفل بقه خرجت وراحت عند الى خلقها.. خرجت وسابت الجسد الى هلك من المرض والعقل الى كان مليان علم وحكمه وايمان.. خرجت الروح الى

شقيت وعاشت سنين طويله محرومه من كل حاجه حلوه علشان ارواحنا احنا تعيش في بغداده.. لأول مره من 33 سنه أقوله يا بابا.. وهو ميردش عليا.

- كنت سامعه صوتك وانت بتقرأ سورة يس جمبه.. بس طبعاً كنت مشغولة مع اخواتك الى كانوا بيقارنوا وسائل الانتحار ببعض ويشوفوا هيموتوا ازاي وراه.

- كان يستاهل وأكثر والله.. بعد ما خلصت قراءه قعدت احكيه وأكله زى ما كنت بحكيه أيام المشروع.. اصريت يومها انى انام جمبه رغم انى عمرى ما نمت جمبه أبدا.. حسيت ساعتها اد ايه الدنيا هايقة ومتستاهلش.. 33 سنه موجود وانا كنت بهرب منه.. دلوقتي بصارع عقارب الساعة علشان متمشيش وافضل جمبه سواد الليل بس.. لأن خلاص.. هيطلع النهار وبعد صلاة الجمعة هنزله بأيدي للتراب.. شوفي قسوة الدنيا.. ايده كانت بتأكلنى وانا ايدى هتردمه بالتراب.. سبحان الله.

- اكيد هو في مكان أفضل.. ربنا يرحمه هو وكل الآباء يارب.

- آمين.. واستمرت الحياه بقى.. الدنيا عمرها ما وقفت عند حد.

- يااه يا احمد.. كل ده!! انت استحملت كثير اوى.

- فوق ما تتصوري.. لحظات الامل كانت جميله جدا.. ولحظات الإحباط كانت في منتهى القسوة.. عمرى ما كرهت البلد.. بس كرهت الناس الى مخليين الحياه صعبه.. كرهت الجهل والتخلف والفساد لكن عمرى ما تنازلت عن هويتي.

- اسمحلي اعارضك.. انت دلوقتي بتتنازل عن هوية ابنك.. انا فاكهه كويس لما حملت في حمزة.. بنتكلم هولدا فين.. لقيتك مجهز كل حاجه على انى هولدا في أمريكا.. انا نفسى - اتفاجئت.. لا انت كنت جايلى سيره ولا معرفنى.. كان واضح اوى انك كنت مخطط كل حاجه ومن فتره كمان.. الكلام ده كله مش وليد اللحظة ابدا.. احنا جينا هنا ولقيتك مضطرب كل حاجه.. حتى المستشفى والدكتوراه الى مفروض اتابع معاها.. مش معقول كل ده عرفته هنا.. احنا يا دوب وصلنا من هنا.. وتاني يوم علطول كان عندي كشف.

- الى حصل وانا مسافر هو الى خلاني كفرت بكل شيء.. أبني مش هيشوف الى انا شفته ابدا.. انا هربيه كويس وهطلعه ذكى وناجح.. لازم يتربى في مجتمع يساعده ويزقه لقدام مش مجتمع يخسف بيه وباحلامه الأرض.. فداه كل الى كسبته وفداه كل الى هكسبه.. فداه عمرى كله لو لزم الامر.. المهم انه مش هيعانى زى مانا عانيت.

- بس انت قلت قبل كده ان الشدائد تصنع الرجال.. وان المواقف دى هي الى شكلت شخصيتك

- صحيح.. ولكن شدائد عن شدائد تفرق.. انا عاوزه يتمرط في الشغل مش في الإحباط.. عاوز ضهره ينقصم من المذاكرة والتحصيل والاجتهاد مش من اللف على مكاتب الجهلاء والمرتشين.. مش عاوزك تقلقي خالص انا مرتب كل حاجه.. حتى لو مت دلوقتي.. انتى في أمان تام بأذن الله.. وعلى فكره.. موتى دلوقتي مصلحه ليكي انتى والولد لأنك هتصرفى بوليصة تأمين محترمه من الشركة.. بس بشرط متقتلينيش لأن القاتل لا يرث يا قطه.

- متقولش كده يا راجل بعد الشر.. عليك.. حسك في الدنيا.. اى نعم انت رخم وبتألش عليا.. لكن اهو.. ضل رخم ولا ضل الحكومة.. عمرى ما هقتلك طبعاً.. ليه.. هو القتلة الأجورين خلصوا.. ههههههه.

- اسفوخص على كده.. متقلقيش يا غسل.. انا مش ناوى اموت دلوقتي.. قاعد على قلبك.

- استنى يسطى قبل ما تاكلى في الكلام.. انت قلتلى انك اتحبست بسبب الموضوع ده..

- اه
- ازای بقي؟
- هقولك.. بس بكره بقي.. الصباح رباح.

السجن للجدعان

يوم جديد مشرق بالضوء من أيام أمريكا الطويلة جدا.. خلصت حكايتي مع المحروسة وفن صناعة الفشل.. مش فاضل غير اخر مشهد.. المشهد الى المخرج هيقول فيه كالأثلاث.. ممتاز يا جماعه.. كت.. بالإنجليزي يعنى اقطع.. الفعل بتاعها قطع.. كلمه عبقرية توصف الموقف ده بالظبط.. هي كلمة الفصل في علاقتي بمصر في الوقت ده وكلمة النهاية..

كت كانت هي بداية سفري للخارج مهاجر وهربان من كل شيء سيء عشته في البلد دى..

كت بيني وبينك يا مصر لحد ما تلفظي ناسك بره ولحد ما نيلك ينصف من فيرس الرشوة والفساد وسوء الخلق..

كت.. كنت فاكرها سهله.. لكنها كانت قاسية وصعبة اوى.. قلبت معايا بمرض نفسى اسمه الحنين الى الوطن.

ام حمزة مصره تقلب عليا مواجع الذكريات.. الولية دى مش بتنسي ابدأ.. صاحية على الصبح مصممه تعرف الفصل الأخير

من الحكاية.. قبل ما أكمل جرس الباب ضرب.. السؤال التقليدي الذى لا يحمل اى معنى.. هو انت مستني حد؟

وهو يعنى لازم أكون مستني حد لما الباب يخطب؟ مينفعش مثلا أكون مستني سبت.. الشه رخمه جدا منى قفلتها على

الصبح.. محدش يركز.

فتحت الباب.. رجل البريد جايبلى طرد.. تشكر يا ذوق.. الفترة دى انا كنت متعود استلم طرود كتير.. كنت شغال شحن من

البيت.. اهو تسالي بدل القعدة المملة.

- ايه ده.. طرد فيه البضاعة.. والتسليم امتى يا معلم احمد أبو الروس.

- بكره.. في بطن الزير يا معلمه كواكب.

- طيب.. سيبك بقي من الطرد وقولي.. عملت ايه بعد ما جتلك تأشيرة السفر؟

- قلتلك انا بقي انى قررت اسافر السعودية واشتغل مع أصحابي..

- اه.. وبعدين الشت عليا وانا مش مسامحاك.

- ماشى.. رجعت من أبو سمبل وانا واخذ قراري بقوه.. مصر.. خلاص انتهت بالنسبالي.. هسافر وابدأ حياتي بره في مكان تانى.. هشوف اوراسكوم لو بيعتوني دوله محترمه.. ان مكانش.. هروح اى دوله خليجي عيش فيها.. مصر.. خلاص.. شكرا لها اوى على كده.. عرضت الكلام ده على بابا.. حزن الدنيا كلها اتجمع في وشه وانا بقوله كده.. مش حزين على انى مسافر.. هو نفسه قضى نص حياته في الطيارات.. حزنه كله كان علشان انا كفرت بالبلد وفقدت الثقة فيها.. هو مكانش عنده مانع انى اسافر.. اسافر وارجع واسافر وارجع تانى.. هي دى سنة الحياة.. احباطه الحقيقي كان ان زهرة شباب الجيل - زى ما كان بيقول- بيطيروا على بره.. لما الشباب المتعلم المتحمس الى عنده أفكار ومستعد يعمل حاجه يسافر.. امال مين الى هيفضل علشان مستقبل البلد؟

- هو عمى كان سينمائي زيك كده؟

- مش فكرة سينمائي.. بابا هو أوضح مثال للشرفاء الى انضحك عليهم بالتجربة الناصرية.. خرج من تحت الأرض زى الدود.. اتولد سنة 43.. امه ماتت وهو عنده 6 سنين.. اسره فقيره فقر مدقع بتكمل عشاها نوم.. جدي الله يرحمه باع نحاس البيت علشان يدفعه مصاريف كلية الهندسة ووقفوا محتارين بعد كده لما بابا نجح في إعدادي هندسه بجيد جدا.. هيعملوا ايه في مصاريف سنه أولى؟ هيجيبوا فلوس منين؟ طيب اخواته الكبار ودخلوا الجيش.. هو مقبلش في الفنية العسكرية.. حرام المجموع العالي ده يروح اى كليه والسلام.. في نفس التوقيت ده عبد الناصر اصدر قرار بمجانية التعليم الجامعي.. بابا وصحابه جالهم فرح جنوني.. عبد الناصر انقذ مستقبلهم.. بدل ما كانوا هيحولوا معهد البريد وللا اى حاجه من الى مصاريفها معقوله.. ربنا أراد انه يكمل ويبقى مهندس في وقت الهندسة فيه كانت هي القمه.. الكلام ده كان أيام بناء السد العالي.. كان طالب الصبح وبيشتغل في ورشة خراطة بعد الظهر.. اتخرج سنة 66.. اشتغل سنه في السد العالي وبعدين اتاخذ على الجبهة.. 7 سنين في الجيش ظابط احتياط.. حضر حرب 67 و73 وخرج منهم بإصابة في رجله.. اخذ وسام السد العالي من عبد الناصر سنة 68 ونوط الشجاعة العسكري من الطبقة الثانية سنة 73 بعد ما اسر نقيب إسرائيلي بدلناه ب 30 أسير مصري.. اخذ ميدالية 6 أكتوبر سنة 74.. خدم في وزارة الكهرباء لحد ما بقي نائب الوزير وخرج من الخدمة بعد ما مدوله سن التقاعد 3 مرات.. ماجستير ودكتوراه في انشاء وصيانة شبكات الكهرباء منخفضة التكاليف.. اشترك في مشاريع عملاقة لتصدير الكهرباء من مصر.. للأردن وفلسطين والسودان وليبيا.. كان من ضمن الفريق الى اشتغل في مشروع الربط الكهربائي بين مصر.. والسعودية.. كان طفل أيام الانقلاب الأول سنة 52.. عاش التجربة الناصرية كامله في وقت مكانش في اى اعلام ولا مصادر معلومات غير الحكومة.. انكسر.. في 67 وقام على حيله تاني في 73.. اجتهد واشتغل وحقق كل نجاح ممكن الانسان يحققه بتوفيق ربنا ومجهوده لوحده.. مخدش من الدنيا اى شيء.. لما بدأت اموره تستقر نوعا ما.. فوجئنا ان عنده فيرس سي.. فضل المسكين يعاني من هباب الطين ده 25 سنه.. 25 سنه كامله عايش معانا في البيت ومحافظ علينا.. لا حد اتعدى ولا حد فينا حس بأى فرق.. علمنا كلنا احسن تعليم وجوز البنات ومات في هدوء على سريريه.. لا تعبنا في مرضه ولا ارهقنا ولا عمره كان حمل ثقيل على حد.. كان نعم الزوج والله.. ساعات كنت أقول لأمي بيني وبينها ورب العزة انا لو مراتي تعمل معايا كده.. ده انا اعلقها من كعوبها في الصالة زى الذبائح واجلدها بالكرباج 3 مرات في اليوم.. كان كل همه ان البلد احوالها تتحسن علشان الجيل الجديد.. في أواخر أيامه كان حزين ويقول ان الحكومة سرفت عمره ومجهوده هو والى زيه.. ربينا واحسنا تربية شباب زى الورد.. والحكومة طفشتهم بره.. يا خسارة شقايا.. الكلاب طفشولى أبني.

- بس المفروض يكون سعيد ان احوالك اتحسننت و انك بتحقق نجاح على المستوى الشخصي.

- مكانتش دى أفكاره.. كان فكره دايم ان الوطن اهم من الفرد.. الأسرة اهم من الفرد.. المجموع اهم من الفرد.. الفرد يضحي ويبجي على نفسه علشان المجموع.. قبل ما اسافر قعدت معاه.. قالي انه كان عارف ان الموقف هيرسى على كده.. لكنه محبش يحبطني ولا يقول اى حاجه تدبني طالقه سلبية.. وبرضه لعل وعسى.. الموضوع ينجح.. هو حب اني اخوض التجربة كامله علشان شخصيتي تتشكل.. رغم انه كان بيبيكى دم لما يشوفني فرحان او حزين.. هو كان عارف المستخبي بس مرضاش يقولي.

- الله يرحمه.. ده رجل غير عادى.

- اه والله.. ربنا يرحمه

- وبعدين.. سافرت ازاى بقي؟

- بعتولى التأشيرة وحجزت التذكرة.. مسافر في أسوأ ظروف ممكن يسافر فيها انسان من بلده.. ابويا راقد على فراش المرض.. حياة اختي الكبيرة مش مستقرة.. اختي الصغيرة هتتخطب.. البلد عموما فيها حالة غليان تقول ان الكرسي هيتقلب بصاحبه قريب جدا.

- انت نطيت من المركب في اخر ثانية على فكره.

- اه.. سافرنا من هنا والبلد ولعت من هنا.. ربنا كان رايد بيا خير لأنى لو كنت حضرت الاحداث دى كلها في مصر.. كان زماني اول الشهداء.. للأسف انا حضرت في الميدان 4 أيام بس.. بعدهم رجعت على الشغل.. انا واحد من اللى قاسوا وعانوا من خراب العقول وفساد الذمم والجهل والتسطيح والتكفير.. سافرت علشان ابدأ حياه جديده في السعودية بلد الخير والحج والعمرة.. كنت فاكر كده.. لكنى كالعاده كنت حمار.. تصدقي بالله.. علاقتي بالدين ضعفت في السعودية.. في مصر كنت متدين اكثر من كده.
- يا ستار يارب.
- اه والله.. الدين السعودي ده انا معروفش.. كلنا منعرفش عنه حاجه.. مشايخنا الاجلاء زى الشيخ الغزالي والشيخ الشعراوي والشيخ عطيه صقر رحمة الله عليهم جميعا ضحكوا علينا باين.. مقلولناش ان الإسلام المصري غير الإسلام السعودي.. ما علينا.. مش بحب افتكر اى حاجه عن البلد دى.. لهم دينهم ولى دين.
- ماشى.. ايه اللى حصل في مصر بقي غير الحكاية دى خلاك تقلب اوى كده؟
- يوم السفر.. وكأن البلد مكانتش عاوزه تسبيني الا وانا مقرر اشتغل ضدها جاسوس.
- متقوليش انهم ضايقوك في المطار.. ما كلنا بنسافر علطول اهو.
- اه.. انا كنت غلطان لا انكر.. ولكن اذا عرف السبب بطل العجب.
- طيب.. قول بقي.. السبب والتفاصيل وكله كله.
- رحت المطار علشان اسافر.. سلمت على أهلي كلهم واخذت شنطتى وطلعت على المطار.. خلصت إجراءات السفر وقعدت في غرفة التدخين.. بنفخ مع الدخان ذكريات الممرار اللى شفته في اخر سنتين.. نادوا على الطائرة فطلعت في هدوء.. كنت اخر واحد طلع الطائرة زى ما بحب اعمل دايمًا علشان اتفادى الناس اللى هوايتها انها تقف في وسط الطريق متعملش حاجه غير انها تعطل الخلق.. وانا طالع سلم الطائرة.. طالع بالراحة جدا.. زى ما أكون مش عاوز اطلع.. رجليا زى ما يكون فيها أكياس رمل.. وصلت لحد باب الطائرة.. كان واقف على باب الطائرة 3 افراد.. مضيفه ومضيف وفرد امن الطائرة.. ده بيبقي موظف تبع الامن القومي.. علشان لو حصل اى قلق في الطائرة يتصرف.. سمعت كلامهم مع بعض.. بتاع الامن ده كان بيكلمهم عن ابن اخته اللى هيتعين عندهم في مصر.. للطيران بعد ما جابوله واسطه من لواء كبير في الداخلية.. عازوهم يظبطوه بقي في سفريات حلوه وكده..
- عادى.. لحد كده مش شايفه اى سبب لأى حاجه.
- الحوار بتاعهم ده زى ما يكون برطمان ملح اندلق على جرجى المفتوح.. الواسطة.. الفساد والقرف والزبالة.. لواء بسلطته يعطى من لا يستحق مكان شخص آخر يستحق.. لسه عايشين كده.. الله يخرب بيوتكوا.. السرطان اللى سرح في جثة مصر وصل لكل مكان.. واسطه يعنى حد ميستاهلش هياخد حاجه مش من حقه.. الطبيعى ان مبيقاش في واسطه.. الطبيعى ان ابن البواب يبقي له نفس الفرصة المتاحة لابن المستشار.. الطبيعى ان يبقي في فرص متساوية لكل.. الطبيعى ان الاشكال اللى زى دى لازم تموت علشان البلد تنصف.. مجرد ذكر كلمات الواسطة واللواء دول هيج عليا كل الذكريات الوسخة ومحسيتش بنفسى والله وقتها وعملت اللى عملته.
- عملت ايه؟
- اتلفت لورا.. بقي وشى للمطار وضهري للطيارة.. صرخت بصوت عالي.. يا مصر.. سامعاني يا مصر.. اتفوووووووووو وعلى اللى يقعد فيكي ثانية واحده بعد كده... ورحت جاى تافف بعزم ما فيا.. 5 مرات.
- يا لهوى.. انت اتجننت.

- اه اتجننت.. ده اقل واجب.. حلم عمرى ضاع.. مستقبلي اتلعب بيه كوره.. ماشى من البلد الى اتولدت وكبرت فيها مجبر ومكره لا بطل.. سايب أهلي في ظروف قاسيه جدا ورايح لأسوأ خلق الله علشان ملقتش مكان ليا في بلدى احقق فيه أحلامي.. اتجننت علشان فكرت.. اتجننت علشان حلمت.. اتجننت علشان نويت خير لبلد المفروض ان نيتنا ناحيتها تبقي كل شر.. اتجننت علشان قلت يارب بدل ما أقول استعنا على الشغل بإبليس.. اتجننت علشان رافض ادفع رشوه رغم انى دفعتها ورجلي فوق رقبتى.. اتجننت علشان متمسك بحريتي وأدميتى.. اتجننت علشان بدل ما اضحك على بنات الناس قرئت 30 الف كتاب.. اتجننت علشان رببت عقلي بدل ما اطلق لساني.. اتجننت علشان صدقت.. اتجننت وجنوني اصبح من النوع الخطر.. انا الى يتقال عليه مجنون بينما الى بيسرقوا دول ابطال.. على رأى نجيب سرور:

تسرق شلن.. تبقي هيصه ودوشه وجريمة

تسرق الوف الألوف تبقي من الابطال

وكل ما السرقة تكبر القانون سيما

وكل ما السرقة تصغر.. في حرام وحلال

كنت بتكلم بعصبيه شديده اوى.. بلف وادور في الأوضة زى المجنون.. حسيت انى في محاكمه وحد بيغلطني.. حسيت بالظلم الى وقع عليا قبل كده.. ام حمزة ضغطت على الدمى اوى لحد ما انفجر في وشها.. هي مش غلطانه.. هي مسكينه لا تملك من الامر الا انها تقول يا سيدى.. ملناش دعوه.. دع الخلق للخالق.. المصيبة ان احنا سيبنا الخلق للخالق فعلا.. الخالق نفسه مش راضي عن كده ولا قالنا اعملوا كده.. والخلق دول بعد ما سيبناهم.. مسابوناش فحالنا.. زى ما قال عدوية:

وجينا نبعد..

قالولنا نقعد..

وجينا نقعد..

شدوا الكراسي.

مش كفاهيه سرقة فلوس البلد.. كمان اتسرفت احلامنا وطموحاتنا واجبرنا على المعيشة في حيز اضيق من خرم الإبرة.. ولو اتكلمت يبقى 3 ت. تهاجر.. تتسجن.. تتقتل.

- يا احمد انا معاك.. بس انت ربنا كرمك وهتمشى.. كان لزومه ايه بقي؟

- ومين قالك انى كنت عاوز أمشي؟ والى ربنا مكرمهمش لسه.. ذنبهم ايه؟ وبعدين هو ده بقي الحل.. أمشي؟ وامشى اروح فين.. هي دى مش بلدى برضة!!

- يا سيدى انت مش هتصلح الكون.

- ومين قال ان الكون فاسد؟ اديكى في أمريكا اهو وشايفة.. مصر بس هي الى فاسده.. وبعدين انا مش هصلح الكون.. ولا انتى.. ولا حمزة.. ولا بابا.. ولا حد من أصحابي.. ولا حد من زملاء الشغل.. امال مين الى هيعدل ابن "الو....." المعوج ده.. هنفضل عايشين في الزبالة دى لحد امتى؟.

- معنديش حاجه اقولها لك.. انت صح نظرياً.. بس التمن اعتقد انه كان غالى.

- اه.. شافني بتاع امن الطائرة دى.. جه يتخايق معايا.. سحبني من قفايا على نقطة الشرطة في المطار وعملي محضر.. هناك.. متخيله.. اخر 10 دقائق في مصر.. اترميت في نقطة الشرطة.. مفيش اوضة حبس ولا زنزانة.. محبوس في مكتب الظابط هناك.. اتسلى عليا أمناء الشرطة.. ضريوني كم مهول من الضرب.. كلت علق مكلهاش حرامي جزم في مسجد الحسين يوم الجمعة.. فضلوا يضربوني يومين كاملين.. تتغير الورديات وهما ولاد الكلب يسلموني لبعض.. كل يوم محضر.. شكل.. يبدو ان نقطة الشرطة دى مفيش عليها تفتيش.. لان اى مفتش داخله لو كان عدى عليهم وشافني مرعى كده بالمحاضر الكفتة دى كان وداهم في داهيه.. المفروض انهم يرحلونى للقسم التابع ليه بطاقتي.. ولكن انا مسافر السعودية بقي.. يعنى اكيد معايا فلوس.. طمعهم ووساختهم عموهم عن انهم يرحلونى لطنطا.. لو كانوا عملوا كده كنت اتحبست فعلا في قضيه عنب.. وخدى بالك من حاجه كمان.. انا كنت ختمت خروج خلاص.. يعنى قانونا انا بره البلد.. يعنى لو كانوا قتلوني حتى.. مكانش هيبقي عليهم اى حاجه.. لكن ربنا ستر.. من حظى جه ظابط استلم الوردية.. ده كان ظابط حدوده راخر.

- ليه؟

- شكله كان ابن ناس اوى ومصرف عليه.. في الأول طلبلى شاي وعزم عليا بسجائر.. وبعدين سمع منى الحدودة كلها.

- وانت حكيت طبعا وقلت بلاوى

- قتلته كل حاجه بكل التفاصيل.. قتلته حضرتك انت عارف ان امين الشرطة بتاعك ده ضربني على قفايا.. انت عارف ده معناه ايه.. متخيل المأساة؟ هو افتكر انى بهدهه بنظام انت عارف بتكلم مين والكلام الفاضي ده.. انا بدأت افهمه قصدى.. قتلته يا سيادة الرائد انا مهندس ابن مهندس.. خريج كلية قمة بتقدير عالي.. اسمى معروف في السوق وليا سمعتي وسمعة أسرتي.. يوم ما كان جدي الأكبر أمير كبير من امراء الممالك في البلد دى وله مسجد من المساجد الأثرية بأسمه الناس بتزوره لحد النهارده.. الجيل التالي من عائلتي كان يملك ابعديه في الدقهلية بلغت 4500 فدان بيشتغل فيها الاف العمال وحاربوا ضد الفرنسيين في مصر.. جدى لأمي كان من كبار رجال الأوقاف وامام وخطيب المسجد الأحمدى "السيد البدوي" في طنطا.. عمال البوفيه في الشركة الى كنت بشتغل فيها تعليمهم اعلى من البلطجي ده.. وحتى لو على المستوي الجسدي.. انا معايا فرقة صاعقة وبطل منطقة القاهرة في الملاكمة 3 سنين أيام الثانوية الحربية.. يعنى لو مسكت الهفأ الى انت مشغله بلطجي عندك ده في خلال 120 ثانية بالظبط يا اما هقتله يا اما هقعدة على كرسي بعجل طول عمره.. يقوم ده.. يضربني انا على قفايا بالألم!! ده ولا حتى في أفلام الكوميديا السوداء يحصل فيها كده.

- عارف انا لو مكان امين الشرطة وسمعت الكلام ده.. اضريك تانى.

- ماهو حاول فعلا.. لكن لقاني زقيت الكرسي واستعديت بقى للموت.. ساعتها فعلا كنت ناوى معاه على الشر.. الظابط كان اقل منى حجما ومش مدى خوانة خالص وواقف في الطريق بينى وبين الأمين.. خدت بالى من طبنجته.. كنت هاخذها واقتل الأمين فعلا والى يحصل يحصل.. لولا ان الظابط اتدخل وطلب منه يطلع بره المكتب.. الظابط كان متعاطف معايا جدا.. اكتشفت بقي انه قرفان من البوليس قرف الدنيا وبيجهز ورقه علشان يحول نيابة.. نظرتي كانت في محلها.. ده ابن ناس وملوش في الشغلانه القدرة دى.. الرجل شاف شكلي لا يبدو عليا انى حبسجي او بتاع مشاكل او مهرب مخدرات مثلا علشان اتعامل المعاملة القدرة دى.. راح جاى مقطوع كل المحاضر بتاعتي.. وحجزلى تذكره على حسابه للرياض وهو بيقول البلد دى مش مكتوبلها تنصف ابداء.. ماهو الغير أمناء الشرطة بتوع المطار كانوا اخدوا فلوسي كلها.. الرجل فضل يعتذر بتاع ساعه مثلا.. سافرت السعودية في معاد الطائرة بتاعتي ومع اول نزول لمصر.. دفعته تمن التذكرة كامله وفوقها ساعه شيروتي فاخرة جدا كهديه وعربون صداقة نظيفة.. رفضها في الأول لكنى اصريت.. قالي هقبلها من صديق أهاده فيوم من الأيام.. واستمرت علاقتي بيه لحد النهارده.. حتى بعد ما ساب الداخلية وراح النيابة.

- ورحت السعودية.

- قلتلى ايه؟
- مش الخالة نظيمه دى.. طلعت مرات لواء من اللواءات اللى اكتشفت انهم وسادات خاليه.
- شوف يا اخى.. وانا اللى افكرتها مرات عقيد.. ههههههه.

الخاتمة

انتهت الحدوتة على كده..

حسيت براحه نفسية كبيرة اوى رغم كل الذكريات الأليمة اللى بحاول دايمًا انى انسأها..

عارف إحساس انك تكون مزنوق جدا وبطنك هتتفرتك وتقعّد فترة طويلة مش لاقى حمام.. وفجأة وانت نفسك متوقف

وعلى وشك الموت مسموم ومخنوق تلاقى حمام نظيف معطر؟

اهو ده بالضبط كان احساسى..

شيلت مرأتى همومى.. هي معندهاش اى شيء تقدمه الا كلمه حلوه او دعوه كويسة.. مرأتى مش لواء يقدر يرفعني السماء

بكلمة او يخسف بيا الأرض لو غضب عليها.. هي ست مسكينة زيها زى كل الستات.. ولكنى اكتشفت ان المسكينة دى هي

سبب قوتى انا.. هو ده بالضبط اللى ربنا قال عليه سكن.. ادايه كنت عاصف غضبان لما بدأت بحكيلها.. وادايه دلوقتي انا

ساكن تماما ولا قبر مهجور مقفر.

اكتشفت صحة وجهة نظر ابويا لما وصاني عليها وطلب منى انى لا ازور وازرة وزر أخرى وان مش كل الستات زى بعض..

جنس النسوان النمروود ده منهن ملائكة متخفيات في صورة البشر.. ربنا كرمي واخذت أفضل ملاك فيهم حبسته في بيتي..

حكيت لها وانا غضبان ودموعي متحجرة.. وانتهى الأمر انى مرتاح وهادى..

حكيت وبعد ما حكيت وشتمت وسبيت ولعنت.. ضحكنا..

لأول مرة من ساعة ما بدأت الحكاية الغم دى نضحك كده..

بعد ما خلصت كلام هي قامت تمشى رجليلها شويه وتخبط اى حاجه من الثلاجة.. مسكينه.. بقالها بتاع نص ساعه مكنتش

حاجه.. ودى نفساء.. وزى ما اتفق ابائنا الأوائل.. العيل ينزل من هنا لازم نحط مكانه حوت يونس من هنا.

انا قمت افتح الطرد اللى جالي الصبح.. نظره واحده لمحتواه ادتنى إحساس بالطمأنينة على مستقبل أبني.. نظره منى الى

أمه وانا بحضر طبق الفول الأمريكاني.. هي فهمت الموضوع كله وفهمت محتوى الطرد في ايه.. أساسا انا رازع المشوار ده كله

علشان اللحظة دى بالذات.

خدت محتوى الطرد وحاجه كده كنت شايلها عندي علشان اللحظة دى فرشتها على سرير حمزه وحطيت حمزه فوقهم

وقعدت العب معاه.. وهو مش فاهم اى بطيخ.

وغنيت لحمزة وطلبت منه يقول ورايا.. قول يا موزه:

ويكون شعارنا بعدئذ بالله نثق

والراية الموشحة بالنجوم سترفر بنصر

على أرض الأحرار وموطن الشجعان
وضحكت مع ام حمزة على حركات حمزة أبو 7 ايام..
ضحكت كما لم اضحك من قبل..
ضحكت بنفس صافيه وقلب راضي وهادي..
ضحكت يمكن علشان رميت حمل من على قلبي لما شيلتها نص همومي..
ضحكت لما شفت محتوى الطرد..
ضحكت أكثر لما شفت جواز سفر أزرق على غلافه نسر كبير اوى..
وضحكت تانى على صورة حمزه في جواز السفر وعلى صورته مع العلم..
العلم الى هيحميه..
العلم الامريكاني.

(تمت)

أحمد حسني

الرياض - 2018